

॥ नमो तस्स भगवतो अरहतो सम्मासम्बुद्धस्स ॥

## अभिधम्ममातिकापाळि

एकं समयं भगवा देवेसु विहरति तावतिसंभवने पारिच्छत्तकमूले पण्डुकम्बलसिलायं । तत्र खो भगवा देवानं तावतिसानं अभिधम्मकथं कथेसि ।

### १. धम्मसङ्गणीमातिका

#### तिकमातिका

कुसला धम्मा (ध० स० तिकमातिका १-२२), अकुसला धम्मा, अब्याकता धम्मा । सुखाय वेदनाय सम्पयुत्ता धम्मा, दुक्खाय वेदनाय सम्पयुत्ता धम्मा, अदुक्खमसुखाय वेदनाय सम्पयुत्ता धम्मा । विपाका धम्मा, विपाकधम्मधम्मा, नेवविपाकनविपाकधम्मधम्मा । उपादिण्णुपादानिया धम्मा, अनुपादिण्णुपादानिया धम्मा, अनुपादिण्णानुपादानिया धम्मा । संकिलिद्वुसंकिलेसिका धम्मा, असंकिलिद्वुसंकिलेसिका धम्मा, असंकिलिद्वुअसंकिलेसिका धम्मा । सवितक्कसविचारा धम्मा, अवितक्कविचारमत्ता धम्मा, अवितक्कअविचारा धम्मा । पीतिसहगता धम्मा, सुखसहगता धम्मा, उपेक्खासहगता धम्मा । दस्सनेन पहातब्बा धम्मा, भावनाय पहातब्बा धम्मा, नेव दस्सनेन न भावनाय पहातब्बा धम्मा । दस्सनेन पहातब्बहेतुका धम्मा, भावनाय पहातब्बहेतुका धम्मा, नेव दस्सनेन न भावनाय पहातब्बहेतुका धम्मा । आचयगामिनो धम्मा, अपचयगामिनो धम्मा, नेवाचयगामिनापचयगामिनो धम्मा । सेक्खा धम्मा, असेक्खा धम्मा, नेवसेक्खनासेक्खा धम्मा । परिता धम्मा, महग्गता धम्मा, अप्पमाणा धम्मा । परित्तारम्मणा धम्मा, महग्गतारम्मणा धम्मा, अप्पमाणारम्मणा धम्मा । हीना धम्मा, मज्झिमा धम्मा, पणीता धम्मा । मिच्छत्तनियता धम्मा, सम्मत्तनियता धम्मा, अनियता धम्मा । मग्गारम्मणा धम्मा, मग्गहेतुका धम्मा, मग्गाधिपतिनो धम्मा । उप्पन्ना धम्मा, अनुप्पन्ना धम्मा, उप्पादिनो धम्मा । अतीता धम्मा, अनागता धम्मा, पच्चुप्पन्ना धम्मा । अतीतारम्मणा धम्मा, अनागतारम्मणा धम्मा, पच्चुप्पन्नारम्मणा धम्मा । अज्झता धम्मा, बहिद्धा धम्मा, अज्झत्तबहिद्धा धम्मा । अज्झत्तारम्मणा धम्मा, बहिद्धारम्मणा धम्मा, अज्झत्तबहिद्धारम्मणा धम्मा । सनिदस्सनसप्पटिघा धम्मा, अनिदस्सनसप्पटिघा धम्मा, अनिदस्सनअप्पटिघा धम्मा (ध० स० तिकमातिका १-२२) ।

द्वावीसतितिकं ।

#### दुक्कमातिका

#### हेतुगोच्छकं

हेतू धम्मा, न हेतू धम्मा । सहेतुका धम्मा, अहेतुका धम्मा । हेतुसम्पयुत्ता धम्मा, हेतुविप्पयुत्ता धम्मा । हेतू चेव धम्मा सहेतुका च, सहेतुका चेव धम्मा न च हेतू । हेतू चेव धम्मा हेतुसम्पयुत्ता च, हेतुसम्पयुत्ता चेव धम्मा न च हेतू । न हेतू खो पन धम्मा सहेतुकापि, अहेतुकापि । हेतुगोच्छकं ।

#### चूळन्तरदुकं

सप्पच्चया धम्मा, अप्पच्चया धम्मा । सङ्गता धम्मा, असङ्गता धम्मा । सनिदस्सना धम्मा, अनिदस्सना धम्मा । सप्पटिघा धम्मा, अप्पटिघा धम्मा । रूपिनो धम्मा, अरूपिनो धम्मा । लोकिया धम्मा, लोकुत्तरा धम्मा । केनचि विज्जेय्या धम्मा, केनचि न विज्जेय्या धम्मा । चूळन्तरदुकं ।

#### आसवगोच्छकं

आसवा धम्मा, नो आसवा धम्मा । सासवा धम्मा, अनासवा धम्मा । आसवसम्पयुत्ता धम्मा, आसवविप्पयुत्ता धम्मा । आसवा चेव धम्मा सासवा च, सासवा चेव धम्मा नो च आसवा । आसवा चेव धम्मा आसवसम्पयुत्ता च, आसवसम्पयुत्ता चेव धम्मा नो च आसवा । आसवविप्पयुत्ता खो पन धम्मा सासवापि, अनासवापि । आसवगोच्छकं ।

#### सज्जोजनगोच्छकं

सज्जोजना धम्मा, नो सज्जोजना धम्मा । सज्जोजनिया धम्मा, असज्जोजनिया धम्मा । सज्जोजनसम्पयुत्ता धम्मा, सज्जोजनविप्पयुत्ता धम्मा । सज्जोजना चेव धम्मा सज्जोजनिया च, सज्जोजनिया चेव धम्मा नो च सज्जोजना । सज्जोजना चेव धम्मा सज्जोजनसम्पयुत्ता च, सज्जोजनसम्पयुत्ता चेव धम्मा नो च सज्जोजना । सज्जोजनविप्पयुत्ता खो पन धम्मा सज्जोजनियापि, असज्जोजनियापि । सज्जोजनगोच्छकं ।

### गन्धगोच्छकं

गन्धा धम्मा, नो गन्धा धम्मा । गन्धनिया धम्मा, अगन्धनिया धम्मा । गन्धसम्पयुत्ता धम्मा, गन्धविष्युत्ता धम्मा । गन्धा चेव धम्मा गन्धनिया च, गन्धनिया चेव धम्मा नो च गन्धा । गन्धा चेव धम्मा गन्धसम्पयुत्ता च, गन्धसम्पयुत्ता चेव धम्मा नो च गन्धा । गन्धविष्युत्ता खो पन धम्मा गन्धनियापि, अगन्धनियापि । गन्धगोच्छकं ।

### ओघगोच्छकं

ओघा धम्मा, नो ओघा धम्मा । ओघनिया धम्मा, अओघनिया धम्मा । ओघसम्पयुत्ता धम्मा, ओघविष्युत्ता धम्मा । ओघा चेव धम्मा ओघनिया च, ओघनिया चेव धम्मा नो च ओघा । ओघा चेव धम्मा ओघसम्पयुत्ता च, ओघसम्पयुत्ता चेव धम्मा नो च ओघा । ओघविष्युत्ता खो पन धम्मा ओघनियापि, अओघनियापि । ओघगोच्छकं ।

### योगगोच्छकं

योगा धम्मा, नो योगा धम्मा । योगनिया धम्मा, अयोगनिया धम्मा । योगसम्पयुत्ता धम्मा, योगविष्युत्ता धम्मा । योगा चेव धम्मा योगनिया च, योगनिया चेव धम्मा नो च योगा । योगा चेव धम्मा योगसम्पयुत्ता च, योगसम्पयुत्ता चेव धम्मा नो च योगा । योगविष्युत्ता खो पन धम्मा योगनियापि, अयोगनियापि । योगगोच्छकं ।

### नीवरणगोच्छकं

नीवरणा धम्मा, नो नीवरणा धम्मा । नीवरणिया धम्मा, अनीवरणिया धम्मा । नीवरणसम्पयुत्ता धम्मा, नीवरणविष्युत्ता धम्मा । नीवरणा चेव धम्मा नीवरणिया च, नीवरणिया चेव धम्मा नो च नीवरणा । नीवरणा चेव धम्मा नीवरणसम्पयुत्ता च, नीवरणसम्पयुत्ता चेव धम्मा नो च नीवरणा । नीवरणविष्युत्ता खो पन धम्मा नीवरणियापि, अनीवरणियापि । नीवरणगोच्छकं ।

### परामासगोच्छकं

परामासा धम्मा, नो परामासा धम्मा । परामट्ठा धम्मा, अपरामट्ठा धम्मा । परामाससम्पयुत्ता धम्मा, परामासविष्युत्ता धम्मा । परामासा चेव धम्मा परामट्ठा च, परामट्ठाचेव धम्मा नो च परामासा । परामासविष्युत्ता खो पन धम्मा परामट्ठापि, अपरामट्ठापि । परामासगोच्छकं ।

### महन्तरदुकं

सारम्मणा धम्मा, अनारम्मणा धम्मा । चित्ता धम्मा, नो चित्ता धम्मा । चेतसिका धम्मा, अचेतसिका धम्मा । चित्तसम्पयुत्ता धम्मा, चित्तविष्युत्ता धम्मा । चित्तसंसट्ठा धम्मा, चित्तविसंसट्ठा धम्मा । चित्तसमुद्धाना धम्मा, नो चित्तसमुद्धाना धम्मा । चित्तसहभुनो धम्मा, नो चित्तसहभुनो धम्मा । चित्तानुपरिवत्तिनो धम्मा, नो चित्तानुपरिवत्तिनो धम्मा । चित्तसंसट्ठसमुद्धाना धम्मा, नो चित्तसंसट्ठसमुद्धाना धम्मा । चित्तसंसट्ठसमुद्धानसहभुनो धम्मा, नो चित्तसंसट्ठसमुद्धानसहभुनो धम्मा । चित्तसंसट्ठसमुद्धानानुपरिवत्तिनो धम्मा, नो चित्तसंसट्ठसमुद्धानानुपरिवत्तिनो धम्मा । अज्झत्तिका धम्मा, बाहिरा धम्मा । उपादा धम्मा, नो उपादा धम्मा । उपादिण्णा धम्मा, अनुपादिण्णा धम्मा । महन्तरदुकं ।

### उपादानगोच्छकं

उपादाना धम्मा, नो उपादाना धम्मा । उपादानिया धम्मा, अनुपादानिया धम्मा । उपादानसम्पयुत्ता धम्मा, उपादानविष्युत्ता धम्मा । उपादाना चेव धम्मा उपादानिया च, उपादानिया चेव धम्मा नो च उपादाना । उपादाना चेव धम्मा उपादानसम्पयुत्ता च, उपादानसम्पयुत्ता चेव धम्मा नो च उपादाना । उपादानविष्युत्ता खो पन धम्मा उपादानियापि, अनुपादानियापि । उपादानगोच्छकं ।

### किलेसगोच्छकं

किलेसा धम्मा, नो किलेसा धम्मा । संकिलेसिका धम्मा, असंकिलेसिका धम्मा । संकिलिद्धा धम्मा, असंकिलिद्धा धम्मा । किलेससम्पयुत्ता धम्मा, किलेसविष्युत्ता धम्मा । किलेसा चेव धम्मा संकिलेसिका च, संकिलेसिका चेव धम्मा नो च किलेसा । किलेसा चेव धम्मा संकिलिद्धा च, संकिलिद्धा चेव धम्मा नो च किलेसा । किलेसा चेव धम्मा किलेससम्पयुत्ता च, किलेससम्पयुत्ता चेव धम्मा नो च किलेसा । किलेसविष्युत्ता खो पन धम्मा संकिलेसिकापि, असंकिलेसिकापि । किलेसगोच्छकं ।

## पिड्डिदुकं

दस्सनेन पहातब्बा धम्मा, न दस्सनेन पहातब्बा धम्मा । भावनाय पहातब्बा धम्मा, न भावनाय पहातब्बा धम्मा । दस्सनेन पहातब्बहेतुका धम्मा, न दस्सनेन पहातब्बहेतुका धम्मा । भावनाय पहातब्बहेतुका धम्मा, न भावनाय पहातब्बहेतुका धम्मा । सवितक्का धम्मा, अवितक्का धम्मा । सविचारा धम्मा, अविचारा धम्मा । सप्पीतिका धम्मा, अप्पीतिका धम्मा । पीतिसहगता धम्मा, न पीतिसहगता धम्मा । सुखसहगता धम्मा, न सुखसहगता धम्मा । उपेक्खासहगता धम्मा, न उपेक्खासहगता धम्मा । कामावचरा धम्मा, न कामावचरा धम्मा । रूपावचरा धम्मा, न रूपावचरा धम्मा । अरूपावचरा धम्मा, न अरूपावचरा धम्मा । परियापन्ना धम्मा, अपरियापन्ना धम्मा । निर्यायानिका धम्मा, अनिर्यायानिका धम्मा । नियता धम्मा, अनियता धम्मा । सउत्तरा धम्मा, अनुत्तरा धम्मा । सरणा धम्मा, अरणा धम्मा । पिड्डिदुकं ।

अभिधम्मदुकमातिका ।

## सुत्तन्तिकदुकमातिका

विज्जाभागिनो धम्मा, अविज्जाभागिनो धम्मा । विज्जूपमा धम्मा, वजिरूपमा धम्मा । बाला धम्मा, पण्डिता धम्मा । कण्हा धम्मा, सुक्का धम्मा । तपनीया धम्मा, अतपनीया धम्मा । अधिवचना धम्मा, अधिवचनपथा धम्मा । निरुत्ति धम्मा, निरुत्तिपथा धम्मा । पज्जत्ति धम्मा, पज्जत्तिपथा धम्मा । नामज्ज, रूपज्ज । अविज्जा च, भवतण्हा च । भवदिट्ठि च, विभवदिट्ठि च । सस्सतदिट्ठि च, उच्छेददिट्ठि च । अन्तवा दिट्ठि च, अनन्तवा दिट्ठि च । पुब्बन्तानुदिट्ठि च, अपरन्तानुदिट्ठि च । अहिरिकज्ज, अनोत्तप्पज्ज । हिरी च, ओत्तप्पज्ज । दोवचस्सता च, पापमित्तता च । सोवचस्सता च, कल्याणमित्तता च । आपत्तिकुसलता च, आपत्तिवुट्ठानकुसलता च । समापत्तिकुसलता च, समापत्तिवुट्ठानकुसलता च । धातुकुसलता च, मनसिकारकुसलता च । आयतनकुसलता च, पटिच्चसमुप्पादकुसलता च । ठानकुसलता च, अट्ठानकुसलता च । अज्जवो च, मद्दवो च । खन्ति च, सोरच्चज्ज । साखल्यज्ज, पटिसन्धारो च । इन्द्रियेसु अगुत्तद्वारता च, भोजने अमत्तज्जुता च । इन्द्रियेसु गुत्तद्वारता च, भोजने मत्तज्जुता च । मुट्ठस्सच्चज्ज, असम्पज्जज्ज । सति च, सम्पज्जज्ज । पटिसङ्ख्यानबलज्ज, भावनाबलज्ज । समथो च, विपस्सना च । समथनिमित्तज्ज, पग्गाहनिमित्तज्ज । पग्गाहो च, अविकखेपो च । सीलविपत्ति च, दिट्ठिविपत्ति च । सीलसम्पदा च, दिट्ठिसम्पदा च । सीलविसुद्धि च, दिट्ठिविसुद्धि च । दिट्ठिविसुद्धि खो पन, यथादिट्ठिस्स च पधानं । संवेगो च संवेज्जियेसु ठानेसु, संविग्गस्स च योनिसो पधानं । असन्तुट्ठिता च कुसलेसु धम्मेसु, अप्पटिवानिता च पधानस्मिं । विज्जा च, विमुत्ति च । खये जाणं, अनुप्पादे जाणन्ति ।

सुत्तन्तिकदुकमातिका ।

धम्मसङ्गणीमातिका निट्ठिता ।

## २. विभङ्गमातिका

### खन्धविभङ्गो

**पञ्चकखन्धा** — (विभ० १) रूपकखन्धो वेदनाकखन्धो सज्जाकखन्धो सङ्खारकखन्धो विज्जाणकखन्धोति । खन्धविभङ्गं ।

### आयतनविभङ्गो

**द्वादसायतनानि** (विभ० १५४) — चक्खुआयतनं रूपायतनं सोतायतनं सद्दायतनं धानायतनं गन्धायतनं जिह्वायतनं रसायतनं कायायतनं फोड्ढायायतनं मनायतनं धम्मायतनन्ति । आयतनविभङ्गं ।

### धातुविभङ्गो

**अट्ठारस धातुयो** (विभ० १८३) — चक्खुधातु रूपधातु चक्खुविज्जाणधातु, सोतधातु सद्दधातु सोतविज्जाणधातु, धानधातु गन्धधातु धानविज्जाणधातु, जिह्वाधातु रसधातु जिह्वाविज्जाणधातु, कायधातु फोड्ढायायतनधातु, मनोधातु धम्मधातु मनोविज्जाणधातूति । धातुविभङ्गं ।

### सच्चविभङ्गो

**चत्तारि अरियसच्चानि** (विभ० १८९) — दुक्खं अरियसच्चं, दुक्खसमुदयं अरियसच्चं, दुक्खनिरोधं अरियसच्चं, दुक्खनिरोधगमिनी पटिपदा अरियसच्चन्ति । सच्चविभङ्गं ।

### इन्द्रियविभङ्गो

**बावीसतिन्द्रियानि** (विभ० २१९) — चक्षुन्द्रियं श्रोत्रिन्द्रियं घानिन्द्रियं जिह्विन्द्रियं कायिन्द्रियं मनिन्द्रियं इत्थिन्द्रियं पुरिसिन्द्रियं जीवितिन्द्रियं सुखिन्द्रियं दुःखिन्द्रियं सोमनस्सिन्द्रियं दोमनस्सिन्द्रियं उपेक्खिन्द्रियं सद्दिन्द्रियं वीरियिन्द्रियं सतिन्द्रियं समाधिन्द्रियं पज्जिन्द्रियं अनज्जातज्जस्सामीतिन्द्रियं अज्जिन्द्रियं अज्जाताविन्द्रियन्ति । इन्द्रियविभङ्गं ।

### पटिच्चसमुप्पादविभङ्गो

अविज्जापच्चया सङ्खारा (विभ० २२५), सङ्खारपच्चया विज्जाणं, विज्जाणपच्चया नामरूपं, नामरूपपच्चया सळायतनं, सळायतनपच्चया फस्सो, फस्सपच्चया वेदना, वेदनापच्चया तण्हा, तण्हापच्चया उपादानं, उपादानपच्चया भवो, भवपच्चया जाति, जातिपच्चया जरामरणं सोकपरिदेवदुःखदोमनस्सुपायासा सम्भवन्ति, एवमेतस्स केवलस्स दुःखखन्धस्स समुदयो होति । पटिच्चसमुप्पादविभङ्गं ।

### सतिपट्टानविभङ्गो

**चत्तारो सतिपट्टाना** (विभ० ३५५) — इध भिक्खु अज्झत्तं काये कायानुपस्सी विहरति, बहिद्वा काये कायानुपस्सी विहरति, अज्झत्तबहिद्वा काये कायानुपस्सी विहरति आतापी सम्पजानो सतिमा विनेय्य लोके अभिज्झादोमनस्सं ।

अज्झत्तं वेदनासु वेदनानुपस्सी विहरति, बहिद्वा वेदनासु वेदनानुपस्सी विहरति, अज्झत्तबहिद्वा वेदनासु वेदनानुपस्सी विहरति आतापी सम्पजानो सतिमा विनेय्य लोके अभिज्झादोमनस्सं ।

अज्झत्तं चित्ते चित्तानुपस्सी विहरति, बहिद्वा चित्ते चित्तानुपस्सी विहरति, अज्झत्तबहिद्वा चित्ते चित्तानुपस्सी विहरति आतापी सम्पजानो सतिमा विनेय्य लोके अभिज्झादोमनस्सं ।

अज्झत्तं धम्मेषु धम्मानुपस्सी विहरति, बहिद्वा धम्मेषु धम्मानुपस्सी विहरति, अज्झत्तबहिद्वा धम्मेषु धम्मानुपस्सी विहरति आतापी सम्पजानो सतिमा विनेय्य लोके अभिज्झादोमनस्सं । सतिपट्टानविभङ्गं ।

### सम्मप्यधानविभङ्गो

**चत्तारो सम्मप्यधाना** (विभ० ३९०) — इध भिक्खु अनुपन्नानं पापकानं अकुसलानं धम्मानं अनुप्पादाय छन्दं जनेति वायमति वीरियं आरभति चित्तं पग्गण्हाति पदहति ।

उपन्नानं पापकानं अकुसलानं धम्मानं पणानाय छन्दं जनेति वायमति वीरियं आरभति चित्तं पग्गण्हाति पदहति ।

अनुपन्नानं कुसलानं धम्मानं उप्पादाय छन्दं जनेति वायमति वीरियं आरभति चित्तं पग्गण्हाति पदहति ।

उपन्नानं कुसलानं धम्मानं ठितिया असम्मोसाय भिय्योभावाय वेपुल्लाय भावनाय पारिपूरिया छन्दं जनेति वायमति वीरियं आरभति चित्तं पग्गण्हाति पदहति । सम्मप्यधानविभङ्गं ।

### इद्धिपादविभङ्गो

**चत्तारो इद्धिपादा** (विभ० ४३०) — इध भिक्खु छन्दसमाधिपधानसङ्खारसमन्नागतं इद्धिपादं भावेति, वीरियसमाधिपधानसङ्खारसमन्नागतं इद्धिपादं भावेति, चित्तसमाधिपधानसङ्खारसमन्नागतं इद्धिपादं भावेति, वीमंसासमाधिपधानसङ्खारसमन्नागतं इद्धिपादं भावेति । इद्धिपादविभङ्गं ।

### बोज्झङ्गविभङ्गो

**सत्त बोज्झङ्गा** (विभ० ४६६) — सतिसम्बोज्झङ्गो धम्मविचयसम्बोज्झङ्गो वीरियसम्बोज्झङ्गो पीतिसम्बोज्झङ्गो पस्सद्विसम्बोज्झङ्गो समाधिसम्बोज्झङ्गो उपेक्खासम्बोज्झङ्गो । बोज्झङ्गविभङ्गं ।

### मग्गङ्गविभङ्गो

**अरियो अट्टङ्गिको मग्गो** (विभ० ४८६) । सेय्यथिदं — सम्मादिट्ठि सम्मासङ्कणो सम्मावाचा सम्माकम्मन्तो सम्माआजीवो सम्मावायामो सम्मासति सम्मासमाधि । मग्गाङ्गविभङ्गं ।

### ज्ञानविभङ्गो

इध भिक्खु पातिमोक्खसंवरसंवुतो विहरति (विभ० ५०८) आचारगोचरसम्पन्नो अणुमत्तेसु वज्जेसु भयदस्सावी समादाय सिक्खति सिक्खापदेसु इन्द्रियेसु गुत्तद्वारो भोजने मत्तञ्जू पुब्बरत्तापररत्तं जागरियानुयोगमन्युत्तो सातच्चं नेपक्कं बोधिपक्खिकानं धम्मानं भावनानुयोगमन्युत्तो ।

सो अभिक्कन्ते पटिक्कन्ते सम्पजानकारी होति, आलोकिते विलोकिते सम्पजानकारी होति, समिज्जिते पसारिते सम्पजानकारी होति, सङ्घाटिपत्तचीवरधारणे सम्पजानकारी होति, असिते पीते खायिते सायिते सम्पजानकारी होति, उच्चारपस्सावकम्मे सम्पजानकारी होति, गते ठिते निसिन्ने सुत्ते जागरिते भासिते तुण्हीभावे सम्पजानकारी होति ।

सो विवित्तं सेनासनं भजति अरञ्जं रुक्खमूलं पब्बतं कन्दरं गिरिगुहं सुसानं वनपत्थं अब्भोकासं पलालपुज्जं अप्पसदं अप्पनिग्घोसं विजनवातं मनुस्सराहस्सेय्यकं पटिसल्लानसारुणं ।

सो अरञ्जगतो वा रुक्खमूलगतो वा सुज्जागारगतो वा निसीदति पल्लङ्कं आभुजित्वा उजुं कायं पणिधाय परिमुखं सति उपट्टपेत्वा, सो अभिज्झं लोके पहाय विगताभिज्झेन चेतसा विहरति, अभिज्झाय चित्तं परिसोधेति, ब्यापादपदोसं पहाय अब्यापन्नचित्तो विहरति सब्बपाणभूतहितानुकम्पी, ब्यापादपदोसा चित्तं परिसोधेति, थिनमिद्धं पहाय विगतथिनमिद्धो विहरति आलोकसञ्जी सतो सम्पजानो, थिनमिद्धा चित्तं परिसोधेति, उद्धच्चकुक्कुच्चं पहाय अनुद्धतो विहरति अज्झत्तं वूपसन्तचित्तो, उद्धच्चकुक्कुच्चा चित्तं परिसोधेति, विचिकिच्छं पहाय तिण्णविचिकिच्छो विहरति अकथंकथी कुसलेसु धम्मेषु, विचिकिच्छाय चित्तं परिसोधेति ।

सो इमे पञ्च नीवरणे पहाय चेतसो उपक्किलेसे पञ्जाय दुब्बलीकरणे विविच्चेव कामेहि विविच्च अकुसलेहि धम्मेहि सवितक्कं सविचारं विवेकजं पीतिसुखं पठमं ज्ञानं उपसम्पज्ज विहरति, वितक्कविचारानं वूपसमा अज्झत्तं सम्पसादनं चेतसो एकोदिभावं अवितक्कं अविचारं समाधिजं पीतिसुखं दुतियं ज्ञानं उपसम्पज्ज विहरति, पीतिया च विरागा उपेक्खको च विहरति सतो च सम्पजानो सुखञ्च कायेन पटिसंवेदेति, यं तं अरिया आचिक्खन्ति “उपेक्खको सतिमा सुखविहारी”ति, ततियं ज्ञानं उपसम्पज्ज विहरति, सुखस्स च पहाना दुक्खस्स च पहाना पुब्बेव सोमनस्सदोमनस्सानं अत्थङ्गमा अदुक्खमसुखं उपेक्खासतिपारिसुद्धिं चतुत्थं ज्ञानं उपसम्पज्ज विहरति ।

सब्बसो रूपसज्जानं समतिक्कमा पटिघसज्जानं अत्थङ्गमा नानत्तसज्जानं अमनसिकारा “अनन्तो आकासो”ति आकासानज्जायतनं उपसम्पज्ज विहरति, सब्बसो आकासानज्जायतनं समतिक्कम्म “अनन्तं विज्जाण”न्ति विज्जाणज्जायतनं उपसम्पज्ज विहरति, सब्बसो विज्जाणज्जायतनं समतिक्कम्म “नत्थि किञ्ची”ति आकिञ्चज्जायतनं उपसम्पज्ज विहरति, सब्बसो आकिञ्चज्जायतनं समतिक्कम्म नेवसज्जानासज्जायतनं उपसम्पज्ज विहरति । ज्ञानविभङ्गं ।

### अप्पमज्जाविभङ्गो

**चतस्सो अप्पमज्जायो** (विभ० ६४२) — इध भिक्खु मेत्तासहगतेन चेतसा एकं दिसं फरित्वा विहरति, तथा दुतियं, तथा ततियं, तथा चतुत्थं । इति उद्धमधो तिरियं सब्बधि सब्बत्ताय सब्बावन्तं लोकं मेत्तासहगतेन चेतसा विपुलेन महग्गतेन अप्पमाणेन अवेरेन अब्यापज्जेन फरित्वा विहरति ।

करुणासहगतेन चेतसा एकं दिसं फरित्वा विहरति, तथा दुतियं, तथा ततियं, तथा चतुत्थं । इति उद्धमधो तिरियं सब्बधिसब्बत्ताय सब्बावन्तं लोकं करुणासहगतेन चेतसा विपुलेन महग्गतेन अप्पमाणेन अवेरेन अब्यापज्जेन फरित्वा विहरति ।

मुदितासहगतेन चेतसा एकं दिसं फरित्वा विहरति, तथा दुतियं, तथा ततियं, तथा चतुत्थं । इति उद्धमधो तिरियं सब्बधि सब्बत्ताय सब्बावन्तं लोकं मुदितासहगतेन चेतसा विपुलेन महग्गतेन अप्पमाणेन अवेरेन अब्यापज्जेन फरित्वा विहरति ।

उपेक्खासहगतेन चेतसा एकं दिसं फरित्वा विहरति, तथा दुतियं, तथा ततियं, तथा चतुत्थं । इति उद्धमधो तिरियं सब्बधि सब्बत्ताय सब्बावन्तं लोकं उपेक्खासहगतेन चेतसा विपुलेन महग्गतेन अप्पमाणेन अवेरेन अब्यापज्जेन फरित्वा विहरति । अप्पमज्जाविभङ्गं ।

### सिक्खापदविभङ्गो

**पञ्च सिक्खापदानि** (विभ० ७०३) — पाणातिपाता वेरमणी सिक्खापदं, अदिन्नादाना वेरमणी सिक्खापदं, कामेसुमिच्छाचारा वेरमणी सिक्खापदं,

मुसावादा वेरमणी सिक्खापदं, सुरामेरयमज्जपमादट्ठाना वेरमणी सिक्खापदं । सिक्खापदविभङ्गं ।

### पटिसम्भिदाविभङ्गो

चतस्सो पटिसम्भिदा (विभ० ७१८) — अत्थपटिसम्भिदा धम्मपटिसम्भिदा निरुत्तिपटिसम्भिदा पटिभानपटिसम्भिदा । पटिसम्भिदाविभङ्गं ।

### जाणविभङ्गो

**एकविधेन जाणवत्थु** (विभ० ७५१) — पच्च विज्जाणा न हेतु, अहेतुका, हेतुविषययुत्ता, सप्पच्चया, सङ्कृता, अरूपा, लोकिया, सासवा, संयोजनिया, गन्थनिया, ओघनिया, योगनिया, नीवरणिया, परामट्ठा, उपादानिया, संकिलेसिका, अब्बाकता, सारम्मणा, अचेतसिका, विपाका, उपादिण्णुपादानिया, असंकिलिडुसंकिलेसिका, न सवितक्कसविचारा, न अवितक्कविचारमत्ता, अवितक्कविचारा, न पीतिसहगता, नेव दस्सनेन न भावनाय पहातब्बा, नेव दस्सनेन न भावनाय पहातब्बहेतुका, नेवाचयगामिनापचयगामिनो, नेवसेक्खनासेक्खा, परित्ता, कामावचरा, न रूपावचरा, न अरूपावचरा, परियापन्ना, नो अपरियापन्ना, अनियता, अनिय्यानिका ।

उप्पन्नवत्थुका, उप्पन्नारम्मणा, पुरेजातवत्थुका, पुरेजातारम्मणा, अज्झत्तिकवत्थुका, बाहिरारम्मणा, असम्भिन्नवत्थुका, असम्भिन्नारम्मणा, नानावत्थुका, नानारम्मणा, न अज्जमज्जस्स गोचरविसयं पच्चनुभोत्ति, न असमन्नाहारा उप्पज्जन्ति, न अमनसिकारा उप्पज्जन्ति, न अब्बोकिण्णा उप्पज्जन्ति, न अपुब्बं अचरिमं उप्पज्जन्ति, न अज्जमज्जस्स समनन्तरा उप्पज्जन्ति ।

पच्च विज्जाणा अनाभोगा, पच्चहि विज्जाणेहि न कज्जि धम्मं पटिविजानाति, अज्जत्र अभिनिपातमत्ता, पच्चन्नं विज्जाणानं समनन्तरापि न कज्जि धम्मं पटिविजानाति, पच्चहि विज्जाणेहि न कज्जि इरियापथं कप्पेति, पच्चन्नं विज्जाणानं समनन्तरापि न कज्जि इरियापथं कप्पेति, पच्चहि विज्जाणेहि न कायकम्मं न वचीकम्मं पटुपेति, पच्चन्नं विज्जाणानं समनन्तरापि न कायकम्मं न वचीकम्मं पटुपेति, पच्चहि विज्जाणेहि न कुसलाकुसलं धम्मं समादियति, पच्चन्नं विज्जाणानं समनन्तरापि न कुसलाकुसलं धम्मं समादियति, पच्चहि विज्जाणेहि न समापज्जति न वुट्ठाति, पच्चन्नं विज्जाणानं समनन्तरापि न समापज्जति न वुट्ठाति, पच्चहि विज्जाणेहि न चवति न उप्पज्जति, पच्चन्नं विज्जाणानं समनन्तरापि न चवति न उप्पज्जति, पच्चहि विज्जाणेहि न सुपति न पटिबुज्झति न सुपिणं पस्सति, पच्चन्नं विज्जाणानं समनन्तरापि न सुपति न पटिबुज्झति न सुपिणं पस्सति, याथावकवत्थुविभावना पज्जा । एवं एकविधेन जाणवत्थु ।

**दुविधेन जाणवत्थु** — लोकिया पज्जा, लोकुत्तरा पज्जा । केनचि विज्जेय्या पज्जा, केनचि न विज्जेय्या पज्जा । सासवा पज्जा, अनासवा पज्जा । आसवविषययुत्ता सासवा पज्जा, आसवविषययुत्ता अनासवा पज्जा । संयोजनिया पज्जा, असंयोजनिया पज्जा । संयोजनविषययुत्ता संयोजनिया पज्जा, संयोजनविषययुत्ता असंयोजनिया पज्जा । गन्थनिया पज्जा, अगन्थनिया पज्जा । गन्थविषययुत्ता गन्थनिया पज्जा, गन्थविषययुत्ता अगन्थनिया पज्जा ।

ओघनिया पज्जा, अनोघनिया पज्जा । ओघविषययुत्ता ओघनिया पज्जा, ओघविषययुत्ता अनोघनिया पज्जा । योगनिया पज्जा, अयोगनिया पज्जा । योगविषययुत्ता योगनिया पज्जा, योगविषययुत्ता अयोगनिया पज्जा । नीवरणिया पज्जा, अनोवरणिया पज्जा । नीवरणविषययुत्ता नीवरणिया पज्जा, नीवरणविषययुत्ता अनोवरणिया पज्जा । परामट्ठा पज्जा, अपरामट्ठा पज्जा । परामासविषययुत्ता परामट्ठा पज्जा, परामासविषययुत्ता अपरामट्ठा पज्जा । उपादिण्णा पज्जा, अनुपादिण्णा पज्जा । उपादानिया पज्जा, अनुपादानिया पज्जा । उपादानविषययुत्ता उपादानिया पज्जा, उपादानविषययुत्ता अनुपादानिया पज्जा ।

संकिलेसिका पज्जा, असंकिलेसिका पज्जा । किलेसविषययुत्ता संकिलेसिका पज्जा, किलेसविषययुत्ता असंकिलेसिका पज्जा । सवितक्का पज्जा, अवितक्का पज्जा । सविचारा पज्जा, अविचारा पज्जा । सप्पीतिका पज्जा, अप्पीतिका पज्जा । पीतिसहगता पज्जा, न पीतिसहगता पज्जा । सुखसहगता पज्जा, न सुखसहगता पज्जा । उपेक्खासहगता पज्जा, न उपेक्खासहगता पज्जा । कामावचरा पज्जा, न कामावचरा पज्जा । रूपावचरा पज्जा, न रूपावचरा पज्जा । अरूपावचरा पज्जा, न अरूपावचरा पज्जा । परियापन्ना पज्जा, अपरियापन्ना पज्जा । निव्यानिका पज्जा, अनिव्यानिका पज्जा । नियता पज्जा, अनियता पज्जा । सउत्तरा पज्जा, अनुत्तरा पज्जा । अत्थजापिका पज्जा, जापितत्था पज्जा । एवं दुविधेन जाणवत्थु ।

**तिविधेन जाणवत्थु** — चिन्तामया पज्जा, सुतमया पज्जा, भावनामया पज्जा । दानमया पज्जा, सीलमया पज्जा, भावनामया पज्जा । अधिसीले पज्जा, अधिचित्ते पज्जा, अधिपज्जाय पज्जा । आयकोसल्लं, अपायकोसल्लं, उपायकोसल्लं ।

विपाका पज्जा, विपाकधम्मधम्मा पज्जा, नेवविपाकनविपाकधम्मधम्मा पज्जा । उपादिण्णुपादानिया पज्जा, अनुपादिण्णुपादानिया पज्जा, अनुपादिण्णुपादानिया पज्जा । सवितक्कसविचारा पज्जा, अवितक्कविचारमत्ता पज्जा, अवितक्कविचारा पज्जा । पीतिसहगता पज्जा, सुखसहगता पज्जा, उपेक्खासहगता पज्जा । आचयगामिनी पज्जा, अपचयगामिनी पज्जा, नेवाचयगामिनापचयगामिनी पज्जा । सेक्खा पज्जा, असेक्खा पज्जा,



जरामरणनिरोधगामिनिया पटिपदाय जाणं । जातिया जाणं...पे०... भवे जाणं...पे०... उपादाने जाणं...पे०... तण्हाय जाणं...पे०... वेदनाय जाणं...पे०... फस्से जाणं...पे०... सळायतने जाणं...पे०... नामरूपे जाणं...पे०... विज्जाणे जाणं...पे०... सङ्खारेसु जाणं, सङ्खारसमुदये जाणं, सङ्खारनिरोधे जाणं, सङ्खारनिरोधगामिनिया पटिपदाय जाणं । एवं चतुब्बिधेन जाणवत्थु ।

**पञ्चविधेन जाणवत्थु** — पञ्चङ्गिको सम्मासमाधि, पञ्चजाणिको सम्मासमाधि । एवं पञ्चविधेन जाणवत्थु ।

**छब्बिधेन जाणवत्थु** — छसु अभिज्जासु पज्जा । एवं छब्बिधेन जाणवत्थु ।

**सत्तविधेन जाणवत्थु** — सत्तसत्तति जाणवत्थूनि । एवं सत्तविधेन जाणवत्थु ।

**अट्ठविधेन जाणवत्थु** — चतूसु मग्गेसु, चतूसु फलेसु पज्जा । एवं अट्ठविधेन जाणवत्थु ।

**नवविधेन जाणवत्थु** — नवसु अनुपुब्बविहारसमापत्तीसु पज्जा । एवं नवविधेन जाणवत्थु ।

**दसविधेन जाणवत्थु** — दस तथागतस्स तथागतबलानि, येहि बलेहि समन्नागतो तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति । कतमानि दस? इध तथागतो ठानञ्च ठानतो अट्ठानञ्च अट्ठानतो यथाभूतं पजानाति, यम्पि तथागतो ठानञ्च ठानतो अट्ठानञ्च अट्ठानतो यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो अतीतानागतपच्चुप्पन्नानं कम्मसमादानानं ठानसो हेतुसो विपाकं यथाभूतं पजानाति । यम्पि तथागतो अतीतानागतपच्चुप्पन्नानं कम्मसमादानानं ठानसो हेतुसो विपाकं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो सब्बत्थगामिनिं पटिपदं यथाभूतं पजानाति, यम्पि तथागतो सब्बत्थगामिनिं पटिपदं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो अनेकधातुनानाधातुलोकं यथाभूतं पजानाति, यम्पि तथागतो अनेकधातुनानाधातुलोकं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो सत्तानं नानाधिमुत्तिकतं यथाभूतं पजानाति, यम्पि तथागतो सत्तानं नानाधिमुत्तिकतं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो परसत्तानं परपुग्गलानं इन्द्रियपरोपरियत्तं यथाभूतं पजानाति, यम्पि तथागतो परसत्तानं परपुग्गलानं इन्द्रियपरोपरियत्तं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो ज्ञानविमोक्खसमाधिसमापत्तीनं संकिलेसं वोदानं वुट्ठानं यथाभूतं पजानाति, यम्पि तथागतो ज्ञानविमोक्खसमाधिसमापत्तीनं संकिलेसं वोदानं वुट्ठानं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो पुब्बेनिवासानुस्सतिं यथाभूतं पजानाति, यम्पि तथागतो पुब्बेनिवासानुस्सतिं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो सत्तानं चुतूपपातं यथाभूतं पजानाति, यम्पि तथागतो सत्तानं चुतूपपातं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

पुन चपरं तथागतो आसवानं खयं यथाभूतं पजानाति, यम्पि तथागतो आसवानं खयं यथाभूतं पजानाति, इदम्पि तथागतस्स तथागतबलं होति । यं बलं आगम्म तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति ।

इमानि दस तथागतस्स तथागतबलानि । येहि बलेहि समन्नागतो तथागतो आसभं ठानं पटिजानाति, परिसासु सीहनादं नदति, ब्रह्मचक्कं पवत्तेति । एवं दसविधेन जाणवत्थु ।



जाणविभङ्गं ।

खुदकवत्थुविभङ्गो

एककं

जातिमदो (विभ० ८३२), गोतमदो, आरोग्यमदो, योब्वनमदो, जीवितमदो, लाभमदो, सक्कारमदो, गरुकारमदो, पुरेक्खारमदो, परिवारमदो, भोगमदो, वण्णमदो, सुतमदो, पटिभानमदो, रत्तञ्जुमदो, पिण्डपातिकमदो, अनवञ्जातमदो, इरियापथमदो, इद्धिमदो, यसमदो, सीलमदो, ज्ञानमदो, सिप्पमदो, आरोहमदो, परिणाहमदो, सण्ठानमदो, पारिपूरिमदो, मदो, पमादो, थम्भो, सारम्भो, अत्रिच्छता, महिच्छता, पापिच्छता, सिङ्गं, तित्तिणं, चापल्यं, असभागवुत्ति, अरति, तन्दी, विजम्भिता, भत्तसम्मदो, चेतसो च लीनत्तं, कुहना, लपना, नेमित्तिकता, निष्पेसिकता, लाभेन लाभं निजिगीसनता, “सेय्योहमस्मी”ति मानो, “सदिसोहमस्मी”ति मानो, “हीनोहमस्मी”ति मानो । सेय्यस्स “सेय्योहमस्मी”ति मानो, सेय्यस्स “सदिसोहमस्मी”ति मानो, सेय्यस्स “हीनोहमस्मी”ति मानो, सदिसस्स “सेय्योहमस्मी”ति मानो, सदिसस्स “सदिसोहमस्मी”ति मानो, सदिसस्स “हीनोहमस्मी”ति मानो, हीनस्स “सेय्योहमस्मी”ति मानो, हीनस्स “सदिसोहमस्मी”ति मानो, हीनस्स “हीनोहमस्मी”ति मानो, मानो, अतिमानो, मानातिमानो, ओमानो, अधिमानो, अस्मिमानो, मिच्छामानो, जातिवितक्को, जनपदवितक्को, अमरवितक्को, परानुद्वयतापटिसंयुतो वितक्को, लाभसक्कारसिलोकपटिसंयुतो वितक्को, अनवञ्जत्तिपटिसंयुतो वितक्को (विभ० ८३२) । एककं ।

दुकं

कोथो च उपनाहो च, मक्खो च पळासो च, इस्सा च मच्छरियञ्च, माया च साठेय्यञ्च, अविज्जा च भवतण्हा च, भवदिट्ठि च विभवदिट्ठि च, सस्सतदिट्ठि च उच्छेददिट्ठि च, अन्तवादिट्ठि च अनन्तवादिट्ठि च, पुब्बन्तानुदिट्ठि च अपरन्तानुदिट्ठि च, अहिरिकञ्च अनोत्तप्पञ्च, दोवचस्सता च पापमित्तता च, अनज्जवो च अमहवो च, अक्खन्ति च असोरच्चञ्च, असाखल्यञ्च अप्पटिसन्थारो च, इन्द्रियेसु अगुत्तद्वारता च भोजने अमत्तञ्जुता च, मुट्ठस्सच्चञ्च असम्पजञ्च, सीलविपत्ति च दिट्ठिविपत्ति च, अज्झत्तसंयोजनञ्च बहिद्वात्तसंयोजनञ्च । दुकं ।

तिक्

तीणि अकुसलमूलानि, तयो अकुसलवितक्का, तिस्सो अकुसलसञ्जा, तिस्सो अकुसलधातुयो, तीणि दुच्चरितानि, तयो आसवा, तीणि संयोजनानि, तिस्सो तण्हा, अपरापि तिस्सो तण्हा, अपरापि तिस्सो तण्हा, तिस्सो एसना, तिस्सो विधा, तीणि भयानि, तीणि तमानि, तीणि तित्थायतनानि, तयो किञ्चना, तीणि अङ्गणानि, तीणि मलानि, तीणि विसमानि, अपरानिपि तीणि विसमानि, तयो अग्गी, तयो कसावा, अपरेपि तयो कसावा ।

अस्साददिट्ठि अत्तानुदिट्ठि मिच्छादिट्ठि, अरति विहेसा अधम्मचरिया, दोवचस्सता पापमित्तता नानत्तसञ्जा, उद्धच्चं कोसज्जं पमादो, असन्तुट्ठिता असम्पजञ्जता महिच्छता, अहिरिकं अनोत्तप्पं पमादो, अनादरियं दोवचस्सता पापमित्तता, अस्सद्वियं अवदञ्जुता कोसज्जं, उद्धच्चं असंवरो दुस्सील्यं, अरियानं अदस्सनकम्यता सद्धम्मं असोतुकम्यता उपारम्भचित्तता, मुट्ठस्सच्चं असम्पजञ्जं चेतसो विक्खेपो, अयोनिसो मनसिकारो कुम्मग्गसेवना चेतसो च लीनत्तं । तिकं ।

चतुक्कं

चत्तारो आसवा, चत्तारो गन्था, चत्तारो ओघा, चत्तारो योगा, चत्तारि उपादानानि, चत्तारो तण्हप्पादा, चत्तारि अगतिगमनानि, चत्तारो विपरियासा, चत्तारो अनरियवोहारा, अपरेपि चत्तारो अनरियवोहारा, चत्तारि दुच्चरितानि, अपरापि चत्तारि दुच्चरितानि, चत्तारि भयानि, (अपरानिपि चत्तारि भयानि,) चतस्सो दिट्ठियो । चतुक्कं ।

पञ्चकं

पञ्चोरम्भागियानि संयोजनानि, पञ्चुद्धम्भागियानि संयोजनानि, पञ्च मच्छरियानि, पञ्च सङ्गा, पञ्च सल्ला, पञ्च चेतोखिला, पञ्च चेतोविनिबन्धा, पञ्च नीवरणानि, पञ्च कम्मानि आनन्तरिकानि, पञ्च दिट्ठियो, पञ्च वेरा, पञ्च ब्यसना, पञ्च अक्खन्तिया आदीनवा, पञ्च भयानि, पञ्च दिट्ठधम्मनिब्बानवादा । पञ्चकं ।

छक्कं

छ विवादमूलानि, छ छन्दरागा धम्मा, छ विरोधवत्थूनि, छ तण्हाकाया, छ अगारवा, छ परिहानिया धम्मा, अपरेपि छ परिहानिया धम्मा, छ

सोमनस्सुपविचारा, छ दोमनस्सुपविचारा, छ उपेक्खुपविचारा, छ गेहसितानि सोमनस्सानि, छ गेहसितानि दोमनस्सानि, छ गेहसिता उपेक्खा, छ दिट्ठियो। छक्कं।

#### सत्तकं

सत्त अनुसया, सत्त संयोजनानि, सत्त परियुट्ठानानि, सत्त असद्धम्मा, सत्त दुच्चरितानि, सत्त माना, सत्त दिट्ठियो। सत्तकं।

#### अट्ठकं

अट्ठ किलेसवत्थूनि, अट्ठ कुसीतवत्थूनि, अट्ठसु लोकधम्मेषु चित्तस्स पटिघातो, अट्ठ अनरियवोहारा, अट्ठ मिच्छत्ता, अट्ठ पुरिसदोसा, अट्ठ असज्जिवादा, अट्ठ नेवसज्जिनासज्जिवादा। अट्ठकं।

#### नवकं

नव आघातवत्थूनि, नव पुरिसमलानि, नवविधा माना, नव तण्हामूलका धम्मा, नव इज्जितानि, नव मज्जितानि, नव फन्दितानि, नव पपज्जितानि, नव सङ्घतानि। नवकं।

#### दसकं

दस किलेसवत्थूनि, दस आघातवत्थूनि, दस अकुसलकम्मपथा, दस संयोजनानि, दस मिच्छत्ता, दसवत्थुका मिच्छादिट्ठि, दसवत्थुका अन्तग्गाहिका दिट्ठि। दसकं।

अट्ठारस तण्हाविचरितानि अज्झत्तिकस्स उपादाय, अट्ठारस तण्हाविचरितानि बाहिरस्स उपादाय, तदेकज्झं अभिसज्जुहित्वा अभिसङ्घिपित्वा छत्तिस तण्हाविचरितानि होन्ति, इति अतीतानि छत्तिस तण्हाविचरितानि, अनागतानि छत्तिस तण्हाविचरितानि, पच्चुप्पन्नानि छत्तिस तण्हाविचरितानि, तदेकज्झं अभिसज्जुहित्वा अभिसङ्घिपित्वा **अट्ठ तण्हाविचरितसतं** होति, यानि च द्वासट्ठि दिट्ठिगतानि ब्रह्मजाले वेय्याकरणे वुत्तानि भगवता।

खुदकवत्थुविभङ्गं।

#### धम्महदयविभङ्गो

कति खन्धा, कति आयतनानि, कति धातुयो, कति सच्चानि, कति इन्द्रियाणि, कति हेतू, कति आहारा, कति फस्सा, कति वेदना, कति सज्जा, कति चेतना, कति चित्तानि (विभ० ९७८)?

पञ्चकखन्धा, द्वादसायतनानि, अट्ठारस धातुयो, चत्तारि सच्चानि, बावीसतिन्द्रियाणि, नव हेतू, चत्तारो आहारा, सत्त फस्सा, सत्त वेदना, सत्त सज्जा, सत्त चेतना, सत्त चित्तानि (विभ० ९७८)।

धम्महदयविभङ्गं।

विभङ्गमातिका निट्ठिता।

### ३. धातुकथामातिका

#### नयमातिका

सङ्गहो असङ्गहो (धातु० १)। सङ्गहितेन असङ्गहितं। असङ्गहितेन सङ्गहितं। सङ्गहितेन सङ्गहितं। असङ्गहितेन असङ्गहितं। सम्पयोगो विष्पयोगो। सम्पयुत्तेन विष्पयुत्तं। विष्पयुत्तेन सम्पयुत्तं। सम्पयुत्तेन सम्पयुत्तं। विष्पयुत्तेन विष्पयुत्तं। सङ्गहितेन सम्पयुत्तं विष्पयुत्तं। सम्पयुत्तेन सङ्गहितं असङ्गहितं। असङ्गहितेन सम्पयुत्तं विष्पयुत्तं। विष्पयुत्तेन सङ्गहितं असङ्गहितं।

#### अब्भन्तरमातिका

पञ्चक्खन्धा । द्वादसायतनानि । अट्टारस धातुयो । चत्तारि सच्चानि । बावीसतिन्द्रियानि । पटिच्चसमुप्पादो । चत्तारो सतिपट्टाना । चत्तारो सम्मपधाना । चत्तारो इन्द्रियादा । चत्तारि ज्ञानानि । चतस्सो अप्पमज्जायो । पञ्चिन्द्रियानि । पञ्च बलानि । सत्त बोज्झङ्गा । अरियो अट्ठङ्गिको मग्गो । फस्सो वेदना सज्जा चेतना चित्तं अधिमोक्खो मनसिकारो ।

### नयमुखमातिका

तीहि सङ्गहो । तीहि असङ्गहो । चतूहि सम्पयोगो । चतूहि विप्पयोगो ।

### लक्खणमातिका

सभागो । विसभागो ।

### बाहिरमातिका

सब्बापि धम्मसङ्गणी धातुकथाय मातिकाति ।

धातुकथामातिका निट्ठिता ।

## ४. पुग्गलपञ्जत्तिमातिका

छ पञ्जत्तियो (पु० प० मातिका १) — खन्धपञ्जत्ति आयतनपञ्जत्ति धातुपञ्जत्ति सच्चपञ्जत्ति इन्द्रियपञ्जत्ति पुग्गलपञ्जत्तीति ।

पुग्गलपञ्जत्तिमातिका निट्ठिता ।

## ५. कथावत्थुमातिका

### पुग्गलकथा

### सुद्धसच्चिकट्टुअनुलोमपच्चनीकं

पुग्गलो उपलब्धति सच्चिकट्टुपरमत्थेनाति (कथा० १), आमन्ता । यो सच्चिकट्टो परमत्थो, ततो सो पुग्गलो उपलब्धति सच्चिकट्टुपरमत्थेनाति? न हेवं वत्तब्बे ।

आजानाहि निग्गहं — हज्जि पुग्गलो उपलब्धति सच्चिकट्टुपरमत्थेन, तेन वत रे वत्तब्बे “यो सच्चिकट्टो परमत्थो, ततो सो पुग्गलो उपलब्धति सच्चिकट्टुपरमत्थेना”ति । यं तत्थ वदेसि “वत्तब्बे खो ‘पुग्गलो उपलब्धति सच्चिकट्टुपरमत्थेन’, नो च वत्तब्बे ‘यो सच्चिकट्टो परमत्थो, ततो सो पुग्गलो उपलब्धति सच्चिकट्टुपरमत्थेना’”ति, मिच्छा ।

नो चे पन वत्तब्बे “यो सच्चिकट्टो परमत्थो, ततो सो पुग्गलो उपलब्धति सच्चिकट्टुपरमत्थेना”ति, नो च वत रे वत्तब्बे “पुग्गलो उपलब्धति सच्चिकट्टुपरमत्थेना”ति । यं तत्थ वदेसि “वत्तब्बे खो ‘पुग्गलो उपलब्धति सच्चिकट्टुपरमत्थेन’, नो च वत्तब्बे ‘यो सच्चिकट्टो परमत्थो, ततो सो पुग्गलो उपलब्धति सच्चिकट्टुपरमत्थेना’”ति, मिच्छा ।

अनुलोमपच्चकं ।

पुग्गलो नुपलब्धति सच्चिकट्टुपरमत्थेनाति? आमन्ता । यो सच्चिकट्टो परमत्थो, ततो सो पुग्गलो नुपलब्धति सच्चिकट्टुपरमत्थेनाति? न हेवं वत्तब्बे ।

आजानाहि पटिकम्मं — हज्जि पुग्गलो नुपलब्धति सच्चिकट्टुपरमत्थेन, तेन वत रे वत्तब्बे “यो सच्चिकट्टो परमत्थो, ततो सो पुग्गलो नुपलब्धति सच्चिकट्टुपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्धति सच्चिकट्टुपरमत्थेन’, नो च वत्तब्बे ‘यो सच्चिकट्टो परमत्थो, ततो सो पुग्गलो नुपलब्धति सच्चिकट्टुपरमत्थेना’”ति, मिच्छा ।

नो चे पन वत्तब्बे “यो सच्चिकट्टो परमत्थो, ततो सो पुग्गलो नुपलब्धति सच्चिकट्टुपरमत्थेना”ति, नो च वत रे वत्तब्बे “पुग्गलो नुपलब्धति







नो चे पन वत्तब्बे “सब्बत्थ पुग्गलो नुपलब्भति सच्चिकट्टपरमत्थेना”ति, नो च वत रे वत्तब्बे “पुग्गलो नुपलब्भति सच्चिकट्टपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्भति सच्चिकट्टपरमत्थेन’, नो च वत्तब्बे ‘सब्बत्थ पुग्गलो नुपलब्भति सच्चिकट्टपरमत्थेना’”ति, मिच्छा...पे०... ।

छट्ठो निग्गहो ।

### कालसच्चिकट्टपच्चनीकानुलोमं

पुग्गलो नुपलब्भति सच्चिकट्टपरमत्थेनाति? आमन्ता । सब्बदा पुग्गलो नुपलब्भति सच्चिकट्टपरमत्थेनाति? न हेवं वत्तब्बे ।

आजानाहि निग्गहं — हज्जि पुग्गलो नुपलब्भति सच्चिकट्टपरमत्थेन, तेन वत रे वत्तब्बे “सब्बदा पुग्गलो नुपलब्भति सच्चिकट्टपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्भति सच्चिकट्टपरमत्थेन’, नो च वत्तब्बे ‘सब्बदा पुग्गलो नुपलब्भति सच्चिकट्टपरमत्थेना’”ति, मिच्छा ।

नो चे पन वत्तब्बे “सब्बदा पुग्गलो नुपलब्भति सच्चिकट्टपरमत्थेना”ति, नो च वत रे वत्तब्बे “पुग्गलो नुपलब्भति सच्चिकट्टपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्भति सच्चिकट्टपरमत्थेन’, नो च वत्तब्बे ‘सब्बदा पुग्गलो नुपलब्भति सच्चिकट्टपरमत्थेना’”ति, मिच्छा...पे०... ।

सत्तमो निग्गहो ।

### अवयवसच्चिकट्टपच्चनीकानुलोमं

पुग्गलो नुपलब्भति सच्चिकट्टपरमत्थेनाति? आमन्ता । सब्बेसु पुग्गलो नुपलब्भति सच्चिकट्टपरमत्थेनाति? न हेवं वत्तब्बे ।

आजानाहि निग्गहं — हज्जि पुग्गलो नुपलब्भति सच्चिकट्टपरमत्थेन, तेन वत रे वत्तब्बे “सब्बेसु पुग्गलो नुपलब्भति सच्चिकट्टपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्भति सच्चिकट्टपरमत्थेन’, नो च वत्तब्बे ‘सब्बेसु पुग्गलो नुपलब्भति सच्चिकट्टपरमत्थेना’”ति, मिच्छा ।

नो चे पन वत्तब्बे “सब्बेसु पुग्गलो नुपलब्भति सच्चिकट्टपरमत्थेना”ति, नो च वत रे वत्तब्बे “पुग्गलो नुपलब्भति सच्चिकट्टपरमत्थेना”ति । यं तत्थ वदेसि “वत्तब्बे खो ‘पुग्गलो नुपलब्भति सच्चिकट्टपरमत्थेन’, नो च वत्तब्बे ‘सब्बेसु पुग्गलो नुपलब्भति सच्चिकट्टपरमत्थेना’”ति, मिच्छा...पे०... ।

अट्ठमो निग्गहो ।

कथावत्थुमातिका निट्ठिता ।

## ६. यमकमातिका

### मूलयमकं

#### कुसलपदनयचतुक्कं

ये केचि कुसला धम्मा (यम० १.मूलयमक.१ आदयो), सब्बे ते कुसलमूला । ये वा पन कुसलमूला, सब्बे ते धम्मा कुसला ।

ये केचि कुसला धम्मा, सब्बे ते कुसलमूलेन एकमूला । ये वा पन कुसलमूलेन एकमूला, सब्बे ते धम्मा कुसला ।

ये केचि कुसलमूलेन एकमूला धम्मा, सब्बे ते कुसलमूलेन अज्जमज्जमूला । ये वा पन कुसलमूलेन अज्जमज्जमूला, सब्बे ते धम्मा कुसला ।

ये केचि कुसला धम्मा, सब्बे ते कुसलमूलमूला । ये वा पन कुसलमूलमूला, सब्बे ते धम्मा कुसला ।

ये केचि कुसला धम्मा, सब्बे ते कुसलमूलेन एकमूलमूला । ये वा पन कुसलमूलेन एकमूलमूला, सब्बे ते धम्मा कुसला ।

ये केचि कुसलमूलेन एकमूलमूला धम्मा, सब्बे ते कुसलमूलेन अज्जमज्जमूलमूला । ये वा पन कुसलमूलेन अज्जमज्जमूलमूला, सब्बे ते धम्मा कुसला ।

ये केचि कुसला धम्मा, सब्बे ते कुसलमूलका । ये वा पन कुसलमूलका, सब्बे ते धम्मा कुसला ।







मूलयमकमातिका निट्टिता ।

**खन्धयमकं**

**पण्णत्तिवारो**

पञ्चकखन्धो (यम० १.खन्धयमक.१ आदयो) — रूपकखन्धो वेदनाकखन्धो सज्जाकखन्धो सङ्खारकखन्धो विज्जाणकखन्धो ।

**पदसोधनवारो**

**अनुलोमं**

रूपं रूपकखन्धो, रूपकखन्धो रूपं ।

वेदना वेदनाकखन्धो, वेदनाकखन्धो वेदना ।

सज्जा सज्जाकखन्धो, सज्जाकखन्धो सज्जा ।

सङ्खारा सङ्खारकखन्धो, सङ्खारकखन्धो सङ्खारा ।

विज्जाणं विज्जाणकखन्धो, विज्जाणकखन्धो विज्जाणं ।

**पच्चनीकं**

न रूपं न रूपकखन्धो, न रूपकखन्धो न रूपं ।

न वेदना न वेदनाकखन्धो, न वेदनाकखन्धो न वेदना ।

न सज्जा न सज्जाकखन्धो, न सज्जाकखन्धो न सज्जा ।

न सङ्खारा न सङ्खारकखन्धो, न सङ्खारकखन्धो न सङ्खारा ।

न विज्जाणं न विज्जाणकखन्धो, न विज्जाणकखन्धो न विज्जाणं ।

**पदसोधनमूलचक्कवारो**

**अनुलोमं**

रूपं रूपकखन्धो, खन्धा वेदनाकखन्धो ।

रूपं रूपकखन्धो, खन्धा सज्जाकखन्धो ।

रूपं रूपकखन्धो, खन्धा सङ्खारकखन्धो ।

रूपं रूपकखन्धो, खन्धा विज्जाणकखन्धो ।

वेदना वेदनाकखन्धो, खन्धा रूपकखन्धो ।

वेदना वेदनाकखन्धो, खन्धा सज्जाकखन्धो ।

वेदना वेदनाकखन्धो, खन्धा सङ्खारकखन्धो ।

वेदना वेदनाक्खन्धो, खन्धा विज्जाणक्खन्धो ।

सज्जा सज्जाक्खन्धो, खन्धा रूपक्खन्धो ।

सज्जा सज्जाक्खन्धो, खन्धा वेदनाक्खन्धो ।

सज्जा सज्जाक्खन्धो, खन्धा सङ्खारक्खन्धो ।

सज्जा सज्जाक्खन्धो, खन्धा विज्जाणक्खन्धो ।

सङ्खारा सङ्खारक्खन्धो, खन्धा रूपक्खन्धो ।

सङ्खारा सङ्खारक्खन्धो, खन्धा वेदनाक्खन्धो ।

सङ्खारा सङ्खारक्खन्धो, खन्धा सज्जाक्खन्धो ।

सङ्खारा सङ्खारक्खन्धो, खन्धा विज्जाणक्खन्धो ।

विज्जाणं विज्जाणक्खन्धो, खन्धा रूपक्खन्धो ।

विज्जाणं विज्जाणक्खन्धो, खन्धा वेदनाक्खन्धो ।

विज्जाणं विज्जाणक्खन्धो, खन्धा सज्जाक्खन्धो ।

विज्जाणं विज्जाणक्खन्धो, खन्धा सङ्खारक्खन्धो ।

### पच्चनीकं

न रूपं न रूपक्खन्धो, न खन्धा न वेदनाक्खन्धो ।

न रूपं न रूपक्खन्धो, न खन्धा न सज्जाक्खन्धो ।

न रूपं न रूपक्खन्धो, न खन्धा न सङ्खारक्खन्धो ।

न रूपं न रूपक्खन्धो, न खन्धा न विज्जाणक्खन्धो ।

न वेदना न वेदनाक्खन्धो, न खन्धा न रूपक्खन्धो ।

न वेदना न वेदनाक्खन्धो, न खन्धा न सज्जाक्खन्धो ।

न वेदना न वेदनाक्खन्धो, न खन्धा न सङ्खारक्खन्धो ।

न वेदना न वेदनाक्खन्धो, न खन्धा न विज्जाणक्खन्धो ।

न सज्जा न सज्जाक्खन्धो, न खन्धा न रूपक्खन्धो ।

न सज्जा न सज्जाक्खन्धो, न खन्धा न वेदनाक्खन्धो ।

न सज्जा न सज्जाक्खन्धो, न खन्धा न सङ्खारक्खन्धो ।

न सज्जा न सज्जाक्खन्धो, न खन्धा न विज्जाणक्खन्धो ।

न सङ्खारा न सङ्खारक्खन्थो, न खन्था न रूपक्खन्थो ।  
 न सङ्खारा न सङ्खारक्खन्थो, न खन्था न वेदनाक्खन्थो ।  
 न सङ्खारा न सङ्खारक्खन्थो, न खन्था न सज्जाक्खन्थो ।  
 न सङ्खारा न सङ्खारक्खन्थो, न खन्था न विज्जाणक्खन्थो ।  
 न विज्जाणं न विज्जाणक्खन्थो, न खन्था न रूपक्खन्थो ।  
 न विज्जाणं न विज्जाणक्खन्थो, न खन्था न वेदनाक्खन्थो ।  
 न विज्जाणं न विज्जाणक्खन्थो, न खन्था न सज्जाक्खन्थो ।  
 न विज्जाणं न विज्जाणक्खन्थो, न खन्था न सङ्खारक्खन्थो ।

### सुद्धखन्धवारो

#### अनुलोमं

रूपं खन्थो, खन्था रूपं ।  
 वेदना खन्थो, खन्था वेदना ।  
 सज्जा खन्थो, खन्था सज्जा ।  
 सङ्खारा खन्थो, खन्था सङ्खारा ।  
 विज्जाणं खन्थो, खन्था विज्जाणं ।

#### पच्चनीकं

न रूपं न खन्थो, न खन्था न रूपं ।  
 न वेदना न खन्थो, न खन्था न वेदना ।  
 न सज्जा न खन्थो, न खन्था न सज्जा ।  
 न सङ्खारा न खन्थो, न खन्था न सङ्खारा ।  
 न विज्जाणं न खन्थो, न खन्था न विज्जाणं ।

### सुद्धखन्धमूलचक्कवारो

#### अनुलोमं

रूपं खन्थो, खन्था वेदना ।  
 रूपं खन्थो, खन्था सज्जा ।  
 रूपं खन्थो, खन्था सङ्खारा ।

रूपं खन्धो, खन्धा विज्जाणं ।

वेदना खन्धो, खन्धा रूपं ।

वेदना खन्धो, खन्धा सज्जा ।

वेदना खन्धो, खन्धा सङ्खारा ।

वेदना खन्धो, खन्धा विज्जाणं ।

सज्जा खन्धो, खन्धा रूपं ।

सज्जा खन्धो, खन्धा वेदना ।

सज्जा खन्धो, खन्धा सङ्खारा ।

सज्जा खन्धो, खन्धा विज्जाणं ।

सङ्खारा खन्धो, खन्धा रूपं ।

सङ्खारा खन्धो, खन्धा वेदना ।

सङ्खारा खन्धो, खन्धा सज्जा ।

सङ्खारा खन्धो, खन्धा विज्जाणं ।

विज्जाणं खन्धो, खन्धा रूपं ।

विज्जाणं खन्धो, खन्धा वेदना ।

विज्जाणं खन्धो, खन्धा सज्जा ।

विज्जाणं खन्धो, खन्धा सङ्खारा ।

### पच्चनीकं

न रूपं न खन्धो, न खन्धा न वेदना ।

न रूपं न खन्धो, न खन्धा न सज्जा ।

न रूपं न खन्धो, न खन्धा न सङ्खारा ।

न रूपं न खन्धो, न खन्धा न विज्जाणं ।

न वेदना न खन्धो, न खन्धा न रूपं ।

न वेदना न खन्धो, न खन्धा न सज्जा ।

न वेदना न खन्धो, न खन्धा न सङ्खारा ।

न वेदना न खन्धो, न खन्धा न विज्जाणं ।

न सज्जा न खन्धो, न खन्धा न रूपं ।  
 न सज्जा न खन्धो, न खन्धा न वेदना ।  
 न सज्जा न खन्धो, न खन्धा न सङ्खारा ।  
 न सज्जा न खन्धो, न खन्धा न विज्जाणं ।  
 न सङ्खारा न खन्धो, न खन्धा न रूपं ।  
 न सङ्खारा न खन्धो, न खन्धा न वेदना ।  
 न सङ्खारा न खन्धो, न खन्धा न सज्जा ।  
 न सङ्खारा न खन्धो, न खन्धा न विज्जाणं ।  
 न विज्जाणं न खन्धो, न खन्धा न रूपं ।  
 न विज्जाणं न खन्धो, न खन्धा न वेदना ।  
 न विज्जाणं न खन्धो, न खन्धा न सज्जा ।  
 न विज्जाणं न खन्धो, न खन्धा न सङ्खारा ।

खन्धयमकमातिका निवृत्ता ।

आयतनयमकं

पण्णत्तिवारो

**द्वादसायतनानि** (यम० १.आयतनयमक.१ आदयो) — चक्खायतनं सोतायतनं घानायतनं जिह्वायतनं कायायतनं रूपायतनं सद्दायतनं गन्धायतनं रसायतनं फोट्टब्बायतनं मनायतनं धम्मायतनं ।

पदसोधनवारो

अनुलोमं

चक्खु चक्खायतनं, चक्खायतनं चक्खु ।  
 सोतं सोतायतनं, सोतायतनं सोतं ।  
 घानं घानायतनं, घानायतनं घानं ।  
 जिह्वा जिह्वायतनं, जिह्वायतनं जिह्वा ।  
 कायो कायायतनं, कायायतनं कायो ।  
 रूपं रूपायतनं, रूपायतनं रूपं ।  
 सद्दो सद्दायतनं, सद्दायतनं सद्दो ।  
 गन्धो गन्धायतनं, गन्धायतनं गन्धो ।

रसो रसायतनं, रसायतनं रसो ।

फोडुब्बो फोडुब्बायतनं, फोडुब्बायतनं फोडुब्बो ।

मनो मनायतनं, मनायतनं मनो ।

धम्मो धम्मायतनं, धम्मायतनं धम्मो ।

### पच्चनीकं

न चक्खु न चक्खायतनं, न चक्खायतनं न चक्खु ।

न सोतं न सोतायतनं, न सोतायतनं न सोतं ।

न धानं न धानायतनं, न धानायतनं न धानं ।

न जिह्वा न जिह्वायतनं, न जिह्वायतनं न जिह्वा ।

न कायो न कायायतनं, न कायायतनं न कायो ।

न रूपं न रूपायतनं, न रूपायतनं न रूपं ।

न सद्दो न सद्दायतनं, न सद्दायतनं न सद्दो ।

न गन्धो न गन्धायतनं, न गन्धायतनं न गन्धो ।

न रसो न रसायतनं, न रसायतनं न रसो ।

न फोडुब्बो न फोडुब्बायतनं, न फोडुब्बायतनं न फोडुब्बो ।

न मनो न मनायतनं, न मनायतनं न मनो ।

न धम्मो न धम्मायतनं, न धम्मायतनं न धम्मो ।

### पदसोधनमूलचक्कवारो

#### अनुलोमं

चक्खु चक्खायतनं, आयतना सोतायतनं ।

चक्खु चक्खायतनं, आयतना धानायतनं ।

चक्खु चक्खायतनं, आयतना जिह्वायतनं...पे०... ।

चक्खु चक्खायतनं, आयतना धम्मायतनं ।

सोतं सोतायतनं, आयतना चक्खायतनं ।

सोतं सोतायतनं, आयतना धानायतनं...पे०... ।

सोतं सोतायतनं, आयतना धम्मायतनं ।

घानं घानायतनं, आयतना चक्खायतनं...पे०... ।

घानं घानायतनं, आयतना धम्मायतनं...पे०... ।

धम्मो धम्मायतनं, आयतना चक्खायतनं ।

धम्मो धम्मायतनं, आयतना सोतायतनं...पे०... ।

धम्मो धम्मायतनं, आयतना मनायतनं । (चक्कं बन्धितब्बं ।)

### पच्चनीकं

न चक्खु न चक्खायतनं, नायतना न सोतायतनं ।

न चक्खु न चक्खायतनं, नायतना न घानायतनं...पे०... ।

न चक्खु न चक्खायतनं, नायतना न धम्मायतनं ।

न सोतं न सोतायतनं, नायतना न चक्खायतनं...पे०... ।

न सोतं न सोतायतनं, नायतना न धम्मायतनं ।

न घानं न घानायतनं, नायतना न चक्खायतनं...पे०... ।

न घानं न घानायतनं, नायतना न धम्मायतनं...पे०... ।

न धम्मो न धम्मायतनं, नायतना न चक्खायतनं ।

न धम्मो न धम्मायतनं, नायतना न सोतायतनं...पे०... ।

न धम्मो न धम्मायतनं, नायतना न मनायतनं । (चक्कं बन्धितब्बं ।)

### सुद्धायतनवारो

#### अनुलोमं

चक्खु आयतनं, आयतना चक्खु ।

सोतं आयतनं, आयतना सोतं ।

घानं आयतनं, आयतना घानं ।

जिह्वा आयतनं, आयतना जिह्वा ।

कायो आयतनं, आयतना कायो ।

रूपं आयतनं, आयतना रूपं ।

सद्दो आयतनं, आयतना सद्दो ।

गन्धो आयतनं, आयतना गन्धो ।



रसो आयतनं, आयतना रसो ।

फोडुब्बो आयतनं, आयतना फोडुब्बो ।

मनो आयतनं, आयतना मनो ।

धम्मो आयतनं, आयतना धम्मो ।

### पच्चनीकं

न चक्खु नायतनं, नायतना न चक्खु ।

न सोतं नायतनं, नायतना न सोतं ।

न धानं नायतनं, नायतना न धानं ।

न जिह्वा नायतनं, नायतना न जिह्वा ।

न कायो नायतनं, नायतना न कायो ।

न रूपं नायतनं, नायतना न रूपं ।

न सद्दो नायतनं, नायतना न सद्दो ।

न गन्धो नायतनं, नायतना न गन्धो ।

न रसो नायतनं, नायतना न रसो ।

न फोडुब्बो नायतनं, नायतना न फोडुब्बो ।

न मनो नायतनं, नायतना न मनो ।

न धम्मो नायतनं, नायतना न धम्मो ।

### सुद्धायतनमूलचक्कवारो

#### अनुलोमं

चक्खु आयतनं, आयतना सोतं...पे०... ।

चक्खु आयतनं, आयतना धम्मो ।

सोतं आयतनं, आयतना चक्खु...पे०... ।

सोतं आयतनं, आयतना धम्मो ।

धानं आयतनं, आयतना चक्खु...पे०... ।

धानं आयतनं, आयतना धम्मो...पे०... ।

धम्मो आयतनं, आयतना चक्खु ।

धम्मो आयतनं, आयतना सोतं... पे० ... ।

धम्मो आयतनं, आयतना मनो । (चककं बन्धितब्बं ।)

### पच्चनीकं

न चक्खु नायतनं, नायतना न सोतं... पे० ... ।

न चक्खु नायतनं, नायतना न धम्मो ।

न सोतं नायतनं, नायतना न चक्खु... पे० ... ।

न सोतं नायतनं, नायतना न धम्मो ।

न धानं नायतनं, नायतना न चक्खु... पे० ... ।

न धानं नायतनं, नायतना न धम्मो... पे० ... ।

न धम्मो नायतनं, नायतना न चक्खु ।

न धम्मो नायतनं, नायतना न सोतं... पे० ... ।

न धम्मो नायतनं, नायतना न मनो । (चककं बन्धितब्बं ।)

आयतनयमकमातिका निट्ठिता ।

### धातुयमकं

### पण्णत्तिवारो

**अट्टारस धातुयो** (यम० १. धातुरमक. १ आदयो) — चक्खुधातु सोतधातु घानधातु जिह्वाधातु कायधातु रूपधातु सद्दधातु गन्धधातु रसधातु फोड्डब्बधातु चक्खुविज्जाणधातु सोतविज्जाणधातु घानविज्जाणधातु जिह्वाविज्जाणधातु कायविज्जाणधातु मनोधातु मनोविज्जाणधातु धम्मधातु ।

### पदसोधनवारो

### अनुलोमं

चक्खु चक्खुधातु, चक्खुधातु चक्खु ।

सोतं सोतधातु, सोतधातु सोतं... पे० ... ।

चक्खुविज्जाणं चक्खुविज्जाणधातु, चक्खुविज्जाणधातु चक्खुविज्जाणं... पे० ... ।

मनो मनोधातु, मनोधातु मनो ।

मनोविज्जाणं मनोविज्जाणधातु, मनोविज्जाणधातु मनोविज्जाणं ।

धम्मो धम्मधातु, धम्मधातु धम्मो ।

### पच्चनीकं

न चक्खु न चक्खुधातु, न चक्खुधातु न चक्खु ।

न सोतं न सोतधातु, न सोतधातु न सोतं...पे०... ।

न चक्खुविज्जाणं न चक्खुविज्जाणधातु, न चक्खुविज्जाणधातु न चक्खुविज्जाणं...पे०... ।

न मनो न मनोधातु, न मनोधातु न मनो ।

न मनोविज्जाणं न मनोविज्जाणधातु, न मनोविज्जाणधातु न मनोविज्जाणं ।

न धम्मो न धम्मधातु, न धम्मधातु न धम्मो ।

### पदसोधनमूलचक्कवारो

#### अनुलोमं

चक्खु चक्खुधातु, धातू सोतधातु...पे०... ।

चक्खु चक्खुधातु, धातू धम्मधातु । (यथा आयतनयमके चक्कं बन्धितं, एवमिध चक्कं बन्धितब्बं ।)

#### पच्चनीकं

न चक्खु न चक्खुधातु, न धातू न सोतधातु ।

न चक्खु न चक्खुधातु, न धातू न घानधातु...पे०... ।

न चक्खु न चक्खुधातु, न धातू न धम्मधातु...पे०... ।

न धम्मो न धम्मधातु, न धातू न चक्खुधातु...पे०... ।

न धम्मो न धम्मधातु, न धातू न मनोविज्जाणधातु । (चक्कं बन्धितब्बं ।)

### सुद्धधातुवारो

#### अनुलोमं

चक्खु धातु, धातू चक्खु...पे०... ।

चक्खुविज्जाणं धातु, धातू चक्खुविज्जाणं...पे०... ।

मनोविज्जाणं धातु, धातू मनोविज्जाणं ।

धम्मो धातु, धातू धम्मो ।

#### पच्चनीकं

न चक्खु न धातु, न धातू न चक्खु...पे०... ।

न चक्खुविज्जाणं न धातु, न धातू न चक्खुविज्जाणं...पे०... ।

न मनोविज्जाणं न धातु, न धातू न मनोविज्जाणं ।

न धम्मो न धातु, न धातू न धम्मो ।

## सुद्धधातुमूलचक्कवारो

### अनुलोमं

चक्खु धातु, धातू सोतं...पे०... ।

चक्खु धातु, धातू धम्मो...पे०... ।

धम्मो धातु, धातू चक्खु...पे०... ।

धम्मो धातु, धातू मनोविज्जाणं । (चक्कं बन्धितब्बं ।)

### पच्चनीकं

न चक्खु न धातु, न धातू न सोतं...पे०... ।

न चक्खु न धातु, न धातू न धम्मो...पे०... ।

न धम्मो न धातु, न धातू न चक्खु...पे०... ।

न धम्मो न धातु, न धातू न मनोविज्जाणं । (चक्कं बन्धितब्बं ।)

धातुयमकमातिका निड्डिता ।

### सच्चयमकं

### पण्णत्तिवारो

**चत्तारि सच्चानि** (यम० १.सच्चयमक.१ आदयो) — दुक्खसच्चं समुदयसच्चं निरोधसच्चं मग्गसच्चं ।

### पदसोधनवारो

### अनुलोमं

दुक्खं दुक्खसच्चं, दुक्खसच्चं दुक्खं ।

समुदयो समुदयसच्चं, समुदयसच्चं समुदयो ।

निरोधो निरोधसच्चं, निरोधसच्चं निरोधो ।

मग्गो मग्गसच्चं, मग्गसच्चं मग्गो ।

### पच्चनीकं

न दुक्खं न दुक्खसच्चं, न दुक्खसच्चं न दुक्खं ।

न समुदयो न समुदयसच्चं, न समुदयसच्चं न समुदयो ।

न निरोधो न निरोधसच्चं, न निरोधसच्चं न निरोधो ।

न मग्गो न मग्गसच्चं, न मग्गसच्चं न मग्गो ।

पदसोधनमूलचक्रवारो

अनुलोमं

दुखं दुखसच्चं, सच्चा समुदयसच्चं ।  
 दुखं दुखसच्चं, सच्चा निरोधसच्चं ।  
 दुखं दुखसच्चं, सच्चा मगसच्चं ।  
 समुदयो समुदयसच्चं, सच्चा दुखसच्चं ।  
 समुदयो समुदयसच्चं, सच्चा निरोधसच्चं ।  
 समुदयो समुदयसच्चं, सच्चा मगसच्चं ।  
 निरोधो निरोधसच्चं, सच्चा दुखसच्चं ।  
 निरोधो निरोधसच्चं, सच्चा समुदयसच्चं ।  
 निरोधो निरोधसच्चं, सच्चा मगसच्चं ।  
 मगो मगसच्चं, सच्चा दुखसच्चं ।  
 मगो मगसच्चं, सच्चा समुदयसच्चं ।  
 मगो मगसच्चं, सच्चा निरोधसच्चं ।

पच्चनीकं

न दुखं न दुखसच्चं, न सच्चा न समुदयसच्चं ।  
 न दुखं न दुखसच्चं, न सच्चा न निरोधसच्चं ।  
 न दुखं न दुखसच्चं, न सच्चा न मगसच्चं ।  
 न समुदयो न समुदयसच्चं, न सच्चा न दुखसच्चं ।  
 न समुदयो न समुदयसच्चं, न सच्चा न निरोधसच्चं ।  
 न समुदयो न समुदयसच्चं, न सच्चा न मगसच्चं ।  
 न निरोधो न निरोधसच्चं, न सच्चा न दुखसच्चं ।  
 न निरोधो न निरोधसच्चं, न सच्चा न समुदयसच्चं ।  
 न निरोधो न निरोधसच्चं, न सच्चा न मगसच्चं ।  
 न मगो न मगसच्चं, न सच्चा न दुखसच्चं ।  
 न मगो न मगसच्चं, न सच्चा न समुदयसच्चं ।

न मग्गो न मग्गसच्चं, न सच्चा न निरोधसच्चं ।

सुद्धसच्चवारो

अनुलोमं

दुक्खं सच्चं, सच्चा दुक्खं ।

समुदयो सच्चं, सच्चा समुदयो ।

निरोधो सच्चं, सच्चा निरोधो ।

मग्गो सच्चं, सच्चा मग्गो ।

पच्चनीकं

न दुक्खं न सच्चं, न सच्चा न दुक्खं ।

न समुदयो न सच्चं, न सच्चा न समुदयो ।

न निरोधो न सच्चं, न सच्चा न निरोधो ।

न मग्गो न सच्चं, न सच्चा न मग्गो ।

सुद्धसच्चमूलचक्कवारो

अनुलोमं

दुक्खं सच्चं, सच्चा समुदयो ।

दुक्खं सच्चं, सच्चा निरोधो ।

दुक्खं सच्चं, सच्चा मग्गो ।

समुदयो सच्चं, सच्चा दुक्खं...पे०... सच्चा मग्गो ।

निरोधो सच्चं, सच्चा दुक्खं...पे०... सच्चा मग्गो ।

मग्गो सच्चं, सच्चा दुक्खं ।

मग्गो सच्चं, सच्चा समुदयो ।

मग्गो सच्चं, सच्चा निरोधो ।

पच्चनीकं

न दुक्खं न सच्चं, न सच्चा न समुदयो ।

न दुक्खं न सच्चं, न सच्चा न निरोधो ।

न दुक्खं न सच्चं, न सच्चा न मग्गो ।

न समुदयो न सच्चं, न सच्चा न दुक्खं...पे०... न सच्चा न मग्गो।

न निरोधो न सच्चं, न सच्चा न दुक्खं...पे०... न सच्चा न मग्गो।

न मग्गो न सच्चं, न सच्चा न दुक्खं।

न मग्गो न सच्चं, न सच्चा न समुदयो।

न मग्गो न सच्चं, न सच्चा न निरोधो।

सच्चयमकमातिका निट्ठिता।

**सङ्खारयमकं**

**पण्णत्तिवारो**

**तयो सङ्खारा** (यम० २.सङ्खारयमक.१ आदयो) — कायसङ्खारो वचीसङ्खारो चित्तसङ्खारो। अस्सासपस्सासा कायसङ्खारो, वितक्कविचारा वचीसङ्खारो, सज्जा च वेदना च चित्तसङ्खारो, ठपेत्वा वितक्कविचारे सब्बेपि चित्तसम्पयुत्तका धम्मा चित्तसङ्खारो।

**पदसोधनवारो**

**अनुलोमं**

कायो कायसङ्खारो, कायसङ्खारो कायो।

वची वचीसङ्खारो, वचीसङ्खारो वची।

चित्तं चित्तसङ्खारो, चित्तसङ्खारो चित्तं।

**पच्चनीकं**

न कायो न कायसङ्खारो, न कायसङ्खारो न कायो।

न वची न वचीसङ्खारो, न वचीसङ्खारो न वची।

न चित्तं न चित्तसङ्खारो, न चित्तसङ्खारो न चित्तं।

**पदसोधनमूलचक्कवारो**

**अनुलोमं**

कायो कायसङ्खारो, सङ्खारा वचीसङ्खारो।

कायो कायसङ्खारो, सङ्खारा चित्तसङ्खारो।

वची वचीसङ्खारो, सङ्खारा कायसङ्खारो।

वची वचीसङ्खारो, सङ्खारा चित्तसङ्खारो।

चित्तं चित्तसङ्खारो, सङ्खारा कायसङ्खारो।

चित्तं चित्तसङ्खारो, सङ्खारा वचीसङ्खारो।

### पच्चनीकं

न कायो न कायसङ्खारो, न सङ्खारा न वचीसङ्खारो ।  
 न कायो न कायसङ्खारो, न सङ्खारा न चित्तसङ्खारो ।  
 न वची न वचीसङ्खारो, न सङ्खारा न कायसङ्खारो ।  
 न वची न वचीसङ्खारो, न सङ्खारा न चित्तसङ्खारो ।  
 न चित्तं न चित्तसङ्खारो, न सङ्खारा न कायसङ्खारो ।  
 न चित्तं न चित्तसङ्खारो, न सङ्खारा न वचीसङ्खारो ।

### सुद्धसङ्खारवारो

#### अनुलोमं

कायसङ्खारो वचीसङ्खारो, वचीसङ्खारो कायसङ्खारो ।  
 कायसङ्खारो चित्तसङ्खारो, चित्तसङ्खारो कायसङ्खारो ।  
 वचीसङ्खारो चित्तसङ्खारो, चित्तसङ्खारो वचीसङ्खारो ।

### पच्चनीकं

न कायसङ्खारो न वचीसङ्खारो, न वचीसङ्खारो न कायसङ्खारो ।  
 न कायसङ्खारो न चित्तसङ्खारो, न चित्तसङ्खारो न कायसङ्खारो ।  
 न वचीसङ्खारो न चित्तसङ्खारो, न चित्तसङ्खारो न वचीसङ्खारो ।

सङ्खारयमकमातिका निट्ठिता ।

#### अनुसययमकं

**सत्तानुसया** (यम० २.अनुसययमक.१) — कामरागानुसयो पटिघानुसयो मानानुसयो दिट्ठानुसयो विचिकिच्छानुसयो भवरागानुसयो अविज्जानुसयो ।

अनुसययमकमातिका निट्ठिता ।

#### चित्तयमकं

#### सुद्धचित्तसामञ्जं

#### पुगलवारो

### १. उप्पादनिरोधकालसम्भेदवारो

यस्स चित्तं उप्पज्जति न निरुज्झति (यम० २.चित्तयमक.१ आदयो), तस्स चित्तं निरुज्झिस्सति न उप्पज्जिस्सति । यस्स वा पन चित्तं निरुज्झिस्सति न उप्पज्जिस्सति, तस्स चित्तं उप्पज्जति न निरुज्झति ।

यस्स चित्तं न उप्पज्जति निरुज्झति, तस्स चित्तं न निरुज्झिस्सति उप्पज्जिस्सति । यस्स वा पन चित्तं न निरुज्झिस्सति उप्पज्जिस्सति, तस्स चित्तं न











यं चित्तं उप्पज्जित्थ, नो च तं चित्तं उप्पन्नं, तं चित्तं उप्पज्जिस्सति । यं वा पन चित्तं उप्पज्जिस्सति, नो च तं चित्तं उप्पन्नं, तं चित्तं उप्पज्जित्थ ।

यं चित्तं न उप्पज्जित्थ, नो च तं चित्तं न उप्पन्नं, तं चित्तं न उप्पज्जिस्सति । यं वा पन चित्तं न उप्पज्जिस्सति, नो च तं चित्तं न उप्पन्नं, तं चित्तं न उप्पज्जित्थ ।

### १२. उप्पन्नुप्पज्जमानवारो

उप्पन्नं उप्पज्जमानं, उप्पज्जमानं उप्पन्नं ।

न उप्पन्नं न उप्पज्जमानं, न उप्पज्जमानं न उप्पन्नं ।

### १३. निरुद्धनिरुज्जमानवारो

निरुद्धं निरुज्जमानं, निरुज्जमानं निरुद्धं ।

न निरुद्धं न निरुज्जमानं, न निरुज्जमानं न निरुद्धं ।

### १४. अतिक्कन्तकालवारो

यं चित्तं उप्पज्जमानं खणं खणं वीतिक्कन्तं अतिक्कन्तकालं, निरुज्जमानं खणं खणं वीतिक्कन्तं अतिक्कन्तकालं तं चित्तं । यं वा पन चित्तं निरुज्जमानं खणं खणं वीतिक्कन्तं अतिक्कन्तकालं, उप्पज्जमानं खणं खणं वीतिक्कन्तं अतिक्कन्तकालं तं चित्तं ।

यं चित्तं न उप्पज्जमानं खणं खणं वीतिक्कन्तं अतिक्कन्तकालं, न निरुज्जमानं खणं खणं वीतिक्कन्तं अतिक्कन्तकालं तं चित्तं । यं वा पन चित्तं न निरुज्जमानं खणं खणं वीतिक्कन्तं अतिक्कन्तकालं, न उप्पज्जमानं खणं खणं वीतिक्कन्तं अतिक्कन्तकालं तं चित्तं ।

### सुद्धचित्तसामञ्जं

### पुग्गलधम्मवारो

### १. उप्पादनरोधकालसम्भेदवारो

यस्स यं चित्तं उप्पज्जति न निरुज्जति, तस्स तं चित्तं निरुज्जिस्सति न उप्पज्जिस्सति । यस्स वा पन यं चित्तं निरुज्जिस्सति न उप्पज्जिस्सति, तस्स तं चित्तं उप्पज्जति न निरुज्जति ।

यस्स यं चित्तं न उप्पज्जति निरुज्जति, तस्स तं चित्तं न निरुज्जिस्सति उप्पज्जिस्सति । यस्स वा पन यं चित्तं न निरुज्जिस्सति उप्पज्जिस्सति, तस्स तं चित्तं न उप्पज्जति निरुज्जति ।

### २. उप्पादुप्पन्नवारो

यस्स यं चित्तं उप्पज्जति, तस्स तं चित्तं उप्पन्नं । यस्स वा पन यं चित्तं उप्पन्नं, तस्स तं चित्तं उप्पज्जति ।

यस्स यं चित्तं न उप्पज्जति, तस्स तं चित्तं न उप्पन्नं । यस्स वा पन यं चित्तं न उप्पन्नं, तस्स तं चित्तं न उप्पज्जति ।

### ३. निरोधुप्पन्नवारो

यस्स यं चित्तं निरुज्जति, तस्स तं चित्तं उप्पन्नं । यस्स वा पन यं चित्तं उप्पन्नं, तस्स तं चित्तं निरुज्जति ।

यस्स यं चित्तं न निरुज्जति, तस्स तं चित्तं न उप्पन्नं । यस्स वा पन यं चित्तं न उप्पन्नं, तस्स तं चित्तं न निरुज्जति ।

### ४. उप्पादवारो

यस्स यं चित्तं उप्पज्जति, तस्स तं चित्तं उप्पज्जित्थ । यस्स वा पन यं चित्तं उप्पज्जित्थ, तस्स तं चित्तं उप्पज्जति ।





यस्स कुसलं चित्तं उप्पज्जति... पे०... यस्स अकुसलं चित्तं उप्पज्जति । यस्स अब्याकतं चित्तं उप्पज्जति । यस्स सुखाय वेदनाय सम्पयुतं चित्तं उप्पज्जति ।

(एतेन उपायेन याव सरणअरणा उद्धरितब्बा ।)

यस्स अरणं चित्तं उप्पज्जति न निरुज्झति, तस्स अरणं चित्तं निरुज्झिस्सति न उप्पज्जिस्सति । यस्स वा पन अरणं चित्तं निरुज्झिस्सति न उप्पज्जिस्सति, तस्स अरणं चित्तं उप्पज्जति न निरुज्झति ।

चित्तयमकमातिका निड्ढिता ।

**धम्मयमकं**

**पण्णात्तिवारो**

**पदसोधनवारो**

**अनुलोमं**

कुसला कुसला धम्मा (यम० ३.धम्मयमक.१ आदयो) । कुसला धम्मा कुसला ।

अकुसला अकुसला धम्मा । अकुसला धम्मा अकुसला ।

अब्याकता अब्याकता धम्मा । अब्याकता धम्मा अब्याकता ।

**पच्चनीकं**

न कुसला न कुसला धम्मा । न कुसला धम्मा न कुसला ।

न अकुसला न अकुसला धम्मा । न अकुसला धम्मा न अकुसला ।

न अब्याकता न अब्याकता धम्मा । न अब्याकता धम्मा न अब्याकता ।

**पदसोधनमूलचक्कवारो**

**अनुलोमं**

कुसला कुसला धम्मा । धम्मा अकुसला धम्मा ।

कुसला कुसला धम्मा । धम्मा अब्याकता धम्मा ।

अकुसला अकुसला धम्मा । धम्मा कुसला धम्मा ।

अकुसला अकुसला धम्मा । धम्मा अब्याकता धम्मा ।

अब्याकता अब्याकता धम्मा । धम्मा कुसला धम्मा ।

अब्याकता अब्याकता धम्मा । धम्मा अकुसला धम्मा ।

**पच्चनीकं**

न कुसला न कुसला धम्मा । न धम्मा न अकुसला धम्मा ।



न कुसला न कुसला धम्मा । न धम्मा न अब्याकता धम्मा ।

न अकुसला न अकुसला धम्मा । न धम्मा न कुसला धम्मा ।

न अकुसला न अकुसला धम्मा । न धम्मा न अब्याकता धम्मा ।

न अब्याकता न अब्याकता धम्मा । न धम्मा न कुसला धम्मा ।

न अब्याकता न अब्याकता धम्मा । न धम्मा न अकुसला धम्मा ।

**सुद्धधम्मवारो**

**अनुलोमं**

कुसला धम्मा । धम्मा कुसला ।

अकुसला धम्मा । धम्मा अकुसला ।

अब्याकता धम्मा । धम्मा अब्याकता ।

**पच्चनीकं**

न कुसला न धम्मा । न धम्मा न कुसला ।

न अकुसला न धम्मा । न धम्मा न अकुसला ।

न अब्याकता न धम्मा । न धम्मा न अब्याकता ।

**सुद्धधम्ममूलचक्कवारो**

**अनुलोमं**

कुसला धम्मा । धम्मा अकुसला ।

कुसला धम्मा । धम्मा अब्याकता ।

अकुसला धम्मा । धम्मा कुसला ।

अकुसला धम्मा । धम्मा अब्याकता ।

अब्याकता धम्मा । धम्मा कुसला ।

अब्याकता धम्मा । धम्मा अकुसला ।

**पच्चनीकं**

न कुसला न धम्मा । न धम्मा न अकुसला ।

न कुसला न धम्मा । न धम्मा न अब्याकता ।

न अकुसला न धम्मा । न धम्मा न कुसला ।

न अकुसला न धम्मा । न धम्मा न अब्याकता ।

न अब्याकता न धम्मा । न धम्मा न कुसला ।

न अब्याकता न धम्मा । न धम्मा न अकुसला ।

धम्मयमकमातिका निड्डिता ।

**इन्द्रिययमकं**

**पण्णत्तिवारो**

**बावीसतिन्द्रियानि** (यम० ३.इन्द्रिययमक.१ आदयो) — चक्खुन्द्रियं सोतिन्द्रियं घानिन्द्रियं जिह्विन्द्रियं कायिन्द्रियं मनिन्द्रियं इत्थिन्द्रियं पुरिसिन्द्रियं जीवितिन्द्रियं सुखिन्द्रियं दुक्खिन्द्रियं सोमनस्सिन्द्रियं दोमनस्सिन्द्रियं उपेक्खिन्द्रियं सद्धिन्द्रियं वीरियिन्द्रियं सतिन्द्रियं समाधिन्द्रियं पज्जिन्द्रियं अनज्जातज्जस्सामीतिन्द्रियं अज्जिन्द्रियं अज्जाताविन्द्रियं ।

**पदसोधनवारो**

**अनुलोमं**

चक्खु चक्खुन्द्रियं, चक्खुन्द्रियं चक्खु ।

सोतं सोतिन्द्रियं, सोतिन्द्रियं सोतं ।

घानं घानिन्द्रियं, घानिन्द्रियं घानं ।

जिह्वा जिह्विन्द्रियं, जिह्विन्द्रियं जिह्वा ।

कायो कायिन्द्रियं, कायिन्द्रियं कायो ।

मनो मनिन्द्रियं, मनिन्द्रियं मनो ।

इत्थी इत्थिन्द्रियं, इत्थिन्द्रियं इत्थी ।

पुरिसो पुरिसिन्द्रियं, पुरिसिन्द्रियं पुरिसो ।

जीवितं जीवितिन्द्रियं, जीवितिन्द्रियं जीवितं ।

सुखं सुखिन्द्रियं, सुखिन्द्रियं सुखं ।

दुक्खं दुक्खिन्द्रियं, दुक्खिन्द्रियं दुक्खं ।

सोमनस्सं सोमनस्सिन्द्रियं, सोमनस्सिन्द्रियं सोमनस्सं ।

दोमनस्सं दोमनस्सिन्द्रियं, दोमनस्सिन्द्रियं दोमनस्सं ।

उपेक्खा उपेक्खिन्द्रियं, उपेक्खिन्द्रियं उपेक्खा ।

सद्धा सद्धिन्द्रियं, सद्धिन्द्रियं सद्धा ।

वीरियं वीरियिन्द्रियं, वीरियिन्द्रियं वीरियं ।

सति सतिन्द्रियं, सतिन्द्रियं सति ।

समाधि समाधिन्द्रियं, समाधिन्द्रियं समाधि ।

पञ्चा पञ्चिन्द्रियं, पञ्चिन्द्रियं पञ्चा ।

अनञ्जातञ्जस्सामीति अनञ्जातञ्जस्सामीतिन्द्रियं, अनञ्जातञ्जस्सामीतिन्द्रियं अनञ्जातञ्जस्सामीति ।

अञ्जं अञ्जिन्द्रियं, अञ्जिन्द्रियं अञ्जं ।

अञ्जातावी अञ्जाताविन्द्रियं, अञ्जाताविन्द्रियं अञ्जातावी ।

### पच्चनीकं

न चक्खु न चक्खुन्द्रियं, न चक्खुन्द्रियं न चक्खु ।

न सोतं न सोतिन्द्रियं, न सोतिन्द्रियं न सोतं ।

न घानं न घानिन्द्रियं, न घानिन्द्रियं न घानं ।

न जिह्वा न जिह्विन्द्रियं, न जिह्विन्द्रियं न जिह्वा ।

न कायो न कायिन्द्रियं, न कायिन्द्रियं न कायो ।

न मनो न मनिन्द्रियं, न मनिन्द्रियं न मनो ।

न इत्थी न इत्थिन्द्रियं, न इत्थिन्द्रियं न इत्थी ।

न पुरिसो न पुरिसिन्द्रियं, न पुरिसिन्द्रियं न पुरिसो ।

न जीवितं न जीवितिन्द्रियं, न जीवितिन्द्रियं न जीवितं ।

न सुखं न सुखिन्द्रियं, न सुखिन्द्रियं न सुखं ।

न दुक्खं न दुक्खिन्द्रियं, न दुक्खिन्द्रियं न दुक्खं ।

न सोमनस्सं न सोमनस्सिन्द्रियं, न सोमनस्सिन्द्रियं न सोमनस्सं ।

न दोमनस्सं न दोमनस्सिन्द्रियं, न दोमनस्सिन्द्रियं न दोमनस्सं ।

न उपेक्खा न उपेक्खिन्द्रियं, न उपेक्खिन्द्रियं न उपेक्खा ।

न सद्भा न सद्भिन्द्रियं, न सद्भिन्द्रियं न सद्भा ।

न वीरियं न वीरियिन्द्रियं, न वीरियिन्द्रियं न वीरियं ।

न सति न सतिन्द्रियं, न सतिन्द्रियं न सति ।

न समाधि न समाधिन्द्रियं, न समाधिन्द्रियं न समाधि ।

न पञ्चा न पञ्चिन्द्रियं, न पञ्चिन्द्रियं न पञ्चा ।

न अनज्जातज्जस्सामीति न अनज्जातज्जस्सामीतिन्द्रियं, न अनज्जातज्जस्सामीतिन्द्रियं न अनज्जातज्जस्सामीति ।

न अज्जं न अज्जिन्द्रियं, न अज्जिन्द्रियं न अज्जं ।

न अज्जातावी न अज्जाताविन्द्रियं, न अज्जाताविन्द्रियं न अज्जातावी ।

### पदसोधनमूलचककवारो

#### अनुलोमं

चक्खु चक्खुन्द्रियं, इन्द्रिया सोतिन्द्रियं ।

चक्खु चक्खुन्द्रियं, इन्द्रिया घानिन्द्रियं ।

चक्खु चक्खुन्द्रियं, इन्द्रिया जिह्विन्द्रियं ।

चक्खु चक्खुन्द्रियं, इन्द्रिया कायिन्द्रियं ।

चक्खु चक्खुन्द्रियं, इन्द्रिया मनिन्द्रियं ।

चक्खु चक्खुन्द्रियं, इन्द्रिया इत्थिन्द्रियं ।

चक्खु चक्खुन्द्रियं, इन्द्रिया पुरिसिन्द्रियं ।

चक्खु चक्खुन्द्रियं, इन्द्रिया जीवितिन्द्रियं ।

चक्खु चक्खुन्द्रियं, इन्द्रिया सुखिन्द्रियं ।

चक्खु चक्खुन्द्रियं, इन्द्रिया दुक्खिन्द्रियं ।

चक्खु चक्खुन्द्रियं, इन्द्रिया सोमनस्सिन्द्रियं ।

चक्खु चक्खुन्द्रियं, इन्द्रिया दोमनस्सिन्द्रियं ।

चक्खु चक्खुन्द्रियं, इन्द्रिया उपेक्खिन्द्रियं ।

चक्खु चक्खुन्द्रियं, इन्द्रिया सद्धिन्द्रियं ।

चक्खु चक्खुन्द्रियं, इन्द्रिया वीरियिन्द्रियं ।

चक्खु चक्खुन्द्रियं, इन्द्रिया सतिन्द्रियं ।

चक्खु चक्खुन्द्रियं, इन्द्रिया समाधिन्द्रियं ।

चक्खु चक्खुन्द्रियं, इन्द्रिया पज्जिन्द्रियं ।

चक्खु चक्खुन्द्रियं, इन्द्रिया अनज्जातज्जस्सामीतिन्द्रियं ।

चक्खु चक्खुन्द्रियं, इन्द्रिया अज्जिन्द्रियं ।

चक्खु चक्खुन्द्रियं, इन्द्रिया अज्जाताविन्द्रियं ।

सोतं सोतिन्द्रियं, इन्द्रिया चक्षुन्द्रियं...पे०... ।  
 सोतं सोतिन्द्रियं, इन्द्रिया अज्जाताविन्द्रियं ।  
 घानं घानिन्द्रियं, इन्द्रिया चक्षुन्द्रियं...पे०... ।  
 घानं घानिन्द्रियं, इन्द्रिया अज्जाताविन्द्रियं ।  
 जिह्वा जिह्विन्द्रियं, इन्द्रिया चक्षुन्द्रियं...पे०... ।  
 जिह्वा जिह्विन्द्रियं, इन्द्रिया अज्जाताविन्द्रियं ।  
 कायो कायिन्द्रियं, इन्द्रिया चक्षुन्द्रियं...पे०... ।  
 कायो कायिन्द्रियं, इन्द्रिया अज्जाताविन्द्रियं ।  
 मनो मनिन्द्रियं, इन्द्रिया चक्षुन्द्रियं...पे०... ।  
 मनो मनिन्द्रियं, इन्द्रिया अज्जाताविन्द्रियं ।  
 इत्थी इत्थिन्द्रियं, इन्द्रिया चक्षुन्द्रियं...पे०... ।  
 इत्थी इत्थिन्द्रियं, इन्द्रिया अज्जाताविन्द्रियं ।  
 पुरिसो पुरिसिन्द्रियं, इन्द्रिया चक्षुन्द्रियं...पे०... ।  
 पुरिसो पुरिसिन्द्रियं, इन्द्रिया अज्जाताविन्द्रियं ।  
 जीवितं जीवितिन्द्रियं, इन्द्रिया चक्षुन्द्रियं...पे०... ।  
 जीवितं जीवितिन्द्रियं, इन्द्रिया अज्जाताविन्द्रियं ।  
 सुखं सुखिन्द्रियं, इन्द्रिया चक्षुन्द्रियं...पे०... ।  
 सुखं सुखिन्द्रियं, इन्द्रिया अज्जाताविन्द्रियं ।  
 दुक्खं दुक्खिन्द्रियं, इन्द्रिया चक्षुन्द्रियं...पे०... ।  
 दुक्खं दुक्खिन्द्रियं, इन्द्रिया अज्जाताविन्द्रियं ।  
 सोमनस्सं सोमनस्सिन्द्रियं, इन्द्रिया चक्षुन्द्रियं...पे०... ।  
 सोमनस्सं सोमनस्सिन्द्रियं, इन्द्रिया अज्जाताविन्द्रियं ।  
 दोमनस्सं दोमनस्सिन्द्रियं, इन्द्रिया चक्षुन्द्रियं...पे०... ।  
 दोमनस्सं दोमनस्सिन्द्रियं, इन्द्रिया अज्जाताविन्द्रियं ।  
 उपेक्खा उपेक्खिन्द्रियं, इन्द्रिया चक्षुन्द्रियं...पे०... ।  
 उपेक्खा उपेक्खिन्द्रियं, इन्द्रिया अज्जाताविन्द्रियं ।

सद्धा सद्धिन्द्रियं, इन्द्रिया चक्खुन्द्रियं...पे०... ।

सद्धा सद्धिन्द्रियं, इन्द्रिया अज्जाताविन्द्रियं ।

वीरियं वीरियिन्द्रियं, इन्द्रिया चक्खुन्द्रियं...पे०... ।

वीरियं वीरियिन्द्रियं, इन्द्रिया अज्जाताविन्द्रियं ।

सति सतिन्द्रियं, इन्द्रिया चक्खुन्द्रियं...पे०... ।

सति सतिन्द्रियं, इन्द्रिया अज्जाताविन्द्रियं ।

समाधि समाधिन्द्रियं, इन्द्रिया चक्खुन्द्रियं...पे०... ।

समाधि समाधिन्द्रियं, इन्द्रिया अज्जाताविन्द्रियं ।

पज्जा पज्जिन्द्रियं, इन्द्रिया चक्खुन्द्रियं...पे०... ।

पज्जा पज्जिन्द्रियं, इन्द्रिया अज्जाताविन्द्रियं ।

अनज्जातज्जस्सामीति अनज्जातज्जस्सामीतिन्द्रियं, इन्द्रिया चक्खुन्द्रियं...पे०... ।

अनज्जातज्जस्सामीति अनज्जातज्जस्सामीतिन्द्रियं, इन्द्रिया अज्जाताविन्द्रियं ।

अज्जं अज्जिन्द्रियं, इन्द्रिया चक्खुन्द्रियं...पे०... ।

अज्जं अज्जिन्द्रियं, इन्द्रिया अज्जाताविन्द्रियं ।

अज्जातावी अज्जाताविन्द्रियं, इन्द्रिया चक्खुन्द्रियं...पे०... ।

अज्जातावी अज्जाताविन्द्रियं, इन्द्रिया अज्जिन्द्रियं ।

### पच्चनीकं

न चक्खु न चक्खुन्द्रियं, न इन्द्रिया न सोतिन्द्रियं ।

न चक्खु न चक्खुन्द्रियं, न इन्द्रिया न धानिन्द्रियं ।

न चक्खु न चक्खुन्द्रियं, न इन्द्रिया न जिह्मिन्द्रियं ।

न चक्खु न चक्खुन्द्रियं, न इन्द्रिया न कायिन्द्रियं ।

न चक्खु न चक्खुन्द्रियं, न इन्द्रिया न मनिन्द्रियं ।

न चक्खु न चक्खुन्द्रियं, न इन्द्रिया न इत्थिन्द्रियं ।

न चक्खु न चक्खुन्द्रियं, न इन्द्रिया न पुरिसिन्द्रियं ।

न चक्खु न चक्खुन्द्रियं, न इन्द्रिया न जीवितिन्द्रियं ।

न चक्खु न चक्खुन्द्रियं, न इन्द्रिया न सुखिन्द्रियं ।



न वीरियं न वीरियिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न सति न सतिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न समाधि न समाधिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न पज्जा न पज्जिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न अनज्जातज्जस्सामीति न अनज्जातज्जस्सामीतिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न अज्जं न अज्जिन्द्रियं, न इन्द्रिया न चक्खुन्द्रियं...पे०... न इन्द्रिया न अज्जाताविन्द्रियं ।  
 न अज्जातावी न अज्जाताविन्द्रियं, न इन्द्रिया न चक्खुन्द्रियं...पे०... न इन्द्रिया न अज्जिन्द्रियं ।

### सुद्धिन्द्रियवारो

#### अनुलोमं

चक्खु इन्द्रियं, इन्द्रिया चक्खु ।  
 सोतं इन्द्रियं, इन्द्रिया सोतं ।  
 घानं इन्द्रियं, इन्द्रिया घानं ।  
 जिह्वा इन्द्रियं, इन्द्रिया जिह्वा ।  
 कायो इन्द्रियं, इन्द्रिया कायो ।  
 मनो इन्द्रियं, इन्द्रिया मनो ।  
 इत्थी इन्द्रियं, इन्द्रिया इत्थी ।  
 पुरिसो इन्द्रियं, इन्द्रिया पुरिसो ।  
 जीवितं इन्द्रियं, इन्द्रिया जीवितं ।  
 सुखं इन्द्रियं, इन्द्रिया सुखं ।  
 दुक्खं इन्द्रियं, इन्द्रिया दुक्खं ।  
 सोमनस्सं इन्द्रियं, इन्द्रिया सोमनस्सं ।  
 दोमनस्सं इन्द्रियं, इन्द्रिया दोमनस्सं ।  
 उपेक्खा इन्द्रियं, इन्द्रिया उपेक्खा ।  
 सद्दा इन्द्रियं, इन्द्रिया सद्दा ।  
 वीरियं इन्द्रियं, इन्द्रिया वीरियं ।  
 सति इन्द्रियं, इन्द्रिया सति ।



समाधि इन्द्रियं, इन्द्रिया समाधि ।

पज्जा इन्द्रियं, इन्द्रिया पज्जा ।

अनज्जातज्जस्सामीति इन्द्रियं, इन्द्रिया अनज्जातज्जस्सामीति ।

अज्जं इन्द्रियं, इन्द्रिया अज्जं ।

अज्जातावी इन्द्रियं, इन्द्रिया अज्जातावी ।

### पच्चनीकं

न चक्खु न इन्द्रियं, न इन्द्रिया न चक्खु ।

न सोतं न इन्द्रियं, न इन्द्रिया न सोतं ।

न घानं न इन्द्रियं, न इन्द्रिया न घानं ।

न जिक्खा न इन्द्रियं, न इन्द्रिया न जिक्खा ।

न कायो न इन्द्रियं, न इन्द्रिया न कायो ।

न मनो न इन्द्रियं, न इन्द्रिया न मनो ।

न इत्थी न इन्द्रियं, न इन्द्रिया न इत्थी ।

न पुरिसो न इन्द्रियं, न इन्द्रिया न पुरिसो ।

न जीवितं न इन्द्रियं, न इन्द्रिया न जीवितं ।

न सुखं न इन्द्रियं, न इन्द्रिया न सुखं ।

न दुक्खं न इन्द्रियं, न इन्द्रिया न दुक्खं ।

न सोमनस्सं न इन्द्रियं, न इन्द्रिया न सोमनस्सं ।

न दोमनस्सं न इन्द्रियं, न इन्द्रिया न दोमनस्सं ।

न उपेक्खा न इन्द्रियं, न इन्द्रिया न उपेक्खा ।

न सद्धा न इन्द्रियं, न इन्द्रिया न सद्धा ।

न वीरियं न इन्द्रियं, न इन्द्रिया न वीरियं ।

न सति न इन्द्रियं, न इन्द्रिया न सति ।

न समाधि न इन्द्रियं, न इन्द्रिया न समाधि ।

न पज्जा न इन्द्रियं, न इन्द्रिया न पज्जा ।

न अनज्जातज्जस्सामीति न इन्द्रियं, न इन्द्रिया न अनज्जातज्जस्सामीति ।

न अज्जं न इन्द्रियं, न इन्द्रिया न अज्जं ।

न अज्जातावी न इन्द्रियं, न इन्द्रिया न अज्जातावी ।

### सुद्धिन्द्रियमूलचक्कवारो

#### अनुलोमं

चक्खु इन्द्रियं, इन्द्रिया सोतं ।

चक्खु इन्द्रियं, इन्द्रिया घानं ।

चक्खु इन्द्रियं, इन्द्रिया जिक्खा ।

चक्खु इन्द्रियं, इन्द्रिया कायो ।

चक्खु इन्द्रियं, इन्द्रिया मनो ।

चक्खु इन्द्रियं, इन्द्रिया इत्थी ।

चक्खु इन्द्रियं, इन्द्रिया पुरिसो ।

चक्खु इन्द्रियं, इन्द्रिया जीवितं ।

चक्खु इन्द्रियं, इन्द्रिया सुखं ।

चक्खु इन्द्रियं, इन्द्रिया दुक्खं ।

चक्खु इन्द्रियं, इन्द्रिया सोमनस्सं ।

चक्खु इन्द्रियं, इन्द्रिया दोमनस्सं ।

चक्खु इन्द्रियं, इन्द्रिया उपेक्खा ।

चक्खु इन्द्रियं, इन्द्रिया सद्धा ।

चक्खु इन्द्रियं, इन्द्रिया वीरियं ।

चक्खु इन्द्रियं, इन्द्रिया सति ।

चक्खु इन्द्रियं, इन्द्रिया समाधि ।

चक्खु इन्द्रियं, इन्द्रिया पज्जा ।

चक्खु इन्द्रियं, इन्द्रिया अनज्जातज्जस्सामीति ।

चक्खु इन्द्रियं, इन्द्रिया अज्जं ।

चक्खु इन्द्रियं, इन्द्रिया अज्जातावी ।

सोतं इन्द्रियं, इन्द्रिया चक्खु... पे० ... इन्द्रिया अज्जातावी ।

[illegible]

पच्यनीकं

न चक्षु न इन्द्रियं, न इन्द्रिया न सोतं ।  
न चक्षु न इन्द्रियं, न इन्द्रिया न घानं ।  
न चक्षु न इन्द्रियं, न इन्द्रिया न जिह्वा ।  
न चक्षु न इन्द्रियं, न इन्द्रिया न कायो ।  
न चक्षु न इन्द्रियं, न इन्द्रिया न मनो ।

न चक्खु न इन्द्रियं, न इन्द्रिया न इत्थी ।  
 न चक्खु न इन्द्रियं, न इन्द्रिया न पुरिसो ।  
 न चक्खु न इन्द्रियं, न इन्द्रिया न जीवितं ।  
 न चक्खु न इन्द्रियं, न इन्द्रिया न सुखं ।  
 न चक्खु न इन्द्रियं, न इन्द्रिया न दुक्खं ।  
 न चक्खु न इन्द्रियं, न इन्द्रिया न सोमनस्सं ।  
 न चक्खु न इन्द्रियं, न इन्द्रिया न दोमनस्सं ।  
 न चक्खु न इन्द्रियं, न इन्द्रिया न उपेक्खा ।  
 न चक्खु न इन्द्रियं, न इन्द्रिया न सद्धा ।  
 न चक्खु न इन्द्रियं, न इन्द्रिया न वीरियं ।  
 न चक्खु न इन्द्रियं, न इन्द्रिया न सति ।  
 न चक्खु न इन्द्रियं, न इन्द्रिया न समाधि ।  
 न चक्खु न इन्द्रियं, न इन्द्रिया न पज्जा ।  
 न चक्खु न इन्द्रियं, न इन्द्रिया न अनज्जातज्जस्सामीति ।  
 न चक्खु न इन्द्रियं, न इन्द्रिया न अज्जं ।  
 न चक्खु न इन्द्रियं, न इन्द्रिया न अज्जातावी ।  
 न सोतं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न घानं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न जिह्वा न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न कायो न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न मनो न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न इत्थी न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न पुरिसो न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न जीवितं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न सुखं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न दुक्खं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।

न सोमनस्सं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न दोमनस्सं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न उपेक्खा न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न सद्धा न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न वीरियं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न सति न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न समाधि न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न पज्जा न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न अनज्जातज्जस्सामीति न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न अज्जं न इन्द्रियं, न इन्द्रिया न चक्खु...पे०... न इन्द्रिया न अज्जातावी ।  
 न अज्जातावी न इन्द्रियं, न इन्द्रिया न चक्खु...पे०... न इन्द्रिया न अज्जं ।

इन्द्रिययमकमातिका निड्डिता ।

यमकमातिका निड्डिता ।

## ७. पट्टानमातिका

हेतुपच्चयो आरम्भणपच्चयो अधिपतिपच्चयो अनन्तरपच्चयो समनन्तरपच्चयो सहजातपच्चयो अज्जमज्जपच्चयो निस्सयपच्चयो  
 उपनिस्सयपच्चयो पुरेजातपच्चयो पच्छाजातपच्चयो आसेवनपच्चयो कम्मपच्चयो विपाकपच्चयो आहारपच्चयो इन्द्रियपच्चयो ज्ञानपच्चयो मग्गपच्चयो  
 सम्पयुत्तपच्चयो विष्णयुत्तपच्चयो अत्थिपच्चयो नत्थिपच्चयो विगतपच्चयो अविगतपच्चयोति (पट्टा० १.१.पच्चयुद्देस) ।

पट्टानमातिका निड्डिता ।

### निगमनं

सत्तप्पकरणनामतो, अभिधम्ममदेसयि ।  
 देवातिदेवो देवानं, देवलोकमिह तं पुरे ॥

तस्सायं मातिका सब्बा, सकलस्सापि उद्धरा ।  
 चिरद्वितत्थं धम्मस्स, तं पग्गणहन्तु साधवो ॥

द्वावीसति तिका चेव, तथेव हेतुगोच्छकं ।  
 चूळन्तरदुका सत्त, गोच्छका च ततो परं ॥

महन्तरदुका चापि, ततो चुद्दस निद्विसे ।  
 गोच्छकानि दुवे पिड्ढि-दुकानिद्वारसेदिसा ॥

द्वाचत्तालीस सुत्तन्त-दुका तेवन्ति पज्जधा ।  
 सत्तप्पकरणिका भिन्ना, धम्मसङ्गणिमातिका ॥

अभिधम्ममातिकापाळि निट्ठिता ।

॥ नमो तस्स भगवतो अरहतो सम्मासम्बुद्धस्स ॥

## मोहविच्छेदनी

गन्थारम्भकथा

१. कारुञ्जभावितं यस्स, जाणचक्खु महोदयं ।  
अन्धभूतस्स लोकस्स, जातं सामञ्जलोचनं ॥
२. तं बुद्धं सुगतं धीरं, ससद्दम्मं ससावकं ।  
वन्दित्वानुस्सरित्वा च, थोमेत्वा च विनायकं ॥
३. थरे च थिरसीलादि-गुणालङ्कारसोभिते ।  
सासनुज्जोतके धीरे, पुब्बके वंसपालके ॥
४. विसुद्धिदेवदेवो यं, देवानं तिदसालये ।  
पज्जाय देसयी तस्स, अभिधम्मस्स मातिका ॥
५. या तस्सा विपुलत्थाय, धम्मसङ्गणिआदिहि ।  
अनेकेहि पकारेहि, पाळिअट्ठकथाहि च ॥
६. अत्थो विनिच्छयो चेव,  
विभत्तो सागरूपमो ।  
अनन्तनयवोकिण्णो,  
दुक्खोगाहो यतो ततो ॥
७. समासेनाभिधम्मत्थं, मातिकामुखतोखिलं ।  
जातुकामेहि सुद्धेहि, अन्तेवासीहि याचितो ॥
८. सङ्कट्ठित्वान नयतो, पाळिअट्ठकथागतं ।  
अत्थं विनिच्छयञ्चेव, समासेन निराकुलं ॥
९. सामत्थियगतं अत्थं, निकायन्तरनिस्सटं ।  
महाविहारवासीनं, कमाभतनयानुगं ॥
१०. दीपयन्तो नयञ्जूनं, सदा सम्मोदकारिणिं ।  
मोहविच्छेदनिं नाम, करिस्सामत्थवण्णनन्ति ॥

गन्थारम्भकथा निट्ठिता ।

## १. धम्मसङ्गणीमातिका

तिकपदत्थवण्णना

तत्थ अभिधम्मस्स मातिकाति एत्थ केनट्ठेन अभिधम्मो? धम्मातिरेकधम्मविसेसट्ठेन । अतिरेकविसेसत्थदीपको हि एत्थ अभि-सद्वो “बाळ्हा मे दुक्खा वेदना अभिक्कमन्ति, नो पटिक्कमन्ति (सं० नि० ४.८७; ५.१९५, १०२२; म० नि० ३.३८४, ३८९), अभिक्कन्तवण्णा”तिआदीसु (सं० नि० १.१;

खु० पा० ५.१; सु० नि० मङ्गलसुत्त; वि० व० ८५७) विय, तस्मा यथा समुस्सितेसु बहूसु छत्तेसु चेव धजेसु च यं अतिरेकप्पमाणं, विसेसवण्णसण्ठानञ्च छत्तं, तं अतिच्छत्तं, यो अतिरेकप्पमाणो, विसेसवण्णसण्ठानो च धजो, सो अतिद्धजोति च वुच्चति, एवमेव अयम्पि धम्मो धम्मातिरेकधम्मविसेसद्वेन “अभिधम्मो”ति वुच्चति। भगवता हि सुत्तन्तं पत्वा खन्धायतनधातुसच्चइन्द्रियपच्चयाकारादयो धम्मा एकदेसेन विभत्ता, न निष्पदेसेन, अभिधम्मं पत्वा पन अनेकेहि नयविसेसेहि निष्पदेसतोव विभत्ता। एवं धम्मातिरेकधम्मविसेसद्वेन “अभिधम्मो”ति वेदितव्वो।

केनद्वेन **मातिका**? मातुसमद्वेन। माता वियाति हि मातिका यथा पदुमिकं मुखन्ति। यथा हि माता नानाविधे पुत्ते पसवति, ते पालेति, पोसेति च, एवमयम्पि नानाविधे धम्मे, अत्थे च पसवति, ते च अविनस्समाने पालेति, पोसेति च, तस्मा “मातिका”ति वुच्चति। मातिकं हि निस्साय धम्मसङ्गणीआदिसत्तप्पकरणवसेन वित्थारियमाना अनन्तापरिमाणा धम्मा, अत्था च ताय पसुता, पालिता, पोसिता विय च होन्ति। तथा हि **धम्मसङ्गणिप्पकरणे** चतस्सो विभत्तियो चित्तविभत्ति रूपविभत्ति निक्खेपरासि अत्थुद्धारोति। तत्थ नानानयेहि एकूननवुत्तिचित्तविभाविनी चित्तविभत्ति वित्थारियमाना अनन्तापरिमाणभाणवारा होति, तदनन्तरं एकविधादिना रूपविभाविनी रूपविभत्ति वित्थारियमाना अनन्तापरिमाणभाणवारा होति, तदनन्तरं मूलखन्धद्वारादीनि निक्खिपित्वा देसितो निक्खेपरासि वित्थारियमानो अनन्तापरिमाणभाणवारो होति, तदनन्तरं तेपिटकस्स बुद्धवचनस्स अट्ठकथाभूतो अत्थुद्धारो वित्थारियमानो अनन्तापरिमाणभाणवारो होति। एवमिदं धम्मसङ्गणिप्पकरणं वाचनामग्गतो अतिरेकतेरसमत्तभाणवारम्पि समानं वित्थारियमानं अनन्तापरिमाणभाणवारं होति।

तथा **विभङ्गप्पकरणे** खन्धविभङ्गो

आयतनधातुसच्चइन्द्रियपच्चयाकारसतिपट्टानसम्मप्यधानइद्धिपादबोज्झङ्गमग्गङ्गज्ञानअप्पमज्जासिक्खापदपटिसम्भिदाजाणखुदकवत्थुधम्महृदयविभङ्गाति अट्टारस विभङ्गा विभत्ता, ते सुत्तन्तभाजनीयअभिधम्मभाजनीयादिनानानयेहि वित्थारियमाना पच्चेकं अनन्तापरिमाणभाणवारा होन्ति। एवमिदं विभङ्गप्पकरणं वाचनामग्गतो पच्चित्तिसमत्तभाणवारम्पि समानं वित्थारियमानं अनन्तापरिमाणभाणवारं होति।

तथा **धातुकथापकरणं** “सङ्गहो असङ्गहो”तिआदिना चुहसविधेन विभत्तं वाचनामग्गतो अतिरेकछभाणवारमत्तम्पि समानं वित्थारियमानं अनन्तापरिमाणभाणवारं होति।

तथा **पुग्गलपञ्जत्तिप्पकरणं** खन्धपञ्जत्ति आयतनधातुसच्चइन्द्रियपुग्गलपञ्जत्तीति छब्बिधेन विभत्तं वाचनामग्गतो अतिरेकपञ्चभाणवारमत्तम्पि वित्थारियमानं अनन्तापरिमाणभाणवारं होति।

तथा **कथावत्थुप्पकरणं** सकवादे पञ्च सुत्तसतानि, परवादे पञ्च सुत्तसतानीति सुत्तसहस्सं समोधानेत्वा विभत्तं वाचनामग्गतो सङ्गीतिआरोपितनयेन दीघनिकायप्पमाणम्पि वित्थारियमानं अनन्तापरिमाणभाणवारं होति।

तथा **यमकप्पकरणं** मूलयमकं खन्धायतनधातुसच्चसङ्खारअनुसयचित्तधम्मइन्द्रिययमकन्ति दसविधेन विभत्तं वाचनामग्गतो वीसभाणवारसत्तम्पि वित्थारियमानं अनन्तापरिमाणभाणवारं होति।

**पट्टानप्पकरणं** हेतुपच्चयआरम्भणपच्चयादिचतुर्वीसतिपच्चये गहेत्वा तिकपट्टानादिचतुर्वीसतिविधेन विभत्तं पच्चेकं कतिपयभाणवारम्पि वित्थारियमानं अनन्तापरिमाणभाणवारं होति। एवं अनन्तापरिमाणानं धम्मानं, अत्थानञ्च पसवनतो, पालनतो, पोसनतो च “माता वियाति मातिका”ति वुच्चति। पालनपोसनञ्चेत्थ सम्मुट्ठानं, विरुद्धानञ्च पाळिअत्थानं मातिकानुसारेण सल्लक्खेत्वा समानयनतो, रक्खणतो च वेदितव्वं। सा पनायं परिच्छेदतो धम्मसङ्गणीमातिका विभङ्गमातिका धातुकथामातिका पुग्गलपञ्जत्तिमातिका कथावत्थुमातिका यमकमातिका पट्टानमातिकाति सत्तन्नं पकरणानं आदिमिह ठपिता सत्तविधा होति।

तत्थ धम्मसङ्गणीमातिका आदि, सापि तिकमातिका दुकमातिकाति दुविधा। तत्थ द्वावीसति तिका **तिकमातिका** नाम। द्वेचत्तालीससतदुका **दुकमातिका** नाम, सा पुन आहच्चभासिता सावकभासिताति दुविधा। तत्थ द्वावीसति तिका चेव, “हेतू धम्मा न हेतू धम्मा...पे०... सरणा धम्मा अरणा धम्मा”ति इमे च सत्तं दुकाति अयं **आहच्चभासिता** सम्मासम्बुद्धदेसिता सत्तन्नं पकरणानं मातिका नाम, तदनन्तरा “विज्जाभागिनो धम्मा अविज्जाभागिनो धम्मा...पे०... खयेजाणं अनुष्णादेजाणं”न्ति इमे द्वाचत्तालीस सुत्तन्तिकदुका धम्मसेनापतिसारिपुत्तत्थेरेन ठपितत्ता **सावकभासिता** नाम। इमे ठपेन्तो पन थेरो न सामुक्कंसिकेन अत्तनो जाणेन ठपेसि, एकुत्तरियं पन एककनिपातदुकनिपातसङ्गीतिसुत्तदसुत्तरसुत्तेहि समोधानेत्वा आभिधम्मिकत्थेरानं सुत्तन्तं पत्वा अकिलमनत्थं ठपेसि।

सा पुन सप्पदेसनप्पदेसवसेन द्वे कोट्टासा होन्ति। एत्थ हि नव तिका, एकसत्तति च दुका सप्पदेसानं सावसेसानं नामरूपानं परिग्गहितत्ता **सप्पदेसा** नाम, अवसेसा तेरस तिका, एकसत्तति च दुका निष्पदेसानं निरवसेसानं नामरूपानं गहितत्ता **निष्पदेसा** नाम। तेसं विभागो तत्थ तत्थेव आवि भविस्सति। तथा नामलाभवसेन द्विधा। सब्बेव हि एते तिकदुका आदिपदवसेन, सब्बपदवसेन चाति द्विधा नामं लभन्ति। तत्थ “कुसला धम्मा, अकुसला धम्मा,

अव्याकता धम्मा”ति अयं ताव आदिपदवसेन लद्धनामो कुसलत्तिको नाम । “सुखाय वेदनाय सम्पयुत्ता धम्मा...पे०... धम्मा”ति अयं सब्बपदवसेन लद्धनामो वेदनात्तिको नाम । एवं सब्बेसम्पि तिकदुकानं नामं वेदितव्वं ।

सा पनेसा पञ्चदसहि परिच्छेदेहि ववत्थिता । तिकानं हि एको परिच्छेदो, दुकानं चुदस । “हेतू धम्मा नहेतू धम्मा”ति आदयो हि छ दुका गन्थतो च अत्थतो च अञ्जमञ्जसम्बन्धेन कणिका विय, घटा विय च हुत्वा ठितत्ता “हेतुगोच्छको”ति वुच्चति । ततो अपरे “सप्पच्चया धम्मा”ति आदयो सत्त दुका अञ्जमञ्जं असम्बन्धा केवलं दुकसामञ्जेन उच्चिनित्वा गोच्छकन्तरे ठपितत्ता, अञ्जेहि च अन्तरदुकेहि चूळकत्ता “चूळन्तरदुका”ति वेदितव्वा । ततो परं आसवदुकादीनं छन्नं दुकानं वसेन आसवगोच्छको नाम । ततो संयोजनदुकादीनं छन्नं वसेन संयोजनगोच्छको नाम । तथा गन्थओघयोगनीवरणदुकादीनं छन्नं छन्नं वसेन गन्थओघयोगनीवरणगोच्छका नाम । परामासदुकादीनं पञ्चन्नं वसेन परामासगोच्छको नाम । ततो परं सारम्मणदुकादयो चतुदस दुका महन्तरदुका नाम । ततो परं उपादानदुकादयो छ दुका उपादानगोच्छको नाम । ततो किलेसदुकादयो अट्टदुका किलेसगोच्छको नाम । ततो परं दस्सेनपहातव्वदुकादयो अट्टारस दुका अभिधम्ममात्तिकाय परियोसाने ठपितत्ता पिट्टिदुका नाम । विज्जाभागियदुकादयो पन द्वाचत्तालीस दुका सुत्तन्तिकदुका नाम । एवमेतस्सा पञ्चदसहि परिच्छेदेहि ववत्थिताय ताव अयं अत्थवण्णना भविस्सति ।

### कुसलत्तिकवण्णना

यस्मा पनेत्थ तिकमात्तिका आदि, तत्थापि कुसलत्तिको आदि, तस्मा कुसलत्तिकस्स ताव —

अत्थतो भूमिभेदा च, पच्चेकं सम्पयोगतो ।  
उद्देसतो च धम्मानं, लक्खणादिविभागतो ॥

सङ्गहा सुज्जतो चेव, विसयादिपभेदतो ।  
यथानुरूपं सब्बत्थ, वेदितव्वो विनिच्छयो ॥

तत्थ अत्थतो ताव कुसला धम्माति एत्थ कुसलसद्दो आरोग्यानवज्जछेकसुखविपाकेसु दिस्सति । अयं हि “कच्चि नु भोतो कुसलं, कच्चि भोतो अनामच”न्ति आदीसु (जा० १.१५.२४६; २.२०.१२९) आरोग्ये दिस्सति । “कतमो पन, भन्ते, कायसमाचारो कुसलो? यो खो, महाराज, कायसमाचारो अनवज्जो”ति आदीसु (म० नि० २.३६१) अनवज्जे । “कुसलो त्वं रथस्स अङ्गपच्चङ्गान”न्ति आदीसु (म० नि० २.८७) छेके । “कुसलस्स कम्मस्स कतत्ता उपचितत्ता”ति आदीसु (ध० स० ४३१) सुखविपाके । स्वायमिध आरोग्येपि अनवज्जेपि सुखविपाकेपि वत्तति । यथेव हि रूपकाये निब्याधिताय आरोग्यद्वेन कुसलं वुत्तं, एवं अरूपधम्मेषि किलेसव्याधिनो अभावेन आरोग्यद्वेन कुसलं वेदितव्वं । किलेसवज्जस्स पन अभावा अनवज्जद्वेन कुसलं ।

धम्म-सद्दो पनायं परियत्तिहेतुगुणनिस्सत्तनिज्जीवतादीसु दिस्सति । अयं हि “धम्मं परियापुणाति सुत्तं गेय्य”न्ति आदीसु (अ० नि० ४.१०२) परियत्तियं दिस्सति । “हेतुमिहि जाणं धम्मपटिसम्भेदा”ति आदीसु (विभ० ७२०) हेतुमिहि । “न हि धम्मो अधम्मो च, उभो समविपाकिनो”ति आदीसु (थेरगा० ३०४) गुणे । “धम्मेषु धम्मानुपस्सी विहरती”ति आदीसु (दी० नि० २.३७३) निस्सत्तनिज्जीवतायं, स्वायमिधापि निस्सत्तनिज्जीवतायमेव वट्ठति ।

वचनत्थो पनेत्थ — कुच्छित्ते पापधम्मे सलयन्ति चलयन्ति कम्मेन्ति विद्धंसेन्तीति कुसला । कुच्छित्तेन वा आकारेन सयन्तीति कुसा, ते कुसे लुनन्ति छिन्दन्तीति कुसला । कुच्छित्तानं वा सानतो तनुकरणतो जाणं कुसं नाम, तेन कुसेन लातव्वा परिवत्तेतव्वाति कुसला । अथ वा कोसल्लं वुच्चति पञ्जा, ततो कोसल्लतो सम्भूतत्ता कुसला । इदं पन अनन्तरे वुत्तज्जाति निब्बचनद्वयं किञ्चापि निष्परियायतो जाणसम्पयुत्तानमेव युज्जति, रुळ्हीवसेन पन तंसदिसताय जाणविष्पयुत्तानम्पीति गहेतव्वं । यथा वा कुसा उभयभागगतं हत्थपदेसं लुनन्ति, एवमिमेषि उप्पन्नानुप्पन्नभावेन उभयभागगतं संकिलेसपक्खं लुनन्ति, तस्मा कुसा विय लुनन्तीति कुसला । अत्तनो पन सभावं धारेन्तीति धम्मा, धारीयन्ति वा पच्चयेहि, धारीयन्ति वा यथासभावतो आधारीयन्तीतिपि धम्मा । न कुसला अकुसला, मित्तपटिपक्खा अमित्ता विय कुसलपटिपक्खाति अत्थो । न ब्याकताति अव्याकता, कुसलाकुसलभावेन अकथिताति अत्थो । तेसु अनवज्जसुखविपाकलक्खणा कुसला, सावज्जदुखविपाकलक्खणा अकुसला, अविपाकलक्खणा अव्याकता ।

किं पनेतानि कुसलाति वा धम्माति वाति आदीनि एकत्थानि, उदाहु नानत्थानीति? किञ्चेत्थ यदि ताव एकत्थानि, “कुसला धम्मा”ति इदं “कुसला कुसला”ति वुत्तसदिसं होति । अथ नानत्थानि, तिकदुकानं छक्कचतुक्कभावो आपज्जति, पदानञ्च असम्बन्धो “कुसला रूपं चक्खुमा”ति आदीनं विय । अथापि यदि एतानि एकत्थानि, कुसलाकुसलाव्याकतपदानं तिण्णम्पि धम्मानं धम्मसभावेन एकत्ता कुसलादीनम्पि एकत्तं आपज्जति । अथ “कुसलपदतो अकुसलादिपदस्स अञ्जत्तं सिया”ति वदथ, न एतानि एकत्थानि । तदा धम्मो नाम भावो । भावतो च अञ्जो अभावोति । एवं अञ्जोञ्जापेक्खाय अभावत्तमाप्नेहि धम्मोहि अनञ्जे कुसलादयोपि अभावा एव सियुन्ति? सब्बमेतं अकारणं, कस्मा? यथानुमतिवोहारसिद्धितो, न हि “कुसला धम्मा”ति आदीनि पदानि यथा कुसला कुसलाति, एवं अत्थविसेसाभावेन पण्डितेहि अनुमतानि, नापि कुसला रूपं चक्खुमा-सद्दा विय अञ्जमञ्जं अनोलोकितात्थभावेन, अथ खो अनवज्जइद्विपाकत्तादिसङ्घातस्स अत्थविसेसस्स, सभावसाधारणादिअत्थसामञ्जस्स च जोतकत्तेन यथाक्कमं



अनुमतानि । कुसल-सद्वो हि धम्म-सदस्स पुरतो वुच्चमानो कुसलाकुसलादिसब्बसाधारणसामञ्जस्यदीपकं धम्म-सद्वं अकुसलादितो निवत्तेत्वा अत्तनो अत्तनो अत्थविसेसविसिद्धत्यदीपकं करोति । एवं पच्चेकं भिन्नविसयानम्पि नेसं विसेसनविसेसितब्बभावेन पवत्तियं एकत्थताय पण्डितानुमतताय यथावुत्तदोसारोपने कारणं वुत्तं, सब्बमेतं अकारणं । एवं ततो परेसुपि सब्बत्थ यथानुरूपतो जातब्बं । अयं ताव पदत्थतो विनिच्छयो ।

### कुसलपदत्थो

**भूमिभेदाति** तेसु कुसलाकुसलाव्याकतेसु धम्मेषु कुसला ताव धम्मा भूमिभेदतो चतुब्बिधा होन्ति — कामावचरा रूपावचरा अरूपावचरा लोकोत्तराति । अयं भूमिभेदतो विनिच्छयो ।

**सम्पयोगतोति** एवं भूमिभेदतो चतुब्बिधानम्पि नेसं पच्चेकं सम्पयोगतो विनिच्छयो वेदितब्बो । तत्थ कामावचरा ताव सम्पयोगतो अट्ठविधा होन्ति । सेय्यथिदं? सोमनस्ससहगतं जाणसम्पयुत्तं असङ्खारं, तथा ससङ्खारं । उपेक्खासहगतं जाणसम्पयुत्तं असङ्खारं, तथा ससङ्खारं । सोमनस्ससहगतं जाणविषयुत्तं असङ्खारं, तथा ससङ्खारं । उपेक्खासहगतं जाणविषयुत्तं असङ्खारं, तथा ससङ्खारन्ति । तत्थ इट्ठारम्मणता, सद्भाबाहुल्लता, विसुद्धदिट्ठिता, आनिसंसदस्साविता च एकादस पीतिसम्बोज्झङ्गकारणानि चाति इमेहि ताव कारणेहि सोमनस्ससहगतभावो वेदितब्बो । जाणसम्पत्तिं पन पत्थेत्वा कतकम्मतो, ब्रह्मादिउपपत्तितो, पञ्चादसकवसेन इन्द्रियपरिपाकतो, विक्खम्भनेन किलेसदूरिभावतो च सत्तविधधम्मविचयसम्बोज्झङ्गकारणतो च जाणसम्पयुत्तता वेदितब्बा । अत्तनो वा परेसं वा वसेन पवत्तो पुब्बपयोगो सङ्खारो नाम ।

तेन उप्पन्नं ससङ्खारं, तदभावा असङ्खारञ्च वेदितब्बं । एतेसु हि यथावुत्तसोमनस्सजाणहेतुं आगम्म पहट्ठो “अत्थि दिन्न”न्ति आदिनयप्पवत्तं सम्मादिट्ठिं पुरक्खत्वा असंसीदन्तो, परेहि च अनुस्साहितो दानादीनि पुज्जानि करोति, तदास्स सोमनस्ससहगतं जाणसम्पयुत्तं पठमं कुसलं उप्पज्जति । यदा पन वुत्तनयेन हट्ठतुट्ठो सम्मादिट्ठिं पुरक्खत्वा अमुत्तचागितादिवसेन संसीदमानो, अत्तनो पटिसङ्खारेन वा परेहि वा उस्साहितो करोति, तदास्स तदेव ससङ्खारं दुतियं कुसलं होति । यदा पन जातिजनादिपटिपत्तिदस्सनेन जातपरिचया बालदारकादयो भिक्खुआदिदस्सनेन सोमनस्सजाता सहसा दानवन्दनादीनि करोन्ति, तदा जाणविषयुत्तं ततियं कुसलं उप्पज्जति । यदा पन जातिआदीहि उस्साहिता एवं पटिपज्जन्ति, तदा तदेव चतुत्थं ससङ्खारचित्तं होति । यदा पन सोमनस्सहेतुनो अभावेन विसुं चतूसुपि विकप्पेषु सोमनस्सरहिता होन्ति, तदा सेसानि चत्तारि उपेक्खासहगतानि कुसलानि उप्पज्जन्ति । एवं पच्चेकं सम्पयोगतो विनिच्छयो वेदितब्बो ।

**उद्देसतो च धम्मानन्ति** एवं सम्पयोगतो अट्ठविधेषु कुसलेसु पच्चेकं धम्मानं उद्देसतोपि विनिच्छयो वेदितब्बो । तत्थ पठमकुसले ताव पाळिया सरूपेन आगता तिसं धम्मा, येवापनका नवाति एकूनचत्तालीस धम्मा होन्ति । सेय्यथिदं — फस्सो वेदना सज्जा चेतना चित्तं वितक्को विचारो पीति वीरियं चित्तेकगता जीवितं सद्भा सति हिरी ओत्तपं अलोभो अदोसो अमोहो कायपस्सद्धि चित्तपस्सद्धि कायलहुता चित्तलहुता कायमुदुता चित्तमुदुता कायकम्मज्जता चित्तकम्मज्जता कायपागुज्जता चित्तपागुज्जता कायजुक्ता चित्तजुक्ताति इमे सरूपेन आगता तिसंधम्मा । छन्दो अधिमोक्खो मनसिकारो तत्रमज्जत्तता करुणा मुदिता कायदुच्चरितविरति वचीदुच्चरितविरति मिच्छाजीवविरतीति इमे येवापनका नवाति ।

पदभाजनीये पन —

“यस्मिं समये कामावचरं कुसलं चित्तं उप्पन्नं होति...पे०... तस्मिं समये फस्सो होति, वेदना...पे०... सज्जा चेतना चित्तं वितक्को विचारो पीति सुखं चित्तस्सेकगता सद्धिन्द्रियं वीरियिन्द्रियं सतिन्द्रियं समाधिन्द्रियं पज्जिन्द्रियं मनिन्द्रियं सोमनस्सिन्द्रियं जीवितिन्द्रियं सम्मादिट्ठि सम्मासङ्कप्पो सम्मावायामो सम्मासति सम्मासमाधि सद्भाबलं वीरियबलं सतिबलं समाधिबलं पज्जाबलं हिरिबलं ओत्तप्पबलं अलोभो अदोसो अमोहो अनभिज्झा अब्यापादो सम्मादिट्ठि हिरी ओत्तपं कायपस्सद्धि चित्तपस्सद्धि कायलहुता चित्तलहुता कायमुदुता चित्तमुदुता कायकम्मज्जता चित्तकम्मज्जता कायपागुज्जता चित्तपागुज्जता कायजुक्ता चित्तजुक्ता सति सम्पज्जं समथो विपस्सना पग्गाहो अविक्खेपो होती”ति (ध० स० १) —

एवं सरूपतो उद्दिट्ठा छपज्जास धम्मा “ये वा पन तस्मिं समये अज्जेपि अत्थि पटिच्चसमुप्पन्ना अरूपिनो धम्मा”ति (ध० स० १) एवं येवापनकवसेन सामज्जतो उद्दिट्ठा, **अट्ठकथायं** चस्सा तेसु तेसु सुत्तप्पदेसेसु आगते गहेत्वा सरूपतो निद्दिट्ठा छन्दादयो नवाति पज्चसट्ठि धम्मा आगता । यस्मा पन तेसु सरूपेन आगता ज्ञानङ्गइन्द्रियमग्गङ्गबलमूलादीनं वसेन एकस्सेव बहुकिच्चतादस्सनत्थं पुनप्पुनं गहेत्वा परियायेन छपज्जासविधेन देसितापि अगहितगहणेन यथावुत्ता समत्तिसेव धम्मा होन्ति, ते पन सविभत्तिका अविभत्तिकाति दुविधा । तत्थ फस्सादयो अट्ठारस एककत्ता अविभत्तिका । वेदनादयो द्वादस धम्मा अट्ठतिसप्पभेदेन यथायोगं विभत्तता सविभत्तिका, येवापनका पन अविभत्तिका एव । तस्मा ते सब्बेपि निप्परियायेन एकूनचत्तालीस धम्माव होन्ति । होन्ति चेत्थ —

फस्सादिपज्चकं पज्चज्ञानङ्गानिन्द्रियट्ठकं ।

मग्गङ्गपञ्चकं सत्तबलं मूलत्तिकम्पि च ॥

कम्मपथत्तिकञ्चेव, लोकपालदुकं तथा ।  
पस्सद्धिआदी छ दुका, तीणि पिड्डिदुकानिति ॥

सत्तरसहि रासीहि, छपञ्जासेव पाळियं ।  
वुत्ता सभावतो तिस, धम्मा अगहितग्गहे ॥

फस्सो जीवितसञ्जा च, चेतना चारपीतियो ।  
छ दुका कायपस्सद्धि-पमुखाडारसेकका ॥

चित्तं वितक्को सद्धा च, हिरिओत्तप्पियम्पि च ।  
अलोभो च अदोसो च, सत्त द्विधा विभाविता ॥

वेदना तिविधा वीरियं, सति च चतुधा मता ।  
छद्धा एकग्गता पञ्जा, सत्तधाव विभाविता ॥

विरती अप्पमञ्जायो, मनक्कारो छन्दमञ्जता ।  
धिमोक्खो येवापनका, नवेते पठमे मने ॥

पञ्चसङ्खिविधेनेव, परियायेन देसिता ।  
नवाधिका च तेत्तिस, धम्माव परमत्थतोति ॥

एत्थ च सरूपेन आगता तिस धम्मा, येवापनकेसु चत्तारो चाति चतुत्तिस धम्मा एकक्खणे नियता लब्भन्ति, सेसा पन करुणादयो पञ्च करुणापुब्बभागमुदितापुब्बभागवसेन, कायदुच्चरितवचीदुच्चरितमिच्छाजीवेहि विरमणवसेन च चित्तस्स पवत्तिकालेसु एव उप्पज्जित्वा अञ्जथानुप्पज्जनतो अनियता । ते च यस्मा दुक्खितसुखितसत्तवसेन, कायदुच्चरितादित्तयवसेन च पच्चकं भिन्नविसयत्ता एकतो न उप्पज्जन्ति, तस्मा करुणापुब्बभागादिवसेन पवत्तेसु पञ्चसु चित्तक्खणेषु नियता चतुत्तिस, करुणादीसु एकन्ति पञ्चत्तिस धम्मा उप्पज्जन्ति, केवलं पन दानादिवसेन पवत्तियं नियता चतुत्तिसेव उप्पज्जन्तीति वेदितव्वं । अयं धम्मद्वेसतो विनिच्छयो ।

**लक्खणादिविभागतोति** एवं उद्दिट्ठानं धम्मानं लक्खणरसादितो विनिच्छयो वेदितव्वो । फुसतीति **फस्सो** । स्वायं फुसनलक्खणो, सङ्गट्टनरसो, सन्निपातपच्चुपट्टानो, आपाथगतविसयपदट्टानो । अयं हि अरूपधम्मोपि समानो आरम्भणे फुसनाकारेन पवत्ततीति फुसनलक्खणो, सा चस्स फुसनाकारप्पवत्ति अम्बिलादिदस्सेन खेळुप्पादादिना जातव्वा । एकदेसेन पन अनल्लीयमानोपि रूपं विय चक्खुं, सद्धो विय च सोंतं चित्तमारम्भणञ्च सङ्गट्टेतीति सङ्गट्टनरसो । तिकसन्निपातसङ्गातस्स पन अत्तनो कारणस्स वसेन पवेदितत्ता सन्निपातपच्चुपट्टानो, फलट्टेन पच्चुपट्टानेन पनेस वेदनापच्चुपट्टानो नाम होति । तज्जासमन्नाहारेन चेव इन्द्रियेन च परिकखते विसये अनन्तरायेन उप्पज्जनतो आपाथगतविसयपदट्टानोति वुच्चति । वेदनाधिष्ठानभावतो पनेस निच्चम्मा गावी विय दट्टव्वो । लक्खणादीसु च तेसं तेसं धम्मानं सभावो वा सामञ्जं वा लक्खणं नाम, किच्चं वा सम्पत्ति वा रसो नाम, उपट्टानाकारो वा फलं वा पच्चुपट्टानं नाम, आसन्नकारणं पदट्टानं नाम । एवं उपरिपि सब्बत्थ लक्खणादीनं नानत्तं वेदितव्वं ।

वेदयतीति **वेदना**, सा वेदयितलक्खणा, सभावभेदतो पनेसा पञ्चविधा होति — सुखं दुक्खं सोमनस्सं दोमनस्सं उपेक्खाति । तत्थ इड्डफोट्टब्बानुभवनलक्खणं सुखं, सम्पयुत्तानं उपबूहनरसं, कायिकअस्सादपच्चुपट्टानं, कायिन्द्रियपदट्टानं । अनिड्डफोट्टब्बानुभवनलक्खणं दुक्खं, सम्पयुत्तानं मिलापनरसं, कायिकाबाधपच्चुपट्टानं, कायिन्द्रियपदट्टानं । इड्डारम्भणानुभवनलक्खणं सोमनस्सं, यथा तथा वा इड्डाकारसम्भोगरसं, सम्पयुत्तानं उपबूहनरसं वा, चेतसिकअस्सादपच्चुपट्टानं, इड्डाकारदस्सनपदट्टानं । अनिड्डारम्भणानुभवनलक्खणं दोमनस्सं, यथा तथा वा अनिड्डाकारसम्भोगरसं, सम्पयुत्तानं मिलापनरसं वा, चेतसिकाबाधपच्चुपट्टानं, एकन्तेन हृदयवत्थुपदट्टानं । मज्झत्तवेदयितलक्खणा उपेक्खा, सम्पयुत्तानं नातिउपबूहनमिलापनरसा, सन्तभावपच्चुपट्टाना, निष्पीतिकचित्तपदट्टाना । एत्थ च सुखं, दुक्खञ्च एकन्तमव्याकतं, दोमनस्समेकन्तमकुसलं, सोमनस्सुपेक्खा पन सिया कुसला, सिया अकुसला, सिया अब्याकता । इध पन कुसला सोमनस्सवेदना अधिपेता ।

नीलादिभेदं आरम्भणं सञ्जानातीति **सञ्जा** । सा सञ्जाननलक्खणा, पच्चाभिञ्जाणरसा, पुनसञ्जाननपच्चयनिमित्तकरणरसा वा दारुआदीसु तच्छकादयो विय, यथागहितनिमित्तवसेन अभिनिवेसकरणपच्चुपट्टाना हत्थिदस्सकअन्था विय, आरम्भणे अनोगाळहवुत्तियाय अचिरट्टानपच्चुपट्टाना वा विज्जु विय, यथाउपट्टितविसयपदट्टाना तिणपुरिसेसु मिगपोतकानं पुरिसाति उप्पन्नसञ्जा विय ।

चेतेतीति **चेतना**, सद्धि अत्तना सम्पयुत्तधम्मे आरम्भणे अभिसन्दहतीति अत्थो। सा चेतनाभावलक्खणा, आयूहनरसा, सा च कुसलाकुसलेसु एव होती। इतरेसु पन तंसदिसताय संविदहनपच्चुपट्टाना सकिच्चपरिकिच्चसाधका जेडुसिस्समहावडुकिआदयो विय। अच्चायिककम्मानुस्सरणादीसु पनायं सम्पयुत्तेसु उस्साहनभावेन पवत्तमाना पाकटा होती।

आरम्भणं चिन्तेतीति **चित्तं**, विज्जाणं। वित्थारतो पनस्स वचनत्थो चित्तदुके आवि भविस्सति। तदेतं विजाननलक्खणं चित्तं, पुब्बङ्गमरसं, निरन्तरप्पवत्तितो सन्धानपच्चुपट्टानं, नामरूपपदट्टानं।

वितक्केति ऊहेति, वितक्कनमत्तमेव वा सोति **वितक्को**। स्वायमारम्भणे चित्तस्स अभिरोपनलक्खणो, आहननपरियाहननरसो, आरम्भणे चित्तस्स आनयनपच्चुपट्टानो।

आरम्भणे तेन चित्तं विचरति, विचरणमत्तमेव वा सोति **विचारो**। स्वायमारम्भणानुमज्जनलक्खणो, तत्थ सहजातानुयोजनरसो, चित्तस्स अनुप्पबन्धनपच्चुपट्टानो। अभिनिरोपनानुमज्जनवसेन पनेसं यथाक्कमं ओळारिकसुखुमताय घण्टाभिघातो विय चेतसो पठमाभिनिपातो वितक्को, घण्टानुरवो विय अनुप्पबन्धो विचारो। विष्फारवा चेत्थ वितक्को आकासे उप्पतितुकामपक्खिनो पक्खविक्खेपो विय, सन्तवुत्ति विचारो आकासे उप्पतितस्स पक्खिनो पक्खपसारणं विय। सो पन नेसं विसेसो पठमदुतियज्झानेसु पाकटो होती। उभोपि पनेते सम्पयुत्तधम्मपदट्टाना।

पिणयतीति **पीति**। सा सम्पियायनलक्खणा, कायचित्तपीणनरसा, फरणरसा वा, ओदग्यपच्चुपट्टाना, सोमनस्ससहगतचित्तपदट्टाना।

वीरानं भावो, कम्मं वा **वीरियं**, विविधेन वा उपायेन ईरयितब्बं पवत्तयितब्बन्ति वीरियं। तच्च उस्साहलक्खणं, सहजातानं उपत्थम्भनरसं, असंसीदनभावपच्चुपट्टानं, “संविग्गो योनिं सो पदहती”ति (अ० नि० ४.११३) वचनतो संवेगपदट्टानं, वीरियारम्भवत्थुपदट्टानं वा। इदं पन कुसलपक्खे पदट्टानं, अकुसलादिपक्खे पन साधारणवसेन यथा तथा वा दुक्खविनोदनकामतापदट्टानं, सम्पयुत्तधम्मपदट्टानं वा। तं समारद्धं सब्बासं सम्पत्तीनं मूलं होतीति दट्टब्बं।

एको अगो विसयो अस्साति एकगं, चित्तं, तस्स भावो एकगता, चित्तस्स एकगता **चित्तेकगता**, समाधिस्सेतं नामं। सा अविसारणलक्खणा, सहजातानं सम्पिण्डनरसा नहानीयचुण्णानं उदकं विय, उपसमपच्चुपट्टाना, जाणपच्चुपट्टाना वा, सुखपदट्टाना, अकुसलादिसाधारणवसेन पनेत्थापि पच्चुपट्टानपदट्टानानि वुत्तनयेन योजेत्वा जातब्बानि। निवाते दीपच्चीनं ठिति विय चेतसो ठितीति दट्टब्बा।

एत्थ च किञ्चापि आरम्भणं भिन्दित्वा अनुपविसन्ता विय कुसलपक्खे चत्तारो धम्मा आरम्भणं ओगाहन्ति सद्धा सति एकगता पज्जाति, तेनेव सद्धा “ओकप्पना”ति वुत्ता, सति च “अपिलापना”ति, एकगता “अवडुत्ती”ति, पज्जा “परियोगाहना”ति च वुत्ता। अकुसलपक्खे च तयो तण्हा दिट्ठि अविज्जाति। तेन ते एव “ओघा”ति वुत्ता। तथापि नेसं लक्खणादितो नानत्तम्पि सिद्धमेव। अकुसलपक्खे पन एकगता उद्धच्चसमागतता “ओगाहना”ति न वुत्ता। अकुसलधम्मा हि एकविसये सम्पिण्डनकिच्चेन समाधिना युत्तापि उदकसित्तरजुट्टानं विय तद्ध्वणज्जेव विकिरणसभावा होन्ति। तेनेव हेत्थ उपचारप्पनाप्पत्ति न होती, कुसलधम्मा पन यस्मा उदकं आसिज्जित्वा आसिज्जित्वा आकोटनमज्जनादीनि कत्वा उपलित्तट्टानं विय सकलम्पि दिवसं निच्चलपवत्तनसमत्थाति उपचारप्पनाप्पत्तापि होती, तस्मा तत्थ ओगाहनाति वुत्ताति गहेतब्बं।

जीवन्ति तेन, जीवनमत्तं वा तन्ति **जीवितं**, तं सहजातानुपालनलक्खणं, तेसं पवत्तनरसं, तेसज्जेव ठपनपच्चुपट्टानं, यापयितब्बधम्मपदट्टानं। अत्तनो ठितिक्खणे एव चेतं ते धम्मे अनुपालेति उदकं विय उप्पलादीनि, न भङ्गक्खणे। सयं भिज्जमानत्ता सयं पवत्तितधम्मसम्बन्धेनेव पवत्तति नियामको वियाति दट्टब्बं।

सद्वहन्ति एताय, सयं वा सद्वहति, सद्वहनमत्तं वा एसाति **सद्धा**। सा सद्वहनलक्खणा, ओकप्पनलक्खणा वा, पसादनरसा उदकप्पसादकमणि विय, पक्खन्दनरसा वा ओघुत्तारकवीरपुरिसो विय, अकालुसियपच्चुपट्टाना, अधिमुत्तिपच्चुपट्टाना वा, सद्धेय्यवत्थुपदट्टाना, सद्धम्मसवनादिसोतापत्तियङ्गपदट्टाना वा, हत्थवित्तबीजानि विय दट्टब्बा।

सरन्ति ताय, सयं वा सरति, सरणमत्तमेव वा एसाति **सति**। सा अपिलापनलक्खणा, असम्भोसनरसा, आरक्खपच्चुपट्टाना, विसयाभिमुखभावपच्चुपट्टाना वा, थिरसज्जापदट्टाना, कायादिसतिपट्टानपदट्टाना वा। आरम्भणे दळ्हपत्तिट्ठितत्ता पन एसिका विय, चक्खुद्वारादिरक्खणतो दोवारिको विय च दट्टब्बा।

कायदुच्चरितादीहि हिरीयतीति **हिरी**, लज्जायेतं अधिवचनं। तेहियेव ओत्तप्पतीति **ओत्तप्पं**, पापतो उब्बेगस्सेतं अधिवचनं। तत्थ पापतो जिगुच्छनलक्खणा हिरी, उत्तासलक्खणं ओत्तप्पं। लज्जनाकारेण पापकानं अकरणरसा हिरी, उत्तासाकारेण ओत्तप्पं। असुचिमक्खितस्स, अगिसन्तत्तस्स च अयोगुळस्स गहेतुं अविसहनं विय एतेसं यथाक्कमं जिगुच्छनसन्तासाकारेहि पापाकरणं वेदितब्बं। वुत्ताकारेनेव च पापतो संकोचनपच्चुपट्टानानि एतानि,

अत्तपरगारवपदद्वानानि कुलवधूवेसिया भावो विय, लोकपालकानि चाति दट्ठब्बानि । उभिन्नम्पि पनेसं समुद्धानं अधिपति सभावो लक्खणेन चाति मातिकं ठपेत्वा यथाक्कमं अञ्जत्तबहिद्वासमुद्धानता, अत्तलोकाधिपतिता, लज्जाभयसभावसण्ठिता, सप्पतिस्सववज्जभयदस्सावितालक्खणता च **अट्टसालिनि**यं (ध० स० अट्ठ० १ बलरासिवण्णना) वित्थारतो विभत्ता, अत्थिकेहि तं तत्थेव गहेतब्बं ।

न लुब्धति एतेन, सयं वा न लुब्धति, अलुब्धनमत्तमेव वा तन्ति **अलोभो** । अदोसामोहेसुपि एसेव नयो । तेसु अलोभो आरम्भणे चित्तस्स अगेधलक्खणो, अलग्गभावलक्खणो वा कमलदले जलबिन्दु विय, अपरिग्गहरसो मुत्तभिक्खु विय, अनल्लीनभावपच्चुपट्टानो असुचिम्हि पतितपुरिसो विय ।

**अदोसो** अचण्डिक्कलक्खणो, अविरोधलक्खणो वा अनुकूलमित्तो विय, आघातविनयनरसो, परिळाहविनयनरसो वा चन्दनं विय, सोम्मभावपच्चुपट्टानो पुण्णचन्दो विय ।

**अमोहो** यथासभावप्पटिवेधलक्खणो, अक्खलितप्पटिवेधलक्खणो वा कुसलितस्सासक्खित्तउसुप्पटिवेधो विय, विसयोभासनरसो अनुद्धटो पदीपो विय, असम्मोहपच्चुपट्टानो अरज्जगतसुदेसको विय । तयोपि चेते सब्बकुसलानं मूलभूताति दट्ठब्बा ।

अपिच अलोभो चेत्थ दानहेतु, अदोसो सीलहेतु, अमोहो भावनाहेतु । तीहिपि चेतेहि यथापटिपाटिया नेक्खम्मसज्जा अब्यापादसज्जा अविहिंसासज्जा होन्ति, तथा अधिकऊनविपरीतगहणानं अभावो, तथा पियविप्पयोगअप्पियसम्पयोगइच्छितालाभदुक्खानं, जातिजरा मरणदुक्खानं, पेतनिरयतिरच्छानगतिदुक्खानञ्च अभावो, तथा भोगमित्तअत्तसम्पत्तिपच्चयभावो, तथा कामसुखपरिच्चागअत्तकिलमथपरिच्चागमज्झिमपटिपत्तीनं सम्भवो, तथा असुभअप्पमाणधातुसज्जानं, अनिच्चदुक्खअनत्तसज्जानं, दिब्बब्रह्मअरियविहारानञ्च सम्भवो होतीति एवमादीहि नयेहि तेसं वित्थारो वेदितब्बो ।

एत्थ च अमोहो नाम पज्जा, सा पजाननलक्खणा । विज्जाणं विजाननलक्खणं । सज्जा सज्जाननलक्खणा । किं पनेतासं सज्जाविज्जाणपज्जानं नानत्तन्ति? सज्जाननविजाननपजाननमेव । एतासं हि समानेपि जाननभावे सज्जाय “नीलं पीत”न्तिआदिना पुन सज्जुप्पादकमत्तेन आकारेन सज्जाननमत्तमेव होति, अजातबुद्धिदारकस्स विय चित्तवट्टादिभावमत्ताकारेन कहापणादिदस्सनं, न ततो उद्धं । विज्जाणस्स पन यथावुत्तेन च ततो विसिट्ठेन च अनिच्चादिना आकारेन जाननं होति, गामिकपुरिसस्स विय यथावुत्तेन च उपभोगारहतादिना च आकारेन कहापणादिदस्सनं, न ततो उद्धं । पज्जाय पन तेहि च यथावुत्तेहि नानप्पकारेहि च मग्गपातुभावादिहेतूहि सब्बेहि आकारेहि पजाननं होति, हेरज्जिकस्स विय यथावुत्तेहि च एक्ककूटअद्दसारादिसब्बेहि आकारेहि च कहापणादिदस्सनं । पज्जाय हि अजानितब्बं नाम नत्थि । एवं सज्जाननविजाननपजाननाकारेहि एतासं नानत्तं वेदितब्बं । एत्थ च चक्खुविज्जाणादीनि वितक्कवीरियादिसहजातपच्चयविरहतो रूपादीसु सज्जाकिच्चतो अधिकविजाननकिच्चं कातुं न सक्कोन्ति, बलपरिणायकानि विय सेनङ्गानि पज्जानुवत्तकानेव होन्तीति वेदितब्बानि । तेनाह भगवा “पञ्चहि विज्जाणेहि न कज्जि धम्मं पटिविजानाति अज्जत्र अभिनिपातमत्ता”तिआदि (विभ० ७६६) ।

कायपरस्सम्भनं **कायपस्सद्धि** । चित्तपरस्सम्भनं **चित्तपस्सद्धि** । कायोति पनेत्थ वेदनादयो तयो खन्था । उभोपि पनेता कायचित्तदरथवूपसमलक्खणा, कायचित्तदरथनिम्मह्नरसा, कायचित्तानं अपरिप्फन्दसीतिभावपच्चुपट्टाना, कायचित्तपदट्टाना । कायचित्तानञ्च अवूपसमकरउद्धच्चादिकिलेसपटिपक्खभूताति दट्ठब्बा ।

कायलहुभावो **कायलहुता** । चित्तलहुभावो **चित्तलहुता** । एवं उपरिपि पदत्थो दट्ठब्बो । कायचित्तानं गरुभाववूपसमलक्खणा कायलहुता, चित्तलहुता च, तेसं गरुभावननिम्मह्नरसा, तेसं अदन्धतापच्चुपट्टाना, तेसं गरुभावकरथिनमिद्धादिकिलेसपटिपक्खभूताति दट्ठब्बा ।

कायचित्तानं थद्धभाववूपसमलक्खणा **कायमुदुता**, **चित्तमुदुता** च, तेसं थद्धभावननिम्मह्नरसा, अप्पटिघातपच्चुपट्टाना, कायचित्तपदट्टाना, तेसं थद्धभावकरदिट्ठिमानादिकिलेसपटिपक्खभूताति दट्ठब्बा ।

कायचित्तानं अकम्मज्जभाववूपसमलक्खणा **कायकम्मज्जता**, **चित्तकम्मज्जता** च, तेसं अकम्मज्जभावननिम्मह्नरसा, कायचित्तानं आरम्भणकरणसम्पत्तिपच्चुपट्टाना, तेसं अकम्मज्जभावकरावसेसनीवरणपटिपक्खभूताति दट्ठब्बा । पसादनीयवत्थूसु पसादावहा, हितकिरियासु विनियोगक्खमभावावहा सुवण्णविसुद्धि वियाति दट्ठब्बा ।

कायचित्तानं अगेलज्जभावलक्खणा **कायपागुज्जता**, **चित्तपागुज्जता** च, तेसं गेलज्जनिम्मह्नरसा, निरादीनवपच्चुपट्टाना, तेसं गेलज्जकरअस्सद्धियादिकिलेसपटिपक्खभूताति दट्ठब्बा । कायचित्तानं अज्जवलक्खणा **कायजुक्कता**, **चित्तजुक्कता** च, तेसं कुटिलभावननिम्मह्नरसा, अजिम्हतापच्चुपट्टाना, तेसं कुटिलभावकरमायासाठेय्यादिपटिपक्खभूताति दट्ठब्बा । सब्बेपेते पस्सद्धिआदयो धम्मा कायचित्तपदट्टानाति वेदितब्बा ।

किं पनेत्थ पस्सद्वादयो धम्मा उद्धच्चादिं विनोदेतुं न सक्कोन्ति, येन इमे पस्सद्वादयो धम्मा न विसुं विभत्ताति? नो न सक्कोन्ति, इमे पन सहिता एव सक्कोन्ति, इतरथा तेसं उप्पत्तिया एव असम्भवतो। यथा वा पस्सद्वादीसु विज्जमानेसु मोहाहिरिकादीनं उजुपटिपक्खभावेन अमोहहिरिआदयो होन्ति, एवमेतेपि उद्धच्चादिउजुपटिपक्खभावेन इच्छितब्बाति गहेतब्बा। यस्मा चेत्थ द्वीहि द्वीहि एव यथासकं पटिपक्खा हरितब्बा, तस्मा ते एते एव द्विधा विभत्ता, न अमोहादयोति जातब्बा।

येवापनकेसु **छन्दो**ति कत्तुकामतायेतं अधिवचनं, तस्मा सो कत्तुकामतालक्खणो, आरम्मणपरियेसनरसो, आरम्मणेन अत्थिकतापच्चुपट्टानो, तदेवस्स पदट्टानं। आरम्मणगगहणे चायं चेतसो हत्थप्पसारणं विय दट्टब्बो। अयञ्च यस्मा विरज्जितब्बादीसुपि नेक्खम्मादिना सह लोभविसदिसेन कत्तुकामताकारेण पवत्तति, तस्मा असेखानमि उप्पज्जति। लोभो पन सुभसुखादिविपल्लासपुब्बकेन अभिसङ्गाकारेण पवत्ततीति अयमेतेसं विसेसो। एवं मेत्ताकरुणादीनमि लोभादीहि विसेसो यथानुरूपं जातब्बो।

अधिमुच्चनं **अधिमोक्खो**। सो सन्निट्ठानलक्खणो, असंसप्पनरसो, निच्छयपच्चुपट्टानो, सन्निट्ठातब्बधम्मपदट्टानो, आरम्मणे निच्चलभावेन इन्दखीलो विय दट्टब्बो। ननु च सद्भापि अधिमोक्खोति वुच्चति। तथा हि अधिमोक्खलक्खणे इन्दुं कारेतीति सद्धिन्द्रियन्ति वुच्चतीति? सच्चं, सा च खो सम्पसादनभावेन अधिमोक्खो, अयं पन यथा तथा वा निच्छयभावेनाति न कोचि विरोधो।

किरिया कारो, मनस्मिं कारो **मनसिकारो**, पुरिममनतो विसदिसं मनं करोतीतिपि **मनसिकारो**, स्वायं आरम्मणपटिपादको वीथिपटिपादको जवनपटिपादकोति तिप्पकारो, तत्थ **आरम्मणपटिपादको** इध मनसिकारो। सो सारणलक्खणो, सम्पयुत्तानं आरम्मणेसु पयोजनरसो, आरम्मणाभिमुखभावपच्चुपट्टानो, आरम्मणपदट्टानो, सङ्खारक्खन्धपरियापन्नो। आरम्मणपटिपादकत्तेन सम्पयुत्तानं सारथि विय दट्टब्बो। **वीथिपटिपादको**ति पन पञ्चद्वारावज्जनस्सेतं अधिवचनं। **जवनपटिपादको**ति मनोद्वारावज्जनस्स, न ते इध अधिप्पेता। एत्थ चायं मनसिकारो समन्नाहारमत्ताकारेण आरम्मणे सम्पयुत्तानं पयोजको, **चेतना** चेतोकिरियाभावेन, **वितक्को** पन सङ्कप्पाकारेण, उपनिज्झायनाकारेण च अभिनिरोपको। तेनेव हेत्थ पदभाजनीये “तक्को सङ्कप्पोति च, ज्ञानङ्ग”न्ति च वुच्चतीति अयमेतेसं विसेसो।

तेसु तेसु धम्मेसु मज्झत्तता **तत्रमज्झत्तता**। सा चित्तचेतसिकानं समवाहितलक्खणा, ऊनाधिकतानिवारणरसा, पक्खपातुपच्छेदनरसा वा, मज्झत्तभावपच्चुपट्टाना, सम्पवत्तसम्पयुत्तधम्मपदट्टाना। सम्पयुत्तधम्मानं अज्झुपेक्खणेन सम्पवत्तानं आजानीयानं अज्झुपेक्खकसारथि विय दट्टब्बा।

परदुक्खे सति साधून् हृदयकम्पनं करोतीति **करुणा**, किरिति वा परदुक्खं हिंसति च, किरियति वा दुक्खितेसु पसारीयतीति करुणा। सा परदुक्खापनयनाकारप्पवत्तिलक्खणा, परदुक्खासहनरसा, अविहिंसापच्चुपट्टाना, दुक्खाभिभूतानं अनाथभावदस्सनपदट्टाना। मोदन्ति तां तंसमङ्गिनो, सयं वा मोदति, मोदनमत्तमेव वा तन्ति **मुदिता**। सा पमोदलक्खणा, अनिस्सायनरसा, अरतिविघातपच्चुपट्टाना, सत्तानं सम्पत्तिदस्सनपदट्टाना।

कस्मा पनेत्थ मेत्तुपेक्खा न वुत्ताति? पुब्बे गहितत्ता। अदोसो एव हि सत्तेसु हितफरणवसेन पवत्तियं मेत्ता। तत्रमज्झत्तता एव च इट्ठानिट्ठसत्तेसु मज्झत्ताकारेण पवत्तियं उपेक्खा। ते च धम्मा नियता, केवलं पन नेसं सत्तेसु मेत्तुपेक्खाभावेन पवत्ति अनियताति। कायदुच्चरिततो विरति **कायदुच्चरितविरति**। सेसपदद्वयेपि एसेव नयो। लक्खणादितो पनेता तिस्सोपि कायदुच्चरितादिवत्थूनं अवीतिक्कमलक्खणा, ततो संकोचनरसा, तेसं अकिरियपच्चुपट्टाना, सद्भाहिरोत्तप्पअप्पिच्छतादिगुणपदट्टाना, पापकिरियतो चित्तस्स विमुखभावभूताति दट्टब्बा। एवं लक्खणादितो विनिच्छयो वेदितब्बो।

**सङ्गहाति** एवं ये इमे इमस्मिं कामावचरपठमकुसले विभत्ता एकूनचत्तालीस धम्मा, सब्बेते खन्धतो चतुब्बिधा होन्ति — वेदनाक्खन्धो सज्जाक्खन्धो सङ्खारक्खन्धो विज्जाणक्खन्धोति। तत्थ रासट्ठेन सोमनस्सवेदना वेदनाक्खन्धो, तथा सज्जा सज्जाक्खन्धो, चित्तं विज्जाणक्खन्धो, अवसेसा फस्सादयो छत्तिस धम्मा सङ्खारक्खन्धोति वेदितब्बा।

ननु च यदि रासट्ठेन खन्धो, फस्सादीनं ताव अनेकत्ता सङ्खारक्खन्धता युता, कथं पन वेदनादीनं तिण्णं खन्धताति? उपचारतो। पच्चेकं हि अतीतादिभेदभिन्नेसु वेदनासज्जाविज्जाणेसु निरुद्धोपि खन्ध-सद्दो तदेकदेसेसु एकेकवेदनादीसुपि समुदायोपचारेण वोहरीयतीति तदेकदेसेपि तब्बोहारो, यथा रुक्खस्स साखाय छिज्जमानाय “रुक्खो छिज्जती”तिआदीसु वियाति। एवं खन्धतो चतुब्बिधा होन्ति।

ते पुन आयतनतो दुविधा होन्ति — मनायतनं धम्मायतनन्ति। सज्जातिसमोसरणट्ठानट्ठेन हेत्थ चित्तं **मनायतनं**, सेसा पन अट्ठित्स धम्मा **धम्मायतनन्ति**। एवं आयतनतो दुविधा होन्ति। ते पुन धातुवसेन दुविधा मनोविज्जाणधातु धम्मधातूति। निस्सत्तनिज्जीवट्ठेन हेत्थ चित्तं **मनोविज्जाणधातु**, सेसा **धम्मधातूति**। एवं धातुवसेन दुविधा।

तथा आहारानाहारवसेन। तत्थ फस्सो चेतना चित्तन्ति इमे तयो धम्मा विसेसपच्चयत्तेन यथाक्कमं “फस्साहारो मनोसज्चेतनाहारो विज्जाणाहारो”ति वुच्चन्ति, अवसेसा न आहाराति। किं पनेते पच्चया न होन्ति, ये न आहाराति वुच्चेय्यन्ति? नो न होन्ति, विसेसपच्चया पन न होन्ति, फस्सादयो पन तेसं

धम्मानं विसेसपच्चया होन्ति, विसेसतो वेदनादयो च आहरन्ति । फस्साहारो हि तिस्सो वेदनायो आहरति, मनोसञ्चेतनाहारो तयो भवे, विज्जाणाहारो पटिसन्धिनामरूपं । ननु च सो विपाको, इदं पन कुसलविज्जानन्ति? किञ्चापि एवं, तंसरिक्खताय पन विज्जाणाहारोत्वेव वुत्तं । यस्मा वा इमे “अरूपिनो आहारा सम्पयुत्तकानं धम्मानं तंसमुद्धानानञ्च रूपानं आहारपच्चयेन पच्चयो”ति (पट्ठा० १.१.१५) वचनतो कबळीकाराहारो विय रूपकायस्स उपत्थम्भकट्टेन नामकायस्स आहारपच्चया होन्ति, तस्मा इमेव “आहारा”ति वुत्ताति वेदितब्बं । एवं आहारानाहारवसेन दुविधा ।

तथा इन्द्रियानिन्द्रियतो । तत्थ सद्धा वीरियं सति एकग्गता अमोहो चित्तं सोमनस्सवेदना जीवितन्ति इमे अट्ठ धम्मा अधिपतियट्टेन यथाक्कमं “सद्धिन्द्रियं वीरियिन्द्रियं सतिन्द्रियं समाधिन्द्रियं पञ्चिन्द्रियं मनिन्द्रियं सोमनस्सिन्द्रियं जीवितिन्द्रिय”न्ति वुच्चन्ति, अवसेसा न “इन्द्रियानी”ति । एवं इन्द्रियानिन्द्रियतो दुविधा ।

तथा ज्ञानज्ञानाङ्गवसेन । तत्थ वितक्को विचारो पीति सोमनस्सं एकग्गताति इमे पञ्च धम्मा उपनिज्झायनट्टेन “ज्ञानङ्गानी”ति वुच्चन्ति, इतरे “अज्ञानङ्गानी”ति । एवं ज्ञानज्ञानाङ्गवसेन दुविधा ।

तथा मग्गङ्गामग्गङ्गवसेन । तत्थ अमोहो वितक्को विरतित्तयं वीरियं सति एकग्गताति इमे अट्ठ धम्मा निव्यानट्टेन, विमोक्खट्टेन च यथाक्कमं “सम्मादिट्ठि सम्मासङ्कपो सम्मावाचा सम्माकम्मन्तो सम्माआजीवो सम्मावायामो सम्मासति सम्मासमाधी”ति नामेन “मग्गङ्गानी”ति वुच्चन्ति, इतरे “अमग्गङ्गानी”ति । **पाळियं** पन लोकियचित्ते विरतीनं अनियतत्ता, येवापनकत्ता च ता वज्जेत्वा “पञ्चङ्गिको मग्गो होती”ति (ध० स० ५८, १२१) वुच्चति । एवं मग्गङ्गामग्गङ्गवसेन दुविधा ।

तथा बलाबलवसेन । तत्थ सद्धावीरियं सति समाधि पञ्जा हिरी ओत्तप्पन्ति इमे सत्त धम्मा अकम्पियट्टेन बलानीति वुच्चन्ति, इतरे अबलानीति । एवं बलाबलवसेन दुविधा ।

तथा हेतुनहेतुवसेन । तत्थ अलोभो अदोसो अमोहोति इमे तयो धम्मा मूलट्टेन हेतूति वुच्चन्ति, इतरे नहेतूति । एवं हेतुनहेतुवसेन दुविधा । एवं फस्साफस्सवेदनावेदना सज्जासज्जाचित्ताचित्तादिवसेनपि वुत्तनयानुसारेन यथायोगं सङ्गहविभागो वेदितब्बो । अयमेत्थ सङ्खेपो, वित्थारो पन पदभाजनीयसङ्गहवारे (ध० स० १०३ आदयो), **तदट्ठकथायञ्च** (ध० स० अट्ठ० ५८-१२०) गहेतब्बो । एवं सङ्गहतो विनिच्छयो वेदितब्बो ।

**सुज्जतो चेवाति** एवं खन्धादीहि सङ्गहितेसु तेसु धम्मेसु तब्बिनिमुत्तो कारकवेदकादिसभावो अत्ता वा सस्सतो वा भावो न उपलब्धति । सुज्जा ते धम्मा अत्तेन वा अत्तनियेन वा, केवलं पटिच्चसमुपपन्ना, सलक्खणधारणतो धम्ममत्ता, निच्चसुखादिसारविरहतो असारा, पवत्तकनियामकाभावतो अपरिणायका अनिच्चा, दुक्खा, अनत्ता, अनत्तनिया च हुत्वा पवत्तन्तीति अयमेत्थ सङ्खेपो, वित्थारो पन पदभाजनीयसुज्जतवारे, **तदट्ठकथायञ्च** गहेतब्बोति । एवं सुज्जतो विनिच्छयो वेदितब्बो ।

निट्ठिता पठमकुसलस्स अत्थवण्णना ।

दुतियादीसुपि पठमकुसले वुत्तनयेन धम्मुद्देसादिना सब्बो विनिच्छयो वेदितब्बो । न केवलञ्च एत्थेव, इतो परेसुपि सब्बत्थ हेट्ठा वुत्तसदिसानं पदानं, धम्मानञ्च अत्थो, सब्बो च विनिच्छयो एत्थ वुत्तनयेनेव वेदितब्बो । इतो परं पन अपुब्बमेव वण्णयिस्साम । दुतियचित्ते ताव ससङ्खारभावमत्तमेव पठमचित्ततो विसेसो, सेसं तादिसमेव । दुतियकुसलं ।

ततियेपि धम्मुद्देसे अमोहाभावा इन्द्रियमग्गङ्गबलमूलसङ्गहेसु पञ्चिन्द्रियसम्मादिट्ठिमग्गङ्गपञ्जाबलमोहमूलानं परिहानिया सद्धिन्द्रियादीनं भावो विसेसो, सेसं तादिसमेव । तथा चतुत्थे ससङ्खारभावमत्तमेव विसेसो । ततियचतुत्थानि ।

पञ्चमछट्ठसत्तमट्ठमेसु पन सुखसोमनस्सट्ठानेसु उपेक्खाभावो, पीतिया च अभावो । तेनेव ज्ञानङ्गसङ्गहवारे चतुरङ्गज्ज्ञानताव विसेसो, सेसं पठमदुतियततियचतुत्थचित्तसदिसमेव । उपेक्खासहगतेसु चेत्थ चतूसु करुणामुदिताना उपपज्जन्तीति केचि वदन्ति, परिकम्मभूतानं पनेत्थ तासं उपपत्तिया महाअट्ठकथायं अनुज्जातत्ता उपचारप्पत्ता पन उपपज्जन्ति, न इतराति गहेतब्बं । पञ्चमछट्ठसत्तमट्ठमानि ।

**विसयादिप्पभेदतोति** एवं धम्मुद्देसादिना विभत्तानि अट्ठ कामावचरकुसलानि आरम्मणविभागतो पच्चेकं छब्बिधानि होन्ति रूपारम्मणं...पे०... धम्मरम्मणन्ति । तत्थ नीलादिभेदभिन्ना, अतीतानागतपच्चुप्पन्नअज्झत्तिकबाहिरओळारिकसुखुमादिभेदभिन्ना च वण्णधातु **रूपारम्मणं** नाम । एवं **सद्धारम्मणादीसुपि** यथानुरूपं भेदो वेदितब्बो ।

एत्थ च **फोट्ठब्बन्ति** आपोधातुवज्जितभूतत्तयं, **धम्मरम्मणन्ति** पञ्चारम्मणानि वज्जेत्वा अवसेसा रूपारूपपञ्जत्तियो वेदितब्बा, सेसं तादिसमेव । केचि पनेत्थ “चक्खुविज्जाणादीनमापाथगतानि एतानारम्मणानि रूपारम्मणादिवोहारं लभन्ति, अनापाथगतानि पन अतीतानागतदूरसुखुमादिभेदभिन्नानि

धम्मारम्मणानेवा”ति वदन्ति, तं न युतं दिब्बचक्खादीनं रूपारम्मणतादिवचनतो ।

अनापाथगता एव हि तानि दिब्बचक्खुआदीनं आरम्मणं, न च तानि धम्मारम्मणानि । रूपादयो हि पञ्च पच्चेकं द्वीसु द्वीसु द्वारेसु एकस्मिं खणे आपाथमागन्त्वा तंतद्वारिकजवनानं, तदनन्तरे मनोद्वारिकानञ्च अपरभागे च दिट्ठसुतादिवसेनानुस्सरन्तस्स सुद्धमनोद्वारिकानञ्च आरम्मणानि होन्ति । तथा हि नानावण्णविचित्तचेतियादिदस्सं करोन्तस्स, धम्मं सुणन्तस्स, भेरिसद्वादीहि वा पूजादिं करोन्तस्स च गन्धमालादीनि घायित्वा, खादनीयभोजनीयादिञ्च सायित्वा, सुखसम्पस्सानि अत्थरणपावुरणादीनि च फुसित्वा मनापभावं जत्वा तेहि चेतियपूजं करोन्तस्स, तत्थ तत्थ अकुसलं वा उप्पादेन्तस्स, तस्मिं तस्मिं खणे गद्दमानानि रूपादिपञ्चारम्मणानि साखाय अक्कमनं, पथवियं छायाफरणञ्च एकक्खणे कुरुमानं रुक्खगगे निलीयमानं पक्खिनो सरीरं विय यथासकं पसादञ्च घट्टेत्वा तस्मिंयेव खणे भवङ्गचलनपच्चयभावेन मनोद्वारेपि आपाथमागन्त्वा ततो भवङ्गं विच्छिन्दित्वा उप्पन्नानं आवज्जनादिवोद्धब्बनपरियोसानानं, वीथिचित्तानं, तदनन्तरानञ्च कुसलाकुसलादिजवनानं आरम्मणं हुत्वा तदनन्तरासु मनोद्वारवीथीसु च अपरभागे तथारूपं पच्चयं आगम्म अत्तना पूजादिकरणकालेसु, दिट्ठसुतघायितसायितफुट्ठवसेनानुस्सरन्तस्स, पच्चक्खतो अनुभुज्यमानानि विय मनोद्वारे च आरम्मणानि होन्ति ।

अथापि पञ्चहि द्वारेहि अगहितपुब्बानि बुद्धरूपादीनि, दिब्बरूपादीनि च पञ्चारम्मणानि सवनवसेन सल्लक्खेत्वा जवनक्खणे वा अपरभागे सुतवसेनेव अनुस्सरित्वा वा पसादं, कम्मफलसद्भादिं, लोभादिञ्च उप्पादेन्तस्सापि मनोद्वारे आपाथमागच्छन्ति । अभिज्ज्ञानं पन सुद्धमनोद्वारे एव, तस्मा एवं पञ्चद्वारे, मनोद्वारे, सुद्धमनोद्वारे च आपाथगतानि अतीतादिभेदभिन्नानि सब्बानिपि पञ्चारम्मणानि कदाचिपि धम्मारम्मणं न होन्ति, तदितरा नामरूपपञ्चित्तयो धम्मारम्मणन्ति गहेतब्बं । ननु चेत्तानि इट्ठकन्तमनापानि आरम्मणानि लोभस्स वत्थु, कथमेत्थ कुसलं उप्पज्जतीति? नियमादिकारणतो । चित्तं हि “कुसलमेव मया कत्तब्ब”न्ति पुब्बे नियमितवसेन सब्बत्थ अकुसलप्पवर्त्ति निवत्तेत्वा कुसले परिणामनवसेन च अभिण्हं आसेवितकुसलसमुदाचारवसेन च सप्पुरिसूपनिस्सयादिउपनिस्सयवसेन च योनिंसोआभुजितवसेन चाति इमेहि कारणेहि कुसलं हुत्वा उप्पज्जतीति वेदितब्बं । एवमिमेसु छसु आरम्मणेसु उप्पज्जनतो पच्चेकं छब्बिधानि होन्ति । आरम्मणववत्थानकथा ।

एवं आरम्मणभेदभिन्नेसु रूपारम्मणं ताव कुसलं दसपुञ्जकिरियवत्थुवसेन दसविधं होति । तत्थ एकेकं पन कायकम्मं वचीकम्मं मनोकम्मन्ति तिविधं । तत्थ कायद्वारे पवत्तं **कायकम्मं**, वचीद्वारे पवत्तं **वचीकम्मं**, मनोद्वारे पवत्तं **मनोकम्मं** । तत्थ कायद्वारन्ति कायविज्जन्ति । वचीद्वारन्ति वचीविज्जन्ति । तासं विभागो रूपविभक्तियं आवि भविस्सति । मनोद्वारन्ति सब्बं चेतनासम्पयुतं चित्तं वुच्चति, विसेसतो कुसलाकुसलं । तं हि सहजातानं चेतनानं, कायङ्गवाचङ्गचोपनं असम्पापुणित्वा पवत्तानं सुद्धमनोकम्मानं पवत्तिओकासदानतो द्वारन्ति वुच्चति, इमेसु पन तीसु द्वारेसु पवत्ता चेतना कायकम्मादयो नाम । अपिच पाणातिपातादयो, पाणातिपातावेरमणिआदयो च कायकम्मं नाम, मुसावादादयो, मुसावादावेरमणिआदयो च वचीकम्मं नाम, अभिज्ज्ञादयो, अनभिज्ज्ञादयो च मनोकम्मं नाम ।

कुसलपक्खे पन दानादिदसपुञ्जकिरियवत्थूनि च यथारहं कायवचीमनोकम्मानि होन्ति । एवं येभुज्यवुत्तितो चेस कायकम्मादिभावो वुत्तो पाणातिपातादीनम्पि वचीद्वारादीसु पवत्तितो केसज्जि पुरिसानं वनचरकादिभावो विय, द्वारानञ्च कायकम्मद्वारादिभावो केसज्जि गामानं ब्राह्मणगामादिभावो विय । अकुसले ताव एत्थ पाणातिपातादिकायकम्मं कायद्वारे, वचीद्वारे च यथारहं समुट्ठाति, नो मनोद्वारे । तथा मुसावादादिवचीकम्मं । पाणातिपातादिनिष्पादनत्थं हि मनोद्वारे एव चिन्तेन्तस्स चेतनाब्यापादादीसु कम्मपथप्पत्तेसु वा कम्मपथं अप्पत्तेसु वा मनोकम्मेसु एव पविसनतो कायकम्मादिभावं न पापुणाति । ननु विज्जामयेनापि केवलं मनोकम्मेन पाणातिपातादिं करोन्तीति? न अलोणभोजनदब्बसयनमन्तपरिजप्पनादिकायवचीपयोगं विना तस्सासिज्जनतो । अभिज्ज्ञादिमनोकम्मं पन तीसुपि द्वारेसु समुट्ठाति । अभिज्ज्ञाय हि कायेन परभण्डग्गाहादीनं, ब्यापादेन दण्डपरामसनादीनं, मिच्छादिट्ठिया तित्थियवन्दनादीनं करणकाले, वाचाय परसम्पत्तिपत्थनाय “हज्जन्तु बज्जन्तू”ति अनत्थपत्थनाय च तित्थियत्थुतितदत्थदीपनादीनञ्च यथाक्कमं पवत्तिकाले च तस्स मनोकम्मस्स कायवाचासु पवत्ति वेदितब्बा ।

कामावचरकुसलं पन पाणातिपातावेरमणिआदिकं कायवचीमनोकम्मं पच्चेकं द्वारत्तयेपि पवत्ति । तत्थ पाणातिपातादीहि सम्फप्पलापपरियोसानेहि सत्तहि विरमन्तस्स ताव हत्थमुट्ठाय, वचीभेदेन च समादियनकाले, मनसा विरमणकाले च तेसं कायवचीकम्मानं तीसु द्वारेसु पवत्ति वेदितब्बा । अनभिज्ज्ञादीहि सहगतेन चेतसा तज्जस्स कायपयोगस्स, “परवित्तुपकरणं चिरिट्ठितिकं होतु, सब्बे सत्ता अवेरा होन्तु, सो भगवा अरहं सम्मासम्बुद्धो”तिआदिना वचीपयोगस्स, केवलं मनोपयोगस्स च करणकाले मनोकम्मस्स तीसुपि द्वारेसु पवत्ति वेदितब्बा । एत्थ च पञ्चद्वारे उप्पन्नानि जवनानि कायवचीकम्मानि न होन्ति, मनोकम्मानि एव । तानि च न कम्मपथप्पत्तानि, केवलं कुसलादीनि होन्ति । मनोद्वारे पटुतरप्पत्तानि एव हि कम्मपथप्पत्तानि मनोकम्मानि होन्ति, रूपारूपजवनानि पन एकन्तं भावनामयं मनोकम्ममेव मनोद्वारे एव च पवत्तन्ति ।

किञ्चापि अभिज्ज्ञाज्जाणानि विज्जत्तिद्वयजनकानि, तथापि कायवचीकम्मवोहारं न लभन्ति, लोकुत्तरकुसलं पन कायवचीद्वारेसु अनुप्पज्जमानम्पि मिच्छावाचाकम्मन्ताजीवानं समुच्छेदपहानकारीनं विरतीनं वसेन कायवचीकम्मम्पि होति, तदितरमग्गज्जवसेन मनोकम्मम्पीति एकक्खणे तीणीपि कम्मानि होन्ति, तज्ज भावनामयं, द्वारं पनस्स मनोद्वारमेव । यथा च पाणातिपातावेरमणियादीनं वसेन कुसलस्स द्वारत्तये पवत्ति वुत्ता, एवं दसपुञ्जकिरियवत्थूनम्पि

वसेन वत्तब्बा। अट्ठकथासु पन न विचारिता, तथापि नयतो एवं वेदितब्बा।

तेसु दानं कायकम्ममेव, वचीकम्ममि वा। पत्तानुप्पदानं, अब्भनुमोदनं, देसना वचीकम्ममेव। सीलं अपचितिसहगतं, वेय्यावच्चसहगतञ्च कायकम्ममि अत्थि, वचीकम्ममि अत्थि। तत्थ सीलस्स कायवचीकम्मभावो सिद्धो एव। अपचितिया पन पुष्फपूजादिना, वन्दनादिना वा पवत्तिकाले कायकम्मभावो, थुत्तिमयपूजादिना पवत्तिकाले वचीकम्मभावो च वेदितब्बो। वेय्यावच्चस्सापि सहत्था करणकाले कायकम्मभावो, गिलानादीनं चतुपच्चयसमादापनादिवसेन, गरूहि आणत्तसद्देन आरोचनपक्कोसनादिवसेन वचीकम्मभावो च वेदितब्बो। भावना, सवनं, दिट्ठिजुकम्मञ्च मनोकम्ममेव, अब्भनुमोदनमीति केचि। सवनमि हि सोतद्वारानुसारेण मनोद्वारे एव धम्मत्थसल्लक्खणवसेन पवत्तिकाले मनोकम्ममेव।

तत्थ दानं अपचिति वेय्यावच्चं पत्तानुप्पदानं देसनाति इमानि पञ्च कायवचीद्वारेसु एव पवत्तन्ति, न मनोद्वारे। एत्थ च पत्तानुप्पदानदेसनानं कायविकारेण पत्तिं देन्तस्स, धम्मं देसेन्तस्स च कायद्वारेपि पवत्ति वेदितब्बा। सीलं भावना अब्भनुमोदनं सवनं दिट्ठिजुकम्मन्ति इमानि पन पञ्च तीसुपि द्वारेसु पवत्तन्ति, “न पुनेवं करिस्सामी”ति चेत्थ मनसाव दुच्चरिततो विरमन्तस्स, अब्भनुमोदन्तस्स च वसेन सीलब्भनुमोदनानं मनोद्वारेपि पवत्ति वेदितब्बा। यं पन **अट्ठसालिनियं** “दानमयं कायवचीमनोकम्मवसेन तिविधं होती”तिआदि वुत्तं, तं पुब्बचेतनावसेन मनोद्वारे पवत्तं गहेत्वा परियायतो वुत्तं, निप्परियायतो कायवचीद्वारप्पवत्ता सन्निट्ठानचेतनाव। तेनेव हि तत्थेव वुत्तं “विनयपरियायं पत्त्वा हि ‘दस्सामी करिस्सामी’ति वाचा भिन्ना होतीति। इमिना लक्खणेन दानं नाम होति, अभिधम्मपरियायं पत्त्वा पन विज्जमानकवत्थुं आरब्ध मनसा चिन्तितकालतो पट्ठाय कुसलं होति। अपरभागे कायेन वा वाचाय वा कत्तब्बं करिस्सती”ति (ध० स० अट्ठ० १)। इतरथा “दस्सामी”ति चिन्तितमत्तेनापि दानं नाम भवेय्य, तथा च तादिसं वत्थुं यथाचिन्तितनियामेन अदेन्तस्स धुरनिक्खेपे अदिन्नादानमि सिया। एवं मनसा पाणातिपातादयोपि सियुं, तञ्च न युत्तं, तस्मा वुत्तनयेनेव गहेत्तब्बं। अथ वा “सब्बं सापतेय्यं दिन्नञ्जेव हरतू”ति परिच्चजनसम्भवतो दानस्स मनोद्वारेपि पवत्ति वेदितब्बा।

एत्थ च दानसीलादिकायकम्मानं कायद्वारे पवत्तियं कम्मं कायकम्ममेव, द्वारमि कायद्वारमेव। वचीद्वारे पवत्तियं कम्मं कायकम्ममेव, द्वारं पन वचीद्वारं। मनोद्वारे पवत्तियमि कम्मं कायकम्मं, द्वारं पन मनोद्वारं। देसनाब्भनुमोदनादीनं वचीकम्मानं वचीद्वारे पवत्तियं कम्ममि वचीकम्मं, द्वारमि वचीद्वारमेव। कायद्वारे पवत्तियमि कम्मं वचीकम्ममेव, द्वारं पन कायद्वारं। मनोद्वारे पवत्तियमि कम्मं वचीकम्मं, द्वारं पन मनोद्वारं। भावनादिमनोकम्मानं मनोद्वारे पवत्तियं कम्ममि मनोकम्मं, द्वारमि मनोद्वारमेव। कायद्वारे पवत्तियमि कम्मं मनोकम्ममेव, द्वारं पन कायद्वारं। वचीद्वारे पवत्तियमि कम्मं मनोकम्ममेव, द्वारं पन वचीद्वारं। एवं पाणातिपातादीनं, पाणातिपातावेरमणिआदीनञ्च वुत्तानुसारेण कम्मववत्थानं, द्वारववत्थानञ्च यथानुरूपं योजेत्वा असङ्करतो जातब्बं।

द्वारकम्मववत्थानकथा निट्ठिता।

इदानीं यस्मा दसविधानि चेतानि पुञ्जकिरियवत्थूनि तीसु एवं सङ्गहन्ति दानमये सीलमये भावनामयेति। पत्तानुप्पदानं हि दानमये सङ्गहन्ति, “अब्भनुमोदनमी”ति (ध० स० अट्ठ० १५६-१५९ पुञ्जकिरियवत्थादिकथा) **अट्ठकथायं**। अपचितिवेय्यावच्चानि सीलमये। देसनासवनदिट्ठिजुकम्मानि भावनामये, तस्मा रूपारम्मणस्स कुसलस्स दानसीलभावनावसेन द्वारत्तयप्पवत्तिं योजेत्वा दस्सेस्साम। तदनुसारेणैव इतरेसं वसेनापि सक्का जातुन्ति। कुसलं हि वण्णारम्मणं हुत्वा उप्पज्जमानं दानसीलभावनावसेनेव तीसु द्वारेसु पवत्तति। कथं? यदा हि नीलपीतादिवण्णविचिन्तं पुष्फवत्थादिदेय्यधम्मं लभित्वा “वण्णदानं मे भविस्सती”ति वण्णवसेन आभुजित्वा चेतियादीसु सहत्थेन पूजेति, तदा रूपारम्मणं दानमयं कायद्वारे पवत्तति, तञ्च पुब्बचेतना सन्निट्ठानचेतना अपरचेतनाति तिविधं होति। एवं उपरिपि सब्बवारेसु तिविधता वेदितब्बा। यदा पन तदेव यथावुत्तवत्थुं वाचाय आणापेत्वा पुत्तदारादीहि दापेति, तदारूपारम्मणं दानमयं वचीद्वारे पवत्तति। यदा पन तदेव विज्जमानकवत्थुं “दस्सामी”ति चिन्तेति, पच्चासीसति, यथाधिप्पायं निष्पादेस्सति, तदा पुब्बचेतनावसेन परियायतो दानमयं मनोद्वारे पवत्तति नाम। एवं रूपारम्मणं दानमयं द्वारवसेन तिविधं होति।

यदा पन वुत्तप्पकारवण्णं देय्यधम्मं लभित्वा “एवं मनापवण्णानं परिच्चजनं नाम मय्हं कुलवंसागतवत्तमेत”न्ति सहत्था पूजेति, तादिसवण्णवन्तं वा परपरिग्गहितादिभोगसम्पत्तिं परिच्चजित्वा सीलं रक्खति, तदा रूपारम्मणं सीलं कायद्वारे च पवत्तति। यदा पन वुत्तप्पकारवण्णं देय्यधम्मं कुलवंसादिवसेन वाचाय आणापेत्वा परेहि दापेति, तादिसं वा परपरिग्गहितादिं वाचाय अपनेत्वा सीलं रक्खति, तदा रूपारम्मणं सीलं वचीद्वारे पवत्तति। यदा पन तादिसं विज्जमानकवत्थुं कुलवंसादिवसेन “दस्सामी”ति, तादिसं परपरिग्गहितादिकं अनामसित्वा “सीलं रक्खिस्सामी”ति वा चिन्तेति, तदा रूपारम्मणं सीलं मनोद्वारे पवत्तति। एवं रूपारम्मणं सीलमयं द्वारवसेन तिविधं होति।

यदा पन वुत्तप्पकारं वण्णवन्तं दत्त्वा तदेव वण्णं, सब्बं वा रूपायतनं चङ्कमन्तो अनिच्चादितो विपस्सति, तदा रूपारम्मणं भावनामयं कायद्वारे पवत्तति। तदेव वचीभेदं कत्वा सम्मसन्तस्स रूपारम्मणं भावनामयं वचीद्वारे पवत्तति। तदेव कायङ्गवाचङ्गं अचोपेत्वा सम्मसन्तस्स रूपारम्मणं भावनामयं मनोद्वारे पवत्तति। एवं रूपारम्मणं भावनामयं द्वारवसेन तिविधं होति। इति रूपारम्मणस्स कुसलस्स तिविधपुञ्जकिरियवत्थुवसेन नवसु कम्मद्वारेसु पवत्तिविभागो वेदितब्बो। इमिनाव नयेन रूपारम्मणस्स कुसलस्स दसपुञ्जकिरियवत्थुवसेनापि तिसाय कम्मद्वारेसु पवत्तिविभागो योजेत्वा जातब्बो। यथा च रूपारम्मणस्स, एवं सद्धारम्मणादीनमि पञ्चन्नं कुसलानं पुञ्जकिरियवत्थुद्वारेहि विभागो, योजनानयो च यथानुरूपं जातब्बो।



अपिच सद्धं नाम कन्दमूलं विय हत्थेन गहेत्वा दातुं न सक्का । यदा पन “सद्धदानं मे”ति आभुजित्वा भेरिआदितूरिये तिण्णं रतनानं देति, तेहि उपहारं वा करोति, धम्मकथिकादीनं सरभेसज्जादिं देति, धम्मस्सवनं घोसेति, सरभञ्जधम्मकथादिं वा करोति, तदा कुसलं सद्धारम्मणं होति । एवं गन्धादिवत्थुपरिच्चागेपि गन्धादिआरम्मणं । धम्मआरम्मणं पन ओजाजीवितिन्द्रियतदायत्तानं वसेन जातब्बं । यदा हि ओजवन्तानि अन्नपानसपिनवनीतादीनि “ओजदानं मे भविस्सती”ति देति, गिलानानं भेसज्जं वा वेज्जं वा उपनेत्वा, पाणोपरोधकं आवुधजालकुमिनादिं विनासेत्वा वा, वज्झप्पत्ते पाणिनो मोचेत्वा वा “जीवितदानं मे भविस्सति जीवितायत्तवुत्तिताय, पञ्चपसादसोळससुखमरूपचित्तचेतसिकानं वसेन पसादादिदानं मे भविस्सती”ति च मनसि करोति, तदा कुसलं धम्मआरम्मणं होति । सेसं तादिसमेव ।

अयं नानावत्थूसु ठितारम्मणानं योजना । एकवत्थुस्मिम्पि छारम्मणं लब्भतेव । पिण्डपातस्मिं हि मनापो वण्णो, खादनकाले मुरुमुरायनसद्धो, गन्धो, रसो, फोड्डब्बं, ओजा, तदायत्ता वा जीवितपसादादयो, तब्बिसयाणि च विज्जाणादीनीति छारम्मणम्पि वेदितब्बं । एवं चीवरादीसु च वत्थादीसु च यथानुरूपं जातब्बं । एत्थपि दानसीलभावनामयता, कायवचीमनोकम्मभावो च वुत्तनयेनेव वेदितब्बो । यथा च कुसलानं, एवं अकुसलानम्पि आरम्मणकम्मद्वारवत्थानं, अपुञ्जकरियवत्थूसु योजनानयो च वुत्तानुसारेण यथायोगं जातब्बो ।

एवं आरम्मणतो, पुञ्जकरियवत्थुतो, कम्मतो, द्वारतो च अनेकसहस्सप्पभेदेसु चेतेसु कुसलेसु उपङ्गानि पन जाणसम्पयुत्तानि चतुन्नं अधिपतीनं वसेन पच्चेकं चतुब्बिधानि, जाणविषययुत्तानि पन उपङ्गानि वीमंसाधिपतिवज्जिताधिपतित्तयवसेन पच्चेकं तिविधानि, तदुभयानि पुन हीनत्तिकवसेन पच्चेकं तिविधानि, तानि पुन अपरिमाणेसु पन चक्कवाळेसु पच्चेकं अपरिमाणेसु सत्तेसु एकेकस्मिं अतीतानागतपच्चुप्पन्नओळारिकसुखुमतादीहि अनन्तेहि पकारेहि उपपज्जनतो अनन्तापरिमाणानि होन्ति । तानि सब्बानि सम्बुद्धो अनन्तेन बुद्धजाणेन महातुलाय तुल्यमानो विय, महातुम्बे पक्खिपित्वा मिनयमानो विय सब्बाकारतो परिच्छिन्दित्वा महाकरुणाय कामावचरट्टेन सरिक्खताय एकत्तं उपनेत्वा, पुन सोमनस्सुपेक्खासहगतट्टेन, जाणसम्पयुत्तविषययुत्तट्टेन, असङ्खारिकसङ्खारिकट्टेन च कोट्टासे कत्वा देसेसि, यथा तं लोकविदू सत्था देवमनुस्सानन्ति । अयमेत्थ सद्धेपो, वित्थारो पन आदितो पट्टाय **धम्मसङ्गणिया** (ध० स० १), तदद्वकथाय च **अट्टसालिनिया** (ध० स० अट्ट० १) सब्बाकारतो जातब्बोति । एवं विसयादिष्वभेदतो विनिच्छयो वेदितब्बो ।

कामावचरकुसलधम्मा निट्ठिता ।

रूपावचरधम्मा पन कुसला ज्ञानङ्गसम्पयोगभेदतो पञ्चविधा होन्ति । सेय्यथिदं — वितक्कविचारपीतिसुखेकगतासम्पयुत्तं पठमज्झानिकं, ततो वूपसन्तं अतिक्कन्तवितक्कं विचारपीतिसुखेकगतासम्पयुत्तं दुतियज्झानिकं, ततो वूपसन्तं अतिक्कन्तविचारं पीतिसुखेकगतासम्पयुत्तं ततियज्झानिकं, ततो वूपसन्तं विरत्तपीतिकं सुखेकगतासम्पयुत्तं चतुत्थज्झानिकं, ततो वूपसन्तं अत्थङ्गतसुखं उपेक्खेकगतासम्पयुत्तं पञ्चमज्झानिकन्ति । एवं सम्पयोगभेदतो विनिच्छयो वेदितब्बो ।

धम्मद्वेसादितो पन पठमज्झाने ताव कामावचरपठमकुसले वुत्तेसु ठपेत्वा विरत्तयं सेसा छत्तिं स धम्मा होन्ति । तत्थ छन्दादयो चत्तारो, करुणा, मुदिता चाति छ येवापनका । सेसं सुज्जतवारपरियोसानं सब्बं कामावचरपठमकुसले वुत्तसदिसमेव । केवलं हि विरतीनं अभावो, सङ्गहवारे पञ्चमगङ्गाभावो, भूमन्तरवसेन रूपावचरभावो च विसेसो, सेसं तादिसमेव । पठमज्झानं ।

तथा दुतियज्झानेपि केवलं धम्मद्वेसे वितक्काभावो, सङ्गहवारे चतुक्कज्झानङ्गमङ्गाभावो च विसेसो, सेसं पठमसदिसमेव । दुतियं ।

तथा ततियज्झानेपि केवलं धम्मद्वेसे विचाराभावो, सङ्गहवारे तिवङ्गिकज्झानता च विसेसो, सेसं दुतियसदिसमेव । ततियं ।

तथा चतुत्थे केवलं धम्मद्वेसे पीतिया अभावो, कोट्टासवारे दुवङ्गिकज्झानभावो च विसेसो, सेसं ततियसदिसमेव । चतुत्थं ।

तथा पञ्चमे केवलं धम्मद्वेसे करुणामुदितादीनं अभावो, सोमनस्सद्धाने उपेक्खाभावो, कोट्टासवारे ज्ञानिन्द्रियेसु उपेक्खाज्ञानङ्गाभावो, उपेक्खिन्द्रियभावो च विसेसो, सेसं चतुत्थसममेव । पञ्चमं ।

पदभाजनीये पन वितक्कविचारानं वूपसमा दुतियं, पीतिया च विरागा ततियं, सोमनस्सस्स च अत्थङ्गमा चतुत्थन्ति चतुक्कनयोपि आगतो, सो तिकखपज्जानं एकप्पहारेनेव वितक्कविचारसमतिककमसम्भवतो वुत्तो । तत्थ दुतियादीनं सब्बसो पञ्चकनये ततियादिसमत्ता तत्थ वुत्तनयेनेव सब्बो विनिच्छयो वेदितब्बो तत्थेव अन्तो गधभावो चाति । चतुक्कनयो ।

विसयादिष्वभेदतो पन विनिच्छयं पञ्चकनयेनेव वक्खाम, तदनुसारतो एव चतुक्कनयवसेनापि सक्का जातुन्ति । एवं उपरि लोकत्तरेपि । पञ्चविधापि चेते रूपावचरकुसलधम्मा कसिणारम्मणभेदतो पच्चेकं अट्टविधा होन्ति पथवीकसिणं आपोतेजोवायोनीलपीतलोहितोदातकसिणञ्चाति, आलोकाकासकसिणेहि सद्धिं दसविधा होन्ति । **पदभाजनीये** (ध० स० २०२) पन आलोककसिणस्स ओदातकसिणेन सङ्गहितत्ता अग्गहणं दट्टब्बं, आकासकसिणस्स पन उग्घाटनासम्भवतो अनारुप्पज्झानिकत्ता । तं हि पुनपुनं उग्घाटियमानम्पि आकासमेव होति, तस्मा तत्थुप्पन्नं

रूपावचरपञ्चमज्झानं भवविसेसाय, दिट्ठधम्मसुखविहाराय च संवत्तति, अभिज्जाय, विपस्सनाय च पादकम्पि होति, अनारुपप्ता पन निरोधपादकं न होति । सेसानि पन नव कसिणानि निरोधपादकानिपीति अयमेतेसं विसेसो । आनापानज्झानस्सापि पनेत्थ वायोकसिणे सङ्गहो दट्ठब्बोति । कसिणकथा ।

एवं कसिणवसेन अट्ठविधा चेते अभिभायतनवसेन पन पच्चेकं अट्ठविधा होन्ति । भगवता हि —

“अज्झत्तं अरूपसज्जी बहिद्वा रूपानि पस्सति परित्तानि, तानि अभिभुय्य...पे०... अप्पमाणानि । तानि अभिभुय्य ...पे०... परित्तानि सुवण्णदुब्बण्णानि...पे०... अप्पमाणानि सुवण्णदुब्बण्णानि सुविसुद्धं नीलं पीतं लोहितं ओदातं”न्ति (ध० स० २११ आदयो) —

अट्ठ अभिभायतनानि देसितानि, तानि च कसिणेस्वेव अभिभवित्वा समापज्जनवसेन ज्ञानुपपत्तिविसेसतो, अनारम्माणविसेसतो । तत्थ हि **अज्झत्तं अरूपसज्जी**ति अलाभिताय वा अनत्थिकताय वा अज्झत्तरूपे कसिणवसेन परिकम्मसज्जाविरहितोव । **बहिद्वा रूपानि पस्सतीति** बहिद्वा अट्ठ कसिणरूपानि परिकम्मवसेन चेव अप्पनावसेन च पस्सति । **परित्तानीति** खुदकपरिमाणानि, तानि अभिभुय्य पस्सन्तो च सम्पन्नगहणिको कटच्छुभत्तं भत्तं लभित्वा “किं एत्थ भुज्जितब्बं अत्थी”ति सङ्कट्टित्वा सब्बं एककबळमेव करोति, एवमेव जाणुत्तरिको “किमेत्थ परित्तके आरम्माणे समापज्जितब्बं अत्थि, नायं मम भारो”ति तानि अभिभवित्वा सह निमित्तुप्पादेनेव अप्पन्नं निब्बतेति, तस्मा तं ज्ञानं “अभिभायतन”न्ति वुच्चति । **अप्पमाणानीति** महन्तानि । **तानि अभिभुय्याति** महग्घसो एकं भत्तपातिं लभित्वा विय जाणुत्तरो अप्पमाणं लभित्वा “एतं वा होतु अज्जं वा, किमेत्थ समापज्जितब्बं”न्ति अप्पन्नं निब्बतेति । **सुवण्णदुब्बण्णानीति** परिसुद्धापरिसुद्धवण्णानि । परिसुद्धानि हि नीलादीनि, अपरिसुद्धानि च सुवण्णदुब्बण्णानीति इध अधिप्येतानि, एतानिपि “सुवण्णानि वा होन्तु दुब्बण्णानि वा, परित्तअप्पमाणवसेनेव अभिभायतनानी”ति **आगमद्वकथासु** (दी० नि० अट्ठ० २.१७३; म० नि० अट्ठ० २.२४९; अ० नि० अट्ठ० ३.८.६५) वण्णितानि । वण्णाभोगस्स हि अत्थिताय पुरिमानि अभिभायतनानि वण्णाभोगरहितसहितताय एत्थ केवलतो विसेससम्भावा चतुधा वुत्तानि, नीलादीनि पन चत्तारि सुविसुद्धवण्णवसेन सुखारोहताय जाणुत्तरिको अभिभवित्वा अप्पन्नं निब्बतेति, तस्मा आरम्माणविसेसाभावेपि ज्ञानुपपत्तिविसेसतो इमेसं अट्ठन्नं अभिभायतनानं वसेन पच्चेकं अट्ठविधा होन्तीति वेदितब्बा । अभिभायतनकथा ।

तानि पुन यथा च अभिभायतनवसेन, एवं विमोक्खवसेनापि पच्चेकं तिविधा होन्ति । भगवता हि “रूपी रूपानि पस्सति, अज्झत्तं अरूपसज्जी बहिद्वा रूपानि पस्सति, सुभन्त्वेव अधिमुत्तो होती”ति (ध० स० २४० आदयो; दी० नि० ३.३३९, ३५८; अ० नि० ८.६६) तयो विमोक्खा देसिता । ते च कसिणेस्वेव अधिमुच्चनवसेन ज्ञानुपपत्तिविसेसतो, भावनारम्माणविसेसतो किमिदं अधिमुच्चनं नाम? पच्चनीकधम्मोहि सुट्ठ विमुच्चनं, आरम्माणेसु च सुट्ठ अभिरति, पितु मातु अङ्गे विस्सट्ठङ्गपच्चङ्गस्स दारकस्स सयनं विय अनिगगहितभावेन निरासङ्कताय आरम्माणे पवतीति वुत्तं होति । तत्थ **रूपीति** अज्झत्तं केसादीसु उप्पादितं रूपज्झानं रूपं नाम, तदस्स अत्थीति **रूपी** । अज्झत्तम्पि हि केसादीसु नीलं, मेदादीसु पीतं, मंसादीसु लोहितं, दन्तादीसु ओदातज्ज वण्णकसिणवसेन आभुजित्वा परिकम्मं करोन्तस्स रूपज्झानानि, कसिणं उग्घाटेत्वा च अरूपज्झानानि उप्पज्जन्तेव । **रूपानि पस्सतीति** बहिद्वापि नीलकसिणादिरूपानि ज्ञानचक्खुना पस्सति, इमिना अज्झत्तबहिद्भवत्थुकेसु कसिणेसु ज्ञानपटिलाभो दस्सितो । **अज्झत्तं अरूपसज्जीति** अत्तनो केसादीसु अनुप्पादितरूपावचरज्झानो, इमिना बहिद्वा पटिलद्धज्झानता दस्सिता । **सुभन्त्वेव अधिमुत्तो होतीति** इमिना सुविसुद्धेसु नीलादिवण्णकसिणेसु “सुभ”न्ति अधिमुत्तिवसेन पटिलद्धज्झानता दस्सिता । एवं आरम्माणविसेसाभावेपि अधिमुत्तिवसेन ज्ञानुपपत्तिविसेसतो इमेसं तिण्णं विमोक्खानं वसेन पच्चेकं तिविधा होन्तीति वेदितब्बा । विमोक्खकथा ।

यथा च विमोक्खतो, एवं पटिपदाभेदतो पच्चेकं चतुब्बिधा होन्ति दुक्खपटिपदं दन्धाभिज्जं, दुक्खपटिपदं खिप्पाभिज्जं, सुखपटिपदं दन्धाभिज्जं, सुखपटिपदं खिप्पाभिज्जन्ति । तत्थ पठमसमन्नाहारतो पट्टाय याव उपचारं उप्पज्जति, ताव पवत्ता ज्ञानभावना “पटिपदा”ति वुच्चति । सा एकच्चस्स दुक्खा नीवरणादिपच्चनीकधम्मसमुदाचारगहनताय असुखसेवना होति, एकच्चस्स तदभावतो सुखा । उपचारतो पन पट्टाय याव अप्पना, ताव पवत्ता पज्जा “अभिज्जा”ति वुच्चति । सा एकच्चस्स दन्धा असीघप्पवत्तिनी, एकच्चस्स खिप्पा । असप्पायसेविनो दुक्खा पटिपदा होति दन्धा च अभिज्जा, सप्पायसेविनो सुखा पटिपदा होति खिप्पा च अभिज्जा । पुब्बापरकालेसु सप्पायासप्पायसेवनवसेन वोमिस्सता च वेदितब्बा । तथा पलिबोधुपच्छेदादिकं पुब्बकिच्चं असम्पादेन्तस्स पटिपदा दुक्खा, सम्पादेन्तस्स सुखा पटिपदा । अप्पनाकोसल्लं असम्पादेन्तस्स दन्धाभिज्जा, सम्पादेन्तस्स खिप्पा । किलेसिन्द्रियानं वा तिक्खमुदुताय पठमा, विपरियायेन चतुत्था, वोमिस्सताय मज्झिमा द्वेति वेदितब्बा । तण्हाविज्जाभिभवानाभिभवनवसेन वा समथविपस्सनासु कताधिकाराकताधिकारतावसेन वापि एतासं पभेदो वेदितब्बो । पठमज्झानादिआगमनवसेनापि दुतियादीनं पटिपदाभिज्जाभेदो होतियेवाति दट्ठब्बं । एवं पटिपदावसेन पच्चेकं चतुब्बिधा होन्तीति वेदितब्बा । पटिपदाकथा ।

यथा च पटिपदाहि, एवं आरम्माणभेदतोपि पच्चेकं चतुब्बिधा होन्ति परित्तं परित्तरम्माणं, परित्तं अप्पमाणारम्माणं, अप्पमाणं परित्तरम्माणं, अप्पमाणं अप्पमाणारम्माणन्ति । तत्थ यं अप्पगुणं, उपरिज्झानस्स पच्चयो भवितुं न सक्कोति, इदं **परित्तं** । यं पन अवड्ढिते आरम्माणे पवत्तं, तं परित्तं आरम्माणं अस्साति **परित्तरम्माणं** । विपरियायतो **अप्पमाणं अप्पमाणारम्माणं** । तदुभयवोमिस्सताय मज्जे इतरद्वयं वेदितब्बं । एवं आरम्माणभेदतो चतुब्बिधा होन्तीति वेदितब्बा । आरम्माणकथा ।

यथा च पटिपदारम्माणेहि, एवं अधिपतीनं वसेन पच्चेकं चतुब्बिधता, हीनत्तिकवसेन पुन तिविधता च योजेत्वा वेदितब्बा ।

### दसकसिणमूलविभागकथा निड्ठिता ।

यथा कसिणमूलेसु, एवं ब्रह्मविहारमूलेसुपि यथायोगं विभागो वेदितव्यो — मेत्ताकरुणामुदितावसेन हि आदितो चत्तारि ज्ञानानि पच्चेकं तिविधा होन्ति मेत्तासहगतं, करुणासहगतं, मुदितासहगतं । पञ्चमज्झानं पन उपेक्खाब्रह्मविहारवसेन एकविधं उपेक्खासहगतं । पुरिमेसु हि तीसु पञ्चमज्झानं नुप्पज्जति । कस्मा? सोमनस्साविष्णुयोगतो, सोमनस्ससमुद्धितानं व्यापादविहिंसारतीनं यथाक्कमं निस्सरणत्ता, पच्छिमे च तिकचतुक्कज्झानं नुप्पज्जति । कस्मा? उपेक्खावेदनासम्पयोगतो, तस्सा च पटिधानुनयनिस्सरणतो मज्झत्ताकारेण पवत्तितो, तानि पुन पटिपदारम्मणाधिपतिहीनत्तिकभेदेहि पुब्बे वुत्तनयेन योजेत्वा वेदितव्वानि । एत्थ च अप्पसत्तारम्मणवसेन परित्तरम्मणता, बहुसत्तारम्मणवसेन अप्पमाणारम्मणता च एकस्मिं सत्ते अप्पनं पापेत्वा अनुक्कमेन एकावासएकवीथिगामादिगतसत्तेसु पापनवसेन वड्डना च वेदितव्वं । धम्मद्वेसे पनेत्थ करुणासहगते मुदिताविरहिता पञ्चत्तिस धम्मा, तेसु छन्दादयो चत्तारो, करुणा चाति पञ्चेव येवापनका, करुणा च नियताति वेदितव्वं । एवं मुदितासहगतेपि । केवलं करुणाविरहिता मुदिता नियता पवत्ताति अयमेत्थ विसेसो । अवसेसब्रह्मविहारद्वये, पन कसिणसुभादीसु च सब्बत्थ करुणामुदिताविरहिता च चतुत्तिस धम्मा, तत्थ च छन्दादयो चत्तारोव येवापनका वेदितव्वानि । ब्रह्मविहारमूलविभागकथा ।

असुभभेदतो पन पठमज्झानमेवेकं दसविधं होति उद्धुमातकसज्जासहगतं विनीलकविपुब्बकविच्छिदकविक्रयितकविक्रित्तकहतविक्रित्तकलोहितकपुळवक अट्टिकसज्जासहगतं, दसविधेपि चेतस्मिं असुभे पटिकूलत्ता, दुब्बलत्ता च वितक्कबलेनेव ज्ञानं तिड्ठति, न विना वितक्केन सीघसोताय नदिया अरित्तबलेनेव नावा विय, तस्मा पठमज्झानमेवेत्थ उप्पज्जति, समथविपस्सनादिआनिसंसदस्साविताय, पनेत्थ नीवरणप्पहानेन च पीतिसोमनस्सं उप्पज्जति बहुवेतनलाभदस्सनेन पुप्फछड्डुकस्स गूथरासिम्हि विय, उपसन्तव्याधिदुक्खस्स च रोगिनो वमनविरेचनप्पवत्तियं वियाति दड्डुब्बं । तं पन दसविधमि पठमज्झानं पटिपदारम्मणाधिपतिहीनत्तिकवसेन पच्चेकं योजेत्वा वेदितव्वं । एत्थ च असुभारम्मणस्स अवड्डनीयताय खुद्देक उद्धुमातकादिद्वाने उप्पन्नं निमित्तं परित्तरम्मणं, महन्ते अप्पमाणारम्मणं वेदितव्वं । एतेसु पन दससु असुभेसु सामज्जतो द्वत्तिसाकारवसेन, नवसिविधकपब्बवसेन च पवत्ता कायगतासति सङ्गहिता, वण्णकसिणेसु च केसादीनं कोट्टासानं नीलादिवण्णारम्मणा, चतुक्कपञ्चकज्झानवसेन उप्पन्ना कायगतासति च सङ्गहिता । पदभाजनीये विसुं न वुत्ता, तस्मा तेसं वसेनापि विभागो वेदितव्वो । असुभमूलविभागकथा ।

एवं आरम्मणादिभेदतो च भिन्नानं रूपावचरकुसलधम्मानं कालदेसादिभेदेन अनन्तता, भगवता च एकत्तं उपनेत्वा देसितभावो, वित्थारनयातिदेसो च कामावचरकुसले वुत्तानुसारेण यथानुरूपं जातव्वो । इतो परं अरूपावचरादीसुपि विसेसमत्तमेव वक्खाम । एवं विसयादिप्यभेदतो विनिच्छयो वेदितव्वो ।

### रूपावचरकुसलधम्मा निड्ठिता ।

अरूपावचरा पन कुसलधम्मा सम्पयोगतो न भिन्ना, सब्बेपि उपेक्खेकगतासम्पयुत्ताव, धम्मद्वेसादितोपि सब्बसो रूपावचरपञ्चमज्झानसदिसा । अरूपावचरभावो एव हेत्थ विसेसो । **विसयादिप्यभेदतो**ति एत्थ पन आरम्मणतो ते चतुब्बिधा होन्ति । सेय्यथिदं — आकासानज्जायतनं विज्जाणज्जायतनं आकिज्जज्जायतनं नेवसज्जानासज्जायतनन्ति । तत्थ हि कसिणगुघाटिमाकासे “अनन्तो आकासो”ति पवत्तं पठमं, तस्मिं पठमारुप्पविज्जाणे “अनन्तं विज्जाण”न्ति पवत्तं दुतियं, तस्स पठमारुप्पविज्जाणस्स अभावे “नत्थि किज्जी”ति पवत्तं ततियं, तस्मिं ततिये “सन्तमेतं पणीतमेत”न्ति पवत्तं चतुत्थं । पुरिमपुरिमेहि पच्छिमपच्छिमं सन्तसन्ततरसन्ततमन्ति च वेदितव्वं ।

ननु रूपावचरेसु वितक्कादिअङ्गसमतिक्रमतो उपरूपरिज्ञानानं सन्ततरादिभावो वुत्तो, अङ्गातिक्रमरहितेसु पन आरुप्पेसु कथन्ति? आरम्मणातिक्रमतो । एतेसु हि कसिणरूपसमतिक्रमतो पठमं ज्ञानं रूपावचरपञ्चमज्झानतो सन्तं, ततोपि कसिणगुघाटिमाकासातिक्रमतो दुतियं, ततोपि आकासे पवत्तविज्जाणातिक्रमतो ततियं, ततोपि आकासे पवत्तविज्जाणस्स समतिक्रमतो चतुत्थन्ति । एवं अङ्गसमत्तेपि थूलथूलातिक्रमेन सुखुमसुखुमारम्मणताय उपरूपरिज्ञानानं सन्ततरादिभावो वेदितव्वो समायामवित्थारानम्पि वत्थानं सुत्तसुखुमतरादिभावो विय । ननु अभावारम्मणताय ततियारुप्पं सन्तपणीततो मनसि करोन्तस्स चतुत्थारुप्पस्स कथं तत्थ निकन्तिपरियादानं, कथं च समतिक्रमो वा होतीति? असमापज्जितुकामताय, सा च अत्तनो सन्तपणीतताय । यथा हि राजा दन्तकारादिसिपिकानं अतिसुखुममनापसिप्पं दिस्वा “छेका वतिमे आचरिया”ति तेसं छेकताय तुस्सन्तोपि न तं सिपिकभावं पत्थेति, तं समतिक्रम राजभावे एव तिड्ठति, एवंसम्पदमिदं दड्डुब्बं । एवं आरम्मणभेदतो चतुब्बिधानम्पेतेसं पुन पटिपदारम्मणाधिपतिहीनत्तिकभेदेहि पुब्बे वुत्तनयेनेव पच्चेकं भेदो वेदितव्वो ।

एत्थ च रूपावचरचतुत्थज्झाननिकन्ति परियादानदुक्खताय पठमारुप्पस्स, पठमारुप्पादिनिकन्तिपरियादानदुक्खताय दुतियारुप्पादीनज्ज दुक्खपटिपदता, परियादिण्णनिकन्तिकस्स तदप्पनापरिवासदन्धताय दन्धाभिज्जता, विपरियायेन इतरा च वेदितव्वं । परित्तकसिणगुघाटिमाकासमूलकानं पन चतुत्तं परित्तरम्मणता, विपरियायानं अप्पमाणारम्मणता वेदितव्वं । रूपावचरा पनेत्थ अधिपतिसहिताव उप्पज्जन्ति, न विना अधिपतीहि । कामावचरा तु अधिपतिरहितापि उप्पज्जन्ति, ते च आरम्मणाधिपति सहजाताधिपतीति द्वेपि लब्धन्ति । रूपावचरा पन सहजाताधिपतिमेव, नेतरं । तत्थ च छन्दाधिपतिना सहजाता धम्मा छन्दाधिपतेय्या, छन्दो पन अधिपति एव, न छन्दाधिपतेय्यो । इतरे पन अधिपतेय्याव, नाधिपतयो अज्जस्स अत्तना

सहजातस्स छन्दस्स, इतरेसञ्च अधिपतियत्थस्स अभावा । एकस्मिं हि चित्तुप्पादे छन्दादीसु चतूसुपि विज्जमानेसु यथापच्चयं सहजाताधिपति एकोव लब्धति । एवं वीरियाधिपतियादीसुपि यथानुरूपं जातब्बं । एवं विसयादिपभेदतो विनिच्छयो जातब्बो ।

अरूपावचरकुसलधम्मा निट्ठिता ।

लोकुत्तरा पन कुसला मग्गसम्पयोगभेदतो चतुब्बिधा । सेव्यथिदं — सोतापत्तिमग्गसम्पयुत्तं सकदागामिमग्गसम्पयुत्तं अनागामिमग्गसम्पयुत्तं अरहत्तमग्गसम्पयुत्तं । ननु चतूसुपि चेतेसु मग्गसम्पयोगो समानो अट्ठन्मि मग्गज्ञानं सब्बत्थ उप्पत्तितो कथं तत्थ भेदोति? अनुसयप्पहानसङ्घातस्स मग्गकिच्चस्स भेदतो । अनुसये मारेन्तो गच्छतीति हि मग्गो । मग्गा हि यथासकं अनुसये पजहन्ति एव, निमित्ता वुट्ठहन्ति, पवत्तञ्च छिन्दन्ति नामाति वुच्चन्ति । निमित्तन्ति च पञ्चक्खन्धा, पवत्तन्तिपि ते एव । तं दुविधं उपादिन्नकं, अनुपादिन्नकञ्च ।

तत्थपि सोतापत्तिमग्गो दिट्ठानुसयं, विचिकिच्छानुसयं, तदेकट्ठे च किलेसे, तंसहजातानि दिट्ठिसम्पयुत्तानि, विचिकिच्छासम्पयुत्तञ्चाति पञ्चाकुसलचित्तानि च उप्पज्जमानोव समुग्धातेति, समुग्धातेन्तो च अपायभवतो चेव सुगतिभवतो च ठपेत्वा सत्त भवे तदवसेसतो वुट्ठाति । तत्थ यदेतं पठममग्गानुपत्तियं उप्पज्जमानारहं दिट्ठिविचिकिच्छासम्पयुत्तपञ्चचित्तसमुद्धानं रूपं, तं रूपक्खन्धो, तानि पञ्च चित्तानि विज्जाणक्खन्धो, तंसम्पयुत्ता वेदनादयो इतरे तयो खन्धा । इमे अनुपादिन्नपञ्चक्खन्धा अनुपादिन्ननिमित्तं, अनुपादिन्नपवत्तं नाम । ततो पठममग्गो वुट्ठाति, तं छिन्दति नाम । यदेतं अपायभवे, सुगतियञ्च ठपेत्वा सत्त भवे तदवसेसे च पठममग्गानुपत्तियं आर्यातिं उप्पज्जमानारहं कम्मजक्खन्धपञ्चकं, तं उपादिन्ननिमित्तं, उपादिन्नपवत्तं नाम । ततो पठममग्गो वुट्ठाति, तञ्च छिन्दति नाम । ततोव पठममग्गो अनुसयं पजहन्तोव निमित्ता वुट्ठहति, पवत्तञ्च छिन्दति नामाति वेदितब्बं । एवं इतरमग्गेसुपि उपादिन्नानुपादिन्ननिमित्तपवत्तं वुट्ठानं छिन्दनं यथानुरूपं जातब्बं ।

सकदागामिमग्गो पन ओळारिककामरागानुसयं, पटिधानुसयं, तदेकट्ठे च किलेसे, तंसहजातानि च तथा पवत्तानि चत्तारि दिट्ठिविप्पयुत्तानि, द्वे च दोमनस्ससहगतानीति छ अकुसलचित्तानि च उप्पज्जमानोव समुग्धातेति, समुग्धातेन्तो च कामसुगतितो ठपेत्वा एकभवं तदवसेसतो वुट्ठाति, पतनुभूताव तंसमङ्गिनो कामरागब्यापादा अधिमत्ता, ते च कदाचि विरळाव उप्पज्जन्तीति वेदितब्बा ।

अनागामिमग्गोपि तानेव तनुसहगतकामरागपटिधानुसयवसेन उप्पन्नानि छ चित्तानि उप्पज्जमानोव समुग्धातेति, समुग्धातेन्तो च कामभवतो वुट्ठाति । अरहत्तमग्गो पन रूपरागअरूपरागमानाविज्जानुसये, उद्धच्चं, तदेकट्ठे सब्बे किलेसे च तंसहजातानि चत्तारि दिट्ठिविप्पयुत्तानि, उद्धच्चसहगतञ्चाति पञ्चाकुसलचित्तानि च उप्पज्जमानोव समुग्धातेति, समुग्धातेन्तो च रूपारूपतो, सब्बभवतोपि वुट्ठाति । सेसं पठममग्गे वुत्तानुसारतो वेदितब्बं । एवं अनुसयप्पहानसङ्घातकिच्चभेदतो चतुन्नं मग्गानं भेदो वेदितब्बो ।

तदेवं मग्गसम्पयोगभेदतो चतुब्बिधं, पुन ज्ञानङ्गसम्पयोगभेदतो पच्चकं पञ्चविधा होन्ति । कथं? पठममग्गसम्पयुत्तं ताव वितक्कविचारपीतिसुखेकग्गतासम्पयुत्तं पठमज्ज्ञानिकं, विचारपीतिसुखेकग्गतासम्पयुत्तं दुतियज्ज्ञानिकं, पीतिसुखेकग्गतासम्पयुत्तं ततियज्ज्ञानिकं, सुखेकग्गतासम्पयुत्तं चतुत्थज्ज्ञानिकं, उपेक्खेकग्गतासम्पयुत्तं पञ्चमज्ज्ञानिकञ्चाति पञ्चविधं होति । एवं दुतियमग्गादिसम्पयुत्ता चाति वीसतिविधा होन्ति, एत्थ च चतुक्कनयवसेन सोळसविधतापि योजेतब्बा । किं पनेत्थ एवं ज्ञानङ्गयोगभेदस्स नियामकं कारणन्ति? सङ्खारुपेक्खाजाणं । तस्मिं हि वुट्ठानगामिनिविपस्सनाभूते सोमनस्ससहगते अरियमग्गा पञ्चमज्ज्ञानिका न उप्पज्जन्ति, सोमनस्ससहगता चतुक्कज्ज्ञानिकाव उप्पज्जन्ति, उपेक्खासहगते च चतुक्कज्ज्ञानिका न उप्पज्जन्ति, उपेक्खासहगता पञ्चमज्ज्ञानिकाव उप्पज्जन्ति ।

ननु चेत्थ सङ्खारुपेक्खाजाणं सोमनस्सुपेक्खासहगतत्ता चतुक्कपञ्चमज्ज्ञानिकानं सोमनस्सुपेक्खासहगतभावस्स नियामकहेतु, वितक्कादिअङ्गसमतिक्रमतो पन नेसं दुतियादिज्ज्ञानभावस्स नियामकेन अञ्जेन भवितब्बं । न हि सङ्खारुपेक्खाजाणं वितक्कादिविकलं उप्पज्जति । येन तं नियामकं भवेय्य, किं तं नियामकारणन्ति? पादकज्ज्ञानं, सम्मसितज्ज्ञानं वा । रूपारूपावचरेसु हि यं यं ज्ञानं समापज्जित्वा ततुट्ठाय ये केचि पकिण्णकसङ्खारे सम्मसित्वा ये मग्गे उप्पादेति, ते सब्बे तंतंज्ञानसदिसाव होन्ति । यं यं वा पन ज्ञानं, तंसम्पयुत्ते च अनिच्चादितो विपस्सित्वा ये ये मग्गे उप्पादेति, ते च तंतंज्ञानसदिसाव होन्ति भूमिवण्णसदिसवण्णा गोधा विय । तत्थ च सुक्खविपस्सकस्स उप्पन्नमग्गापि, समापत्तिलाभिना ज्ञानं पादकं अकत्वा असम्मसित्वाव उप्पादितमग्गापि पठमज्ज्ञानं पादकं कत्वा तं तं वा सम्मसित्वा उप्पादितमग्गापि सब्बे एकसदिसा पठमज्ज्ञानिकाव होन्ति । न हि लोकुत्तरमग्गो अप्पन्नं अप्पत्तो नाम अत्थि । दुतियततियचतुत्थज्ज्ञानानि पादकानि कत्वा वा तत्थ गते धम्मे सम्मसित्वा वा उप्पादितमग्गा यथाक्कमं चतुरङ्गिका, तिवङ्गिका, दुवङ्गिका च होन्ति । पञ्चमज्ज्ञानं, पन आरुप्पज्ज्ञानानि च पादकं कत्वा वा तत्थ गते धम्मे सम्मसित्वा वा उप्पादितमग्गा उपेक्खेकग्गतावसेन दुवङ्गिकाव होन्ति । एतेसञ्च पञ्चन्नं ज्ञानिकानमि पुब्बभागे विपस्सना सोमनस्ससहगतापि होति उपेक्खासहगतापि, वुट्ठानगामिनी पन विपस्सना चतुक्कज्ज्ञानिकानं सोमनस्ससहगता होति । पञ्चमज्ज्ञानिकानं पन उपेक्खासहगतावाति तदेव पादकज्ज्ञानं, सम्मसितज्ज्ञानं वा नियामकारणन्ति वेदितब्बं । एवं सम्पयोगतो विनिच्छयो ।

धम्मुहेसादितो पन पठमज्ज्ञानिकेसु ताव चतूसु कामावचरपठमकुसले वुत्तधम्मेसु ठपेत्वा करुणामुदिता सत्तितंस धम्मा होन्ति । विरतियो पनेत्थ

नियता, **पाळियञ्च** (ध० स० २७७) रूपेण निद्विद्वा, छन्दादयो च चत्तारो येवापनकाति वेदितब्बा।

सङ्गहवारे पन बोधिपक्खियधम्मेषु पुब्बे सङ्गहितावसेसानं सतिपट्टानसम्मप्यधानइद्धिपादबोज्झङ्गानं वसेन अतिरेका चत्तारो सङ्गहा वेदितब्बा। पठमज्झानिकमगगसम्पयुत्तेसु हि धम्मेषु सति उपट्टानट्टेन **सतिपट्टानं**, सा विसयभेदेन चतुब्बिधा, इतरे अस्सतिपट्टानाति सब्बेव ते द्विधा होन्ति। तथा वीरियं पदहनट्टेन **सम्मप्यधानं**, तं किच्चभेदेन चतुब्बिधं, इतरे असम्मप्यधानाति। तथा छन्दो वीरियं चित्तं अमोहोति चत्तारो धम्मा इज्जनकट्टेन यथाक्कमं “छन्दिद्विपादो वीरियचित्तवीर्यमसिद्धिपादो”ति नामेन “**इद्धिपादा**”ति वुच्चन्ति, इतरे “अनिद्धिपादा”ति। तथा सति अमोहो वीरियं पीति पस्सद्वि समाधि तत्रमज्झत्तताति इमे सत्त धम्मा बुज्जनट्टेन यथाक्कमं “सतिसम्बोज्झङ्गो धम्मविचयसम्बोज्झङ्गो वीरियपीतिपस्सद्विसमाधिउपेक्खासम्बोज्झङ्गो”ति वुच्चन्ति, इतरे अबोज्झङ्गाति एवं चत्तारो सङ्गहा।

सेसं सब्बं लक्खणादितो पट्टाय सुज्जतवारपरियोसानं कामावचरपठमकुसले वुत्तसदिसमेव, केवलं पन मग्गङ्गसङ्गहे “अट्टङ्गिको मग्गो होती”ति (ध० स० ३३७) **पदभाजनीये** सरूपेणेव निद्विद्वा, इन्द्रियसङ्गहे पज्जिन्द्रियट्टाने पठममग्गस्स अनज्जातज्जस्सामीतिन्द्रियं गहेत्वा इतरमग्गानं अज्जिन्द्रियं गहेत्वाव अट्टिन्द्रियन्ति अट्टिन्द्रियता, सब्बत्थ लोक्कतरता च विसेसो, सेसं तादिसमेव। पठमज्झानिका चत्तारो मग्गा।

तथा दुतियज्झानिकेसुपि केवलं धम्मद्वेसे वितक्काभावो, सङ्गहवारे चतुरङ्गज्झानता, सत्तङ्गमग्गता च विसेसो, सेसं पठमज्झानिकसदिसमेव। दुतियज्झानिकमग्गा।

तथा ततियज्झानिकेसुपि केवलं धम्मद्वेसे विचाराभावो, सङ्गहवारे तिवङ्गिकज्झानता च विसेसो, सेसं दुतियज्झानिकसदिसमेव। ततियज्झानिकमग्गा।

तथा चतुत्थज्झानिकेसुपि केवलं धम्मद्वेसे पीतिया अभावो, कोट्टासवारे दुवङ्गिकज्झानता, छळङ्गिकबोज्झङ्गता च विसेसो, सेसं ततियज्झानिकसदिसमेव। चतुत्थज्झानिकमग्गा।

तथा पञ्चमज्झानिकेसुपि केवलं सब्बत्थ वेदनापरिवत्तनमेव विसेसो, सेसं चतुत्थज्झानिकसदिसमेव। पञ्चमज्झानिकमग्गा। एवं धम्मद्वेसादितो विनिच्छयो।

विसयादिप्यभेदतो पन सब्बेपि लोक्कतरकुसला आरम्मणतो निब्बानारम्मणाव, तस्मा न ततो नेसं भेदो, पटिपदादिभेदतो पन पुब्बे वुत्तनयेन पच्चेकं भेदो वेदितब्बो। एत्थ च यो नामरूपपरिग्गहतो पट्टाय किलमन्तो विपस्सनं आरभित्वा दुक्खेन कसिरेन किलेसे विक्खम्भेति, तस्स दुक्खा पटिपदा होति। यो पन विक्खम्भितकिलेसो, सो विपस्सनापरिवासं वासेन्तो चिरेन मग्गपातुभावं पापुणाति, तस्स दन्धाभिज्जा होति। इमिना नयेन इतरा तिस्सोपि पटिपदाभिज्जायो वेदितब्बा। यथा च पटिपदादिभेदतो, एवं विमोक्खभेदतोपि पच्चेकं द्विधा होन्ति — सुज्जतविमोक्खो अप्पणिहितविमोक्खोति।

तत्थ **सुज्जतन्ति**, **अप्पणिहितन्ति** च लोक्कतरमग्गस्स नामं। सो हि आगमनतो सगुणतो आरम्मणतोति तीहि कारणेहि नामं लभति। कथं? इध भिक्खु विपस्सनाकम्मट्टानिको आदितो पट्टाय “अनिच्चं दुक्खमनत्ता”ति तिविधं अनुपस्सनं आरोपेत्वा सम्मसन्तो विचरति, सचस्स वुट्टानगामिनिविपस्सना तेभूमके सङ्गारे अनत्ततो विपस्सति, अयं अत्तसुज्जतादस्सनट्टेन सुज्जता नाम होति। सचे दुक्खतो विपस्सति, अयं तण्हापणिधिरहितट्टेन अप्पणिहिता नाम होति, ता उभोपि आगमनीयट्टाने ठत्वा अत्तनो अत्तनो मग्गस्स यथाक्कमं सुज्जतमग्गो अप्पणिहितमग्गोति नामं देन्ति। एवं आगमनतो नामलाभो वेदितब्बो। ननु सुत्तन्तेसु सचे वुट्टानगामिनिविपस्सना अनिच्चतो पस्सति, तस्सा वसेन मग्गो अनिमित्तविमोक्खो होतीति कत्वा तयो विमोक्खा कथिताति? सच्चं, अपि च खो परियायतो कथिता, निप्परियायतो पन सयम्पि सनिमित्ता अत्तनो मग्गस्स अनिमित्तनामं दातुं असक्कुण्येयताय द्वे एव विमोक्खा होन्तीति। तिस्सोपि हि विपस्सना निच्चनिमित्तं, सुखनिमित्तञ्च उग्घाटनेन अनिमित्तवोहारं लभन्ति, तिस्सोपि निमित्तभूतेसु खन्धेसु चरणतो सनिमित्ताव, तस्मा सयं आगमनीयट्टाने ठत्वा अत्तनो मग्गस्स निप्परियायतो अनिमित्तनामं दातुं न सक्कोन्ति। यस्मा पन मग्गो सयं रागादीहि सुज्जो, रागादिनिमित्तपणिधिरहितो च, तस्मा सगुणेनेव सुज्जतनामं, अप्पणिहितनामञ्च लभति। एवमस्स सगुणतो नामलाभो वेदितब्बो। यस्मा पन निब्बानं रागादीहि, सङ्गारेहि च सुज्जता, रागादिनिमित्तपणिधिरहितता च “सुज्जतं, अनिमित्तं, अप्पणिहितं”ति च वुच्चति, तस्मा तं आरम्मणं कत्वा उप्पन्नमग्गोपि “सुज्जतो, अनिमित्तो, अप्पणिहितो”ति च नामं लभति। एवं आरम्मणतो नामलाभो वेदितब्बो।

तेसु इध आगमनतोव मग्गो नामं लभति, न सगुणतो, नापि आरम्मणतो, सगुणारम्मणतो नामलाभस्स सुत्तन्तेसु परियायदेसितत्ता। तेनेव हेत्थ मग्गानं सगुणारम्मणतोपि अनिमित्तविमोक्खतं अग्गहेत्वा सुज्जतअप्पणिहितविमोक्खताव आगमनतो वुत्ता, तज्जागमनं दुविधं विपस्सनागमनं, मग्गागमनञ्च। तत्थ विपस्सनागमनतो मग्गो च सुज्जतादिनामं लभति, मग्गागमनतो च लभतेव, इध पन मग्गस्स अधिप्पेतत्ता विपस्सनागमनतोव वेदितब्बं। एवं विमोक्खभेदतो पच्चेकं द्विधा होन्ति। एवं विसयादिप्यभेदतो विनिच्छयो।

लोक्कतरकुसलधम्मा निद्विद्वा।

निद्रिता च मोहविच्छेदनिया नाम

अभिधम्ममातिकथसंवण्णनाय

“कुसला धम्मा”ति पदस्स अत्थवण्णना ।

अकुसलपदत्थो

लोभमूलवण्णना

अकुसला पन धम्मा भूमितो एकविधा कामावचराव, सम्पयोगतो पन मूलवसेन तिविधा होन्ति लोभमूला दोसमूला मोहमूलाति । तत्थ लोभमूला अट्टविधा सोमनस्ससहगतं दिट्ठिगतसम्पयुत्तं असङ्कारं, तथा ससङ्कारं, सोमनस्ससहगतं दिट्ठिगतविषययुत्तं असङ्कारं, तथा ससङ्कारं, उपेक्खासहगतं दिट्ठिगतसम्पयुत्तं असङ्कारं, तथा ससङ्कारं, उपेक्खासहगतं दिट्ठिगतविषययुत्तं असङ्कारं, तथा ससङ्कारन्ति ।

तत्थ इट्ठारम्मणे लोभबहुलतादीहि कारणेहि सोमनस्ससहगतता, असङ्खम्मसवनअकल्याणमित्ततादीहि दिट्ठिसम्पयुत्तता च वेदितब्बा । यदा हि “नत्थि कामेसु आदीनवो”तिआदिना नयेन मिच्छादिट्ठि पुरक्खत्वा हट्टतुट्ठो कामे वा परिभुज्जति, दिट्ठमङ्गलादीनि वा सारतो पच्चेति सभावतिकखेनेव अनुस्साहितेन चित्तेन, तदा पठमं अकुसलचित्तं उप्पज्जति । यदा मन्देन समुस्साहितेन, तदा दुतियं । यदा मिच्छादिट्ठि अपुरक्खत्वा केवलं हट्टतुट्ठो मेथुनं वा सेवति, परसम्पत्तिं वा अभिज्झायति, परभण्डं वा हरति सभावतिकखेनानुस्साहितेन, तदा ततियं । यदा समुस्साहितेन, तदा चतुत्थं । यदा पन कामानं वा असम्पत्तिं आगम्म, अज्जेसं वा सोमनस्सहेतून् अभावेन चतूसुपि विकप्पेसु सोमनस्सरहितता होति, तदा सेसानि चत्तारि उपेक्खासहगतानि उप्पज्जन्तीति अयं सम्पयोगतो विनिच्छयो ।

धम्मुद्देशतो पन पठमाकुसले ताव नियता **पाळियं** सरूपेणागता सोळस, येवापनकवसेन चत्तारोति वीसति धम्मा होन्ति । कथं? फस्सो वेदना सज्जा चेत्तना चित्तं वितक्को विचारो पीति वीरियं एकगता जीवितं अहिरिकं अनोत्तपं लोभो मोहो मिच्छादिट्ठीति इमे सरूपेणागता सोळस धम्मा, छन्दो अधिमोक्खो मनसिकारो उद्धचन्ति इमे येवापनका चत्तारोति । पदभाजनीये पन पुब्बे वुत्तनयेनेव “फस्सपञ्चकं ज्ञानङ्गपञ्चकं वीरियसमाधिमनोसोमनस्सजीवितवसेन इन्द्रियानि पञ्च, मिच्छादिट्ठिसङ्कप्पवायामसमाधिवसेन मग्गङ्गानि चत्तारि, वीरियसमाधिअहिरिकानोत्तप्पवसेन बलानि चत्तारि, लोभो मोहोति द्वे मूलानि, अभिज्झा मिच्छादिट्ठीति द्वे कम्मपथानि, अहिरिकं अनोत्तप्पन्ति लोकनासदुकं, समथो पग्गाहो अविक्खेपो चाति एवं सरूपेणागतानं द्वित्तिसधम्मानं सोळससु एव समवरोधो, सविभक्तिकाविभक्तिकभेदो च कामावचरपठमाकुसले वुत्तानुसारतो जातब्बो । अयं धम्मुद्देशतो विनिच्छयो ।

लक्खणादिविभागतो पन न हिरीयतीति अहिरिको, अहिरिकस्स भावो **अहिरिकं**, न ओत्तपं **अनोत्तपं** । तेसु अहिरिकं कायदुच्चरितादीहि अजिगुच्छनलक्खणं, अलज्जालक्खणं वा, अनोत्तपं तेहेव असारज्जनलक्खणं, अनुत्तासलक्खणं वा, सेसं हिरिओत्तप्पानं वुत्तप्पटिपक्खवसेन वेदितब्बं ।

लुब्धति तेन, सयं वा लुब्धति, लुब्धनमत्तमेव वा तन्ति **लोभो** । सो आरम्मणगहणलक्खणो मक्कटालेपो विय, अभिसङ्गरसो तत्तकपाले खित्तमंसपेसि विय, अपरिच्चागपच्चुपट्टानो तेलज्जनरागो विय, सज्जोजनीयधम्मोसु अस्साददस्सनपदट्टानो । तण्हानदिभावेन वड्डमानो सीघसोता नदी विय महासमुदं अपायमेव गहेत्वा गच्छतीति दट्ठब्बो ।

मुहन्ति तेन, सयं वा मुहन्ति, मुहनमत्तमेव वा तन्ति **मोहो** । सो चित्तस्स अन्धकारलक्खणो, अज्जाललक्खणो वा, असम्पटिवेधरसो, आरम्मणसभावच्छादनरसो वा, असम्पापटिपत्तिपच्चुपट्टानो, अन्धकारपच्चुपट्टानो वा, अयोनिमनसिकारपदट्टानो, सब्बाकुसलानं मूलन्ति दट्ठब्बो ।

मिच्छा पस्सन्ति ताय, सयं वा मिच्छा पस्सति, मिच्छादस्सनमत्तमेव वा एसाति **मिच्छादिट्ठि** । सा अयोनिमनो अभिनिवेसलक्खणा, परामासरसा, मिच्छाभिनिवेसपच्चुपट्टाना, अरियानं अदस्सनकामतादिपदट्टाना, परमं वज्जन्ति दट्ठब्बा ।

उद्धतभावो **उद्धच्चं** । तं अवूपसमलक्खणं, अनवट्टानरसं, भन्ततापच्चुपट्टानं, अयोनिमनसिकारपदट्टानं, चित्तविक्खेपोति दट्ठब्बो । सेसो पनेत्थ सुज्जतवारपरियोसानो सब्बोपि विनिच्छयो कुसलाधिकारे वुत्तानुसारतो वेदितब्बो । केवलं सङ्गहवारे **पाळियं** आगतवसेन पज्जिन्द्रियता, चतुरङ्गमग्गता, चतुब्बिधबलता, द्वेहेतुता, सब्बत्थ अकुसलभावो च विसेसो, सेसं तादिसमेव । पठमाकुसलं निद्रितं ।

यथा च पठमे, एवं दुतियेपि ससङ्कारता, येवापनकेसु थिनमिद्धानं सम्भवो, नियतता च विसेसो । तत्थ थिननता **थिनं**, मिद्धनता **मिद्धं**, अनुस्साहनसंसीदनता, सत्तिविधातो चाति अत्थो । तत्थ थिनं अनुस्साहलक्खणं, वीरियविनोदनरसं, संसीदनपच्चुपट्टानं । मिद्धं अकम्मज्जतालक्खणं,

ओनहनरसं, लीनतापच्युपट्टानं, पचलायिकानिद्वापच्युपट्टानं वा, उभयम्पि अरतितन्दिविजम्भिकादीसु अयोनिमोमनसिकारपदट्टानं। द्रुतियं।

ततिये सब्बोपि विनिच्छयो पठमाकुसले वुत्तनयोव। केवलं दिट्ठिया अभावो, येवापनकेसु मानस्स सम्भवो, अनियतता च, सङ्गहवारे तिवङ्गिकमग्गता च विसेसो, सेसं तादिसमेव। तत्थ मज्जतीति **मानो**। सो उण्णतिलक्खणो, सम्पग्गहरसो, केतुकम्यतापच्युपट्टानो, दिट्ठिविप्पयुत्तलोभपदट्टानो, उम्मादो विय दट्ठब्बो। ततियं।

यथा च ततिये, एवं चतुत्थेपि। थिनमिद्दञ्चेत्थ ससङ्गारता च अधिका, सेसं तादिसमेव। चतुत्थं।

पञ्चमल्लदुत्तमदुत्तमेसु सोमनस्सट्टाने उपेक्खासम्भवो, पीतिया च अभावो, ततो एव सङ्गहवारे चतुरङ्गज्ज्ञानता च विसेसो, सेसं सब्बं पठमद्रुतियततियचतुत्थचित्तसदिसमेव।

लोभमूला निट्ठिता।

### दोसमूलवण्णना

दोसमूला पन द्विधा दोमनस्ससहगतं पटिघसम्पयुत्तं असङ्गारं, तथा ससङ्गारं। एवं सम्पयोगतो। धम्मद्वेसादितो पन पठमे ताव पठमाकुसले वुत्तेसु पीतिलोभदिट्ठियो वज्जेत्वा दोसं, येवापनकेसु अनियतानि इस्सामच्छरियकुक्कुच्चानि, सोमनस्सट्टाने दोमनस्सञ्च पक्खिपित्वा एकवीसति धम्मा होन्ति। येवापनका चेत्थ सत्त। तत्थ दुस्सन्ति तेन, सयं वा दुस्सति, दुस्सनमत्तमेव वा तन्ति **दोसो**। सो चण्डिककलक्खणो पढासीविसो विय, विसप्पनरसो विसनिपातो विय, अत्तनो निस्सयदहनरसो वा दावग्गि विय, दुस्सनपच्युपट्टानो लद्धोकासो विय सपत्तो, आघातवत्थुपदट्टानो, विससंसद्वपूतिमुत्तं विय दट्ठब्बो। इस्सायना **इस्सा**। सा परसम्पत्तीनं उसूयनलक्खणा, तत्थेव अनभिरतिरसा, ततो विमुखभावपच्युपट्टाना, परसम्पत्तिपदट्टाना, सज्जोजनन्ति दट्ठब्बा। मच्छेरभावो **मच्छरियं**। तं लद्धानं वा लभितब्बानं वा अत्तनो सम्पत्तीनं निगूहनलक्खणं, तासज्जेव परेहि साधारणभावअक्खमनरसं, सङ्कोचनपच्युपट्टानं, कटुकञ्चुकतापच्युपट्टानं वा, अत्तसम्पत्तिपदट्टानं, चेतसो विरूपभावोति दट्ठब्बं। कुच्छितं कतं कुकतं, तस्स भावो **कुक्कुच्चं**। तं पच्छानुतापलक्खणं, कताकतानुसोचनरसं, विप्पटिसारपच्युपट्टानं, कताकतपदट्टानं, दासव्यमिव दट्ठब्बं। सङ्गहवारे दुक्खेन सङ्गि चतुरङ्गज्ज्ञानता, दोमनस्सेन पञ्चिन्द्रियता, तिवङ्गिकमग्गता, दोसमोहवसेन द्विहेतुकता च वेदितब्बा। सेसो पन सब्बो विनिच्छयो पठमाकुसले वुत्तसदिसो एव। यथा च पठमे, एवं द्रुतियेपि, ससङ्गारता पन थिनमिद्देहि सङ्गि नवयेवापनकता च विसेसो, सेसं तादिसमेव।

दोसमूला निट्ठिता।

### मोहमूलवण्णना

मोहमूलापि द्विधा उपेक्खासहगतं विचिकिच्छासम्पयुत्तं, तथा उद्धच्चसम्पयुत्तन्ति। तत्थ पठमे धम्मद्वेसतो ताव फस्सपञ्चकं वितक्को विचारो वीरियं एकग्गता जीवितं अहिरिकं अनोत्तपं मोहो विचिकिच्छाति सरूपेणागता चुदस, उद्धच्चं मनसिकारोति येवापनका द्वे चाति सोळस धम्मा होन्ति, एकग्गता चेत्थ चित्तद्रुतिमत्ता, इन्द्रियमग्गबलभावं न सम्पापुणाति। ततो एव सङ्गहवारे समाधिं वज्जेत्वा उपेक्खाय सङ्गि चत्तारि इन्द्रियानि, द्वे मग्गङ्गानि, तीणि बलानि होन्ति। मोहो पनेत्थ एकोव हेतु। सेसो पनेत्थ सब्बो विनिच्छयो वुत्तनयो एव।

तत्थ विगता चिकिच्छा एतिस्साति **विचिकिच्छा**। सा संसयलक्खणा, कम्पनरसा, अनिच्छयपच्युपट्टाना, अनेकं सभावपच्युपट्टाना वा, अयोनिमोमनसिकारपदट्टाना, पटिपत्तिअन्तरायकराति दट्ठब्बा। यथा च विचिकिच्छासम्पयुत्ते, एवं उद्धच्चसम्पयुत्तेपि। केवलं विचिकिच्छाय अभावो, अधिमोक्खस्स च भावो, ततो एव बलवतरसमाधिता, तेनेव सङ्गहवारे समाधिना सङ्गि पञ्चिन्द्रियता, तिवङ्गिकमग्गता, चतुब्बलता च होति। उद्धच्चञ्चेत्थ सरूपेनेव निट्ठिं, अधिमोक्खमनसिकारा द्वे येवापनकवसेनाति अयं विसेसो, सेसं तादिसमेव। इमानि पन द्वे चित्तानि नानाविसये, एकविसये च असण्ठहनतो पवट्टनकानि। उद्धच्चसहगतं हि लद्धाधिमोक्खताय लद्धपटिद्वं एकारम्मणेयेव पटिद्वाय पटिद्वाय पवट्टति चतुरस्समणि विय, इतरं नानारम्मणेसु वट्टमणि वियाति दट्ठब्बं। उद्धच्चसहगतञ्च ठपेत्वा सेसा एकादस पटिसन्धिं जनेन्तीति वेदितब्बं।

विसयादिप्पभेदतो पनेते द्वादसपि वत्थारम्मणवसेन ताव छब्बिधा होन्ति। तेसु लोभमोहमूला पन दस पञ्चद्वारे हदयवत्थुं निस्सायेव, मनोद्वारे निस्साय वा अनिस्साय वा जवनकिच्चं साधयमाना छब्बिधा। तथा दोसमूला निस्सायेव पन पवत्तन्ति। लोभमूला पन अदिन्नादानकाममिच्छाचारमुसावादपेसुज्जसम्पफलापाभिज्झासङ्गतानं छन्नं कम्मपथानं वसेन छब्बिधा। दिट्ठिसम्पयुत्ता पनेत्थ मिच्छादिट्ठिवसेनापीति सत्तविधा होन्ति। दोसमूला पन पाणाभिपातादिन्नादानमुसावादपेसुज्जफरुससम्पफलापब्यापादवसेन सत्तविधा होन्ति। दसन्नम्पि पनेसं द्वारकम्मवसेन चैव वीमंसावज्जिताधिपतित्तयवसेन च कुसले वुत्तनयेन विभागो वेदितब्बो। एकन्तहीनता हीनत्तिकभेदो नत्थि। आरम्मणाधिपति पनेत्थ लोभमूलेसु एव, न इतरेसु, मोहमूलेसु पन सहजाताधिपतिपि नत्थि, तथा कम्मपथभेदोपि। न हि पवट्टमानं कञ्चि अधिपतिं करोति। दोसो वा सविसयं, विचिकिच्छाचित्तञ्च

पटिपत्तिमन्तरायकरत्तेन दुच्चरितहेतुभूतम्पि पाणातिपातादीनं दोसलोभमूलचित्तेहेव सन्निष्ठापनियतो कम्मपथभेदं न गच्छति, पुब्बभागे एव पन हेतु होति । तेनेवस्स अपायहेतुता पठममग्गवज्झताति दडुब्बं । अतीतादिभेदतो पन द्वादसन्नं पच्चेकमनन्तरता, सेसो च विनिच्छयो कुसलाधिकारे वुत्तनयेनेव वेदितब्बोति ।

अकुसला धम्मा निड्ढिता ।

अव्याकतपदत्थो

अहेतुककुसलविपाकवण्णना

अव्याकता पन धम्मा जातितो चतुब्बिधा विपाककरियरूपनिब्बानवसेन । तत्थ विपाकाव्याकता धम्मा जातितो च द्विधा होन्ति कुसलाकुसलविपाकवसेन । तत्थ कुसलविपाका भूमितो चतुब्बिधा कामरूपावचरलोकुत्तरविपाकवसेन । तत्थ **कामावचरविपाका** अहेतुका सहेतुकाति दुविधा । तत्थ अलोभादिसहजातहेतुविरहिता अहेतुका । ते सम्पयोगवत्थारम्मणादिभेदतो अद्विविधा । सेय्यथिदं — उपेक्खासहगतं चक्खुविज्जाणं, तथा सोतघानजिक्खाविज्जाणं, सुखसहगतं कायविज्जाणं, उपेक्खासहगता मनोधातु, सोमनस्ससहगता मनोविज्जाणधातु, तथा उपेक्खासहगता चाति । चक्खुविज्जाणादीनि हि चत्तारि चक्खुपसादादीसु चतूसु उपादायरूपेसु उपादायरूपानं घट्टनानिघंसस्स पिचुपिण्डे पिचुपिण्डस्सेवातिदुब्बलताय उपेक्खावेदनासम्पयुत्तानेव होन्ति । कायविज्जाणं पन कायिन्द्रिये फोडुब्बभूतत्तयघट्टनानिघंसस्स अधिकरणमत्थके ठपितपिचुपिण्डे कूटपहारस्सेव बलवताय पसादनिस्सयेसुपि भूतेसु पटिघातसम्भवतो सुखसहगतं होति, मनोधातु अत्तनो गहणदुब्बलताय अतिइड्ढेपि उपेक्खासहगताव, मनोविज्जाणधातु पन अतिइड्ढे सोमनस्ससहगता, इड्ढमज्झत्ते उपेक्खासहगताति अयं सम्पयोगतो विनिच्छयो ।

धम्मुहेसादितो पन चक्खुविज्जाणे ताव फस्सपच्चकं, एकग्गता, जीवितन्ति सरूपेनागता सत्त, येवापनकवसेन मनसिकारो एको चाति अद्व धम्मा होन्ति । सङ्गहतो पनेत्थ खन्धायतनधातुआहारिन्द्रियवसेन पच्चेवसङ्गहा । तत्थ चक्खुविज्जाणधातुधम्मधातुवसेन धातुसङ्गहो, मनो उपेक्खाजीवितिन्द्रियवसेन इन्द्रियसङ्गहो च वेदितब्बो । सेसं वुत्तनयमेव । एत्थ च विज्जमानापि वेदना ज्ञानङ्गतं न गच्छति, इन्द्रियं पन होति । एकग्गता इन्द्रियमग्गङ्गबलभावम्पि न गच्छति अतिदुब्बलता । वितक्कपच्छिमकं हि ज्ञानं, हेतुपच्छिमको मग्गो, बलज्ज । यथा चेत्थ, एवं सोतघानजिक्खाकायविज्जाणेसुपि । केवलं पन सङ्गहवारे सोतविज्जाणधातुआदिवसेन धातुसङ्गहो, कायविज्जाणे वेदनापरिवत्तनज्ज विसेसो । यथा चेत्थ, एवं मनोधातुयापि । केवलं पन वितक्कविचारा द्वे येवापनका च अधिमोक्खोति तयो धम्मा अधिका । सङ्गहवारे मनोधातुधम्मधातुवसेन धातुसङ्गहो, वितक्कविचारुपेक्खेकग्गताहि चतूहि ज्ञानङ्गसङ्गहो च विसेसो । पाळियं पनेत्थ किज्जापि ज्ञानङ्गसङ्गहो न उद्धटो, तथापि सवितक्केसु नियमेन ज्ञानङ्गतासम्भवतो गहेतब्बोव । यथा चेत्थ, एवं मनोविज्जाणधातुद्वयेपि । सोमनस्ससहगतताय पनेत्थ पीति अधिका, सङ्गहवारे च पच्चङ्गज्ज्ञानता, वेदनापरिवत्तनं, उभयथापि मनोविज्जाणधातुधम्मधातुवसेन धातुसङ्गहो च विसेसो, सेसं तादिसमेव ।

विसयादिप्पभेदतो पन चक्खुविज्जाणादीनि पच्च यथाक्कमं चक्खादिएकेकमेव वत्थुं निस्साय पच्चुप्पन्ने, इड्ढे च रूपादिएकेकारम्मणे एव करियमनोधातुअनन्तरं आलोकाकासवायुजलपथवीसहकारीनि पसादकादीनि दस्सनसवनघायनसायनफुसनकिच्चानि साधयमानानि चक्खुद्वारादीसु एकेकस्मिं एव विपच्चन्ति । एवमेतेसं वत्थुद्वारारम्मणकिच्चानि विसुं नियतानि । ठानं पन तेसं पच्चन्नम्पि एकमेव, तेन नेसं न भेदो । मनोधातु पन हृदयवत्थुं निस्सायेव पच्चुप्पन्नेसु रूपादीसु पच्चसुपि आरम्मणेसु पच्चविज्जाणानन्तरं सम्पटिच्छनकिच्चं साधयमाना पच्चसुपि द्वारेसु पवत्तति, सोमनस्ससहगता मनोविज्जाणधातु पन हृदयवत्थुं निस्सायेव अतिइड्ढे पच्चुप्पन्ने पच्चारम्मणे विपाकमनोधातुअनन्तरं सन्तीरणकिच्चं, छसुपि द्वारेसु छसु बलवकामावचरारम्मणेसु अतीतादीसु जवनानन्तरं तदारम्मणकिच्चज्ज साधयमाना विपच्चति । एवमेतिस्सा द्वारारम्मणकिच्चद्वानानि अनिबद्धानि, ततो तेहि भेदो होति, वत्थु पन तत्थेव निबद्धं, ततो न भेदो, एवमुपेक्खासहगतायपि । केवलं पनेसा द्वारविनिमुत्तापि हुत्वा सुगतियं जच्चन्धबधिरजच्चुम्मत्तकादीनं पटिसन्धिकाले पुरिमचुतिचित्तानन्तरं कम्मबलेनोपड्डितं कम्मकम्मनिमित्तगतिनिमित्तेसु अज्जतरं अतीतादिभेदं छब्बिधम्पि कामावचरारम्मणमारब्ध पटिसन्धिकच्चं, तदनन्तरतो पड्डाय यावतायुक् भवङ्गकिच्चं, अन्ते चुतिकिच्चज्ज, वुत्तनयेन सन्तीरणतदारम्मणकिच्चानि च साधयमाना इमेसु पच्चसु ठानेसु विपच्चतीति अयं विसेसो, सेसं तादिसमेव ।

एत्थ च वधबन्धादिवसप्पवत्ते अनिद्वारम्मणे खन्तिपटिसङ्खानादिवसेन कुसलुप्पत्तितो तन्निब्वत्तानं पटिसन्धिआदिविज्जाणानं कम्मनिमित्तज्जे आरम्मणं होति, अनिद्वेनेव तेन भवितब्बं । एवं इड्ढविसये उप्पन्नानं कुसलविपाकानं अनिद्वारम्मणेसु अनुप्पत्तितो कम्मगतिनिमित्तमेव तेसं आरम्मणं होतीति विज्जायति । विचारेत्वा यथा अविरोधो होति, तथा गहेतब्बं । एवं इड्ढविसये उप्पन्नकुसलतो निब्वत्तानम्पि पटिसन्धिआदिविज्जाणानं कम्मनिमित्तारम्मणताय अविरोधो जातब्बो । अतीतादिभेदतो पन अद्वन्नम्पि पच्चेकमनन्तरता हेड्डा वुत्तनयेन गहेतब्बा ।

अहेतुककुसलविपाका निड्ढिता ।



### सहेतुककुसलविपाकवण्णना

अलोभादिविपाकहेतुसम्पयुक्ता पन सहेतुका, ते सम्पयोगतो कामावचरकुसला विय अट्टविधा । सोमनस्सजाणादिसम्पयोगो पनेत्थ आगमनादितो वेदितब्बो । तिहेतुकं हि कामावचरकुसलं तिहेतुकद्विहेतुकपटिसन्धियो दत्त्वा पवत्ते छसु द्वारेसु सोळस विपाकानि देति, दुहेतुकं पन कुसलं दुहेतुकाहेतुकपटिसन्धियो दत्त्वा पवत्ते छसु द्वारेसु तिहेतुकरहितानि द्वादस विपाकानि देति । असङ्खारिकससङ्खारिकभावो पनेत्थ पच्चयविसेसतोपि होति । बलवपच्चयेनापि हि उप्पन्नं असङ्खारिकं होति, दुब्बलेनापि इतरं । केचि पन असङ्खारिकेन ससङ्खारविपाकानं, ससङ्खारिकेन च असङ्खारिकानं उप्पत्तिं न इच्छन्ति । यस्मा पनेतानि पटिसन्धिदायकतो अज्जेनापि कम्मेन पवत्ते अकुसलविपाकानि पवत्तन्ति, पट्टाने च “सहेतुकं भवङ्गं अहेतुकस्स भवङ्गस्स अनन्तरपच्चयेन पच्चयो”ति (पट्टा० ३.१.१०२) वुत्तं, तस्मा अहेतुकपटिसन्धिकस्स पुग्गलस्स सुगतियं पवत्ते सहेतुकानिपि विपाकानि पवत्तन्ति । दुग्गतियं, पन रूपावचरभूमियञ्च अहेतुकानेव पवत्तन्ति । तेसुपि अतिइट्ठे आरम्भणे सोमनस्ससहगतानि, इट्ठमज्झत्ते उपेक्खासहगतानीति एवं आगमनादितो सम्पयोगभेदो वेदितब्बो ।

धम्मद्वेसादितो पन याव सुज्जतवारपरियोसाना कामावचरकुसलसदिसोव सब्बो विनिच्छयो, केवलञ्चेत्थ येवापनकेसु करुणामुदिता न सन्ति सत्तारम्मणत्ता । एकन्तपरित्तरम्मणा हि कामावचरविपाका । विरतियोपेत्थ लोकियेसु एकन्तकुसलसभावत्ता न सन्ति । “पञ्चसिक्खापदा कुसला एवा”ति (विभ० ७१५ आदयो) हि वुत्तं । फस्सादयो चेत्थ विपाकत्ता आदासे मुखनिमित्तं विय निरुस्साहसन्ता, कुसला पन मुखं विय सउस्साहा । सङ्गहवारे च पञ्चङ्गिको मग्गो होति, अयं विसेसो । सेसं तादिसमेव ।

विसयादिप्यभेदतो पन ख्यायं कुसलेसु कम्मद्वारपुञ्जकिरियाधिपतीहि भेदो वुत्तो, सो इध नत्थि अविज्जत्तिजनकतो, अविपाकधम्मतो, तथा अप्ववत्तितो च । हीनत्तिकभेदो पन अत्थि हीनमज्झिमप्पणीतानं कुसलानं विपाकत्ता, तथा द्वारारम्मणादिभेदो । एते हि हृदयवत्थुं निस्साय द्वारविनिमुत्ता हुत्वा देवमनुस्सेसु द्विहेतुकरहितेहानं हेट्ठा वुत्तनयेन पटिसन्धिभवङ्गचुतिकिच्चाणि, छद्वारे छसु आरम्भणेसु तदारम्मणकिच्चञ्च साधयमाना एवं चतूसु ठानेसु विपच्चन्ति । एवमेतेसं द्वारारम्मणकिच्चट्टानानि अनिबद्धानि, ततो तेहि भेदो होति । वत्थु पन तत्थेव निबद्धं, ततो न भेदो । अतीतादिभेदतो पनेत्थापि अनन्तता वुत्तनया एवाति ।

कामावचरसहेतुककुसलविपाका निट्ठिता ।

### रूपावचरविपाकवण्णना

रूपावचरविपाकापि सम्पयोगभेदतो अत्तनो कुसला विय पञ्चविधा होन्ति । सब्बो चेत्थ विनिच्छयभेदो कुसले वुत्तनयो एव । विपाकभावतो पनेत्थ यथा हत्थिआदीनं छाया तंसदिसा, एवं कुसलागमनतो च ज्ञानङ्गादिसम्पयुत्तधम्मसमायोगो, पटिपदादिभेदो च होति । अपिचेत्थ तिविधाय पठमज्ज्ञानभूमिया पठमज्ज्ञानविपाका, तथा दुतियज्ज्ञानभूमिया दुतियज्ज्ञानविपाका ततियज्ज्ञानविपाका च, ततियज्ज्ञानभूमिया चतुत्थज्ज्ञानविपाका, वेहप्फलपञ्चसुद्धावासवसेन छब्बिधाय चतुत्थज्ज्ञानभूमिया पञ्चमज्ज्ञानविपाका च वुत्तनयेन पटिसन्धिभवङ्गचुतिकिच्चाणि साधयमाना हृदयवत्थुं निस्साय द्वारविनिमुत्ताव कम्मनिमित्तसङ्घातपञ्चत्तरम्मणा हुत्वा विपच्चन्तीति अयं विसेसो, सेसं तादिसमेव ।

रूपावचरविपाका निट्ठिता ।

### अरूपावचरविपाकवण्णना

एवं अरूपावचरविपाकापि आरम्भणभेदतो अत्तनो कुसला विय चतुब्बिधा होन्ति । विनिच्छयो च सब्बो कुसले वुत्तनयोव । कुसलतो चेत्थ विसेसो रूपावचरविपाके वुत्तनयेन वेदितब्बो । केवलं पनेत्थ कम्मनिमित्तभूतपञ्चत्तरम्मणो आकासानञ्चायतनविपाको पठमारुप्पभूमियं, तथा महग्गतारम्मणो विज्जाणञ्चायतनविपाको दुतियारुप्पभूमियं, कम्मनिमित्तभूतपञ्चत्तरम्मणो आकिञ्चञ्चायतनविपाको ततियारुप्पभूमियं, महग्गतारम्मणो नेवसञ्जानासञ्चायतनविपाको चतुत्थारुप्पभूमियञ्च अवत्थुका वुत्तनयेन पटिसन्धिभवङ्गचुतिकिच्चाणि साधयमानाव पवत्तन्तीति अयमेव विसेसो ।

अरूपावचरविपाका निट्ठिता ।

### लोकुत्तरविपाकवण्णना

तथा लोकुत्तरविपाकापि अत्तनो कुसला विय तंतमग्गफलत्ता चतुब्बिधा, ज्ञानङ्गयोगभेदतो पच्चेकं पञ्च पञ्च कत्वा वीसतिविधाव होन्ति । विनिच्छयो चेत्थ कुसले वुत्तनयोव । केवलं सङ्गहवारे सोतापत्तिमग्गफलं सकदागामिमग्गफलं अनागामिमग्गफलन्ति इमेसं तिण्णं अज्जिन्द्रियं, अरहत्तफलस्स च अज्जाताविन्द्रियं पज्जिन्द्रियद्वाने गहेत्वा अट्ठिन्द्रियता, बोज्झङ्गमग्गङ्गादिबोधिपक्खियधम्मा, पटिपदादिभेदो च मग्गागमनवसेनेव होतीति

वेदितब्बो। अधिपतिभेदोपेत्य लब्धति। लोकोत्तरकुसला हि अत्तनो फलानं अनन्तरुपत्तितो, जवनवुत्तितो च अधिपतिं विधातुं सक्कोन्ति, लोकिया पन विपरीततो न सक्कोन्ति। तेनाहु पोराणा “विपाके अधिपती नत्थि ठपेत्वा लोकोत्तर”न्ति (ध० स० अट्ठ० ५०५)। विमोक्खभेदतो पनेते मग्गागमनतो तिविधा होन्ति सुज्जतअनिमित्तअप्पणिहितविमोक्खवसेन। मग्गा हि विपस्सनागमनतो “सुज्जतो अप्पणिहितो”ति द्वे नामानि लभित्वा सगुणारम्मणतो परियायेन अनिमित्तातिपि वुच्चन्ति, तस्मा सयं आगमनीयद्वाने ठत्वा अत्तनो अत्तनो अनन्तरफलानं निप्परियायतो तीणिपि नामानि देन्ति। अपरभागे पन फलसमापत्तिभूतानं न देन्ति। तत्थ विपस्सनागमनतोव मग्गे वुत्तनयेन दुविधो नामलाभो वेदितब्बो। ते च न मग्गा विय एकचित्तक्खणिका, मग्गवीथियं पन द्वत्तिक्खत्तुं, फलसमापत्तिवीथियं सकलम्पि दिवसं अप्पनाजवनवसेनेव निरन्तरं महग्गतजवनानि विय पवत्तन्तीति अयं विसेसो।

लोकोत्तरविपाका निट्ठिता।

अकुसलविपाका पन कामावचराव, लोभादिसम्पयुत्तहेतु अभावतो अहेतुका एव च होन्ति। ते सम्पयोगतो उपेक्खासहगतं चक्खुविज्जाणं, तथा सोतधानजिह्वाविज्जाणानि, तथा दुक्खसहगतं कायविज्जाणं, उपेक्खासहगता मनोधातु, तथा मनोविज्जाणधातूति सत्तविधा। विनिच्छयो पनेस सब्बत्थ तादिसाहेतुककुसलविपाकेसु वुत्तनयो एव। केवलं पनानिद्वारम्मणता, कायविज्जाणस्स दुक्खसहगतता, उपेक्खासहगतमनोविज्जाणधातुया उद्धच्चवज्जिताकुसलपच्चया चतूसु अपायेसु पटिसन्धिभवङ्गचुतिकिच्चाणि, सुगतियञ्च सन्तीरणतदारम्मणकिच्चाणि च साधनवसेन पवत्ति च विसेसो, सेसं तादिसमेव।

अकुसलविपाका निट्ठिता।

निट्ठिता च विपाकाब्याकता।

**अहेतुककिरियावण्णना**

किरियाब्याकता पन कामरूपावचरवसेन तिविधा। तत्थ कामावचरकिरिया अहेतुका सहेतुकाति दुविधा। तत्थ सहजातहेतुविरहिता अहेतुका। ता सम्पयोगादितो तिविधा उपेक्खासहगता मनोधातु, सोमनस्ससहगता मनोविज्जाणधातु, तथा उपेक्खासहगताति। **किरिया**ति करणमत्तं, किच्चमत्तन्ति अत्थो। सब्बेसुयेव हि किरियचित्तेसु यं आवज्जनकिच्चद्वयं, तं अजवनवुत्तितो मोघपुप्फं विय। यं जवनवुत्तिकं, तं निरानुसयसन्तानप्पवत्तितो छिन्नमूलरुक्खपुप्फं विय अफलं होति। तंतं आवज्जनजवनकिच्चसाधनवसेन पवत्तता पन किच्चमत्ततं उपादाय “किरिया”ति वुत्तं। तत्थ मनोधातुया विपाकमनोधातुयं वुत्तनयेन सब्बो विनिच्छयो वेदितब्बो। केवलं पन पञ्चद्वारे इट्ठेसु वा अनिट्ठेसु वा पञ्चारम्मणेसु पञ्चपसादे घट्टितेसु उप्पन्नभवङ्गपच्छेदानन्तरं तमेव पञ्चारम्मणमारब्ध हृदयवत्थुं निस्सायेवावज्जनकिच्चं साधयमाना पञ्चसुपि द्वारेसु पवत्ततीति अयं विसेसो।

मनोविज्जाणधातुद्वयम्पि यथाक्कमं कुसलविपाकाहेतुकमनोविज्जाणधातुद्वयसदिसं, वीरियं पनेत्थ अधिकं, वीरियूपत्थम्भोव समाधि बलवा होति। ततो एवेत्थ सङ्गहवारे वीरियसमाधिमनोसोमनस्सजीवित्तिन्द्रियानं पञ्चन्नं वसेन इन्द्रियसङ्गहो होति, इथापि बलसङ्गहो नत्थेव। यं पनेत्थ **पदभाजनीये** समाधिवीरियानं निट्ठेसे “समाधिबलं वीरियबल”न्ति (ध० स० ५७०-५७२) बलवेवचनं वुत्तं, तं इतराहेतुकचित्तसम्पयुत्तेहि इमेसं बलवतरतादस्सन्तं परियायतो वुत्तं। ततो एव हि सङ्गहवारे “द्वे बलानि होन्ती”ति न वुत्तं, तस्मा अहेतुकेसु निप्परियायतो बलं नत्थि एवाति गहेतब्बं।

विसयादिप्पभेदतो पनेत्थ सोमनस्ससहगता ताव हृदयवत्थुञ्जेव निस्साय पञ्चद्वारे वोट्ठब्बनकिच्चाय च, मनोद्वारे अनुळारेसु छसु कामावचरारम्मणेसु आवज्जनकिच्चाय च मनोविज्जाणधातुया अनन्तरं जवनकिच्चं साधयमाना खीणासवानञ्जेव हसितं उप्पादेन्ती पवत्तति। हसितं हि सोमनस्ससहगतकामावचरेहेव जवनेहि, तेसु असेखानं पञ्चहि किरियाजवनेहि, सेखानं पन कुसलेहि चेव दिट्ठिविप्पयुत्तलोभमूलेहि चाति छहि, पुत्थुज्जनानं दिट्ठिसम्पयुत्तेहि चाति अट्ठहीति तेरसहि चित्तेहि उप्पज्जति। उपेक्खासहगता पन पञ्चद्वारे हृदयवत्थुञ्जेव निस्साय सन्तीरणकिच्चाय विपाकमनोविज्जाणधातुया अनन्तरं वोट्ठब्बनकिच्चं, मनोद्वारे सब्बेसु छसुपि आरम्मणेसु सवत्थुका, अवत्थुका वा भवङ्गचलनानन्तरं आवज्जनकिच्चं साधयमाना पवत्तति। अयं हि तीसु भवेसु कस्सचि सचित्तकपुग्गलस्स न किस्मिञ्चि विसये न उप्पज्जति, सब्बज्जुतज्जाणसदिसं महागमनं नामेतं चित्तन्ति अयं विसेसो, सेसं तादिसमेव।

अहेतुककिरिया निट्ठिता।

**सहेतुककामावचरकिरियावण्णना**

अलोभादिकिरियाहेतुसम्पयुत्ता पन सहेतुका, ते सम्पयोगतो कुसला विय अट्ठविधा। सब्बोपेत्य विनिच्छयो कुसलेसु वुत्तनयो एव। केवलं पनेत्थ विरतियो न सन्ति, कुसला च सेखपुत्थुज्जनानं वुत्तनयेन छसु द्वारेसु वत्थुं निस्साय वा अनिस्साय वा जवनकिच्चं साधयमाना पवत्तन्ति, इमे पन असेखानन्ति अयं विसेसो। कामावचरकिरिया।

### रूपावचरकिरियावण्णना

रूपावचरकिरिया च कुसला विय पञ्चविधा । विनिच्छयो च तत्थ वुत्तनयो एव । केवलं हि कुसला सेखपुथुज्जनानं पञ्जत्तारम्मणा, अभिज्जावसेन पवत्तं पञ्चमज्झानं सब्बारम्मणञ्च हुत्वा मनोद्वारे हृदयवत्थुज्जेव निस्साय जवनकिच्चं साधयमाना पवत्तन्ति, इमे पन असेखानन्ति अयमेव विसेसो । रूपावचरकिरिया ।

### अरूपावचरकिरियावण्णना

अरूपावचरकिरिया च कुसला विय चतुर्विधा । विनिच्छयो च तत्थ वुत्तनयो एव । केवलं हि कुसला सेखपुथुज्जनानं सवत्थुका, अवत्थुका वा हेट्ठा वुत्तनयेन यथायोगं पञ्जत्तिमहग्गतारम्मणा मनोद्वारे जवनकिच्चं साधयमाना पवत्तन्ति, इमे पन असेखानन्ति अयं विसेसो । अरूपावचरकिरिया ।

किरियाव्याकता निड्ढिता ।

### पकिण्णककथावण्णना

एत्थ उत्त्वा सब्बे चित्तचेतसिकधम्मो जातिसङ्गहादितो समोधानेत्वा पकिण्णककथा वत्तब्बा । यथावुत्तानि हि चित्तानि कुसलानि एकवीसति, अकुसलानि द्वादस, विपाकानि छत्तिंस, किरियानि वीसति चाति सब्बानिपि एकूननवुत्तिविधानि, लोकुत्तरानं ज्ञानङ्गयोगभेदतो चत्तालीसविधत्ता एकवीससत्तं वा होन्ति । तेसु कामावचरानि चतुपञ्चास, रूपावचरानि पन्नरस, अरूपावचरानि द्वादस, लोकुत्तरानि अट्ठ, चत्तालीसं वा । कामावचरेसु च कुसलानि अट्ठ, विपाकानि तेवीसति, किरियानि एकादस, अहेतुकानि अट्ठारस । सेसानि पन चतुभूमकानिपि सहेतुकानि । तेसु च जातितो चित्तगणना पुब्बे वुत्ताव । चेतसिका पन सद्भा सति हिरीओत्तपं अलोभो अदोसो कायपस्सद्वादयो द्वादस, तत्रमज्झत्तता अमोहो अप्पमज्जाद्वयं, विरतित्तयञ्च मोहो अहिरिकं अनोत्तपं उद्धच्चञ्च लोभो दिट्ठि दोसो विचिकिच्छा च मानो इस्सा मच्छरियं कुक्कुच्चं थिनं मिद्धञ्च फस्सो वेदना सञ्जा चेतना एकगता जीवितिन्द्रियञ्च मनसिकारो च वितक्को विचारो पीति वीरियं छन्दो अधिमोक्खो चाति द्वेपञ्चास होन्ति ।

तत्थ तत्रमज्झत्तता, अप्पमज्जाद्वयं, मानादीनि छ, मनसिकारो छन्दो अधिमोक्खो चाति द्वादस धम्मा यथाठाने येवापनका एव, विरतित्तयं, उद्धच्चञ्च कत्थचि येवापनका । तेसु च तत्रमज्झत्तता मनसिकारो छन्दो अधिमोक्खो उद्धच्चं विरतियोति इमे ठपेत्वा सेसा अट्ठ यथाठाने अनियता एव, विरतियो पन कत्थचि अनियता, इमे पन एकादस ठपेत्वा सेसा एकचत्तालीस धम्मा नियता एव । तत्थ सद्वादयो पञ्चवीसति धम्मा कुसलाव्याकतायेव, मोहादयो चुट्ठस अकुसला एव, फस्सादयो तेरस कुसलाकुसलाव्याकता तिजातिका । एकन्ततो हि कुसला वा अब्याकता वा धम्मा नत्थि, कुसलचित्तसम्पयुत्तसमये पन कुसला, अब्याकतचित्तसम्पयुत्तसमये अब्याकता च होन्ति । मोहादयो पन सरूपेनेव अकुसला, इतरे च तंसम्पयोगेन सब्बेपि चेतो अत्थना सम्पयुत्तचित्तभेदेन भेदवन्तोव होन्तीति वेदितब्बा ।

तेसु हि सद्वादयो एकूनवीसति सब्बेसु कुसलेसु चैव सहेतुकाव्याकतेसु चाति एकूनसट्ठिचित्तेसु उप्पज्जन्ति, ततो पच्चेकं एकूनसट्ठिपभेदा च होन्ति । एवमज्जेपि जातब्बा । अमोहो तेसु जाणविप्पयुत्तानि द्वादस ठपेत्वा सेसेसु, अप्पमज्जा पन कामावचरेसु सहेतुककिरियकुसलेसु चैव पञ्चमज्झानवज्जितरूपावचरेसु चाति अट्ठवीसतिचित्तेसु, विरतियो पन कामावचरकुसलेसु, लोकुत्तरेसु चाति सोळससु । एवमेते पञ्चवीसति धम्मा कुसलाव्याकतेसु उप्पज्जनतो कुसलाव्याकता नाम जाता । अकुसलेसु पन मोहादयो चत्तारो द्वादससुपि अकुसलचित्तेसु उप्पज्जन्ति, लोभो अट्ठसु लोभमूलेसु, दिट्ठि तत्थ दिट्ठिसम्पयुत्तेसु, मानो दिट्ठिविप्पयुत्तेसु, दोसो इस्सा मच्छरियं कुक्कुच्चं पटिघसम्पयुत्तेसु, थिनमिद्धं पञ्चसु ससङ्गारिकेसु, विचिकिच्छा विचिकिच्छासम्पयुत्ते एवाति । एवमेते चुट्ठसपि सयं अकुसलत्ता, अकुसलेस्वेव उप्पज्जनतो च अकुसला नाम ।

इतरेसु च फस्सादयो सत्त धम्मा सब्बचित्तेसु, न हि तं चित्तमत्थि, यं इमेसु एकेनापि विना उप्पज्जति । सब्बत्थका हि एते । वितक्कादयो पन यथायोगिका । तेसु हि वितक्को ताव द्विपञ्चविज्जाणवज्जितकामावचरेसु चैव एकादससु पठमज्झानिकरूपावचरलोकुत्तरेसु चाति पञ्चपञ्चासचित्तेसु उप्पज्जति । विचारो पन तेसु चैव तथा दुतियज्झानिकचित्तेसु चाति छसट्ठिचित्तेसु । पीति चतुत्थज्झानिकवज्जितसोमनस्ससहगतेसु । वीरियं द्विपञ्चविज्जाणमनोधातुसन्तीरणत्तिकवज्जितेसु । छन्दो अहेतुकमोमूहवज्जितेसु । अधिमोक्खो द्विपञ्चविज्जाणविचिकिच्छायुत्तवज्जितेसु । एवमेते तेरस कुसलाकुसलाव्याकतेसु उप्पज्जनतो तिजातिका नाम जाता । सम्पयुत्तचित्तभेदेन चेसं पच्चेकं गणनाभेदोपि वेदितब्बो । यथा हि चित्तं सलक्खणतो एकविधम्पि सम्पयोगावत्थादिभेदेनेव भिन्नं, तथा चेतसिकापि पच्चेकन्ति जातब्बा, विसेसं पन नेसं वक्खाम ।

वत्थुसङ्गहे पन नेसं चित्तेसु ताव कामावचरविपाकमनोधातुहसितानि, दोससम्पयुत्तपटिघरूपावचरपठमग्गानि चाति तेचत्तालीस चित्तानि हेट्ठा वुत्तनयेन यथासकं वत्थूनि निस्सायेव उप्पज्जन्ति, अरूपावचरविपाकानि पन अनिस्सायेव, सेसानि द्वेचत्तालीस निस्सायपि, आरुप्पेसुपि उप्पज्जनतो अनिस्सायपि । अरूपीनं हि छपि वत्थूनि न सन्ति, रूपीनं पन धानादीनि तीणि, सब्बत्थ च तंतंवत्थुरहितानं सब्बत्थ नियतविज्जाणानिपि, असज्जीनं पन सब्बानिपि वत्थुविज्जाणानि न सन्ति । तेसं हि जीवितनवकमेव रूपं पटिसन्धि, पवत्तियं भवङ्गं, मरणकाले चुति च हुत्वा पवत्तति । यथा चेत्य चित्तानं, एवं

तंसम्पयुतचेतसिकानम्पि वत्थुतो सङ्गहभेदो वेदितव्यो । अयं पन विसेसो — तेसु हि दोसो इस्सा मच्छरियं कुक्कुच्चञ्च हृदयवत्थुं निस्साय कामलोके एव उप्पज्जति । करुणामुदिता पन रूपलोकेपि, न अरूपे । तत्थ हि रूपावचरपुब्बभागानिपि न उप्पज्जन्ति, सेसा पन सब्बे निस्सायपि अनिस्सायपि तीसुपि भवेसु उप्पज्जन्ति । तत्थ हि फस्सादयो सत्त छपि वत्थुनि, इतरे पन हृदयमेवाति, सेसं चित्तसमं ।

किच्चद्वारसङ्गहे पन नेसं चित्तं यथा च चुदसहि किच्चहेहि छद्वारिकद्वारविनिमुत्तभावेन, एवं पवत्तिक्कमो वेदितव्यो । यदा हि कुसलाकुसलबलेन तीसु भूमीसु सत्ता निब्बत्तन्ति, तदा तेसं मरणकाले येभ्य्येन छन्नं द्वारानमञ्जतरस्मिं पच्चुपट्टितं कम्मकम्मनिमित्तगतिनिमित्तानमञ्जतरं गहेत्वा उपेक्खासहगतविपाकाहेतुकमनोविज्जाणधातुद्वयञ्चेव अट्ठ महाविपाकानि, नव रूपारूपविपाकानि चेति एकूनवीसति चित्तानि हेट्ठा वुत्तनयेन यथासकभूमीसु पटिसन्धिं हुत्वा उप्पज्जन्ति, तानेव भवङ्गचुतिवसेन द्वारविनिमुत्तानि नाम होन्ति । मरणकाले हि सत्तानं असज्जिसत्तविरहितानं भवन्तरे पटिसन्धिजनकं अतीतं कम्मं वा तं कम्मकरणकाले विसयोपकरणादिभूतं रूपादिछब्बिधम्पि अतीतादिभेदं कालविनिमुत्तञ्च कम्मनिमित्तं वा उपपज्जमानभवानुरूपं कप्परुक्खमातुकुच्छिनिरयगिजालादिगतिनिमित्तं वा कम्मबलेन यथारहं छन्नं द्वारानमञ्जतरस्मिं सायन्हे पब्बतच्छाया पथवियं विय चित्तसन्ताने अल्लीयमानं उपट्ठाति । एवं उपट्ठिते च तस्मिं आरम्भणे कम्मबलेन निरन्तरं पवत्तमानचित्तसन्तानस्स आयुक्खयकम्मक्खयउभयक्खयउपच्छेदककम्मानमञ्जतरेन पच्चासन्नमरणस्स तस्स तस्स वीथिचित्तभवङ्गानन्तरं चुतिचित्तं होति, तदनन्तरं कम्मकम्मनिमितादीसु यथागहितं आरम्भ यथारहं तीसु भवेसु यं किञ्चि पटिसन्धिचित्तं भवन्तरे पठमचित्तं हुत्वा उप्पज्जति ।

तत्थ च दुहेतुकाहेतुकचुतियानन्तरं दस कामावचरपटिसन्धियोव होन्ति, न इतरा, कामावचरतिहेतुकाय चुतिया सब्बापि होन्ति, रूपावचराय पन चुतियापि अहेतुकपटिसन्धिरहिता, अरूपावचराय चुतिया हेट्ठिमवज्जितारूपपटिसन्धियो चेव कामावचरतिहेतुकपटिसन्धियो च, असज्जीनं पन रूपचुतितो भवन्तरे गहितपुब्बं कम्मादिमेवारम्भ अहेतुकरहिता कामावचरपटिसन्धियोव होन्ति, न इतरा । पुत्थुज्जनानं, पन सोतापन्नसकदागामीनञ्च चुतिया सुद्धावासेसु पटिसन्धि न होति, सेखानं द्विहेतुकाहेतुकासज्जिपटिसन्धियो, असेखानं पन सब्बापि पटिसन्धियो न होन्ति । ते हि चुतितो निरुपधिसेसनिब्बानेन अनुपादापरिनिब्बानप्पत्ता नाम होन्ति । एवं गहितपटिसन्धिनिरोधतो परं तदेव चित्तं तस्मिञ्जेवारम्भणे भवङ्गं हुत्वा चुतिपरियोसानं असति वीथिचित्तुप्पादे सुपिनम्पि अदिस्वा निदोक्कमनकालादीसु अपरिमाणसङ्खम्पि नदीसोतं विय निरन्तरं पवत्ति । एवं एकूनवीसतिविज्जाणानं पटिसन्धिभवङ्गचुतिवसेन पवत्तिक्कमो वेदितव्यो ।

एवं पन वत्तमाने भवङ्गसन्ताने यदा इन्द्रियपरिपाकमागम्भ सभागपच्चयन्तरसहितं अतिमहन्तं रूपारम्भणं चक्खुद्वारे घट्टेति, तदा घट्टनानुभावेन द्विक्खत्तुं तत्थ भवङ्गचलनं होति, तदनन्तरं भवङ्गं वोच्छिन्दित्वा तस्मिं रूपारम्भणे किरियमनोधातु आवज्जनकिच्चं साधयमाना उप्पज्जित्वा निरुज्जति, तथा तदनन्तरं चक्खुविज्जाणद्वये यथारहमेकं दस्सनकिच्चं, तदनन्तरं विपाकमनोधातुद्वया अज्जतरं सम्पटिच्छनकिच्चं, तदनन्तरं विपाकमनोविज्जाणधातुत्तया अज्जतरं सन्तीरणकिच्चं, तदनन्तरं उपेक्खासहगतकिरियाहेतुकमनोविज्जाणधातु वोट्टब्बनकिच्चं, तदनन्तरं एकूनतिसकामावचरजवनेसु यं किञ्चि यथारहं सत्तक्खत्तुं, छक्खत्तुं, मरणकालादीसु पञ्चक्खत्तुमेव वा जवनकिच्चं साधयमानं, तदनन्तरं एकादससु तदारम्भणकिच्चेसु महाविपाकसन्तीरणेसु यथारहमेकं सकिं, द्विक्खत्तुं वा तदारम्भणकिच्चं साधयमानं उप्पज्जित्वा निरुज्जति, तदनन्तरं भवङ्गसन्तति एव पवत्ति । एवं चक्खुद्वारे सत्तकिच्चाणि छचत्तालीस चित्तानि सम्भवन्ति ।

यदा पन वुत्तनयेन सद्धारम्मणादीनि सोतद्वारादीसु घट्टेन्ति, तदापि चक्खुद्वारे विय पच्चेकञ्च छचत्तालीसेव भवन्ति । केवलं हेत्थ आवज्जनानन्तरं चक्खुविज्जाणद्वाने सोतविज्जाणादिद्वयानि यथाक्कमं सवनादिकिच्चाणि साधयमानानि उप्पज्जन्तीति । एवं पञ्चद्वारे अतिमहन्ते पञ्चारम्भणे चतुपञ्जास कामावचरचित्तानेव सम्भवन्ति । केचि पनेत्थ “ससङ्खारिकजवनानि पञ्चद्वारे न उप्पज्जन्ति पुब्बप्पयोगासम्भवा, मनोद्वारेयेवेतानि उप्पज्जन्ती”ति वदन्ति ।

महन्ते पन तदारम्भणवज्जितानि । विसयस्स जवनसमकालमेव अतीतत्ता जवनावसाने भवङ्गं होति । परित्ते पन जवनम्पि नत्थि । वोट्टब्बनं हेत्थ जवनद्वाने ठत्वा द्वत्तिक्खत्तुं पवत्तित्वा निरुज्जति, ततो परं भवङ्गं होति । अयं पन वारो “दिट्ठं विय मे, सुतं विय मे”तिआदिकथनकाले लब्धति । अतिपरित्ते पन वोट्टब्बनप्पादा असण्ठहनतो भवङ्गचलनमत्तमेव, न आवज्जनादीनि । आवज्जनेन हि भवङ्गे आवट्टिते वोट्टब्बनं अप्पत्वा अन्तरा चक्खुविज्जाणानन्तरं चित्तं भवङ्गं ओतरिस्सतीति नेतं ठानं विज्जति, नापि अप्पवत्तमाने विसये पञ्चद्वारिकवीथिचित्तानि पवत्तन्तीति । अयं पञ्चद्वारे विसयप्पवत्तिभेदेन चित्तप्पवत्तिनियमो ।

मनोद्वारे पन छसु आरम्भणेसु आपाथगतेसु वुत्तनयेन भवङ्गचलनमनोद्वारावज्जनानन्तरं कुसलाकुसलफलनावज्जनकिरियचित्तेसु पञ्चपञ्जासजवनकिच्चेसु यं किञ्चि कामावचरारम्भणमारम्भ पवत्ति, ततो पभुति कामावचरारम्भणे तदारम्भणं होति । अप्पनाजवने अयं पवत्तिक्कमो — समथविपस्सनाकम्मट्टानिकानं हि यथासकविसये उप्पादितपुब्बभागभावानां “इदानि अप्पना उप्पज्जिस्सती”ति भवङ्गचलनावज्जननावसाने जाणसम्पयुत्तकामावचरजवनेसु अज्जतरस्मिं यथारहं परिकम्पोपचारानुलोमगोत्रभुनामेन चतुक्खत्तुं, तिक्खत्तुमेव वा उप्पज्जित्वा निरुद्धे चतुत्थं, पञ्चमं वा महगगतजवनेसु यं किञ्चि पठमकप्पनाभिज्जाभूतं एकवारमेव, ज्ञानसमापत्तिभूतं अनन्तवारम्पि जवति । लोकोत्तरजवनेसु पन कुसलानि एकसन्ताने एकवारमेव जवन्ति, तदनन्तरं यथासकं फलचित्तञ्च द्वत्तिवारं, फलसमापत्तिवीथियं फलमेव अनन्तवारम्पि जवति, निरोधसमापत्तियं पन

अनुपुब्बनिरोधवसेन पठमज्ज्ञानतो यावाकिञ्चज्जायतना यथाक्कमं आवज्जनपरिकम्मादिवसेनेव समापज्जित्वा वुड्ढितस्स गोत्रभुतो अनन्तरं चतुत्थारुपज्जवने द्विखत्तुं जवित्वा निरुद्धे यथापरिच्छिन्नकालञ्च चित्तं न उपज्जति, वुड्ढानकाले च आवज्जनपरिकम्मादिवसितनियामेन अनागामिफलं, अरहत्तफलं वा यथारहमेकवारमेव उपज्जति । तत्थ च कुसलगोत्रभुतो अनन्तरं कुसलज्जेव आदितो फलत्तयञ्च अप्पेति, किरियागोत्रभुतो किरियं, अरहत्तफलञ्च । तत्थापि सोमनस्ससहगततो सोमनस्ससहगतमेव, उपेक्खासहगततो च उपेक्खासहगतमेव अप्पेति । असेखानमेव चेत्थ अरहत्तफलकिरियाजवनानि, यथासकं सेखानमेव सेसलोकुत्तरानि, सेखपुथुज्जनानमेव कुसलाकुसलानि, तिहेतुकानमेव अप्पना होन्ति, अयं जवननियमो ।

अप्पनाजवनतो परं पन तदारम्मणं नत्थि । जवनारम्मणेसु हि कामावचरभूतेस्वेव कामावचरपटिसन्धिकानमेव अतिमहन्ते, विभूते च विसये तदारम्मणमुपज्जति । अतिइद्वे पनारम्मणे सन्तीरणकिरियाजवनतदारम्मणानि सोमनस्ससहगतानि, इड्डमज्जत्ते, अनिट्ठे च उपेक्खासहगतानि होन्ति । यदा पन दोमनस्सानन्तरं सोमनस्सस्स पट्टाने पटिक्खित्तता सोमनस्सपटिसन्धिकस्स अतिइद्विदीसु पटिधे जविते तदारम्मणभवङ्गानि न उपज्जन्ति, तदा अज्जं परिचितपुब्बं परित्तरम्मणमारब्ध अनावज्जनम्पि निरोधतो वुड्ढहन्तस्स सामज्जफलं विय अन्तरा उपेक्खासहगतसन्तीरणं उपज्जति, तमनन्तरित्वा भवङ्गं होतीति अयं तदारम्मणनियमो ।

एवं पन भवङ्गानन्तरं छद्वारे आवज्जनादीनि वीथिचित्तानि । इति यावतायुक्तं इमिनाव कमेन चित्तनियामतो विज्जाणानि पवत्तन्ति । वीथिचित्तानन्तरं, पन भवङ्गानन्तरं वा सब्बपच्छिमं तं एकूनवीसतिविधं भवङ्गमेव तस्मिञ्जेवारम्मणे चुतिकिच्चञ्च साध्यमानं पवत्तति, तस्मिं निरुद्धे सतो चुतो नाम होति । ततोपि चुतितो पुन पटिसन्धिभवङ्गवीथिचुतियोति एवं पुनप्पुनं चित्तसन्तानं यन्तयुत्तगोणो विय भवादीसु यावानुपादाय आसवेहि न विमुच्चति, तावाविच्छिन्नं पवत्तति एव । एवं पवत्तमाने च चित्तसन्ताने “त्वं भवङ्गं नाम होति, त्वं तदनन्तरं आवज्जनं...पे०... त्वं तदनन्तरं तदारम्मणं नाम होति, त्वं पन भवङ्गं”न्तिआदिना नियामको कत्ता नाम नत्थि, चित्तनियामेनेवेतं पवत्तति ।

पञ्चविधो हि नियामो — बीजनियामो उत्तुनियामो कम्मनियामो धम्मनियामो चित्तनियामोति, तत्थ अङ्कुरपण्णदण्डपुष्पफलादिवक्कमेन तेसं तेसं बीजानं अज्जोञ्जविसदिसरुक्खतिगच्छलतादिसन्ताने अत्तना सदिसफलदानं **बीजनियामो** नाम । तस्मिं तस्मिं समये तेसं तेसं रुक्खानं एकप्पहारेन पुष्पफलपल्लवानं गहणं **उत्तुनियामो** नाम । तस्स तस्स वा कुसलाकुसलकम्मस्स तंतंसदिसासदिसरूपारूपविपाकदानं, कम्मसरिक्खकविपाकदानञ्च **कम्मनियामो** नाम । बोधिसत्तानं पटिसन्धिगहणे, मातुकुच्छितो अभिनिक्खमने, अभिसम्बोधिधम्मचक्कपवत्तनादीसु च द्वत्तिस पुब्बनिमित्तानि **धम्मनियामो** नाम । यथावुत्तेन भवङ्गावज्जनादिकिच्चक्कमेनेव चित्तप्पवत्ति **चित्तनियामो** नाम । इमिना पन चित्तनियामेन यथाक्कमं किच्चवन्तेसु चेतेसु चित्तेसु द्विपञ्चविज्जाणमनोधातुजवनानि यथासम्भवं एककिच्चद्वानानि, सेसानि पन द्वितित्तपञ्चकिच्चद्वानानि, तानि च पुब्बे वुत्तानि, सुविज्जेय्यानि च । एवं एकद्वारिकादीनि च । यथा च चित्तानं, एवं तंसम्पयुत्तचेतसिकानम्पि किच्चद्वारवसेन सङ्गहो वेदितब्बो । अयं पन विसेसो — किच्चतो हि सब्बत्थका ताव सत्त चित्तं विय चुद्वस किच्चानि करोन्ति । वितक्कविचाराधिमोक्खा पन तयो दस्सनादिपञ्चकिच्चानि वज्जेत्वा नव, वीरियं ततो सम्पटिच्छनसन्तीरणानि वज्जेत्वा सत्त, पीति वोड्डब्बनावज्जनानिपि वज्जेत्वा सन्तीरणेन सद्धिं छ, विरतिअप्पमज्जावज्जिता पन वीसति कुसलाब्याकता चेव छन्दो च सन्तीरणम्पि वज्जेत्वा पञ्च, ततो अप्पमज्जा तदारम्मणम्पि वज्जेत्वा चत्तारि, विरतियो पन कुसला जवनकिच्चमेव करोन्ति । द्वारतो च विरतियो मनोद्वारिका एव, तथा करुणामुदिता, द्वारविनिमुत्ता च पन होन्ति । मनोद्वारे एव हि दुच्चरितविरमणं सत्तपज्जतिगहणञ्च होति । अकुसला पन छद्वारिका, तत्थापि मानइस्सामच्छरियकुक्कुच्चानि मनोद्वारिकानेवाति केचि । अवसेसा छद्वारिका चेव द्वारविनिमुत्ता च । सेसं चित्तसदिसमेव । आरम्मणसङ्गहो पन नेसं परित्तरम्मणत्तिके आवि भविस्सतीति । अयं पकिण्णककथा ।

चित्तुप्पादकण्डवण्णना निड्डिता ।

अब्याकतपदं पन नेव ताव निड्डितं । अब्याकतेसु हि विपाकाब्याकतं, किरियाब्याकतञ्च विभत्तं, रूपाब्याकतं, पन निब्बानाब्याकतञ्च अवसिट्ठं । तत्थ रूपाब्याकतं ताव भूमितो कामावचरमेव, न भिन्नं, तथा सम्पयोगतोपि असम्भवो एव । सारम्मणधम्मानमेव, हि अज्जमज्जसम्पयोगो, न इतरेसन्ति । धम्महेसतो पनेतं अट्टवीसतिविधं होति । सेय्यथिदं — पथवीधातु आपोधातु तेजोधातु वायोधातु चक्खु सोतं घानं जिक्का कायो रूपं सद्दो गन्धो रसो इत्थिन्द्रियं पुरिसिन्द्रियं जीवितिन्द्रियं हृदयवत्थु कायविज्जति वचीविज्जति आकासो रूपस्स लहुता मुदुता कम्मज्जता रूपस्स उपचयो सन्तति जरता अनिच्चता कबळीकारो आहारोति । पदभाजनीये पनेत्थ किञ्चापि हृदयवत्थु न आगतं, उपरि पन पट्टानपाळियं “यं रूपं निस्साय मनोधातु च मनोविज्जाणधातु च वत्तन्ती”तिआदिना (पट्ठा० १.१.८) सरूपेनेव आगमिस्सतीति तं इध गहितं । केचि पन मिद्धरूपं बलरूपं सम्भवरूपं जातिरूपं रोगरूपन्ति इमानिपि पञ्च गहेत्वा “तेत्तिस रूपाणि होन्ती”ति वदन्ति, ते तेसं अभावं, अन्तोगधभावञ्च वत्ता पटिक्खिपितब्बा । इमेसु हि मिद्धं रूपमेव न होति अरूपधम्मत्ता नीवरणानं । मिद्धेनेव हि पचलायिकाकारेन रूपप्पवत्ति होति, बलरूपं पन वायोधातुया अन्तोगधं तंसभावत्ता, सम्भवरूपं आपोधातुया, जातिरूपं उपचयसन्ततीसु, रोगरूपञ्च जरताअनिच्चतासु पविसति सप्पच्चयसमुद्धितरूपविकारभेदेसु रोगव्यपदेसतोति सब्बं रूपं अट्टवीसतिविधमेव होति । अयं धम्महेसतो विनिच्छयो ।

लक्खणादितो पनेत्थ कक्खल्लत्तलक्खणा **पथवीधातु**, पतिट्ठानरसा, सम्पटिच्छनपच्चुपट्टाना । पग्घरणलक्खणा **आपोधातु**, ब्रूहरसा,

सङ्ग्रहपच्युपट्टाना । उण्हत्तलक्खणा तेजोधातु, परिपाचनरसा, महवानुप्पदानपच्युपट्टाना । वित्थम्भनलक्खणा वायोधातु, समुदीरणरसा, अभिनीहारपच्युपट्टाना । चतस्सोपि चेता सेसभूतत्तयपदट्टाना । रूपाभिघातारहभूतप्पसादलक्खणं, दट्टुकामतानिदानकम्मसमुद्धानभूतप्पसादलक्खणं वा चक्खु, रूपेसु आविज्जनरसं, चक्खुविज्जाणस्स आधारभावपच्युपट्टानं, दट्टुकामतानिदानकम्मजभूतपदट्टानं । इदं पन यदेतं अक्खिकूपके पतिट्ठितं नहारुसुत्तकेन मत्थलुङ्गेन आबद्धमंसयुत्तं, यत्थ सेतम्पि अत्थि कण्हम्पि लोहितम्पि चत्तारिपि महाभूतानि, यच्च सेम्हुस्सदत्ता सेतं, पित्तुस्सदत्ता कण्हं, रुहिरुस्सदत्ता लोहितकं, पथवुस्सदत्ता पत्थिण्णं होति, आपुस्सदत्ता पग्घरति, तेजुस्सदत्ता परिदहति, वायुस्सदत्ता परिब्भमति, यच्च लोके नीलपखुमसमाकिण्णं कण्हसुक्कमण्डलविचित्तं नीलुप्पलदलसन्निभं दीघं पुथुलं चक्खूति वुच्चति, तस्स ससम्भारचक्खुनो सेतमण्डलपरिक्खित्तस्स कण्हमण्डलस्स मज्झे अभिमुखे ठितानं सरीरसण्ठानुप्पत्तिदेसे सत्तसु पिचुपट्टलेसु आसित्ततेलं पिचुपट्टलानि विय सत्त अक्खिपट्टलानि व्यापेत्वा धारणनहापनमण्डनबीजनकिच्चाहि चतूहि धातीहि खत्तियकुमारो विय सन्धारणाबन्धनपरिपाचनसमुदीरणकिच्चाहि चतूहि धातूहि कतूपकारं आयुना अनुपालियमानं वण्णगन्धरसादीहि परिवुत्तं उतुचिन्ताहारेहि उपत्थम्भियमानं पमाणतो ऊकासिरमत्तं चक्खुविज्जाणादीनं यथारहं वत्थुद्वारभावं साधयमानं तिट्ठति । वुत्तम्पि चेत्तं धम्मसेनापतिना —

“येन चक्खुपसादेन, रूपानि मनुपस्सति ।  
परित्तं सुखुमं एतं, ऊकासिरसमूपम”न्ति ॥

सद्वाभिघातारहभूतप्पसादलक्खणं, सोतुकामतानिदानकम्मसमुद्धानभूतप्पसादलक्खणं वा सोत्तं, सद्देसु आविज्जनरसं, सोतविज्जाणस्स आधारभावपच्युपट्टानं, सोतुकामतानिदानकम्मजभूतपदट्टानं । इदं पन ससम्भारसोतबिलस्स अन्तो तनुत्तम्बलोमाचिते अङ्गुलिवेधकसण्ठाने पदेसे वुत्तप्पकाराहि धातुआदीहि कतूपकारानुपालनपरिवारोपत्थम्भं सोतविज्जाणादीनं यथारहं वत्थुद्वारभावं साधयमानं तिट्ठति ।

गन्धाभिघातारहभूतप्पसादलक्खणं, घायितुकामतानिदानकम्मसमुद्धानभूतप्पसादलक्खणं वा धानं, गन्धेसु आविज्जनरसं, धानविज्जाणस्स आधारभावपच्युपट्टानं, घायितुकामतानिदानकम्मजभूतपदट्टानं । इदञ्च ससम्भारधानबिलस्स अन्तो अजपदसण्ठाने पदेसे वुत्तप्पकारोपकारानुपालनपरिवारोपत्थम्भं धानविज्जाणादीनं यथारहं वत्थुद्वारभावं साधयमानं तिट्ठति ।

रसाभिघातारहभूतप्पसादलक्खणा, सायितुकामतानिदानकम्मसमुद्धानभूतप्पसादलक्खणा वा जिह्वा, रसेसु आविज्जनरसा, जिह्वाविज्जाणस्स आधारभावपच्युपट्टाना, सायितुकामतानिदानकम्मजभूतपदट्टाना । एसा च ससम्भारजिह्वामज्झस्स उपरि उप्पलदलगसण्ठाने पदेसे वुत्तप्पकारोपकारानुपालनपरिवारोपत्थम्भा जिह्वाविज्जाणादीनं यथारहं वत्थुद्वारभावं साधयमाना तिट्ठति ।

फोडुब्बाभिघातारहभूतप्पसादलक्खणो, फुसितुकामतानिदानकम्मसमुद्धानभूतप्पसादलक्खणो वा कायो, फोडुब्बेसु आविज्जनरसो, कायविज्जाणस्स आधारभावपच्युपट्टानो, फुसितुकामतानिदानकम्मजभूतपदट्टानो । अयं पन इमस्मिं काये यावता उपादिन्ना पथवीआपोकोट्टासा होन्ति, तत्थ सब्बत्थ कप्पासपट्टले स्नेहो विय अनुगतो वुत्तप्पकारोपकारानुपालनपरिवारोपत्थम्भो कायविज्जाणादीनं यथारहं वत्थुद्वारभावं साधयमानो तिट्ठति । केचि (ध० स० अट्ठ० ६००) पन “तेजाधिकानं भूतानं पसादो चक्खु, विवरवायुआपपथविअधिकानं सोतधानजिह्वाकाया”ति वदन्ति । अपरे (ध० स० अ० ६००) “तेजोसभावं चक्खु, आकासपथविआपवायुसभावा सोतधानजिह्वाकाया”ति वदन्ति । “तेजादिसहकारिता, तेजादिगुणरूपादिविसयत्ता चा”ति कारणञ्च यथाक्कमं वदन्ति । ते च वत्तब्बा — को पनेवमाह “सहकारिसभावेवेह इन्द्रियेहि भवितव्व”न्ति, “रूपादयो वा तेजादीनं गुणा”ति । अविनिब्भोगेसु हि भूतेसु “अयं इमस्स गुणो, अयं इमस्स गुणो”ति न लब्भा वत्तुन्ति । अथापि वदेय्युं “तेजादिअधिकेसु सम्भारेसु रूपादीनं अधिकभावदस्सनतो इच्छितव्वमेतं ‘रूपादयो तेजादीनं गुणा’”ति, ते वत्तब्बा इच्छेय्याम, यदि आपाधिकस्स आसवस्स गन्धतो पथविअधिके कप्पासे गन्धो अधिकतरो सिया, तेजाधिकस्स च उण्होदकस्स वण्णतोपि सीतूदकस्स वण्णो परिहायेथ । यस्मा पनेतं उभयम्पि नत्थि, तस्मा पहायेथ तमेतेसं निस्सयभूतानं विसेसकप्पनं । यथा अविसेसेपि एककलापे भूतानं रूपरसादयो अज्जमज्जं विसदिसा होन्ति, एवं चक्खुपसादादयोपीति गहेतव्वमेतं । किं पनेसं विसेसकारणं नत्थीति? नो नत्थि । किं पन तन्ति? कम्ममेव नेसं असाधारणं कारणं जनकतण्हाजनितानं भूतानं विसेसतो । भूतविसेसे हि सति पसादोव नुप्पज्जति । समानानं हि भूतानं पसादो, न विसमानानन्ति पोराना । एवं कम्मविसेसतो विसेसवन्तेसु चेतेसु चक्खुसोतानि असम्पत्तविसयग्गाहकानि अत्तनो निस्सयं अनल्लीननिस्सयेव विसये विज्जाणहेतुता । धानजिह्वाकाया पन सम्पत्तविसयग्गाहका निस्सयवसेन चेव सयञ्च अत्तनो निस्सयं अल्लीने एव विसये विज्जाणहेतुता ।

केचि पन “चक्खुसोतानिपि सम्पत्तविसयग्गाहकानेव, दूरे ठितेसुपि चन्दरूपादीसु सीघयायिनयनरंसिसज्जोगेन, सद्धानञ्च परम्परायागन्त्वा सोतबिले घट्टेनेन विज्जाणुप्पत्तितो । तेनेव हि कुट्टादिअन्तरितेसु, विच्छिद्वपब्बतलेणादिगतेसु च रूपसद्देसु विज्जाणं न उप्पज्जती”ति वदन्ति । तेसम्पि हि चक्खुनो दूरासन्नेसु चन्दरुक्खादीसु अनुपलक्खितकालभेदेन रंसिसमायोजनसामत्थियं, सद्धानम्पि दूरासन्नानं अविदितताभेदं आगन्त्वा सोतबिलघट्टनसामत्थियं विज्जाणुप्पत्तिहेतुभूतं उपगन्तव्वं । ततो परं तत्थेव ठितानञ्जेव विज्जाणुप्पादनसामत्थियोपगमनं । कुट्टलेणादिअन्तरितानञ्च रूपसद्धानं सहकारिपच्चयविरहतो अनापाथगमनं । इतरथा तेसम्पि तादिसेसु इन्द्रियसज्जोगं न धावितव्वं । गमननिवारणम्पि उप्पत्तिनिवारणमेव, तथेव सहकारिपच्चयविरहतो यादिसेव तेसं इन्द्रियसज्जोगो होति, तादिसे विज्जाणुप्पत्ति होतीति गहेतव्वं ।

चक्रु ताव दूरे ठितानं चन्दादीनमि गहणतो असम्पत्तगाहकं होतु, सोतं पन दूरे रुक्खं छिन्दन्तानं, वत्थं धोवन्तानञ्च दूरतोव पञ्चायमानकायविकारादिना सद्धिं सहं गहेतुं असमत्थताय कथं सणिकं ववत्थापयमानं तं असम्पत्तगाहकं होतीति? तत्थापि च कुठारिवत्थादीनं पठमनिपातसद्धानं मन्दताय यथा हत्थछिज्जमानसाखापलासचलनादिसमुद्धितमन्दसद्धानं परम्परायागमनं नत्थि, तथा अनापाथगमनमि, पच्छा पन घट्टनानिघंसस्स बलवताय उप्पन्नमहासद्धानं आगमनं विय तत्थेव ठितानञ्जेव आपाथगमनं होति, इतरथा दूरासन्नादिववत्थानानि न सियुं गन्धादीनं विय, तस्मा असम्पत्तगोचरानेवेतानि, घानादीनि च सम्पत्तगोचरानीति वेदितब्बानि ।

अहिसुंसुमारपक्खिकुकुरसिङ्गालसदिसानि चेतानि । यथा हि अहि नाम बहिसित्तसम्मट्टुद्धाने नाभिरमति, तं विहाय तिणपण्णगहनवम्मिकादिविसमज्झासयोव होति, एवं चक्रुपि सम्मट्टभित्तिआदिं विहाय इत्थिपुरिसपुफ्लताचित्तादिविसमज्झासयं होति । यथा च सुंसुमारोपि बहि चरणं विहाय उदके बिलज्झासयो होति, एवं सोतमि वातपानच्छिद्दादिविलज्झासयं होति । यथा हि गिज्झादिपक्खीपि भूमिरुक्खादिं विहाय आकासे पक्खन्दनज्झासयो होति, एवं घानमि उद्धगं हुत्वा गन्धपवेसकवाताकड्ढन्तं आकासज्झासयं होति । यथा कुक्कुरो बहिगामचारं विहाय आमिसगवेसी गामज्झासयो महानसादिनिन्नचित्तो होति, एवं जिह्वापि आपज्झासया होति । यथा च सिङ्गालो बहिसुसानचारं विहाय मंसगवेसी सुसानज्झासयो होति, एवं कायोपि अनुपादिन्नं सुखसम्पस्ससयनादिं लभित्वापि उपादिन्नज्झासयो होति । अज्जं हि उपादिन्नकं अलभमाना सत्ता अत्तनो जण्णुकानि उरन्तरं पवेसेत्वा हत्थतले सीसं कत्वापि निपज्जन्ति । आलोकविवरवायुजलपथविपचयानि चेतानि विज्जाणुप्पादकानि । एवमेतेसं पच्चन्नं पसादानं लक्खणरसपच्चुपट्टानपदेसनिस्सयगोचरज्झासयपच्चयभेदेन ववत्थानं वेदितब्बं ।

चक्रुपटिहननलक्खणं **रूपं**, चक्रुविज्जाणस्स विसयभावरसं, तस्सेव गोचरभावपच्चुपट्टानं, चतुमहाभूतपदट्टानं, यथा चेतस्स, एवं सब्बेसमि उपादारूपानं पदट्टानं वेदितब्बं, विसेसं पन वक्खाम । तयिदं रूपं नीलपीतलोहितोदातकाळमज्जिद्वसामछायातपआलोकन्धकारादिवसेन अनेकविधं । केचि पन “अन्धकारो नाम आलोकाभावमतो एव, ततो एव तत्थ गतरूपानि न दिस्सन्ती”ति वदन्ति, तं न युत्तं । यथा हि नीलमेघमणिआदीनं छाया आलोकविसदिसा वण्णायतनभूता होति, एवं भित्तिच्छदनभूमिपब्बतादिच्छाया च घनीभूता घटरूपादिच्छादनतो आलोकविसदिसो अन्धकारोति दट्टब्बो, सोतपटिहननलक्खणो **सदो**, सोतविज्जाणस्स विसयभावरसो, तस्सेव गोचरभावपच्चुपट्टानो । सो गीतभेरिसद्वादिवसेन अनेकविधो । घानपटिहननलक्खणो **गन्धो**, घानविज्जाणस्स विसयभावरसो, तस्सेव गोचरभावपच्चुपट्टानो । सो मूलगन्धसारगन्धादिवसेन अनेकविधो । जिह्वापटिहननलक्खणो **रसो**, जिह्वाविज्जाणस्स विसयभावरसो, तस्सेव गोचरभावपच्चुपट्टानो । सो मूलरसतचरसादीनं वसेन अनेकविधो ।

इत्थिभावलक्खणं **इत्थिन्द्रियं**, इत्थीति पकासनरसं, इत्थिलिङ्गनिमित्तकुत्ताकप्पानं कारणभावपच्चुपट्टानं । पुरिसभावलक्खणं **पुरिसिन्द्रियं**, पुरिसोति पकासनरसं, पुरिसलिङ्गनिमित्तकुत्ताकप्पानं कारणभावपच्चुपट्टानं । उभिनम्पेसं इत्थिपुरिसलिङ्गादीनं कारणभावो न सरसतो अत्थि केनचि पच्चयेन नेसं पच्चयभावस्स पट्टाने अनागतत्ता, अत्तनो पन जनकपच्चयभूतआगमनतोव । इत्थिपुरिसानं पटिनियतलिङ्गनिमित्तकुत्ताकप्पभावानुगुणरूपानमि नियमेन उप्पज्जनतो, लिङ्गनिमित्तादिवोहारानञ्च तप्पधानतो पच्चयभावो, इन्द्रियभावो च परियायतो वुत्तो । तेनेव हि इत्थिउभतोव्यञ्जनकस्स पुरिसिन्द्रियाभावेपि पुरिसलिङ्गनिमित्तादिव्यञ्जनं, पुरिसउभतोव्यञ्जनकस्स इत्थिन्द्रियाभावेपि इत्थिलिङ्गनिमित्तादिव्यञ्जनञ्च पुरिमकम्मतो एव उप्पज्जति । यदि हि नेसं तंतंइन्द्रियेनेव पटिनियतव्यञ्जनानि उप्पज्जेयुं, दुतियव्यञ्जनस्स अभावो आपज्जति । न हि तेसं भावद्वयं अत्थि । यदि सिया, सब्बदापि व्यञ्जनद्वयस्स भावप्पसङ्गो सिया । इत्थिउभतोव्यञ्जनकस्स हि इत्थिन्द्रियमेव विज्जति, न इतरं । तस्स पन यदा इत्थियं रागचित्तं उप्पज्जति, तदा पुरिसव्यञ्जनं पातुभवति, इत्थिव्यञ्जनं पटिच्छन्नं होति । तथा इतरस्स इतरं । यस्मा पनेसं एकमेव इन्द्रियं नियतं, तस्मा इत्थिउभतोव्यञ्जनको सयमि गब्बं गण्हाति, परमि गण्हापेति । पुरिसउभतोव्यञ्जनको परं गण्हापेति, सयं पन न गण्हाति । यथा तेसं उभतोव्यञ्जनकानं कम्मसहायं रागचित्तमेव व्यञ्जनकारणं, न भावो, एवं पकतित्थिपुरिसानमि भावद्वयजनककम्मादिपच्चयो एव तंतंलिङ्गनिमित्तादिकारणन्ति गहेतब्बं । उभयमि चेतं पठमकप्पिकानं पवत्ते समुट्ठाति, ततो अपरभागे पटिसन्धियमेव, सब्बेसं पन पवत्ते एव परिवत्तति । इमेसु च पुरिसलिङ्गं उत्तमं, इत्थिलिङ्गं हीनं, तस्मा पुरिसलिङ्गं बलवअकुसलेन अन्तरधायति, इत्थिलिङ्गं दुब्बलकुसलेन पतिट्ठाति । इत्थिलिङ्गं पन अन्तरधायन्तं दुब्बलाकुसलेन अन्तरधायति, इतरं बलवकुसलेन पतिट्ठाति । एवं उभयमि सुगतियं अकुसलेनेव अन्तरधायति, कुसलेनेव पतिट्ठाति । कायप्पसादो विय च सकलसरीरव्यापकमेव, न च कायप्पसादादीनं ठितोकासे तिट्ठति ।

यदि एवं न सब्बत्थ कायभाविन्द्रियानीति? नेवं परमत्थतो सब्बत्थ, विनिब्भुजित्वा पनेसं ओकासभेदं पञ्जापेतुं न सक्का रूपरसादीनं विय । न हि परमत्थतो रूपे रसो अत्थि । यदि सिया, रूपगहणेनेव गहणं गच्छेय्य । एवं कायभाविन्द्रियानि परमत्थतो न सब्बत्थ, न च सब्बत्थ नत्थि विवेचेतुं असक्कुणेय्यताय हेट्टा वुत्तलक्खणादिववत्थानतोपि चेसं असम्मिस्सता देसतो न विवेकाभावेपि । न केवलञ्च इमानेव, सब्बानिपि रूपानि असम्मिस्सानेव होन्ति । यथा हि पच्चवण्णेन कप्पासेन वट्ठिं कत्वा दीपे जलिते किञ्चापि जाला एकाबद्धा विय होन्ति, तस्स तस्स पन अंसुनो पाटियेक्कं जाला अज्जमज्जं असम्मिस्साव । एवं कायभाविन्द्रियादीनि एकस्मिं ठाने समोसटानिपि भिन्नाद्धानेसु हेट्टुपरियादिवसेन नत्थि, तानिपि असम्मिस्सानेव होन्ति ।

सहजरूपानं अनुपालनलक्खणं **जीवितिन्द्रियं**, तेसं पवत्तनरसं, तेसंयेव ठपनपच्चुपट्टानं, यापयितब्बधम्मपदट्टानं । अत्थिक्खणे एव चेतं सहजरूपानि अनुपालेति उदकं विय उप्पलादीनि, न भङ्गक्खणे सयं भिज्जमानत्ता, यथासकं पच्चयुप्पन्नेपि च धम्मे पालेति धाती विय कुमारं, सयंपवत्तितधम्मसम्बन्धेनेव च पवत्तति नियामको वियाति दट्टब्बं ।

मनोधातुमनोविज्ञाणधातून् निस्सयलक्खणं **हृदयवत्थु**, तासञ्जेव धातून् धारणरसं, उब्बहनपच्चुपट्ठानं । इदं पन हृदयवत्थु यदेतं अन्तोसरीरे द्विन्नं थनानं मज्झे बाहिरपत्तानि अपनेत्वा अधोमुखद्वपितरत्तपदुममकुलसण्ठानं बहि मट्ठं, अन्तो कोसातकीफलस्स अब्भन्तरसदिसं, पञ्चवन्तानं थोकं विकसितं, मन्दपञ्चानं मकुळितं, हृदयमंसयमकं परिकिखपित्वा वक्कयकनकिलोमकपिहकादयो तिट्ठन्ति । तस्स ससम्भारहृदयमंसस्स अन्तो पुन्नागट्ठिपतिट्ठानमत्ते आवाटके सण्ठितं अद्भपसतमत्तलोहितं सण्ठाति । तच्च रागचरितस्स रत्तं, दोसचरितस्स काळकं, मोहचरितस्स मंसधोवनउदकसदिसं, वितक्कचरितस्स कुलत्थयूसवण्णं, सद्वाचरितस्स कणिकारपुष्फवण्णं, बुद्धिचरितस्स अच्छं विप्पसन्नं अनाविलं पण्डरं परिसुद्धं निद्धोतजातिमणिं विय जुतिमन्तं होति, व्यापेत्वा सन्धारणादिकिच्चहेहि भूतेहि कतूपकारं आयुना अनुपालियमानं वण्णादिपरिवुतं उतुचिताहारेहि उपत्थम्भियमानं मनोधातुमनोविज्ञाणधातूनञ्चेव तंसम्पयुत्तानञ्च वत्थुभावं साधयमानं तिट्ठति ।

अभिवक्कमादिप्पवत्तकचित्तसमुद्धानवायोधातुया सहजरूपकायसन्धम्भनसन्धारणचलनस्स पच्चयाकारविकारलक्खणा **कायविज्जति**, अधिप्पायप्पकासनरसा, कायविप्फन्दनहेतुभावपच्चुपट्ठाना, चित्तसमुद्धानवायोधातुपदट्ठाना । वचीभेदप्पवत्तकचित्तसमुद्धानपथवीधातुया उपादिन्नघट्टनस्स पच्चयाकारविकारलक्खणा **वचीविज्जति**, अधिप्पायप्पकासनरसा, वचीघोसस्स हेतुभावपच्चुपट्ठाना, चित्तसमुद्धानपथवीधातुपदट्ठाना । उभोपेता कायविप्फन्दनवचीघोसेहि सयं विज्जेय्यता, अधिप्पायविज्जापनतो च “कायवचीविज्जतियो”ति वुच्चन्ति । चक्खुसोतपथस्मिं हि ठत्वा केनचि हत्थविकारसीसुक्खिपनादिकायविकारे, सदे वा कते तथापवत्तरूपसद्वायतनानि चक्खुसोतविज्जेय्यानि, न तानि विज्जतियो, चित्तसमुद्दितकलापगताय पन वायोधातुया सहजातरूपकायसन्धारणचलनादीनं पच्चयभूतो विकारो कायविज्जति, तथा चित्तसमुद्दितपथवीधातुया उपादिन्नघट्टनस्स पच्चयभूतो आकारविकारो वचीविज्जति । न च ता चक्खुसोतविज्जेय्या, ता पन मनोद्वारिकजवनेहि तालपण्णादिसञ्जाय उदपानादीनि विय यथागहितकायविकारवचीघोसानुसारेन तिरच्छानानमि विज्जेय्या, तदनुसारेनेव “इदञ्चिदञ्च एस कारेति, वदति चा”ति अधिप्पायो च विज्जेय्यो होति, तस्मा सयं विज्जेय्यतो, अधिप्पायविज्जापनतो च “विज्जतियो”ति वुच्चन्ति ।

तत्थ च मनोद्वारिकजवनवीथियं सत्तसु कामावचरजवनेसु कायविज्जतिजनकेसु पुरिमेहि छहि जवनेहि समुद्दितवायोधातुयो उपत्थम्भनसन्धारणकिच्चमेव कातुं सक्कोन्ति, अभिवक्कमादिं पन निप्फादेतुं न सक्कोन्ति । सत्तमजवनसमुद्दिता पन हेट्ठा छहि जवनेहि समुद्दितवायोधातुयोपत्थम्भं लभित्वा सत्तहि युगेहि आकट्ठितब्बभारं सकटं सत्तमयुगयुत्तगोणो विय इतरछयुगयुत्तगोणोपत्थम्भं लभित्वा रूपकायस्स अभिवक्कमपटिक्कमादिं कारेतुं सक्कोति, एवं वचीविज्जतिजनकेपि सत्तमजवनेहि समुद्दिताय पथवीधातुयापि उपादिन्नघट्टनस्स पच्चयभावो वेदितब्बो । इध पन पुरिमजवनसमुद्दिताय उपत्थम्भकत्तं, सत्तमजवनसमुद्दिताय चलनपच्चयत्तञ्च नत्थि तेसं वायोधातुकिच्चत्ता, पुरिमसहगता पन पच्छिमा पथवीधातु उपादिन्नघट्टनसमत्था होति, सेसं तादिसमेव । चित्तसमुद्दितकाये पन वायोधातुया चलन्ते तदुपत्थम्भिततेसमुद्धानिकानमि चलनतो सकलकायस्स अभिवक्कमादयो होन्ति उदके गच्छन्ते तत्थ पतिततिणपण्णानि वियाति दट्ठब्बं ।

रूपपरिच्छेदलक्खणा **आकासधातु**, रूपपरियन्तप्पकासनरसा, रूपमरियादपच्चुपट्ठाना, असम्फुट्टभावपच्चुपट्ठाना, छिद्विवरभावपच्चुपट्ठाना वा, परिच्छिन्नरूपपदट्ठाना, याय परिच्छिन्नेसु रूपेसु “इदमितो उद्धं, अधो, तिरिय”न्ति च होति ।

अदन्धतालक्खणा **रूपस्सलहुता**, रूपानं गरुभावविनोदनरसा, लहुपरिवत्तितापच्चुपट्ठाना, लहुरूपपदट्ठाना । अथद्धतालक्खणा **रूपस्समुदुता**, रूपानं थद्धभावविनोदनरसा, सब्बकिरियासु अविरोधितापच्चुपट्ठाना, मुदुरूपपदट्ठाना । सरीरकिरियानुकूलकम्मज्जभावलक्खणा **रूपस्सकम्मज्जता**, अकम्मज्जताविनोदनरसा, अदुब्बलभावपच्चुपट्ठाना, कम्मज्जतारूपपदट्ठाना । एता पन तिस्रोपि अज्जमज्जं न विजहन्ति, गरुथद्धअकम्मज्जरूपपटिक्कभावेन च समुद्दितानं उतुचिताहारजानं लहुमुदुकम्मज्जभूतानं रूपानं विकारताय च परियायतो गरुथद्धाकम्मज्जभावविनोदनकिच्चा वुत्ता, न पन सभावतो सयं अविज्जमानन्ता ।

आचयलक्खणो **रूपस्सउपचयो**, पुब्बन्ततो रूपानं उम्मुज्जापनरसो, निव्यातनपच्चुपट्ठानो, परिपुण्णभावपच्चुपट्ठानो वा, उपचितरूपपदट्ठानो । पवत्तिलक्खणा **रूपस्ससन्तति**, अनुप्पबन्धनरसा, अनुपच्छेदपच्चुपट्ठाना, अनुप्पबन्धकरूपपदट्ठाना । उभयम्पेतं जातिरूपस्सेवाधिवचनं । सम्पिण्डितानं हि चतुसमुद्धानिकरूपानं पठमुप्पत्ति उपचयो नाम, उपरूपरुप्पत्ति सन्तति नाम । तेनेव तासं **पदभाजनीये** “यो रूपस्स उपचयो, सा रूपस्स सन्तती”ति (ध० स० ६४२) वुत्तं, आकारनानत्ततो पन विसुं उद्धिट्ठा ।

रूपपरिपाकलक्खणा **रूपस्सजरता**, उपनयनरसा, सभावानपगमेपि नवभावापगमपच्चुपट्ठाना वीहिपुराणभावो विय, परिपच्चमानरूपपदट्ठाना । खणे खणे भिज्जमानापि चेसा उपादिन्नेसु खण्डदन्तादितो, अनुपादिन्नेसु रुक्खलतादीसु वण्णविकारादितो च अन्तरन्तरा च सुविज्जेय्यविकारत्ता “पाकटजरा, सवीचिजरा”ति च वुच्चति, मणिकनकचन्दसूरियादीसु दुविज्जेय्यता, निरन्तरत्ता च “अपाकटजरा, अवीचिजरा”ति वुच्चति । ईदिसेसु हि कप्पविनासादिकाले विकारतो जरा पञ्जायेय्य । सब्बदापि पन अपञ्जायमानविकारत्ता अरूपधम्मसेसु जरा पटिच्छन्नजरा नाम । न च तत्थ वण्णविकारादयो जरा तेसं चक्खुविज्जेय्यतो । न हि जरा चक्खुविज्जेय्या, मनोविज्जेय्या पन होति । यथा ओघेन परिभन्नभूमिआदिदस्सनेन अदिट्ठोपि ओघो सुविज्जेय्यो होति, एवं विकारदस्सनेन जराति गहेतब्बं ।



परिभेदलक्षण **रूपस्स अनिच्चता**, संसीदनरसा, खयवयपच्चुपट्टाना, परिभिज्जमानरूपपट्टाना । न केवलञ्चेतानि उपचयादिचतूहि गहितानि जातिजरामरणानि रूपधम्मानमेव, अरूपधम्मानमि होन्ति येव । एतानि च इमेसं सत्तानं अरञ्जणवेसकपविट्ठपरिपातकपतितघातकचोरेहि यथाक्कमं सदिसानीति दट्ठब्बानि ।

ओजालक्षणो **कबळीकारो आहारो**, रूपाहरणरसो, उपत्यम्भनपच्चुपट्टानो, कबळं कत्वा आहरितव्ववत्थुपट्टानो । अयं लक्षणोदितो विनिच्छयो ।

सङ्गहतो पन सब्बम्पेतं रूपं खन्धतो एकविधं रूपकखन्धोव होति, तथा अहेतुकं सप्पच्चयं सङ्गतं लोकियं सासवं सञ्जोनीयं ओघनीयं योगनीयं नीवरणीयं परामट्ठं संकिलेसिकं अनारम्भणं अप्पहातव्वन्तिआदिना च एकविधं, तं पुन भूतोपादायवसेन दुविधं, तथा निष्फन्नानिष्फन्नादिवसेन च । तत्थ पथवीआदीनि चत्तारि महाभूतानि **भूतरूपं** नाम, सेसं **उपादारूपं** नाम । पथवीआदयो सत्तरस, कबळीकारो आहारो चेति अट्टारसविधमि परमत्थतो विज्जमानत्ता **निष्फन्नरूपं** नाम, इतरं **अनिष्फन्नरूपं** नाम । चक्खादयो पञ्च पसादा, भावद्वयं, जीवितिन्द्रियन्ति अट्ठविधमि **इन्द्रियरूपं** नाम, इतरं **अनिन्द्रियं** । तानि इन्द्रियानि चेव हृदयञ्चाति नवविधमि **उपादिन्नं**, इतरं **अनुपादिन्नं**, पञ्च पसादा, चत्तारो रूपसद्वगन्धरसा, आपोधातुविवज्जितभूतत्तयञ्चाति द्वादसविधमि **ओळारिकरूपं**, **सन्तिकेरूपं**, **सप्पटिघरूपञ्च**, सेसं **सुखुमरूपं**, **दूररूपं**, **अप्पटिघरूपञ्च** । पसादा, हृदयञ्च **वत्थुरूपं**, इतरं **अवत्थुरूपं** । पसादा, विज्जित्तद्वयञ्च **द्वाररूपं**, इतरं **अद्वारं** । पसादा **अज्झत्तिकरूपं**, **गोचरगगाहिकरूपञ्च**, इतरं **बाहिरं**, **अगोचरगगाहिकरूपञ्च** । चत्तारि भूतरूपानि, रूपगन्धरसओजा चाति इदं सुद्धट्ठकं **अविनिब्भोगरूपं** नाम, इतरं **विनिब्भोगरूपं** ।

चक्खु नचक्खूति एवमादिवसेन च दुविधं होति । पुन तं सनिदस्सनत्तिकवसेन ति विधं होति । तत्थ रूपायतनं **सनिदस्सनसप्पटिघं**, सेसमोळारिकरूपं **अनिदस्सनसप्पटिघं**, सब्बमि सुखुमरूपं **अनिदस्सनअप्पटिघं** । तथा कम्मजादित्तिकवसेन । तत्थ नवविधं उपादिन्नरूपं, सुद्धट्ठकं, आकासो च **कम्मजं** नाम, विज्जित्तद्वयं, लहुतादित्तयञ्च सद्दो च **अकम्मजं** नाम, उपचयादिचतुब्बिधं लक्षणरूपं **अजं** नाम । सुद्धट्ठकं, आकासो, विज्जित्तद्वयं, लहुतादित्तयं, सद्दो च **चित्तजं** नाम, तदवसेसं लक्षणरूपविरहितं **अचित्तजं** नाम, लक्षणरूपं **अजं** नाम । सुद्धट्ठकं, आकासो, लहुतादित्तयञ्च **आहारजं** नाम, सेसं लक्षणवज्जितं **अनाहारजं** नाम, लक्षणं **अजं** नाम । सुद्धट्ठकं, आकासो, लहुतादित्तयं, सद्दो च **उत्तुजं** नाम, सेसं लक्षणविरहितं **अनुत्तुजं** नाम, लक्षणं **अजं** नाम । लक्षणानि हि जायमानजीयमानपरिभिज्जमानधम्मानं सभावताय कुतोचि जातिवोहारं न लभन्ति भेसमि जातिआदिप्पसङ्गतो । न हि “जाति जायति, जरा जीरति, मरणं मीयती”ति वोहरितुं युत्तं अनवट्टानतो । तदवसेसानं पन आकासविज्जत्तादिअनिष्फन्नानं यदिपि परमत्थतो अविज्जमानताय न कुतोचि उपत्ति अत्थि, तथापि तथा तथा पवत्तरूपं उपादाय नेसं विज्जमानवोहारस्सेव हेतुसमुप्पन्नवोहारस्सापि विरोधाभावतो सहेतुकता वुत्ता । यं पन **पाळियं** “रूपायतनं... पे०... रूपस्स उपचयो रूपस्स सन्तति कबळीकारो आहारो । इमे धम्मा चित्तसमुट्टाना”तिआदीसु (ध० स० १२०२) जातियापि कुतोचि जातत्तं वुत्तं, तं रूपजनकपच्चयानं किच्चानुभावलक्षणे दिट्ठत्ता रूपुप्पत्तिकखणे विज्जमानतं सन्धाय वुत्तं, जरामरणानं पन रूपुप्पत्तिकखणे अभावतो न वुत्तं । “जरामरणं, भिक्खवे, अनिच्चं सङ्गतं पटिच्चसमुप्पन्नं”न्ति (सं० नि० २.२०) इदं पन जरामरणसीसेन तथापवत्तविज्जाणनामरूपादीनमेव गहितत्ता वुत्तन्ति वेदितव्वं । यं तं रूपं अज्झत्तिकं, तं उपादा, यं तं रूपं बाहिरं, तं अत्थि उपादा, अत्थि नो उपादाति एवमादिना नयेनापि ति विधं होति ।

पुन तं सब्बं दिट्ठसुतमुतविज्जातवसेन चतुब्बिधं होति । तत्थ रूपायतनं **दिट्ठं** नाम, सद्दो **सुत्तं** नाम, गन्धरसफोट्टब्बानि पत्वाव गहेतव्वतो **मुत्तं** नाम, सेसं मनसा विज्जातव्वतो **विज्जातं** नाम । तथा रूपरूपचतुक्कादिवसेन चतुब्बिधं, तत्थ अट्टारसविधं निष्फन्नं **रूपरूपं** नाम, आकासो **परिच्छेदरूपं** नाम, विज्जित्तद्वयं, लहुतादित्तयञ्च **विकाररूपं** नाम, उपचयादिचतुब्बिधं **लक्षणरूपं** नाम । तथा हृदयवत्थु वत्थु, न द्वारं नाम, विज्जित्तद्वयं द्वारं, न वत्थु नाम, चक्खादयो पञ्च पसादा वत्थु चेव द्वारञ्च नाम, सेसं नेव वत्थु न द्वारं नामाति एवमादिना नयेन चतुब्बिधं ।

तं पुन एकजादिवसेन पञ्चविधं । नवविधं हि उपादिन्नरूपं कम्मेनेव, विज्जित्तद्वयञ्च चित्तेनेव उप्पज्जनतो **एकजं** नाम, सद्दो उत्तुचित्तेहि उप्पज्जनतो **द्विजं** नाम, लहुतादित्तयं उत्तुचित्ताहारेहि उप्पज्जनतो **तिजं** नाम, सुद्धट्ठकं, आकासो च चतूहिपि उप्पज्जनतो **चतुज्जं** नाम, लक्षणानि **अजं** नाम । एवमादिना पञ्चविधं होति ।

तं पुन चक्खुसोतधानजिक्काकायमनइन्द्रियविज्जेय्यवसेन छब्बिधं । सत्तविज्जाणधातुविज्जेय्यवसेन सत्तविधं । तदेव मनोविज्जाणधातुविज्जेय्यं भूतोपादायवसेन द्विधा कत्वा अट्ठविधं होति । तत्थ हि आपोधातु मनोविज्जाणनेव विज्जेय्यं भूतरूपं नाम, इतरं पसादसहितसुखुमरूपं मनोविज्जाणविज्जेय्योपादायरूपं नाम । तदेव पुन मनोविज्जाणविज्जेय्योपादायरूपं इन्द्रियानिन्द्रियवसेन द्विधा कत्वा नवविधं होति । तं पुन पसादविसय आपोधातुभावहृदयजीवितपरिच्छेदविकारलक्षणआहारवसेन दसविधं होति ।

तदेव पुन चक्खायतनं सोतायतनं घानायतनं जिक्कायतनं कायायतनं रूपायतनं सद्दायतनं गन्धायतनं रसायतनं फोट्टब्बायतनं धम्मायतनन्ति एवं आयतनतो एकादसविधं होति, तथा धातुवसेन । तत्थ आपोधातुविवज्जितभूतत्तयं फोट्टब्बायतनं फोट्टब्बधातु “कायविज्जेय्यं, कायविज्जाणविज्जेय्यं”न्ति च वुच्चति, सुखुमरूपं धम्मायतनं धम्मधातूति, तदेव पसादसहितं “मनोविज्जेय्यं, मनोविज्जाणविज्जेय्यं”न्ति च वुत्तं । सेसं सुविज्जेय्यमेव ।

कस्मा पनेत्थ आपोधातुविवज्जितानञ्जेव भूतानं फोट्टब्बता वुत्ता, ननु आपोधातुपि सीतवसेन फुसित्वा वेदितव्वति? न सीतस्सापि तेजोधातुत्ता ।

उण्हमेव हि सीतन्ति ब्यपदिस्सति । कठिनाकठिनतं उपादाय रुक्खादिविरलच्छाया विय, तं वा उपादाय सन्दच्छायादि, अञ्जथा कस्सेतं सीतत्तं सभावं सिया । “आपोधातुया” इति चे । यदि एवं उण्होदकादीसु आपत्तं न सिया आपोतेजानञ्च सहपवत्तानं विरुद्धलक्खणत्ता, न च सा तेजोसन्निधाने सीतत्तं विहाय तिष्ठति । न हि सभावा केनचि सहभावेन तंसभावं जहन्ति अभावापत्तितो, नापिस्सा सीतभावं मुञ्चित्वा अपरसभावो अत्थि, येन सहभावो युज्जेय्य । यदि सिया “आपो सीतत्त”न्ति, भावद्वयं सिया अञ्जोञ्जविलक्खणसभावत्ता भावस्स, अथापि न सीतत्तं, आपोधातुया सरूपं सीतगुणो, सो च उण्हसन्निधाने विगच्छति, गुणीरूपमेव तिष्ठतीति चे? तदा तर्हि सयं अफोडुब्बाव आपोधातु, न नियतफस्सवतीति च सिया, यो च सीतफस्सो गुणोति सुवुत्तो, सो अम्हेहि तेजोधातुविसेसोति ।

अयमेव विसेसोति चे, ननु सीतत्तं, उण्हत्तञ्च अञ्जोञ्जविरुद्धं, कथं तेजोधातुया सभावं सियाति? नायं दोसो एककलापे तेसं सम्भवाभावतो, भिन्नकलापेसु पन पवत्तियं आलोकन्धकारनीलपीतादीनं वण्णायतनता विय तेजोधातुत्तं न विरुज्झतीति । यदि आपोधातुया न सीतत्तं सरूपं, किं पनस्सा सरूपन्ति? द्रवता । यदि एवं द्रवतापि फुसित्वा जातब्बतो फोडुब्बं सियाति? न सीतादिं फुसित्वा मनसाव वण्णं दिस्वा जातब्बतो । अन्धकारे सयन्ता हि अतिसीतलताय पत्तादिं फुसित्वा “उदकं एत्था”ति आसङ्किता होन्ति, उदकं वा फुसित्वा सप्पादिसज्जिनो, तस्मा अफोडुब्बमेव आपोधातु, इतरभूतत्तयमेव फोडुब्बन्ति गहेतब्बं ।

किं पनेतं भूतत्तयं एकतो आरम्भणं कत्वा कायविज्जाणं उप्पज्जितुं सक्कोति, न सक्कोतीति? न सक्कोति । कस्मा? आभुजितवसेन वा उस्सदवसेन वा तेसु एकमेवारम्भणं कत्वा उप्पज्जनतो । आभुजितवसेन हि ओदनथालियं सित्थं गहेत्वा थद्धमुदुभावं वीमंसन्तस्स, उण्होदकभाजने वा हत्थं ओतारेत्वा उण्हभावं वीमंसन्तस्स, उण्हसमये वा वातपानं विवरित्वा वातेन सरिरं पहरापेत्तस्स च तत्थ तत्थ किञ्चापि इतरं भूतत्तयमि अत्थि, यथाभुजितं पन तंतं पथवीतेजोवायोधातुमेव यथाक्कमं आरम्भ कायविज्जाणं उप्पज्जति । एवं **आभुजितवसेन** आरम्भणं करोति नाम । उस्सदवसेन पन भुज्जनसमये सक्खरं डंसन्तस्स, मग्गे वा अग्गिं अक्कमन्तस्स, बलववातेन वा कण्णसक्खलियमि पहरन्तस्स च तत्थ तत्थ किञ्चापि इतरभूतत्तयमि अत्थि, यथाउस्सदं पन तंतं पथवीतेजोवायोधातुमेवारम्भ यथाक्कमं कायविज्जाणं उप्पज्जति । अग्गिम्हि वा निमुग्गसकलसरीरस्स यदिपि एकप्पहारेन अग्गिना कायो घट्टीयति, यस्मिं यस्मिं पन ठाने कायप्पसादो उस्सन्नो होति, यत्थ यत्थ वा पन विसयघट्टनानिघंसो बलवा होति, तत्थ तत्थेव पठमं कायविज्जाणं उप्पज्जति, पच्छा इतरद्वानेसु । खणपरित्तताय पन सहसा परिवत्तित्वा उप्पज्जनवसेन एकप्पहारेन सकलसरीरं ड्हमानं विय खायति । न हि एकस्मिं खणे बहूनि विज्जाणानि उप्पज्जन्ति, ब्यापेत्ता वा एकं । एकेकस्मिं पन अविनिब्भोगे कायदसके एकमेव कायविज्जाणं उस्सदवसेन उप्पज्जति, एवं इतरवत्थूसुपि विज्जाणानं अविनिब्भोगे पदेसे एकेकानमेव उप्पत्ति वेदितब्बा । एवं **उस्सदवसेन** आरम्भणं करोति नाम ।

केन पन चित्तस्स आरम्भणसङ्कन्ति होतीति? अज्झासयतो, विसयाधिमत्ततो वा । नानाठानेसु हि चित्तपटिमादीनि पस्सितुकामस्स पठमं एकद्वाने दिस्वा ततो इतरद्वानेसु च रूपानि पस्सितुं सरसेनावज्जनं उप्पज्जति । एवं अज्झासयतो सङ्कन्ति होति । रूपारम्भणं पन महन्तमि पस्सन्तस्स सब्बतूरियनिग्घोसे उड्ढिते तं वा सुणन्तस्स मनुज्जामनुज्जे अधिमत्तगन्धरसफोडुब्बे इन्द्रियेसु घट्टिते इतरितरे चित्तं सङ्कमति, एवं विसयाधिमत्ततो सङ्कन्ति होतीति अयमेत्थ सङ्गहतो विनिच्छयो । सुज्जतो, पन अतीतादिवसेन पच्चेकं अनन्तप्पभेदतो च विनिच्छयो चित्तविभत्तियं वुत्तयानुसारेन यथानुरूपं वेदितब्बो ।

समुट्ठानतो, पनेत्थ भवयोनीसु पवत्तिक्कमतो च पकिण्णककथा वेदितब्बा — चतुसमुट्ठानिकानि हि रूपानि उप्पज्जमानानि द्वीसु भवेसु चतूसु योनीसु दसकादिकलापवसेनेव पटिसन्धिपवत्तीसु यथासम्भवं समुप्पज्जन्ति । तत्थ कम्मजेसु ताव वीसतिया कामावचरकुसलाकुसलेहि कामलोकेयेव संसेदजानं, ओपपातिकानञ्च छ वत्थूनि, भावद्वये अज्जतरं, जीवितञ्चाति अट्ठ रूपानि यथासम्भवं पटिसन्धितो पट्टाय पातुभवन्ति । तानि च सुद्धट्ठकं, जीवितञ्च जीवितनवकं, तदेव नवकं चक्खुना सह चक्खुदसकं, सोतेन सोतदसकं, घानेन घानदसकं, जिह्वाय जिह्वादसकं, कायेन कायदसकं, हृदयवत्थुना वत्थुदसकं, भावज्जतरेन भावदसकञ्चाति नव कलापा हुत्वा उप्पज्जन्ति । नपुंसकानं पनेत्थ भावदसकं नत्थि, तथा जच्चन्धादीनं चक्खुसोतघानदसकानि । एवं अण्डजजलाबुजानमि, तेसं पन पटिसन्धिचित्तेन सह कायवत्थुभावदसकानेव उप्पज्जन्ति, ततो पवत्तिकाले जीवितनवकचक्खुदसकादीनि यथानुरूपं उप्पज्जन्ति । रूपभवे पन घानदसकादित्तयं, भावदसकद्वयं, उदरग्गिनवकञ्च नत्थि, सेसानि पञ्चहि रूपावचरकुसलकम्मेहि पटिसन्धितो पभुति उप्पज्जन्ति । अज्जज्जीनं पन पञ्चमज्झानकुसलेन जीवितनवकमेव । एवं कामरूपावचरकम्मसमुट्ठिता नव रूपकलापा द्वीसु भवेसु चतूसु योनीसु यथासम्भवं पटिसन्धितो पट्टाय याव चुतिचित्तोपरिसत्तरसमचित्तस्स ठिति, ताव चित्तस्स उप्पादठितिभङ्गसङ्घातेसु तीसु खणेषु निरन्तरं अज्जत्तसन्ताने एव उप्पज्जन्ति, ततो पभुति अनुप्पज्जित्वा चुतिचित्तेन सह निरुज्जन्ति ।

चित्तजानि पन पञ्चवोकारभवे द्विपञ्चविज्जाणआरूपविपाकवज्जितपञ्चसत्तित्तिहेहि अत्तनो अत्तनो उप्पत्तिकखणे एव समुट्ठापितानि पठमभवङ्गमुपादाय चुतिचित्तपरियोसानं अज्जत्तसन्ताने एव सुद्धट्ठकं, तदेव कायविज्जत्तिया सह कायविज्जत्तिनवकं, वचीविज्जत्तिसद्देहि वचीविज्जत्तिदसकं, लहुतादित्तयेन लहुतादेकादसकं, कायविज्जत्तिलहुतादीहि द्वादसकं, वचीविज्जत्तिसद्दलहुतादीहि तेरसकञ्चाति छ कलापा हुत्वा यथायोगं पवत्तन्ति । रूपजनकचित्तेसु चेत्थ सोमनस्ससहगतकामावचरजवनानि इरियापथविज्जत्तिहसनसहितं सब्बं चित्तजरूपं समुट्ठापेन्ति, सेसकामावचरजवनाभिज्जावोडुब्बानि हसनवज्जं, अप्पनाजवनानि च इरियापथादिविरहितमेव, यथापवत्तं पन इरियापथं अविनस्समानं उपत्थम्भेन्ति । सेसानि पन रूपावचरविपाकमनोधातुतदारम्भणानि एकूनवीसति तमि न करोन्ति, सुद्धट्ठकं, सदनवकं, लहुतादेकादसकं, सद्दलहुतादिद्वादसकञ्चाति

चत्तारो कलापे उप्पादेन्ति, तत्थापि सब्बेसम्पि पटिसन्धिचित्तानि, अरहन्तानं चुतिचित्तानि, अरूपभवूपपन्नानि च न किञ्चि रूपं समुद्वापेन्ति, आरुप्पविपाकद्विपञ्चविज्जाणानि सब्बथा न उप्पादेन्तीति ।

आहारजानि पन कामभवे एव अज्झोहटाहारे ठितेन ठितिप्पत्तेन ओजासङ्गातेन आहारेन समुद्घितानि अज्झत्तसन्ताने एव सुद्धट्ठकं, लहुतादेकादसकज्जाति द्वे कलापा हुत्वा यावतायुकं पवत्तन्ति, न रूपभूमियं । उतुजानि अज्झत्तिकबाहिरेन तेजोधातुसङ्गातेन ठितिप्पत्तेन उतुजा अज्झत्तसन्ताने समुद्घितानि सुद्धट्ठकं, सदनवकं, लहुतादेकादसकं, सदलहुतादेकादसकं, सदलहुतादिद्वादसकज्जाति चत्तारो कलापा हुत्वा यावतायुकं, बहिद्धा पन पथवीपब्बतदेवब्रह्मविमानादीसु सुद्धट्ठकं, समुद्घोसादिसदनवकज्जाति द्वे कलापाव हुत्वा पवत्तन्ति । आकासलक्खणानि चेत्थ सब्बकलापेसु विज्जमानानिपि कलापसङ्गहे वोहाराभावा न गणीयन्ति । पटिसन्धिक्खणे चेत्थ उतुचित्ताहारजानि न होन्ति, न सब्बथापि उप्पत्तिक्खणे जरामरणानीति एवं चतुसमुद्धानिकरूपस्स भवयोनीसु, पटिसन्धिप्पवत्तीसु च पवत्तिकमो वेदितब्बो ।

अपिच द्वाचत्तालीसाय कोट्टासानं वसेनापि चेत्थ तस्स अज्झत्तं, महाभूतादिवसेन बहिद्धा च पवत्ति एवं वेदितब्बा — अज्झत्तिका हि केसा लोमा...पे०... करीसं मत्थलुङ्गन्ति इमे वीसति पथवाधिककोट्टासा, पित्तं...पे०... मुत्तन्ति इमे द्वादस आपाधिककोट्टासा, येन च सन्तप्पति, येन च जीरति, येन च परिडहति, येन च असितपीतखायितसायितं सम्मापरिणामं गच्छतीति इमे चत्तारो तेजाधिककोट्टासा, उद्धंगमो अधोगमो कुच्छिसयो कोट्टासयो अङ्गमङ्गानुसारी अस्सासपस्सासो चाति इमे छ वायुअधिककोट्टासाति द्वेचत्तालीस कोट्टासा होन्ति । तेसु उदरियं करीसं पुब्बो मुत्तन्ति इमे चत्तारो कोट्टासा उतुजा । एवमेतेसु एकेकं उतुजट्ठकमेव होति, सेदो अस्सु खेळो सिङ्घाणिकाति इमे चत्तारो उतुचित्तजा, तेसु एकेकस्मिं द्वे द्वे अट्ठका होन्ति । असितादिपरिपाचको तेजो कम्मजोव, तत्थ जीवितनवकमेव । अस्सासपस्सासो पन चित्तजोव, तत्थ चित्तजसदनवकमेव । इमे दस कोट्टासे ठपेत्वा सेसा द्वत्तिस चतुजा ।

तत्थ अट्ठसु तेजोवायोकोट्टासेसु एकेकस्मिं जीवितनवकज्जेव तीणि च उतुचित्ताहारजट्ठकानि होन्ति, वायोकोट्टासेसु चेत्थ उतुचित्तजसदनवकम्पि होति, सेसेसु चतुवीसतिया कोट्टासेसु केसलोमनखदन्तानं मंसविनिमुत्तद्धानं ठपेत्वा सब्बत्थ द्वे कायभावदसकानि, तीणि च अट्ठकानि, मंसमुत्तेसु पन केसादीसु उतुजट्ठकमेव होति । तानि च यथावुत्तदसकनवकट्ठकानि सकलसरीरव्यापीसु तचमंसरुहिरादीसु, अब्यापीसु च केसादीसु कोट्टासेसु अविनिब्भोगे एकस्मिं अणुपदेसे होन्तीति पच्चेकं अनन्तापरिमाणा, अनन्तधातुपच्चयत्ता तेसं सरीरस्मिं हि परमाणुभेदसज्जुण्णानि अनन्तानि चत्तारि महाभूतानि चेव सउपादारूपानि च अज्जोञ्जपच्चयभूतानि अज्झत्तं द्वाचत्तालीसकोट्टाससरीरारोहपरिणाहसण्ठानादिना, बहिद्धा च पथवीपब्बतादिना च आकारेन यथापच्चयं समुप्पन्नानि । मायाकारादयो विय न बालजनप्पबोधकानि होन्ति ।

पथवीधातु चेत्थ सुखुमसज्जुण्णा रजभूता एव आपोधातुया सङ्गहिता, तेजोधातुया अनुपालिता, वायोधातुया वित्थम्भिता, वण्णादीहि परिवारिता न विकिरियमाना अज्झत्तं इत्थिपुरिसमिगपक्खिदेवब्रह्मादिसरीरभावं, बहिद्धा च पथवीपब्बतरुक्खदेवब्रह्मलोकचन्दसूरियनक्खत्तमणिकनकादिभावज्ज उपगच्छति, यूसगता बन्धनभूता पनेत्थ आपोधातु पथवीपतिट्ठिता । अवसेसानुपालनवित्थम्भनपरिपाचनपरिवारिता न पग्घरति, अपग्घरमाना पीणितभावं दस्सेति, उसुमत्तगता तेजोधातु सेसधातुपतिट्ठानसङ्गहवित्थम्भनपरिवारिता इमं कायं परिपाचेति, वण्णसम्पत्तिञ्चरस्स अपूतिभावज्ज साधेति, वायोधातु वित्थम्भनसमुदीरणसभावा सेसधातुपतिट्ठानसङ्गहानुपालनपरिवारिता वित्थम्भेति चालेति, सरीरविमानादीनं गमनादिपदवीतिहरणादीनं ठितिञ्च सम्पादेति । चतस्सोपि चेता सम्भूय पथवीअधिकताय केसादिभावं, पथवीपब्बतादिभावज्ज, आपाधिकताय पित्तादिभावं, समुद्गजलादिभावज्ज, वायुअधिकताय उद्धङ्गमवातादिभावं, पथवीसन्धारकवातादिभावज्ज, तेजाधिकताय परिपाचकगिआदिभावं, नरकगिआदिभावज्ज साधेन्ति, यासं पकोपेन रोगजरामरणज्जेव कप्पविनासादयो च होन्ति । एवमेतासं चुण्णविचुण्णानं धातून् सज्जयत्ता पच्चेकं अनन्तापरिमाणा कलापा एव अज्झत्तिककोट्टासा होन्ति, तथा बाहिरानि रूपानि । तानि च तेन तेन पच्चयेन तथातथाकारेन समुदिताव उप्पज्जन्ति चेव उप्पज्जिस्सन्ति च ।

यदि पठमं धातुयो अणुरूपेन ठत्वा पच्छा संयुज्जन्ति, तथा ठाने विनियोगाभावतो अपरेनापि परियायेन चेत्थ कम्मजं कम्मपच्चयं कम्मपच्चयउतुसमुद्धानं, आहारजं आहारपच्चयं आहारपच्चयउतुसमुद्धानं, उतुजं उतुपच्चयं उतुपच्चयउतुसमुद्धानं, चित्तजं चित्तपच्चयं चित्तपच्चयउतुसमुद्धानन्ति एवं समुद्धानभेदो वेदितब्बो । तत्थ उपादिन्नरूपं **कम्मजं** नाम, मंसमुत्तकेसलोमदन्तसिङ्घाणिकादि **कम्मपच्चयं** नाम, सम्पत्तिकरमहामेघपथवीपब्बतादि, चक्करतनदेवविमानादि च **कम्मपच्चयउतुसमुद्धानं** नाम । आहारतो समुद्घितं सुद्धट्ठकं **आहारजं** नाम, कबळीकारो आहारो आहारजस्स जनको हुत्वा कम्मजस्स अनुपालको होतीति तदनुपालितं कम्मजरूपं **आहारपच्चयं** नाम, विसभागाहारं सेवित्वा आतपे गच्छन्तस्स काळकुट्टादीनि उप्पज्जन्ति, इदं **आहारपच्चयउतुसमुद्धानं** नाम । कम्मजउतुतो समुद्घितं सुद्धट्ठकं **उतुजं** नाम, तस्मिं उतु अज्जं अट्ठकं समुद्घापेति, इदं **उतुपच्चयं** नाम, तस्मिम्पि उतु अज्जं अट्ठकं समुद्घापेति, इदं **उतुपच्चयउतुसमुद्धानं** नाम । एवं उपादिन्नके तिरस्सो एव सन्ततियो घट्टेतुं सक्कोन्ति, अनुपादिन्नके पन वलाहको **उतुजं** नाम, वुट्ठिधारा **उतुपच्चयं** नाम, देवे पन वुट्ठे पथवी गन्धं मुज्जति, बीजानि विरुहन्तीति एवं यं अनन्तं सन्ततिवसेन पवत्तं, एतं **उतुपच्चयउतुसमुद्धानं** नाम । चित्ततो समुद्घितं सुद्धट्ठकादि **चित्तजं** नाम, चित्तेन पच्छाजातपच्चयभावेन उपत्थम्भितो कायो **चित्तपच्चयं** नाम, अभिज्जाचित्तेन बहिद्धा समुद्घापितहत्थिअस्सादिकं **चित्तपच्चयउतुसमुद्धानं** नाम । पकिण्णककथा ।

रूपाब्बाकतं निट्ठितं ।

### निब्बानाव्याकृतवण्णना

निब्बानाव्याकृतं पन भूमितो लोकुत्तरमेव, धम्मतोपि च एकमेव, भेदो नत्थि, लक्खणादितो पन सन्तिलक्खणं निब्बानं, निवत्तिलक्खणं, असङ्गतलक्खणं वा, अच्युतिरसं, अनिमित्तपच्चुपट्टानं, असङ्गतताय पनस्स कारकहेतुविरहतो पदट्टानं नत्थि, पापकहेतुवसेन पनेतं “दुक्खनिरोधगामिनिपटिपदा”तिआदिवचनतो (विभ० २०६) “अरियमग्गपदट्टान”न्ति वत्तुं वट्टति। सङ्गहतो पन भेदाभावा खन्धेसु सङ्गहं न गच्छति, आयतनादीसु धम्मायतनधम्मधातूसु सङ्गहं गच्छति। सुज्जतो पन अत्तसुज्जं, सलक्खणधारणतो अनत्तकं धम्ममत्तं, असङ्गतताय वा अच्चन्तत्ता च अनिच्चतासुज्जं, दुक्खतासुज्जं, रागादिसुज्जं, निमित्तसुज्जन्ति पवत्तं सुज्जन्ति गहेतब्बं।

भेदतो पन सन्तिलक्खणादिसभावतो एकविधम्पि कारणपरियायतो सउपादिसेसनिब्बानधातु, अनुपादिसेसनिब्बानधातु चेति दुविधं होति। सरसवसेन पन परिकप्पिताकारभेदतो सुज्जतं अनिमित्तं अप्पणिहितन्ति तिविधं होति। सङ्गतधम्मभेदमुपादाय पटिक्खिपितब्बाकारतो न चित्तं, न चेतसिकं, न रूपं, न अतीतं, न अनागतं, न पच्चुप्पन्नं, न मग्गो, न फलन्तिआदिना अनन्तप्पकारं होति।

निब्बानाव्याकृतं निट्ठितं।

एवं इमस्मिं कुसलत्तिके अवुत्तो सभावधम्मो नाम नत्थि। असभावधम्मेषु पनेत्थ किञ्चापि रूपधम्मानं परिच्छेदाकासलक्खणानि एव वुत्तानि, कसिणादिपटिभागनिमित्तानि पन कसिणुग्घाटिमाकासो, विज्जाणाभावो, निरोधसमापत्ति, तिस्सो नामपुग्गलउपादापञ्जत्तियो, अरूपधम्मानं अनिच्चतादिलक्खणादयो च न वुत्ता, तथापि तेसम्पि सभावधम्मव्यतिरेकाभावतो गहणं होति, तस्मा अयं तिको निष्पदेसत्तिकोति वेदितब्बो। यथा चेत्य, एवं इतो परेषुपि तिकदुकेसु पञ्जत्तिग्गहणाभावेपि निरवसेसपरमत्थग्गहणेनेव निष्पदेसता, विपरियायतो सप्पदेसता च वेदितब्बा। यत्थ पन सम्मुत्तिग्गहणं अत्थि, तत्थ वक्खाम।

रूपनिब्बानकण्डो निट्ठितो।

इति मोहविच्छेदनिया

अभिधम्ममातिकत्थसंवण्णनाय

कुसलत्तिकसंवण्णना निट्ठिता।

### वेदनात्तिकादिवण्णना

इदानीं कुसलत्तिकानन्तरं वेदनात्तिकादीनं अत्थवण्णना अनुप्पत्ता, यस्मा पन व्यायं कुसलत्तिकस्स —

“अत्थतो भूमिभेदा च, पच्चेकं सम्पयोगतो।

उद्देसतो च धम्मानं, लक्खणादिविभागतो”ति॥ —

आदिना मातिकं निक्खिपित्वा “कुसला ताव धम्मा भूमितो चतुब्बिधा होन्ति कामावचरा... पे०... लोकुत्तरा”तिएवमादिना विनिच्छयनयो वुत्तो, सो एव सेसत्तिकदुकानम्पि यथायोगं होति। यथा हि एत्थ, एवं “सुखाय वेदनाय सम्पयुत्ता ताव धम्मा भूमितो तिविधा होन्ति कामावचरा रूपावचरा लोकुत्तरा”तिआदिना अनुक्कमेन सब्बत्तिकदुकानम्पि पण्डितेहि सक्का विनिच्छयनयं सल्लक्खेतुं, तस्मा तं वित्थारनयं वज्जेत्वा निक्खेपकण्डे, अत्थुद्धारकण्डे च वुत्तानुसारतो नातिसङ्खेपवित्थारनयेन वेदनात्तिकादीनं तिकदुकानं —

पदत्था तंसरूपा च, नवत्तब्बविभागतो।

विनिच्छयो विजानीयो, तत्थ तत्थ यथारहं॥

तत्थ वेदनात्तिके पदत्थतो ताव “सुखाय वेदनाया”तिआदीसु सुख-सद्दो सुखवेदनासुखमूलसुखारम्भणसुखहेतुसुखपच्चयट्टानअव्याबज्झनिब्बानादीसु दिस्सति। अयं हि “सुखस्स च पहाना”तिआदीसु (दी० नि० १.२३२; ध० स० १६५; विभ० ५९४) सुखवेदनाय दिस्सति। “सुखो बुद्धानमुप्पादो”तिआदीसु (ध० प० १९४) सुखमूले। “यस्मा च खो, महालि, रूपं सुखं सुखानुपतितं सुखावक्कन्त”न्तिआदीसु (सं० नि० ३.६०) सुखारम्भणे। “सुखस्सेतं, भिक्खवे, अधिवचनं, यदिदं पुज्जानी”तिआदीसु (अ० नि० ७.६२; इतिवु० २२) सुखहेतुम्हि। “यावज्जिदं, भिक्खवे, न सुकरं अक्खानेन पापुणितुं, याव सुखा सग्गा (म० नि० ३.२५५)। न ते सुखं पजानन्ति, ये न पस्सन्ति नन्दन”न्ति (सं० नि० १.११) आदीसु सुखपच्चयट्टाने। “दिट्ठधम्मसुखविहारा एते धम्मा”तिआदीसु (म० नि० १.८२) अव्याबज्झे। “निब्बानं परमं सुख”न्तिआदीसु (ध० प० २०३-२०४; म० नि० २१५, २१७) निब्बाने। इध पनायं सुखवेदनायमेव दट्ठब्बो।

वेदना-सद्वो “विदिता वेदना उप्पज्जन्ती”तिआदीसु (म० नि० ३.२०८) वेदयितस्मिं येव वत्तति । दुक्ख-सद्वो दुक्खवेदनादुक्खवत्थुदुक्खारम्मणदुक्खपच्चयदुक्खपच्चयद्वानादीसु दिस्सति । अयं हि “दुक्खस्स च पहाणा”तिआदीसु (दी० नि० १.२३२; ध० स० १६५; वि० ५९४) दुक्खवेदनायं दिस्सति । “जातिपि दुक्खा”तिआदीसु (दी० नि० २.३८७; वि० १९०) दुक्खवत्थुस्मिं । “यस्मा च खो, महालि, रूपं दुक्खं दुक्खानुपतितं दुक्खावकन्त”न्तिआदीसु (सं० नि० ३.६०) दुक्खारम्मणे । “दुक्खो पापस्स उच्चयो”तिआदीसु (ध० प० ११७) दुक्खपच्चये । “यावज्जिदं, भिक्खवे, न सुकरं अक्खानेन पापुणिंतुं, याव दुक्खा निरया”तिआदीसु (म० नि० ३.२५०) दुक्खपच्चयद्वाने । इध पनायं दुक्खवेदनायमेव दट्ठब्बो ।

वचनत्थो पनेत्थ — सुखयति सत्तं, सुट्ठ वा खादति, खनति च कायचित्ताबाधन्ति **सुखा**, कायिकचेतसिकानं सुखसोमनस्सानमेतं अधिवचनं । दुक्खयतीति **दुक्खा**, कायिकचेतसिकानं दुक्खदोमनस्सानमेतं अधिवचनं । न दुक्खा न सुखाति **अदुक्खमसुखा**, उपेक्खायेतं अधिवचनं । म-कारो पदसन्धिकरो । एवं तीहि पदेहि पञ्चविधापि वेदना गहिता । सब्बापि आरम्मणरसं वेदियन्ति अनुभवन्तीति **वेदना** । यो पनायं तीसुपि पदेसु सम्पयुत्त-सद्वो, तस्सत्थो — समं पकारेहि युत्ताति **सम्पयुत्ता**, कतरेहि पकारेहीति? “अत्थि केचि धम्मा केहिचि धम्मेहि सहगता सहजाता संसट्ठा एकुप्पादा एकनिरोधा एकवत्थुका एकारम्मणा”ति (कथा० ४७३) एवं वुत्तेहि इमेहि एकुप्पादतादीहि चतूहि पकारेहि । उक्कट्टनिद्वेसो चेस । आरुप्पे हि विनापि एकवत्थुकाभावं सम्पयोगो लब्धतीति । सेसं वुत्तत्थमेव । अयं तावेत्थ **पदत्थतो** विनिच्छयो ।

**तंसरूपाति** तस्स पदत्थस्स सरूपमत्तदस्सनतो । तत्थ सुखसहगतं कायविज्जाणं, सोमनस्ससहगतानि अट्टारस कामावचरचित्तानि, पठमदुतियततियचतुत्थज्झानिकानि चतुचत्तालीस रूपावचरलोकुत्तरचित्तानि चाति तेसट्ठि चित्तानि सुखाय वेदनाय सम्पयुत्ता नाम । तथा दुक्खसहगतं कायविज्जाणं, द्वे दोमनस्ससहगतानि चाति तीणि चित्तानि दुक्खाय वेदनाय सम्पयुत्ता नाम । सेसानि उपेक्खासहगतानि पञ्चपञ्जास चित्तानि अदुक्खमसुखाय वेदनाय सम्पयुत्ता नाम । यथा च चित्तानं सुखादिसम्पयोगो, एवं तंचित्तसम्पयुत्तानं चेतसिकानम्पि । न केवलञ्च एत्थेव, इतो परेसुपि तिकदुकेसु चित्तवसेनेव तंसम्पयुत्तचेतसिकानम्पि सङ्गहो वेदितब्बो । यत्थ पन विसेसो होति, तत्थ वक्खाम । इध पन चेतसिकेसु सप्पीतिकानि वेदनावज्जितानि छ चेतसिकानि एव पञ्चहिपि वेदनाहि सम्पयुत्तानि, इतरानि पन कायिकसुखदुक्खवज्जिताहि तीहेव । तेसु च पीतित्वज्जिता पञ्च यथायोगिका चेव मोहो अहिरिकं अनोत्तपं उद्धच्चं थिनं मिद्धज्जाति इमे एकादस यथायोगं तीहिपि । तत्थापि वितक्कविचारा महग्गतलोकुत्तरभूताय सुखाय एव, पीति पन सब्बत्थ सुखाय एव, दोसइस्सामच्छेरकुक्कुच्चीनि दुक्खाय एव, विचिकिच्छा उपेक्खाय एव, सेसानि अट्ठवीसतिसोमनस्सुपेक्खाहि एव वेदनाहि सम्पयुत्तानि, तत्थापि करुणामुदिता महग्गतभूताय सुखाय एवाति अयं विसेसो । सेसं चित्तसम्पयोगसदिसं । अयं सरूपतो विनिच्छयो ।

**नवत्तब्बविभागतो**ति इमस्मिं तिके सब्बा वेदना सब्बं रूपं निब्बानं सम्मुतियोति इमे धम्मा “सुखाय वेदनाय सम्पयुत्ता”ति वा “दुक्खाय वेदनाय सम्पयुत्ता”ति वा “अदुक्खमसुखाय वेदनाय सम्पयुत्ता”ति वा न वत्तब्बा । न हि वेदना वेदनाय सम्पयुत्ता होति रूपादयो वा, तस्मा इमे इमस्मिं तिके न लब्धन्ति । अयञ्च सप्पदेसत्तिको होति । यथा चेत्थ, एवं इतो परेसुपि तिकदुकेसु नवत्तब्बयोजना । यं यस्मिञ्च न वुत्तं अत्थि, तस्स सप्पदेसता वेदितब्बा । इतो परं पन यत्थ असङ्गहिता धम्मा होन्ति, तत्थ तेसं विभागं दस्सेत्वा “इमे नवत्तब्बा”ति एतकमेव वक्खाम, तेनस्स सप्पदेसतापि जातब्बा । यत्थ पन असङ्गहिता नत्थि, तं निप्पदेसन्ति वक्खाम । तेन तत्थ नवत्तब्बाभावोपि विज्जातब्बो । सब्बत्थ पन मातिकं अनुद्धरित्वाव पदत्थं, तंसरूपविभागञ्च वक्खाम । अयं नवत्तब्बविभागतो विनिच्छयो ।

वेदनात्तिकं निट्ठितं ।

विपाकत्तिके अज्जमज्जविसिट्ठानं कुसलाकुसलानं पाकाति **विपाका**, विपक्कभावमापन्नानं अरूपधम्मानमेतं अधिवचनं । किञ्चापि अरूपधम्मा विय रूपधम्मापि कम्मसमुट्ठाना अत्थि, अनारम्मणत्ता पन ते कम्मसरिक्खका न होन्तीति सारम्मणा अरूपधम्माव कम्मसरिक्खत्ता विपाकाति वुत्ता बीजसरिक्खकं फलं विय । यथा हि सालिबीजतो निक्खन्तसीसमेव सालिफलन्ति वुच्चति, न अङ्कुरादीनि, तानि पन “सालिजातानि, सालिनिब्बतानि चा”ति वुच्चन्ति, एवं कम्मसदिसा अरूपधम्माव “विपाका”ति वुच्चन्ति, रूपधम्मा पन कम्मजा “उपादिन्ना”ति वुच्चन्ति । **विपाकधम्मधम्मा**ति विपाकसभावा धम्मा । यथा हि जातिजरासभावा सत्ता “जातिधम्मा जराधम्मा”ति वुच्चन्ति, एवं विपाकजनकट्टेन विपाकसभावा विपाकपकतिका धम्माति अत्थो । ततियपदं उभयसभावपटिक्खेपवसेन वुत्तं, अयं पदत्थो ।

तत्थ चतूसु भूमीसु छत्तिस विपाकचित्तानि विपाका नाम, तथा एकवीसति कुसलानि, द्वादस अकुसलानि चाति तैत्तिस विपाकधम्मधम्मा नाम, तीसु भूमीसु वीसति किरियचित्तानि, सब्बञ्च रूपं, निब्बानज्जाति इमे नेवविपाकनविपाकधम्मधम्मा नाम । चेतसिकेसु पन चुट्ठस अकुसला विपाकधम्मधम्मा एव, विरतियो सिया विपाका, सिया विपाकधम्मधम्मा, तदवसेसा पन सिया विपाका, सिया विपाकधम्मधम्मा, सिया नेवविपाकनविपाकधम्मधम्माति चित्तं विय तिविधा होन्तीति अयं विसेसो, सेसं चित्तसमं, इदञ्च निप्पदेसत्तिकन्ति वेदितब्बं ।

विपाकत्तिकं निट्ठितं ।

आरम्मणकरणवसेन तण्हादिट्ठीहि उपेतेन कम्मना आदिन्ना फलभावेन गहिताति उपादिन्ना, आरम्मणभावं उपगन्त्वा उपादानसम्बन्धेन उपादानानं

हिताति उपादानिया, उपादानस्स आरम्भणपच्चयभूतानमेतं अधिवचनं । उपादिन्ना च ते उपादानिया चाति **उपादिन्नुपादानिया**, सासवकम्मनिब्बत्तानं रूपारूपधम्मनमेतं अधिवचनं । इमिना नयेन सेसपदद्वयेपि पटिसेधसहितो अत्थो वेदितब्बो ।

तत्थ द्वित्तिसं लोकियविपाकचित्तानि, नव कम्मजकलापा च उपादिन्नुपादानिया नाम । अवसेसलोकियचित्तानि चैव अकम्मजरूपकलापा च अनुपादिन्नुपादानिया नाम । लोकुत्तरचित्तनिब्बानानि अनुपादिन्ननुपादानिया नाम । किञ्चापि खीणासवानं उपादानक्खन्धा “अम्हाकं मातुलत्थेरो”तिआदिना वदन्तानं परेसं उपादानस्स आरम्भणपच्चया होन्ति, मग्गफलनिब्बानानि पन दिवसं सन्तत्तअयोगुळो विय मक्खिक्खाहि तेजुस्सदत्ता उपादानेहि अनुपादिन्नानेव । असंकिलिद्धअसंकिलेसिकेसुपि एसेव नयो । चेतसिकेसु पन कुसला अनुपादिन्नुपादानिया एव, करुणामुदिता सिया अनुपादिन्नुपादानिया, सिया अनुपादिन्नुपादानिया विरतियो पन सिया अनुपादिन्नुपादानिया, सिया अनुपादिन्ननुपादानिया, सेसा चित्तं विय तिविधा होन्ति, इदञ्च निष्पदेसत्तिकन्ति वेदितब्बं । उपादिन्नुपादानियत्तिकं ।

संकिलेसेतीति संकिलेसो, विबाधति उपतापेतीति अत्थो । संकिलेसेन सम्पयुत्ता संकिलिद्धा, संकिलेससहगताति अत्थो । अत्तानं आरम्भणं कत्वा पवत्तनेन संकिलेसं अरहन्ति, संकिलेसे वा नियुत्ता तस्स आरम्भणभावं अनतिक्कमनतोति संकिलेसिका, संकिलेसस्स आरम्भणपच्चयभूतानमेतं अधिवचनं । संकिलिद्धा च ते संकिलेसिका चाति **संकिलिद्धसंकिलेसिका** । सेसपदद्वयं पुरिमत्तिके वुत्तनयेनेव वेदितब्बं ।

तत्थ द्वादस अकुसलचित्तुप्पादा संकिलिद्धसंकिलेसिका नाम । सेसलोकियचित्तानि चैव सब्बं रूपञ्च असंकिलिद्धसंकिलेसिका नाम । लोकुत्तरचित्तानि, निब्बानञ्च असंकिलिद्धअसंकिलेसिका नाम । चेतसिकेसु पन अकुसला संकिलिद्धसंकिलेसिकाव, करुणामुदिता असंकिलिद्धअसंकिलेसिकाव, सेसकुसलाब्याकता सिया संकिलिद्धसंकिलेसिका, सिया असंकिलिद्धसंकिलेसिका, सिया असंकिलिद्धअसंकिलेसिकाति तिधापि होन्ति, इदञ्च निष्पदेसत्तिकं । संकिलिद्धसंकिलेसिकत्तिकं ।

सम्पयोगवसेन वत्तमानेन सह वितक्केन सवितक्का, तथा सह विचारेण सविचारा, सवितक्का च ते सविचारा चाति **सवितक्कसविचारा** । उभयरहिता **अवितक्कअविचारा** । वितक्कविचारेसु विचारोव मत्ता पमाणमेतेसन्ति विचारमत्ता, विचारतो उत्तरिं वितक्केन सद्धिं सम्पयोगं न गच्छन्तीति अत्थो । अवितक्का च ते विचारमत्ता चाति **अवितक्कविचारमत्ता** ।

तत्थ द्विपञ्चविज्जाणवज्जितकामावचरचित्तानि चैव एकादस महगतलोकुत्तरपठमज्झानिकचित्तानि च तंसम्पयुत्तेसु वितक्कविचारे ठपेत्वा सेसा च सवितक्कसविचारा नाम । तेसु वितक्को एकादस दुतियज्झानिकमहगतलोकुत्तरानि च तंसम्पयुत्तेसु विचारं ठपेत्वा सेसा च अवितक्कविचारमत्ता नाम । दुतियज्झानिकेसु विचारो, सेसा पञ्चचत्तालीस महगतलोकुत्तरचित्तानि, द्विपञ्चविज्जाणानि, तंसम्पयुत्ता च सब्बञ्च रूपं, निब्बानञ्च अवितक्कअविचारा नाम । अपिच कुसलचेतसिका सवितक्कसविचाराव, वितक्को अवितक्कविचारमत्तोव, विचारो पन दुतियज्झानिकेसु सिया अवितक्कअविचारो, सवितक्कचित्तेसु सिया न वत्तब्बो, अवसेसा पन सब्बे चेतसिका धम्मा तिधापि होन्ति । इमस्मिं पन तिके वितक्कसहजातो विचारोव न वत्तब्बो । वितक्कत्तिकं ।

पीतिया सह एकुप्पादादिभावं गताति **पीतिसहगता**, पीतिसम्पयुत्ताति अत्थो । सेसपदद्वयेपि एसेव नयो । **उपेक्खा**ति चेत्य अदुक्खमसुखा वेदना वुत्ता । सा हि सुखदुक्खाकारप्पवर्त्ति उपेक्खति मज्झत्ताकारसण्ठितत्ता तेनाकारेण पवत्ततीति उपेक्खा । इति वेदनात्तिकतो पदद्वयमेव गहेत्वा निष्पीतिकसुखस्स सप्पीतिकसुखतो विसेसदस्सनवसेन अयं तिको वुत्तो ।

तत्थ पीति पञ्चविधा खुद्दिका खणिका ओक्कन्तिका उब्बेगा फरणाति । तत्थ **खुद्दिका** पीति सरीरे लोमहंसनमत्तमेव कातुं सक्कोति । **खणिका** पीति खणे खणे विज्जुप्पादसदिसा होति । **ओक्कन्तिका** पीति समुद्दतीरं वीचि विय कायं ओक्कमित्वा ओक्कमित्वा भिज्जति । **उब्बेगा** पीति बलवती होति कायं उद्भगं कत्वा आकासे लङ्घापनप्पमाणप्पत्ता । **फरणा** पीतिया पन उप्पन्नाय सकलसरीरं धमित्वा पूरितवत्थि विय, महता उदकोधेन पक्खन्दपब्बतकुच्छि विय च अनुपरिप्फुटं होति । तत्थ फरणा रूपावचरलोकुत्तराव, सेसा कामावचराव ।

सुखं पन कायिकं, चेतसिकञ्चेति दुविधं होति । सतिपि च नेसं कत्थचि अविप्पयोगे इट्टारम्भणपटिलाभतुट्ठि पीति, पटिलद्धरसानुभवनं सुखं । यत्थ पीति, तत्थ सुखं । यत्थ सुखं, तत्थ न नियमतो पीति । सङ्खारक्खन्धसङ्गहिता पीति, वेदनाक्खन्धसङ्गहितं सुखं । कन्तारखिन्नस्स वनन्तोदकदस्सनसवनेसु विय पीति, वनच्छायापवेसनउदकपरिभोगेसु विय सुखं । तस्मिं तस्मिं समये पाकटभावतो चेतं वुत्तन्ति वेदितब्बं ।

तत्थ सुखसहगता, उपेक्खासहगता च वेदनात्तिके वुत्ताव, सुखसहगतं पन कायविज्जाणं, महगतलोकुत्तरचतुत्थज्झानिकचित्ते च वज्जेत्वा सेसा पीतिसहगता नाम, तत्थ पीति न पीतिसहगता, सुखसहगताव होति, सुखं पन पीतिसहगतं नाम सिया न पीतिसुखसहगता । इमस्मिं तिके द्वे दोमनस्ससहगतचित्तुप्पादा, दुक्खसहगतं कायविज्जाणं, रूपं, निब्बानञ्च नवत्तब्बा । चेतसिकेसु पन पीति सुखसहगताव, विचिकिच्छा उपेक्खासहगताव, लोभदिट्ठिमाना, पञ्चवीसति कुसलाब्याकता च तिधापि होन्ति, चेतसिकसुखं सिया पीतिसहगतं, पठमदुतियततियज्झानिकेसु चतुत्थज्झानिकेसु सिया

नवत्तब्बं, कायिकं पन सुखं दुक्खं दोमनस्सं सब्बा च उपेक्खा दोसो इस्सा मच्छरियं कुक्कुच्चञ्च नवत्तब्बाव, सेसा सत्तरस धम्मा सिया तिधापि होन्ति नवत्तब्बापि। सेसं सुविज्जेय्यमेव। पीतित्तिकं।

**दस्सनेनाति** सोतापत्तिमग्गेन। सो हि पठमं निब्बानदस्सनतो “दस्सन”न्ति वुत्तो। गोत्रभु पन किञ्चापि पठमतरं पस्सति, यथा पन रज्जो सन्तिकं केनचिदेव करणीयेन आगतो पुरिसो दूरतोव रथिकाय चरन्तं हत्थिक्खन्धगतं राजानं दिस्वापि “दिट्ठो ते राजा”ति पुट्ठो दिस्वापि कातब्बकिच्चस्स अकतत्ता “न पस्सामी”ति वदति, एवमेव निब्बानं दिस्वा कत्तब्बस्स किलेसपण्हानस्स अभावा “दस्सन”न्ति न वुच्चति। तं हि जाणं मग्गस्स आवज्जनट्ठाने तिट्ठति। **भावनायाति** सेसमग्गतयेन। सेसमग्गतयं हि पठममग्गेन दिट्ठस्मियेव धम्मे भावनावसेन उपज्जति, अदिट्ठपुब्बं कञ्चि न पस्सति, तस्मा “भावना”ति वुच्चति। ततियपदं उभयपटिक्खेपवसेन वुत्तं।

तत्थ चत्तारो दिट्ठिगतसम्पयुत्तचित्तुप्पादा, विचिकिच्छासहगतो चाति पञ्च दस्सनेन पहातब्बाव, उद्धच्चसहगतो भावनाय एव पहातब्बो, अवसेसा छ अकुसलचित्तुप्पादा अपायहेतुभावेन पवत्तितो, अप्पवत्तितो च सिया दस्सनेनपहातब्बा, सिया भावनायपहातब्बा, अकुसलवज्जिता पन सब्बे चित्तुप्पादा, रूपं, निब्बानञ्च नेवदस्सनेनभावनायपहातब्बा। चेतसिकेसु पन दिट्ठि विचिकिच्छा इस्सा मच्छरियं कुक्कुच्चं दस्सनेनपहातब्बाव, सेसा अकुसला सिया दस्सनेनपहातब्बा, सिया भावनायपहातब्बाति तिजातिका तेरसविधा होन्ति, वुत्तावसेसा नेवदस्सनेनभावनायपहातब्बाव। यं पन “सोतापत्तिमग्गजाणेन अभिसङ्खारविज्जाणस्स निरोधेन सत्त भवे ठपेत्वा अनमतग्गे संसारे ये उपज्जेय्युं नामञ्च रूपञ्च, एत्थेते निरुज्झन्ती”तिआदिना (चूळनि० अजितमाणवपुच्छनिहेस ६) नयेन कुसलाब्बाकतानम्पि पहातं अनुज्जातं, तं तेसं मग्गानं अभावितत्ता ये उपज्जेय्युं, ते उपनिस्सयपच्चयानं किलेसानं पहीनत्ता पहीनाति इमं परियायं सन्धाय वुत्तं, इदञ्च निष्पदेसत्तिकं। दस्सनेनपहातब्बत्तिकं।

दस्सनेन पहातब्बो हेतु एतेसन्ति **दस्सनेनपहातब्बहेतुका**। दुतियपदेपि एसेव नयो। ततियपदे पन नेवदस्सनेनभावनायपहातब्बो हेतु एतेसन्ति एवमत्थं अग्गहेत्वा नेवदस्सनेनभावनाय पहातब्बो हेतु एतेसं अत्थीति एवमत्थो गहेतब्बो। इतरथा हि अहेतुकानं अग्गहणं भवेय्य। हेतु एव हि तेसं नत्थि, यो दस्सनेनभावनाहि पहातब्बो सिया। सहेतुकेसुपि हेतुवज्जानं पहातं आपज्जति, न हेतून्। हेतुयेव हि एतेसं नेवदस्सनेनभावनायपहातब्बोति वुत्तो, न ते धम्मा। उभयम्पि चेतं अनधिपेत्तं, तस्मा वुत्तनयेन अत्थो गहेतब्बो। इतो परं सब्बो विनिच्छयो अनन्तरत्तिकसदिसोव। केवलं चेतसिकेसु विचिकिच्छुद्धच्चसम्पयुत्तो मोहो दस्सनेनभावनाहि पहातब्बहेतुकेसु न पविसति सहजातस्स अज्जस्स हेतुनो अभावा, नेवदस्सनेनभावनायपहातब्बहेतुकेसु पन पविसति। लोभदोसमूलचित्तेसु पन हेतूसु मोहो लोभेन चेव दोसेन च सहेतुको, लोभदोसा च मोहेनेवाति इमे पहातब्बहेतुकपदे पविट्ठाति अयं विसेसो, सेसं तादिसमेवाति। दस्सनेनपहातब्बहेतुकत्तिकं।

कम्मकिलेसेहि आचीयतीति आचयो, पटिसन्धिचुतिगतिपवत्तिसङ्गातानं उपादिन्नक्खन्धानमेतं अधिवचनं। तस्स कारणं हुत्वा निष्पादनभावेन तं आचयं गच्छन्ति, यस्स वा पवत्तन्ति, तं पुग्गलं यथावुत्तमेव आचयं गमेन्तीति **आचयगामिनो**। ततो एव आचयसङ्गाता चया अपेतत्ता निब्बानं अपेतं चयाति अपचयो, तं आरम्भणं कत्वा पवत्तनतो अपचयं गच्छन्तीति **अपचयगामिनो**। अपिच पाकारं इड्ढकवड्ढकी विय पवत्तं आचिनन्ता गच्छन्तीति **आचयगामिनो**। तेनेव वड्ढकिना चितं चितं विद्धंसयमानो पुरिसो विय तदेव पवत्तं अपचिनन्ता गच्छन्तीति **अपचयगामिनो**। ततियपदं उभयपटिक्खेपेन वुत्तं।

तत्थ लोकियकुसलाकुसलानि आचयगामिनो नाम, चत्तारि मग्गानि अपचयगामिनो नाम, सब्बानि विपाकफलकिरियानि, रूपं, निब्बानञ्च नेवआचयगामिनो न अपचयगामिनो नाम। चेतसिकेसु पन अकुसला आचयगामिनो एव, करुणा मुदिता सिया आचयगामिनो, सिया नेवाचयगामिनो न अपचयगामिनो नाम, सेसा तिधापि होन्ति, इदञ्च निष्पदेसत्तिकं। आचयगामित्तिकं।

तीसु सिक्खासु जाता, सत्तन्तं वा सेखानं एतेतिपि **सेखा**, अपरियोसितसिक्खत्ता सयमेव सिक्खन्तीतिपि **सेखा**। उपरि सिक्खितब्बाभावतो न सेखाति असेखा, वुद्धिप्पत्ता वा सेखातिपि **असेखा**। ततियपदं उभयपटिक्खेपेन वुत्तं।

तत्थ चत्तारि लोकुत्तरकुसलानि, हेट्टिमानि च तीणि सामञ्जफलानीति सत्त सेखा नाम, अरहत्तफलं असेखा नाम, लोकियचित्तानि, रूपं, निब्बानञ्च नेवसेखा नासेखा नाम। चेतसिकेसु पन अकुसला च अप्पमज्जा च नेवसेखा नासेखा एव, सेसा तिधापि होन्ति, इदञ्च निष्पदेसत्तिकं। सेखत्तिकं।

समन्ततो खण्डितत्ता अप्पमत्तकं परित्तन्ति वुच्चति “परित्तं गोमयपिण्ड”न्ति (सं० नि० ३.९६) आदीसु विय। कामावचरधम्मा हि अप्पानुभावताय परित्ता वियाति **परित्ता**। किलेसविक्रम्भनसमत्थताय, महन्तविपुलफलताय, दीघसन्तानताय च महन्तभावं गता, महन्तेहि वा उळारच्छन्दवीरियचित्तपज्जेहि गता पटिपन्नातिपि **महग्गता**। पमाणकरा धम्मा रागादयो पमाणं नाम, आरम्भणतो वा सम्पयोगतो वा नत्थि एतेसं पमाणं, पमाणस्स च पटिपक्खाति **अप्पमाणा**।

तत्थ चतुपज्जास कामावचरचित्तानि, रूपञ्च परित्ता नाम, सत्तवीसति रूपारूपावचरचित्तानि महग्गता नाम, लोकुत्तरचित्तानि, निब्बानञ्च अप्पमाणा

नाम । चेतसिकेसु पन अकुसला परित्ता एव, अप्पमज्जा परित्तमहग्गता एव, विरतियो परित्तअप्पमाणा एव, सेसा तिधापि होन्ति, इदञ्च निष्पदेसत्तिकं । परित्तत्तिकं ।

परित्तं आरम्भणं एतेसन्ति **परित्तारम्भणा** । सेसपदद्वयेपि एसेव नयो । सयं परित्ता वा होन्तु महग्गता वा, परित्तादिधम्मे आरम्भ पवत्ता तदारम्भणाति वुच्चन्ति ।

तत्थ तेवीसति कामावचरविपाका, किरियामनोधातुअहेतुकजवनञ्च परित्तारम्भणाव, विज्जाणञ्चायतननेवसज्जानासज्जायतनकुसलविपाककिरियानि महग्गतारम्भणाव, अट्ट लोकोत्तरचित्तानि अप्पमाणाारम्भणाव, अकुसलचित्तानि च अट्ट जाणविष्ययुत्तजवनानि च सिया परित्तारम्भणा, सिया महग्गतारम्भणा, सिया नवत्तब्बाारम्भणताय न वत्तब्बा, न कदाचि अप्पमाणाारम्भणा, अट्ट जाणसम्पयुत्तकामावचरजवनानि, अभिज्जा, मनोद्वारावज्जनञ्चाति एकादस तिधापि होन्ति नवत्तब्बापि । तेसु च कुसलानि पञ्च अरहत्तमग्गफलवज्जितसब्बारम्भणानि । तत्थापि तंतंसेखानमेव यथासकं मग्गफलानि आरम्भणानि होन्ति, किरियानि छ सब्बथापि सब्बारम्भणानि, अभिज्जावज्जितरूपावचरानि चेव छ आकासानञ्चायतनआकिञ्चञ्चायतनचित्तानि च नियमेन पञ्चत्तारम्भणताय, रूपनिब्बानानञ्च अनारम्भणताय सब्बथा नवत्तब्बाति । चेतसिकेसु पन अकुसला अकुसलचित्तसदिसाव, विरतियो सिया परित्तारम्भणा, सिया अप्पमाणाारम्भणा, करुणामुदिता नवत्तब्बाव, सेसा तिधापि होन्ति सिया नवत्तब्बाति । सेसं सुविज्जेय्यमेव । परित्तारम्भणत्तिकं ।

**हीनाति** लामका, अकुसला धम्मा । हीनपणीतानं मज्झे भवाति **मज्झिमा**, अवसेसा तेभूमका रूपारूपधम्माव । उत्तमद्वेन, अतप्पकद्वेन च **पणीता**, लोकोत्तरचित्तनिब्बानानि । चेतसिकेसु पन अकुसला हीनाव, करुणामुदिता मज्झिमाव, सेसकुसलाब्याकता मज्झिमपणीताव, सेसा तिधापि होन्ति, इदञ्च निष्पदेसत्तिकं । सेसं सुविज्जेय्यमेव । हीनत्तिकं ।

“हितसुखावहा मे भविस्सन्ती”ति एवं आसीसितापि तथा अभावतो, असुभादीसुयेव सुभन्तिआदिविपरीतप्पवत्तितो च मिच्छा सभावाति मिच्छत्ता, विपाकदाने सति खन्धभेदानन्तरमेव विपाकदानतो नियता, मिच्छत्ता च ते नियता चाति **मिच्छत्तनियता** । वुत्तविपरीतेन अत्थेन सम्मा सभावाति सम्मत्ता, सम्मत्ता च ते नियता चाति **सम्मत्तनियता** । उभयथापि न नियताति **अनियता** ।

आनन्तरिकभावेन पवत्तियं सिया मिच्छत्तनियता, अज्जथा पवत्तियं सिया अनियता । अहेतुकअकिरियनत्थिकदिट्ठीसु हि अज्जतरा दिट्ठि यस्स नियता, तं बुद्धसतम्पि विबोधेतुं न सक्कोति । येन च अनन्तरे एव अत्तभावे फलदानतो आनन्तरिकेसु मातुघातकपितुघातकअरहन्तघातकसङ्घभेदकलोहितुप्पादकसङ्घातेसु पञ्चसु कम्मेसु एकम्पि कम्मं पटिघचित्तेन कतं होति, सो सिनेरुप्पमाणेपि सुवण्णथूपे कत्वा सकलचक्कवाळं पूरेत्वा निसिन्नसम्बुद्धप्पमुखं सङ्गं यावजीवं चतूहि पच्चयेहि उपट्ठहित्वापि तेन कुसलेन आनन्तरिकस्स विपाकं पटिबाहितुं न सक्कोति, आनन्तरिकेन पन अधिकेन आनन्तरिकं पटिबाहति, तस्मा नियतमिच्छादिट्ठि आनन्तरिका च मग्गफलानं, महग्गतानञ्च पटिबाहकताय अनन्तरमेव निरये विपाकदानतो मिच्छत्तनियता च जाता, चत्तारो पन मग्गा सम्मत्तनियता नाम, सेसचित्तरूपनिब्बानानि अनियता नाम । चेतसिकेसु पन मोहो अहिरिकं अनोत्तपं उद्धच्चं लोभो दिट्ठि दोसो थिनं मिद्धन्ति इमे नव सिया मिच्छत्तनियता, सिया अनियता, सेसअकुसला, करुणा, मुदिता च अनियता एव, सेसकुसलाब्याकता सिया सम्मत्तनियता, सिया अनियता, तिजातिका पन तिधापि होन्ति, इदञ्च निष्पदेसत्तिकन्ति । मिच्छत्तत्तिकं ।

निब्बानं मग्गाति, किलेसे वा मारेन्तो गच्छतीति मग्गो, अरियमग्गो, सो आरम्भणमेतेसन्ति **मग्गारम्भणा** । लोकियो अट्टङ्गिकोपि मग्गो पच्चयद्वेन एतेसं हेतूति **मग्गहेतुका**, मग्गसम्पयुत्ता धम्मा । मग्गे वा हेतूति मग्गहेतू, अलोभादयो । ते एतेसं हेतूति **मग्गहेतुका** । सम्मादिट्ठि सयं मग्गो चेव हेतु च, इति मग्गभूतो हेतु एतेसन्ति **मग्गहेतुका**, लोकोत्तराव । अभिभवित्वा पवत्तनद्वेन मग्गो अधिपति आरम्भणभूतो, सहजातो वा एतेसन्ति **मग्गाधिपतिनो**, तदुभयं ।

तत्थ रूपावचरचतुत्थज्झानकुसलकिरिया च अभिज्जाभूता, मनोद्वारावज्जनञ्च सिया मग्गारम्भणा, सिया नवत्तब्बा, अरियानं हि चेतोपरियअनागतंसजाणानि परेसज्जेव मग्गचित्तस्स जाननकाले मग्गारम्भणानि, पुब्बेनिवासजाणमनोद्वारावज्जनानि पन अत्तनो, परेसज्जापि तदज्जारम्भणकाले पन नवत्तब्बानि, चेतोपरियजाणस्स पन नियमेन परचित्तविसयत्ता तेन अत्तना अधिगतमग्गं अरिया आलम्बितुं न सक्कोन्ति, अनागतंसजाणेन पन अत्तनो अनागते उप्पज्जनकस्स उपरिमग्गस्स अविसयत्ता न सक्कोन्ति । अरिया हि यथासकं, हेट्ठिमज्ज मग्गफलं जानितुं सक्कोन्ति, न उपरिमं । तानि पन अभिज्जाजवनानि मग्गेन असहजातत्ता न मग्गहेतुकानि । मग्गं गरुंक्त्वा अप्पवत्तनतो न मग्गाधिपतीनि । न हि तानि किञ्चि आरम्भणं अधिपतिं करोन्ति, अन्तमसो लोकोत्तरमपि । कस्मा? अत्तनो महग्गतताय राजानं दिस्वा तस्स मातापितरो विय, मनोद्वारावज्जनं पन अत्तनो अहेतुकताय राजानं दिस्वा खुज्जचेटकादयो विय । चत्तारि मग्गट्टचित्तानि सब्बदा मग्गहेतुका एव, तानेव च वीर्मसावीरियानं अधिपतिभावेन पवत्तियं सिया मग्गाधिपतिनो, इतरेसं छन्दचित्तानं अधिपतिभावेन पवत्तियं सिया नवत्तब्बा, अट्ट जाणसम्पयुत्तकामावचरजवनानि सिया मग्गारम्भणा, सिया मग्गाधिपतिनो, सिया नवत्तब्बा । तानि हि अत्तना, परेहि च पटिविद्धमग्गपच्चवेक्खणकाले मग्गारम्भणा, अत्तनो मग्गं गरुंक्त्वा पच्चवेक्खणकाले मग्गाधिपतिनो च तथाअप्पवत्तियं नवत्तब्बा च होन्ति । अरिया हि परेसं मग्गफलानि पच्चवेक्खन्ता गरुं करोन्तापि अत्तनो मग्गफलानि विय गरुं न करोन्ति, अपि सम्मासम्बुद्धानं । तेसु सोतापन्नो सोतापन्नानमेव मग्गफलानि जानितुं सक्कोति, नाज्जेसं, सकदागामी पन सकदागामीनम्पि, न अनागामिअरहन्तानं,



अनागामी पन अनागामीनम्पि, न अरहन्तानं, अरहा पन सब्बेसम्पि मग्गफलानि जानाति, सोभनलोकियचित्तरूपनिब्बानानि नवत्तब्बानेव । चेतसिकेसु पन विरतियो लोकुत्तरकुसले मग्गसदिसाव, अज्जत्थ नवत्तब्बा, करुणा, मुदिता, अकुसला च नवत्तब्बा, सेसा तिधापि होन्ति नवत्तब्बा च । सेसं सुविज्जेय्यमेवाति । मग्गारम्मणत्तिकं ।

**उपपन्ना**ति एत्थ वत्तमानभूतापगतओकासकतभूमिलद्धवसेन उपपन्ना अनेकपभेदा होन्ति । तत्थ सब्बम्पि उप्पादजराभङ्गसमङ्गीसङ्घातं सङ्घतं **वत्तमानुपपन्नं** नाम, आरम्मणरसं अनुभवित्वा निरुद्धं अनुभूतापगतसङ्घातं कुसलाकुसलज्ज उप्पादादित्तयं अनुपत्त्वा निरुद्धं भूतापगतसङ्घातं, सेससङ्घतज्ज **भूतापगतुपपन्नं** नाम, “यानिस्स तानि पुब्बेतानि कम्मानी”ति एवमादिना नयेन वुत्तं कम्मं अतीतम्पि समानं अज्जं विपाकं पटिबाहित्वा अत्तनो विपाकस्सोकासं कत्वा ठितत्ता, तथाकतोकासज्ज विपाकं अनुपपन्नम्पि एकंसेन उप्पज्जनकतो **ओकासकतुपपन्नं** नाम, तासु तासु भूमीसु असमूहत्तं अकुसलं **भूमिलद्धुपपन्नं** नाम । एत्थ च विपस्सनाय आरम्मणभूता तेभूमका पच्चकखन्धा **भूमि** नाम, तेसु खन्धेसु उप्पत्तारहकिलेसजाता **भूमिलद्धं** नाम, तेहि किलेसेहि सा भूमि लद्धा होतीति एवमेतेसु उप्पन्नेसु इध वत्तमानुपपन्ना अधिप्पेता ।

तत्रायं वचनत्थो — पुब्बन्ततो उप्पादतो पट्टाय याव भङ्गा पन्ना गता पवत्ताति **उपपन्ना**, पच्चुपपन्नाति अत्थो । न उपपन्नाति **अनुपपन्ना** । परिनिद्धितकारणेकदेसत्ता अवस्सं उप्पज्जिस्सन्तीति **उप्पादिनो**, उभयेनापि अनागताव दस्सिता । अयं हि तिको द्विन्नं अद्धानं वसेन पूरेत्वा दस्सितो । लद्धोकासस्स हि कम्मस्स विपाको उप्पादी नाम । यदि पन आयूहितकुसलाकुसलं कम्मं सब्बं विपाकं ददेय्य, अस्स ओकासो न भवेय्य । तं पन दुविधं होति ध्रुवविपाकं, अद्भुवविपाकज्ज । तत्थ पञ्चानन्तरिकअट्टसमापत्तिचतुत्थमग्गादि **ध्रुवविपाकं** नाम । तं पन कम्मं खणप्पत्तम्पि अत्थि अप्पत्तम्पि । तत्थ खणप्पत्तं उप्पन्नं नाम, अप्पत्तं अनुपपन्नं नाम । तस्स दुविधस्स च विपाको दुविधो होति खणप्पत्तो च अप्पत्तो च । तत्थ खणप्पत्तो उप्पन्नो नाम, अप्पत्तो चित्तानन्तरे वा उप्पज्जतु, कप्पसतसहरस्सातिकमे वा ध्रुवपच्चयट्टेन उप्पादी नाम होति । मेत्तेय्यस्स बोधिसत्तस्स मग्गो अनुपपन्नो नाम होति, फलं उप्पादी नाम । तत्थ चतूसु भूमीसु विपाको, कम्मजरूपज्ज वत्तमानुपपन्ना नाम, उप्पज्जनारहा उप्पादिनो नाम, न पन वत्तब्बा “अनुपपन्ना”ति । कुसलाकुसलकिरिया, कम्मजरूपज्ज सिया उपपन्ना, सिया अनुपपन्ना, न पन वत्तब्बा “उप्पादिनो”ति । चेतसिकेसु पन अकुसला अकुसलचित्तसदिसाव, सेसा दुविधापि होन्ति, अतीता, पनेत्थ निब्बानज्ज नवत्तब्बा । सेसं सुविज्जेय्यमेवाति । उप्पन्नत्तिकं ।

अत्तनो सभावं, उप्पादादिकखणं वा पत्वा तं अतिक्कमित्वा इता गता पत्ताति **अतीता** । तदुभयम्पि न आगताति **अनागता** । तं तं कारणं पटिच्च उपपन्नाति **पच्चुपपन्ना**, सब्बे सङ्घता नामरूपधम्मा । न सङ्घतधम्मेसु तेकालिकभावं अप्पत्तो नाम अत्थि, सब्बेपि ते तिधा होन्ति । निब्बानं पनेत्थ नवत्तब्बन्ति । अतीतत्तिकं ।

अतीतं आरम्मणं एतेसन्ति **अतीतारम्मणा** । सेसपदद्वयेपि एसेव नयो ।

तत्थ कुसलविपाककिरियावसेन छब्बिधानि विज्जाणज्जायतननेवसज्जानासज्जायतनानि हेट्ठा अतीतसमापत्तिं आरब्ध पवत्तितो अतीतारम्मणानि, द्विपज्जविज्जाणमनोधातुयो पच्चुपपन्नारम्मणाव, सेसा एकादस कामावचरविपाका, अहेतुकहसनचित्तज्ज तिधापि होन्ति, सेसकामावचरकिरियकुसलाकुसला च अभिज्जाभूतरूपावचरचतुत्थज्ज्ञानकुसलकिरिया च तिधापि होन्ति नवत्तब्बा च । तेसु कामावचरानं अतीतादीसु छसु आरम्मणेसु पवत्तिविभागो हेट्ठा वुत्तोव । नवत्तब्बता पन तेसु जाणविषयुत्तजनकुसलानं पज्जत्तारम्मणवसेनेव, न निब्बानारम्मणवसेन, तेसुपि तिहेतुकजवनावज्जनानं मग्गफलरूपारूपज्ज्ञानानं, पुरेचारिकभावेनापि निब्बानचतुक्कज्ज्ञानविसयानज्ज पच्चवेक्खणभावेनापि नवत्तब्बता वेदितब्बा, अभिज्ज्ञानं पन इद्धिविधजाणस्स ताव कायवसेन चित्तं परिणामेत्वा कायसन्निस्सितं कत्वा दिस्समानेन कायेन गच्छन्तस्स अतीतं पादकज्ज्ञानचित्तं आरब्ध पवत्तनतो अतीतारम्मणं, “अनागतेसु रूपानि एवं होन्तू”ति अधिद्वहन्तस्स अनागतारम्मणं, कायं पन चित्तसन्निस्सितं कत्वा अदिस्समानेन कायेन गमनकाले, अज्जत्तं कुमारवण्णादीनं, बहिद्धापासादकूटागारादीनज्ज पच्चुपपन्नानं निम्मानकाले च पच्चुपपन्नारम्मणज्ज ताव होतीति एवं इद्धिविधस्स छब्बिधम्पि अज्जत्तिकं, बाहिरज्ज तेकालिकं आरम्मणं होतीति वेदितब्बं ।

दिब्बसोतस्स कुच्छिगतं अज्जत्तिकं, बाहिरज्ज पच्चुपपन्नं सद्दायतनमेवारम्मणं । चेतोपरियजाणस्स अतीते सत्तदिवसब्बन्तरे, अनागते सत्तदिवसब्बन्तरे च परेसज्जेव चित्तं अतीतज्ज अनागतज्जारम्मणं होति । सत्तदिवसातिक्कमे पनेतं परचित्तं जानितुं न सक्कोति । अतीतंसअनागतसजाणानं हि एस विसयो, न एतस्स । पच्चुपपन्नचित्तजाननकाले पनस्स पच्चुपपन्नमारम्मणं होति ।

पच्चुपपन्नज्ज नामेतं तिविधं खणपच्चुपपन्नं सन्ततिपच्चुपपन्नं अद्वापच्चुपपन्नज्जाति । तत्थ उप्पादद्वितीभङ्गप्पत्तं **खणपच्चुपपन्नं** नाम । सन्ततिपच्चुपपन्नं पन दुविधं रूपारूपवसेन । तत्थ आतपट्टाना आगन्त्वा गम्भं पविट्ठस्स याव अन्धकारभावो न विगच्छति, अन्तोगम्भे वा वसित्वा दिवा आतपट्टानं ओलोकेन्तस्स याव अक्खीनं फन्दनभावो न वूपसम्मति, अयं **रूपसन्तति** नाम । द्वे तयो जवनवारा **अरूपसन्तति** नाम, तदुभयं **सन्ततिपच्चुपपन्नं** वेदितब्बं । एकभवपरिच्छिन्नं **अद्वापच्चुपपन्नं** नाम । इमस्मिं पन चेतोपरियजाणविसये कतिपयजवनवारा अद्वापच्चुपपन्नं नाम । तत्थ खणपच्चुपपन्नं चित्तं चेतोपरियजाणस्स आरम्मणं न होति आवज्जनेन सद्धिं निरुज्जनतो । न हि आवज्जनजवनानं एत्थ भिन्नारम्मणता युत्ता । रूपसन्ततिपच्चुपपन्नं पन कतिपयजवनवारपरिच्छिन्नं अद्वापच्चुपपन्नं अस्स आरम्मणं होति । इद्धिमा हि परस्स चित्तं जानितुकामो आवज्जेति, तं

आवज्जितकखणे पच्चुप्पन्नचित्तमारम्भणं कत्वा तेनेव सह निरुज्झति । ततो तदेव निरुद्धं चित्तमालम्बित्वा चत्तारि, पञ्च वा जवनानि उप्पज्जन्ति, तेसं पच्छिमं इद्धिचित्तं, सेसानि कामावचरजवनानि । तेसञ्च एकारम्भणत्तेपि इद्धिचित्तमेव परस्स चित्तं जानाति, न इतरानि । यथा चक्खुद्वारवीथियं चक्खुविज्जाणमेव रूपं परस्सति, न इतरानि, तेसु च आवज्जनमेव निष्परियायतो पच्चुप्पन्नारम्भणं, इतरानि पन अद्वासन्ततिवसेन परियायतोति गहेतब्बं, एवमेतस्स अतीतानागतपच्चुप्पन्नं चित्तमेवारम्भणं होति, तञ्च खो परस्सेव, न अत्तनो ।

पुब्बेनिवासजाणं पन नामगोत्तकसिणपञ्जत्तादिअनुस्सरणे, निब्बानानुस्सरणे च नवत्तब्बारम्भणं, सङ्गतधम्मनानुस्सरणे अतीतारम्भणमेव । तस्स हि अतीतेसु सासवानासवेसु, अज्झत्तिकबाहिरेसु च धम्मेसु अनारम्भणं नाम नत्थि, बुद्धानं सब्बज्जुतज्जाणसमगतिकं होति । यथाकम्मूपगजाणस्स अज्झत्तिकं, बाहिरञ्च अतीतं कुसलाकुसलचेतनामत्तमेव । “चेतोपरियजाणस्स चित्तमेवारम्भणं होति, न तंसम्पयुत्तधम्मा”ति **अट्ठकथासु** वुत्तं, **पट्ठाने** पन “कुसला खन्धा इद्धिविधजाणस्स चेतोपरियजाणस्स पुब्बेनिवासानुस्सतिजाणस्स यथाकम्मूपगजाणस्स अनागतंसजाणस्स आरम्भणपच्चयेन पच्चयो”ति (पट्ठो १.१.४०४) वुत्तत्ता चेतोपरियजाणयथाकम्मूपगजाणानं चित्तसम्पयुत्तापि चेतनासम्पयुत्तापि चत्तारो खन्धा आरम्भणं होन्ति एवाति दट्ठब्बं ।

दिब्बचक्खुजाणस्स पन अज्झत्तिकं, बाहिरञ्च पच्चुप्पन्नं वण्णायतनमेवारम्भणं । अनागतंसजाणस्स छब्धिधम्मि अनागतमेव अज्झत्तञ्च बाहिरञ्चारम्भणं, इदम्पि पुब्बेनिवासजाणं विय अनागते सब्बज्जुतज्जाणसदिसन्ति । एवं अभिज्ज्ञानं अतीतानागतपच्चुप्पन्नेसु, नवत्तब्बेसु च अज्झत्तिकबाहिरेसु छसु आरम्भणेसु यथायोगं पवत्ति वेदितब्बा । सेसानि पन्नरस रूपावचरचित्तानि, आकासानज्जायतनआकिञ्चज्जायतनकुसलविपाककिरियानि, अट्ठ लोकुत्तरचित्तानि, रूपनिब्बानानि च नवत्तब्बानि । चेतसिकेसु पन अप्पमज्जा नवत्तब्बाव । सेसं सुविज्जेय्यमेव । अतीतारम्भणत्तिकं ।

“एवं पवत्तमाना मयं अत्ताति गहणं गमिस्सामा”ति इमिना विय अधिप्पायेन अत्तानं अधिकारं कत्वा पवत्ताति **अज्झत्ता** । अज्झत्त-सद्दो पनायं गोचरज्झत्ते नियकज्झत्ते अज्झत्तज्झत्ते विसयज्झत्तेति चतूसु अत्थेसु दिस्सति । “अज्झत्तरतो समाहितो”तिआदीसु (ध० प० ३६२) हि अयं गोचरज्झत्ते दिस्सति । “अज्झत्तं वा धम्मेसु धम्मनूपस्सी विहरती”तिआदीसु (दी० नि० २.३७३) नियकज्झत्ते । “छ अज्झत्तिकानि आयतनानी”तिआदीसु (म० नि० ३.३०४) अज्झत्तज्झत्ते । “अज्झत्तं सुज्जतं उपसम्पज्ज विहरती”तिआदीसु (म० नि० ३.१८७) विसयज्झत्ते, इस्सरियट्ठानेति अत्थो । फलसमापत्ति हि बुद्धानं इस्सरियट्ठानं नाम । इध पनायं नियकज्झत्ते वत्तति, तस्मा अत्तनो सन्ताने पवत्ता पाटिपुगलिका रूपारूपधम्मा इध अज्झत्ताति वेदितब्बा । ततो बहिभूता इन्द्रियबद्धा वा अनिन्द्रियबद्धा वा रूपारूपपञ्चत्तियो बहिद्वा नाम, ततियपदं तदुभयवसेन वुत्तं ।

तत्थ सब्बानि चित्तचेतसिकानि इन्द्रियबद्धरूपं तिधा होन्ति, अनिन्द्रियबद्धरूपं, निब्बानपञ्चत्तियो च बहिद्वाव । इमस्मिं हि तिके कुसलत्तिके अलम्भमाना पञ्चत्तियोपि लम्भन्ति ठपेत्वा आकिञ्चज्जायतनारम्भणं, तदेव इध नवत्तब्बं । तेनेव हि भगवता अनन्तरत्तिके “कसिणादिपञ्चत्तारम्भणानि कामरूपावचरादिचित्तानि बहिद्धारम्भणानि, आकिञ्चज्जायतनञ्च नवत्तब्ब”न्ति वुत्तं, इदञ्च निष्पदेसत्तिकं । अज्झत्तत्तिकं ।

यथावुत्ते अज्झत्तादिके आरम्भणं कत्वा पवत्तानं वसेन अयं तिको वुत्तो । तत्थ छब्धिधानि विज्जाणज्जायतननेवसज्जानासज्जायतनचित्तानि अज्झत्तारम्भणानेव, आकासानज्जायतनत्तयं, रूपावचरलोकुत्तरचित्तानि च बहिद्धारम्भणानेव, वोड्ढन्नवज्जिता अहेतुकमहाविपाका तिधापि होन्ति, अवसेसा पन आकिञ्चज्जायतनवज्जितानि आवज्जनजवनानि, अभिज्ज्ञा च सिया तिधापि होन्ति, आकिञ्चज्जायतनारम्भणस्स आवज्जनपरिकम्पपच्चवेक्खणादिभावप्पवत्तियं सिया नवत्तब्बाति । तेसं अज्झत्तादिआरम्भणता अनन्तरत्तिके, हेट्ठा च वुत्तनयानुसारेन जातब्बा, आकिञ्चज्जायतनत्तयं, पन रूपनिब्बानानि च नवत्तब्बाव । चेतसिकेसु पन अप्पमज्जाविरती बहिद्धारम्भणाव, सेसा तिधापि होन्ति नवत्तब्बा च । सेसं सुविज्जेय्यमेव । अज्झत्तारम्भणत्तिकं ।

दट्ठब्बभावसङ्घातेन सह निदस्सनेनाति सनिदस्सना, पटिहननभावसङ्घातेन सह पटिघेनाति सप्पटिघा, सनिदस्सना च ते सप्पटिघा चाति **सनिदस्सनसप्पटिघा**, रूपायतनमेव । नीलादिभेदमुपादाय पन बहुवचननिद्देशो । नत्थि एतेसं दट्ठब्बभावसङ्घातं निदस्सनन्ति अनिदस्सना, अनिदस्सना च ते वुत्तनयेन सप्पटिघा चाति **अनिदस्सनसप्पटिघा**, सेसानि ओळारिकरूपाणि । ततियपदं उभयपटिक्खेपेन वुत्तं, सुखुमरूपचित्तचेतसिकनिब्बानानि **अनिदस्सनअप्पटिघा** नाम, इदञ्च निष्पदेसत्तिकन्ति वेदितब्बं । सनिदस्सनत्तिकं ।

तिकमातिकत्थवण्णना निड्ढिता ।

**अभिधम्मदुकमातिकत्थवण्णना**

दुकमातिकाय पन हेट्ठा अनागतपदत्थवण्णनंयेव करिस्साम । हेतुगोच्छके ताव हेतू धम्माति एत्थ हेतुहेतु पच्चयहेतु उत्तमहेतु साधारणहेतूति चतुब्बिधा हेतू । तत्थ अलोभादयो छ धम्मा **हेतुहेतू** नाम, उपादारूपादीनं महाभूतादयो **पच्चयहेतू** नाम, विपाकुप्पत्तियं कुसलाकुसलं, इट्ठानिद्वारम्भणञ्च **उत्तमहेतू** नाम, सङ्घारादीनं अविज्जादयो **साधारणहेतू** नाम । इध पन हेतुहेतु अधिप्पेतो । **हेतू धम्माति** मूलट्ठेन हेतुसङ्घाता धम्मा, “हेतुधम्मा”तिपि पाठो, सोयेवत्थो ।

न हेतूति तेसज्जेव पटिक्खेपवचनं ।

तत्थ अलोभो अदोसो अमोहोति कुसलाब्बाकता तयो, लोभो दोसो मोहोति अकुसला तयो चाति इमे छ धम्मा हेतू नाम । इमे ठपेत्वा अवसेसा चेतसिका, सब्बानि च चित्तानि, रूपनिब्बानानि चाति इमे धम्मा न हेतू नाम, इदञ्च निष्पदेसदुक्कन्ति वेदितब्बं । हेतुदुक्कं पठमं ।

सम्पयोगतो पवत्तेन सह हेतुनाति **सहेतुका** । तथेव पवत्तो नत्थि एतेसं हेतूति **अहेतुका** ।

तत्थ अहेतुकचित्तवज्जितानि एकसत्तति चित्तानि सहेतुका नाम । तेसु द्वे मोहमूलानि मोहेनेव सहेतुकानि, अट्ठ लोभमूलानि लोभमोहेहि द्वीहि, द्वे दोसमूलानि दोसमोहेहि, द्वादस जाणविप्पयुत्तकुसलाब्बाकतानि अलोभादोसेहि, सेसानि सत्तचत्तालीस अलोभादीहि तीहिपि सहेतुकानीति, मोहमूलेसु पन मोहो, द्विपञ्चविज्जाणं, मनोधातु, सन्तीरणत्तयं, वोढुब्बनं, हसितुप्पादकानि अट्ठारस चित्तानि, रूपनिब्बानानि चाति इमे धम्मा अहेतुका नाम । चेतसिकेसु पन लोभदोसा, विचिकिच्छा च मोहेनेव सहेतुका, दिट्ठिमानो लोभमोहेहि द्वीहि, इस्सामच्छरियकुक्कुच्चानि दोसमोहेहि, मोहो पन सिया लोभेन, सिया दोसेनाति द्वीहि सहेतुकोपि मोहमूलेसु अहेतुकोपि, थिनमिद्धानि सिया लोभमोहेहि, सिया दोसमोहेहीति तीहिपि सहेतुकानि, अहिरिकानोत्तप्पउद्धच्चानि तथा च केवलमोहेन च, अमोहो पन अलोभादोसेहेव द्वीहि, अलोभो सिया अदोसामोहेहि, सिया अदोसेनाति द्वीहि, अदोसो सिया अलोभामोहेहि, सिया अलोभेनाति द्वीहि, सेसा पन द्वावीसति कुसलाब्बाकता सिया तीहि, सिया द्वीहिपि हेतूहि सहेतुका, छन्दो पन यथायोगं तीहि, पीतिदोसवज्जितेहि पञ्चहि सिया सहेतुकापि अहेतुकापि, सेसा एकादस तिजातिका छहि हेतूहि सहेतुकापि अहेतुकापि, वेदना चेत्य दोमनस्सभूता द्विहेतुकाव, सोमनस्सउपेक्खा यथायोगं दोसवज्जितेहि पञ्चहि सहेतुकापि अहेतुकापि, सुखदुक्खभूता अहेतुकाव, इदञ्च निष्पदेसदुक्कन्ति । दुतियं ।

एकुप्पादादिताय हेतुना सम्पयुत्ताति **हेतुसम्पयुत्ता** । हेतुना विप्पयुत्ताति **हेतुविप्पयुत्ता** । अयं हेतुसम्पयुत्तदुको अनन्तरे वुत्तसहेतुकदुकेन अत्थतो निन्नानाकरणो । सहेतुकदुको एव हि भगवता देसनाविलासेन, तथा बुद्ध्यनकपुगलानं वा अज्झासयवसेन हेतुसम्पयुत्तदुकभावेनापि वुत्तो । एवं उपरिपि समानत्थदुकानं वचने कारणं वेदितब्बं । ततियं ।

चतुत्थादयो पन यस्मा पठमदुक्कदुतियततियदुकेसु पठमपदेन योजेत्वा द्वे दुका, पठमदुके च पच्छिमपदं दुतियदुकेन योजेत्वा एकं दुक्कन्ति तयो दुका देसिता, तस्मा तेसं पदत्थो वुत्तनयोव ।

तत्थ च यथेव “हेतू चेव धम्मा सहेतुका च, सहेतुका चेव धम्मा न च हेतू”ति अयं दुको सम्भवति, तथा “हेतू चेव धम्मा अहेतुका च, अहेतुका चेव धम्मा न च हेतू”ति अयम्पि सम्भवति । इमिना नयेन हेतुसम्पयुत्तदुकेन योजनायपि एको लब्धति । यथा च “न हेतू खो पन धम्मा सहेतुकापि, अहेतुकापी”ति अयं लब्धति, तथा “हेतू खो पन धम्मा सहेतुकापि, अहेतुकापी”ति अयम्पि । यथा चेत्य सहेतुकदुके द्वे दुका, एवं हेतुसम्पयुत्तदुकेपि “न हेतू खो पन धम्मा हेतुसम्पयुत्तापि, हेतुविप्पयुत्तापी”ति च “हेतू खो पन धम्मा हेतुसम्पयुत्तापि, हेतुविप्पयुत्तापी”ति च द्वे दुका लब्धन्तीति अपरेपि पञ्च दुका हेतुगोच्छके योजेतुं सक्का । ते पन भगवता वुत्तानुसारेनेव सक्का जातुन्ति छसु एव सङ्गहिताति वेदितब्बा । तत्थ ये ताव एकस्मिं चित्ते द्वे तयो हेतू एकतो उप्पज्जन्ति, ते हेतू चेव अज्जोञ्जापेक्खाय सहेतुका च नाम । सहेतुकचित्तेसु पन हेतू ठपेत्वा सेसा चित्तचेतसिका धम्मा सहेतुका चेव न च हेतू नाम । इमस्मिं दुके सब्बे अहेतुकधम्मा न वत्तब्बा । चेतसिकेसु पन हेतुवज्जिता अकुसला चेव कुसलाब्बाकता च, छन्दो च सहेतुको चेव न हेतू एव, सेसा तिजातिका, तथा नवत्तब्बा च, मोहो पन हेतू चेव सहेतुको च नवत्तब्बो च । चतुत्थं ।

अनन्तरदुकोपि इमिना दुकेन सब्बथापि सदिसोवाति । पञ्चमं ।

सहेतुकचित्तेसु हेतुवज्जिता चित्तचेतसिका धम्मा **नहेतू सहेतू** नाम, अहेतुकचित्तरूपनिब्बानानि **नहेतू अहेतुका** नाम । इमस्मिं पन दुके छ हेतू न वत्तब्बा । सेसं सुविज्जेय्यमेवाति । छट्ठं ।

हेतुगोच्छकं निडितं ।

सत्तसु चूळन्तरदुकेसु अत्तनो निष्पादकेन सह पच्चयेनाति **सप्पच्चया**, चित्तचेतसिकरूपानि । नत्थि एतेसं उप्पादे वा ठितियं वा पच्चयो अहुत्वा भवनस्सेवाभावाति **अप्पच्चया**, निब्बानमेव । देसनाय पनेत्थ परमताय सोतपतितवसेन बहुवचननिद्देसो कतो । एवं सनिदस्सनादीसुपि । इदञ्च इतो परानि छ च निष्पदेसदुकानीति वेदितब्बानि । ततो परञ्च यत्थ “इमे न वत्तब्बा”ति न वक्खाम, तं निष्पदेसन्ति गहेतब्बं । सप्पच्चयदुक्कं ।

पच्चयेहि समागन्त्वा कताति **सङ्गता** । न सङ्गताति **असङ्गता** । इदञ्च सब्बथा सप्पच्चयदुक्सदिसमेव । सप्पच्चयसङ्गतउभयदुक्कं सब्बथा सदिसमेव । सङ्गतदुक्कं ।

रूपायतनं **सनिदस्सनं** नाम । सेसरूपचित्तचेतसिकनिब्बानानि **अनिदस्सना** नाम । सनिदस्सनदुक्कं ।

पसादविसयरूपानि द्वादस **सण्टिघा** नाम । सेसरूपचित्तचेतसिकनिब्बानानि **अण्टिघा** नाम । सण्टिघदुकं ।

अविनिम्भोगवसेन रूपं एतेसं अत्थीति **रूपिनो**, रूपनलक्खणं वा रूपं, तं एतेसं अत्थीति **रूपिनो**, भूतोपादायरूपमेव । न रूपिनो **अरूपिनो**, चित्तचेतसिकनिब्बानानि । रूपिदुकं ।

लोको वुच्चति लुज्जनपलुज्जनट्टेन वट्ठं, तस्मिं परियापन्नभावेन लोके नियुत्ताति **लोकिया**, पञ्चुपादानक्खन्धा । ततो लोकतो तत्थ अपरियापन्नभावेन उत्तिण्णाति **लोकुत्तरा**, अरियमग्गफलनिब्बानानि । चेतसिकेसु पनेत्थ यं वत्तब्बं, तं असेखत्तिके वुत्तनयेन वेदितब्बं । लोकियदुकं ।

**केनचि विज्जेय्या**ति चक्खुविज्जाणादीसु केनचि एकेन चक्खुविज्जाणेन वा सोतविज्जाणादिना वा विजानितब्बा । **केनचि न विज्जेय्या**ति तेनेव चक्खुविज्जाणेन वा सोतविज्जाणादिना वा न केनचि विजानितब्बानि । एवं हि सति द्विन्मि पदानं अत्थनानत्ततो दुको होति । **पदभाजनीयस्मिम्पि** “ये ते धम्मा चक्खुविज्जेय्या, न ते धम्मा सोतविज्जेय्या”ति (ध० स० ११०१) एतकं एकदुकन्ति अगगहेत्वा “ये ते धम्मा चक्खुविज्जेय्या, न ते धम्मा सोतविज्जेय्या, ये वा पन ते धम्मा सोतविज्जेय्या, न ते धम्मा चक्खुविज्जेय्या”ति (ध० स० ११०१) अयमेको दुकोति वेदितब्बो । तस्स पन रूपं चक्खुविज्जेय्यं, सद्दो न चक्खुविज्जेय्योति अयमत्थो । एवं सेसेसुपि दुकपरिच्छेदो जातब्बो । तत्थ रूपायतनं चक्खुना वा चक्खुविज्जाणेन वा विज्जेय्यं नाम । सेसरूपारूपधम्मा तेनेव चक्खुना वा चक्खुविज्जाणेन वा केनचि नविज्जेय्या । एवं सोतघानजिह्वाकायतब्बिज्जाणमूलिकासुपि चतूसु योजनासु विभागो यथानुरूपं जातब्बो । रूपादयो पन पञ्चविसया मनोधातुत्तयेन केनचि विज्जेय्या । सेसरूपारूपधम्मा तेनेव मनोधातुत्तयेन केनचि नविज्जेय्या । किञ्चापि सामञ्जसो मनोविज्जाणेन अविज्जेय्यस्स अभावतो पाळियं मनोविज्जाणविज्जेय्यवसेन दुको न वुत्तो, तथापि विसेसतो वत्तब्बोव । तथा हि छब्बिधापि कामावचरधम्मा कामावचरविपाकादिना मनोविज्जाणेन केनचि विज्जेय्या, रूपारूपावचरलोकुत्तरपञ्जत्तियो तेनेव केनचि नविज्जेय्या । तथा कामरूपारूपावचरपञ्जत्तियो अकुसलादिना केनचि विज्जेय्या, लोकुत्तरा तेनेव केनचि नविज्जेय्या । तथा निब्बानं लोकुत्तरेन केनचि विज्जेय्यं, सेसलोकियलोकुत्तरा तेनेव केनचि नविज्जेय्याति इमिना नयेन रूपारूपावचरादिभेदेन मनोविज्जाणेन केनचि विज्जेय्याविज्जेय्यधम्मा यथायोगं योजेतब्बा । एवं सब्बे धम्मा केनचि विज्जेय्या, केनचि न विज्जेय्या नाम । इमस्मिञ्च दुके पञ्जत्तियोपि लब्धन्तीति वेदितब्बाति । केनचिविज्जेय्यदुकं ।

चूळन्तरदुका निड्ढिता ।

आसवगोच्छके आसमन्ततो सवन्तीति **आसवा**, चक्खुतोपि...पे०... मनतोपि सवन्ति, पवत्तन्तीति वुत्तं होति । धम्मतो यावगोत्रभुं, ओकासतो यावभवग्गा सवन्तीति वा **आसवा**, एते धम्मे, एतञ्च ओकासं अन्तोकरित्वा पवत्तन्तीति अत्थो । अन्तोकरणत्थो हि अयं **आ**-कारो । चिरपारिवासियट्ठेन मदिरादिआसवा वियातिपि **आसवा** । यदि च चिरपारिवासियट्ठेन आसवा, एते एव भवितुं अरहन्ति । अनादिता आयतं वा संसारदुक्खं सवन्ति पसवन्तीतिपि **आसवा** । ततो अज्जे **नो आसवा** नाम ।

तत्थ कामासवो भवासवो दिट्ठासवो अविज्जासवोति इमे चत्तारो आसवा नाम । तत्थ अट्ठसु लोभसहगतचित्तेसु उप्पन्नो सब्बोपि लोभो **कामासवो** नाम । **अट्ठसालिनियं** पन “पञ्चकामगुणिको रागो कामासवो”ति (ध० स० अट्ठ० ११०२) च, “दिट्ठिसहजातो रागो कामासवो न होति, दिट्ठिरागो नाम होती”ति (ध० स० अट्ठ० ११०५) च, “यो ब्रह्मानं विमानकप्परुक्खाभरणेसु छन्दरागो उप्पज्जति, सो कामासवो न होति पञ्चकामगुणिकस्स रागस्स इधेव पहीनत्ता”ति च वुत्तं । **पाळियं** पन “कामासवो अट्ठसु लोभसहगतेसु चित्तुपादेसु उप्पज्जती”ति (ध० स० १४६५) च, “कामासवं पटिच्च दिट्ठासवो अविज्जासवो”ति (पट्ठा० ३.३.१) च वुत्तत्ता भवासवं ठपेत्वा अवसेसो सब्बोपि लोभो कामासवोति पज्जायति दिट्ठिसम्प्युत्तरागस्स, ब्रह्मानं वत्थाभरणादीसु रागस्स च भवासवत्ताभावा । दिट्ठिविष्युत्तरागो एव हि रूपारूपभवपत्थनावसेन पवत्तियं भवासवो होति “रूपधातुया अरूपधातुया एत्थ भवरागानुसयो अनुसेती”ति आदिवचनतो (यम० २. अनुसययमक. २), न च कामासवभवासवविनिमुत्तो लोभो अत्थि । यदि सिया, “लोभो सिया आसवो, सिया नो आसवो”ति पाळियं वत्तब्बो भवेय्य, “दिट्ठिविष्युत्तलोभेन सम्प्युत्तो अविज्जासवो सिया आसवसम्प्युत्तो, सिया आसवविष्युत्तो”ति च वत्तब्बो सिया । **पदभाजनीये** च कामासवनिद्वेसे आगतस्स “कामेसु कामच्छन्दो”ति (ध० स० ११०३) इमस्स पदस्स **अट्ठसालिनियं** “पञ्चकामगुणेसु कामच्छन्दो”ति (ध० स० अ० ११०३) अत्थो वुत्तो, तस्स पन पदस्स वत्थुकामेसु किलेसकामोतिपि अत्थयोजना सक्का कातुं तेभुमकस्स धम्मस्स वत्थुकामत्ता, तत्थ सब्बत्थ रागस्स च किलेसकामत्ता । वुत्तं हेतं धम्मसेनापतिना **महानिद्वेसे** —

“कतमे वत्थुकामा? मनापिका रूपा...पे०... सब्बेपि कामावचरा धम्मा, सब्बेपि रूपावचरा धम्मा, सब्बेपि अरूपावचरा धम्मा...पे०... इमे वुच्चन्ति वत्थुकामा ।

“कतमे किलेसकामा? छन्दो कामो रागो कामो...पे०... यो कामेसु कामच्छन्दो कामरागो कामनन्दी कामतण्हा कामस्नेहो कामपरिळाहो काममुच्छा कामज्झोसानं कामोघो कामयोगो कामुपादानं कामच्छन्दनीवरणं...पे०... इमे वुच्चन्ति किलेसकामा”ति (महानि० १) ।

अपिचेत्थ “कामोघो कामयोगो”ति आदिना किलेसकामस्स कामोघादिभावं वदता धम्मसेनापतिना वत्थुकामत्तविसयस्स रागस्स आसवादिभावो

अनुज्जातो, न पञ्चकआमगुणिकस्सेव रागस्स । न च ओघासवेसु कोचि विसेसो अत्थि । **अट्टसालिनीयम्पि** हि उपादानगोच्छकस्स **पदभाजनीये** “कामेसु कामच्छन्दो”ति (ध० स० १२२०) इमस्स “वत्थुकामेसु कामच्छन्दो”ति (ध० स० अ० १२२०) अयमेवत्थो वुत्तो । ततो अज्जेसु हेतुगन्थकिलेसगोच्छकेसु लोभस्सेव अनवसेसपरियादानं वुत्तं, न इतरगोच्छकेसु । तेसु च लोभस्स पाळिअनुसारतो ओलोकियमाने किलेसकाममत्तको । अनवसेसलोभपरियादानं पञ्जायति । वीमंसित्वा गहेतब्बं ।

चतूसु पन दिट्ठिगतविषयुत्तचित्तेसु उप्पन्नो रूपारूपभवेसु छन्दरागभावेन, कामज्झोसाननिकन्तिभावेन च पवत्तो लोभो **भवासवो** नाम । **अट्टसालिनीयं** पन “सस्सतदिट्ठिसहजातो रागो भवासवो”ति (ध० स० अट्ठ० ११०२) वुत्तं । **पाळियं** पन “भवासवो चतूसु दिट्ठिगतविषयुत्तलोभसहगतेसू”ति (ध० स० १४६५) नियमितत्ता न सक्का गहेतुं, अधिप्पायो पन गवेसितब्बो । द्वासट्ठिपभेदा सब्बापि दिट्ठि **दिट्ठासवो** नाम । अट्टवत्थुको सब्बोपि मोहो **अविज्जासवो** नाम । तेसु दिट्ठासवो पठमेन मग्गेन पहीयति, कामासवो चतूहिपीति वत्तुं युत्तं, “ततियेना”ति पन वुत्तं । भवासवो, अविज्जासवो च चतुत्थेन पहीयति । इमेसञ्च कामासवभवासवानं लोभसभावत्ता सभावतो तयो धम्मा विभागतो चत्तारो आसवा नाम जाता । इमे ठपेत्वा सेसा लोकियलोकुत्तरा सब्बे धम्मा नो आसवा नाम । आसवदुकं पठमं ।

अत्तानं आरम्भणं कत्वा पवत्तेहि सह आसवेहीति **सासवा**, सब्बे लोकियधम्मा । एवं पवत्तमाना नत्थि एतेसं आसवाति **अनासवा**, नव लोकुत्तरधम्माव । चेतसिका पनेत्थ लोकियदुके वुत्तसदिसाव । सासवदुकं दुतियं ।

ततियादीनं चतुन्नं दुकानं पदत्थो वुत्तनयोव । सेसमेत्थ हेतुगोच्छके वुत्तनयेन वेदितब्बं । अयं पन विसेसो — यथा तत्थ “न हेतू खो पन धम्मा सहेतुकापि, अहेतुकापी”ति अयं ओसानदुको पठमदुके दुतियपदं दुतियदुकेन योजेत्वा वुत्तो, एवमिध “नो आसवा खो पन धम्मा सासवापि, अनासवापी”ति न वुत्तो । अयञ्च तत्थ तत्थ वुत्तनयेन इह सङ्गहितोति वेदितब्बो । यथा चेत्थ, एवं सज्जोजनगोच्छकादीसुपि यथानुरूपं जातब्बं ।

तत्थ द्वादस अकुसलचित्तुप्पादा **आसवसम्पयुत्ता** नाम । दोसमोहमूलचित्तेसु मोहो, कुसलाब्याकतचित्तरूपनिब्बानानि च **आसवविषयुत्ता** नाम । चेतसिकेसु पन मोहं ठपेत्वा सेसा अकुसला आसवसम्पयुत्ताव, मोहो पन तिजातिको च द्विधापि होति, सेसा आसवविषयुत्ता एवाति । ततियं ।

चत्तारो आसवा **आसवा चेव सासवा च** नाम । तदवसेसा लोकियधम्मा **सासवा चेव नो च आसवा** नाम । इध पन लोकुत्तरा न वत्तब्बा । चेतसिकेसु पन आसवाति वुत्तेहि सेसा अकुसला, करुणामुदिता च सासवा चेव नो च आसवा एव, सेसा तथा च न वत्तब्बा च । चतुत्थं ।

ये पन लोभमूलेसु लोभमोहा, लोभदिट्ठिमोहो चाति द्वे तयो एकतो कत्वा उप्पज्जन्ति, ते **आसवा चेव आसवसम्पयुत्ता च** नाम । द्वादस अकुसलचित्तानि चेव आसववज्जिता तंसम्पयुत्ता च **आसवसम्पयुत्ता चेव नो च आसवा** नाम । इध पन आसवविषयुत्ता न वत्तब्बा । चेतसिकेसु पन आसववज्जिता अकुसला आसवसम्पयुत्ता चेव नो च आसवा एव, मोहो सिया आसवो चेव आसवसम्पयुत्तो च, सिया न वत्तब्बो, तिजातिका सिया आसवसम्पयुत्ता चेव नो च आसवा, सिया न वत्तब्बा, कुसलाब्याकता न वत्तब्बाव । सेसं सुविज्जेय्यमेव । पञ्चमं ।

लोकुत्तरवज्जिता **आसवविषयुत्ता सासवा** नाम । लोकुत्तरा **आसवविषयुत्ता अनासवा** नाम । इध पन आसवसम्पयुत्ता न वत्तब्बाव । चेतसिकेसु पन करुणामुदिता आसवविषयुत्ता सासवा एव, मोहो तथा च न वत्तब्बो च, सेसकुसलाब्याकता द्विधापि होन्ति, तिजातिका द्विधापि न वत्तब्बाव, मोहवज्जिता पन अकुसला न वत्तब्बाव । छट्ठं ।

आसवगोच्छकं निट्ठितं ।

संयोजनगोच्छके यस्स संविज्जन्ति, तं पुगलं वट्ठस्मिं संयोजेन्ति बन्धन्तीति **संयोजना** । ततो अज्जे **नो संयोजना** ।

तत्थ कामरागसंयोजनं भवरागपटिघमानदिट्ठिविचिकिच्छासीलब्बतपरामासइस्सामच्छरियअविज्जासंयोजनन्ति इमे दस धम्मा संयोजना नाम । तेसु कामभवदिट्ठिअविज्जासंयोजनानि आसवगोच्छके वुत्तनयानेव । “अनत्थं मे अचरि, चरति, चरिस्सति, पियस्स मे अनत्थं अचरि, चरति, चरिस्सति, अप्पियस्स मे अत्थं अचरि, चरति, चरिस्सती”ति (ध० स० १०६६) एवं वुत्तेहि नवहि आकारेहि सत्तेसु, अट्ठानकोपवसेन सङ्घारेसु च उप्पज्जमानो सब्बोपि दोसो पटिघसंयोजनं नाम ।

“सेय्योहमस्मि, सदिसोहमस्मि, हीनोहमस्मी”ति एवं तीहि आकारेहि पवत्तो सब्बो मानो मानसंयोजनं नाम । तत्थ सेय्यस्सेव सतो पुगलस्स “सेय्योहमस्मि, सदिसो, हीनो”ति च तिधा मानो उप्पज्जति, तथा सदिसहीनानम्पि । तत्थ सेय्यस्स सेय्यमानोव याथावमानो । तथा सदिसस्स सदिसमानो, हीनस्स हीनमानो च । तिण्णम्पि इतरे द्वे द्वे माना अयाथावमानाति जातब्बा ।

सत्थुधम्मसङ्घसिक्खासु, पुब्बन्तापरन्ततदुभयपटिच्चसमुप्पन्नेसु च कङ्कतावसेन पवत्ता सब्बापि विचिकिच्छा विचिकिच्छासंयोजनं नाम ।

गोसीलगोवतादीहि सुद्धीति गहणाकारप्पवत्ता दिट्ठि एव सीलब्बतपरामाससंयोजनं नाम ।

तदवसेसा दिट्ठि दिट्ठिसंयोजनन्ति गहेतब्बं ।

परलाभसक्कारगरुकारमाननवन्दनपूजनादीसु असहनाकारेण पवत्ता इस्सा इस्सासंयोजनं नाम । आवासमच्छरियं कुललाभवणधम्ममच्छरियन्ति पञ्चविधं मच्छरियं मच्छरियसंयोजनं नाम । सकलारामेपि हि परिवेणोवरकादीसु वा वसन्तो तत्थ अज्जस्स वत्तसम्पन्नस्स पेसलस्स भिक्खुनो आगमनं न इच्छति, आगतस्सापि खिप्पं गमनञ्जेव इच्छति, इदं **आवासमच्छरियं** नाम । भण्डनकारकादीनं पन तत्थ वासं अनिच्छतो आवासमच्छरियं नाम न होति ।

अत्तनो पन उपट्ठाककुले वा जातिकुले वा अज्जस्स पेसलस्स उपसङ्कमनं अनिच्छतो **कुलमच्छरियं** होति, पापपुग्गलस्स अनिच्छतो पन न होति । सो हि तेसं पसादभेदाय पटिपज्जतीति ।

अत्तना लभनट्टाने चतुपच्चयं लभन्ते सीलवन्ते दिस्वा “मा लभन्तू”ति चिन्तेन्तस्स **लाभमच्छरियं** होति । यो पन सद्भादेय्यं विनिपातेति, पूतिभावम्पि गच्छन्तं अज्जस्स न देति, तं लभन्तं दिस्वा “सचे इमं अज्जो सीलवा लभेय्य, परिभोगं गच्छेय्या”ति चिन्तेन्तस्स मच्छरियं नाम नत्थि ।

वण्णो नाम अत्तना सदिसो सरीरवण्णोपि गुणवण्णोपि । तत्थ “रूपवा पासादिको”ति परस्स सरीरवण्णं, “सीलवा, धुतवा”ति आदिना गुणवण्णञ्च अत्तनो वण्णभणनट्टाने वुच्चमानं असहन्तस्स दुविधं **वण्णमच्छरियं** नाम होति, अपेसलं पन विपन्नं पसंसित्वा परिसासु उपत्थम्भेन्तं दिस्वा पापगरहिताय असहन्तस्स न होति ।

धम्मोति परियत्तियेव, न पटिवेधो अरियानं तत्थ मच्छरियाभावा । परियत्तिं पन गुळहगन्थं अज्जेसं अकथेतुकामस्स **धम्ममच्छरियं** नाम होति, धम्मनुगहेन पन लोलस्स, कालेन समणो, कालेन निगण्ठादि च हुत्वा विचरन्तस्स पवेणिआगतं तन्ति “सण्हसुखुमं धम्मन्तरं भिन्दित्वा आलुळिस्सति, अम्हाकं समयं भिन्दिस्सती”ति च न देन्तस्स, पुग्गलानुगहेन वा पकतिया सठस्स मायाविनो “सण्हसुखुमधम्मं उग्गण्हित्वा अज्जं ब्याकरित्वा नस्सिस्सती”ति न देन्तस्स च धम्ममच्छरियं न होति । यथा च भिक्खून्, एवं गहट्टानम्पि पञ्चविधं मच्छरियं यथानुरूपं जातब्बं । सङ्केपतो पन गहट्टपण्णजितानं अत्तसम्पत्तिनिगूहनलक्खणं मच्छरियं नामाति गहेतब्बं ।

इमेसु च संयोजनेसु दिट्ठिविचिकिच्छासीलब्बतपरामासइस्सामच्छरियानि सोतापत्तिमग्गेण पहीयन्ति, पटिघो अनागामिमग्गेण, कामरागो चतूहिपीति वत्तब्बं, “ततियेना”ति पन वुत्तं । मानभवरागअविज्जा अरहत्तमग्गेण । तत्थ च अयाथावमानो पठममग्गेण पहीयतीति दट्ठब्बो, इमेसं कामरागभवरागानं लोभसभावत्ता दिट्ठिसीलब्बतपरामासानं मिच्छादिट्ठिसभावत्ता सभावतो अट्टेव धम्मा दस संयोजना नाम जाता । इमे दस ठपेत्वा सेसा लोकियलोकुत्तरधम्मा नो संयोजना नाम । सेसं आसवदुकसदिसं । संयोजनदुकं पठमं ।

आरम्भणभावं उपगन्त्वा संयोजनसंवट्टनेन संयोजनानं हिताति **संयोजनिया**, सासवधम्मा एव । तथा नीवरणियाति एत्थापि । न संयोजनिया **असंयोजनिया**, अनासवा । सेसं सासवदुकसदिसमेव । दुतियं ।

ततियादयोपि आसवगोच्छके ततियादिसदिसा एव, विसेसमत्तमेवेत्थ वक्खाम । तत्थ हि द्वादसाकुसलचित्तानि **संयोजनसम्पयुत्ता** नाम, उद्धच्चसहगतो मोहो, सेसचित्तरूपनिब्बानानि **संयोजनविण्युत्ता** नाम । सेसं सममेव । ततियं ।

दस संयोजनानि **संयोजना चेव संयोजनिया च** नाम । तदवसेसलोकियधम्मा **संयोजनिया चेव नो च संयोजना** नाम । सेसं सुविज्जेय्यमेव । चतुत्थं ।

ये पन उद्धच्चविरहितेसु एकादससु अकुसलचित्तेसु विचिकिच्छामोहा दोसमोहा दोसइस्सामोहा दोसमच्छरियमोहा लोभमानमोहा लोभदिट्ठिमोहा चाति द्वे तयो एकतो उप्पज्जन्ति, ते **संयोजना चेव संयोजनसम्पयुत्ता च** नाम । द्वादसाकुसलचित्तानि चेव संयोजनवज्जिततंसम्पयुत्ता च **संयोजनसम्पयुत्ता चेव नो च संयोजना** नाम । सेसमिध अनन्तरदुकञ्च आसवगोच्छके पञ्चमछट्टदुकसदिसमेव । केवलं आसवपदट्टाने संयोजनपदमेव विसेसो । पञ्चमछट्टदुकानि ।

संयोजनगोच्छकं निट्ठितं ।

गन्थगोच्छके यस्स संविज्जन्ति, तं चुतिपटिसन्धिवसेन वट्ठस्मिं गन्थेन्ति घटेन्तीति **गन्था** । ततो अज्जे **नो गन्था** ।

तत्थ अभिज्झाकायगन्थो, ब्यापादो, सीलब्बतपरामासो, इदंसच्चाभिनिवेसो कायगन्थोति इमे चत्तारो धम्मा गन्था नाम । तत्थ अभिज्झा एव नामकायं

वुत्तनयेन गन्थेतीति **अभिज्झाकायगन्थो**। एवं सेसेसुपि। सब्बञ्जुभासितम्पि पटिक्खिपित्वा “सस्सतो लोको, इदमेव सच्चं, मोघमञ्ज”न्ति इमिना आकारेन अभिनिविसनतो सीलब्बतपरामासविरहिता सब्बापि दिट्ठि **इदं सच्चाभिनिवेसो** नाम। सेसा वुत्तत्थाव। इमेसु च पच्छिमा द्वे गन्था पठमेन मग्गेन पहीयन्ति, ब्यापादो ततियेन, अभिज्झा चतूहिपि। इमे च सभावतो तयो धम्मा चत्तारो गन्था नाम जाता। इमे पन ठपेत्वा सेसा सब्बे धम्मा नो गन्था नाम। गन्थदुकं पठमं।

आरम्मणकरणवसेन गन्थेहि गन्थितब्बाति **गन्थनिया**। न गन्थनिया **अगन्थनिया**। सेसं सासवदुकसदिसमेव। दुतियं।

मोहमूलवज्जितानि दस अकुसलचित्तानि, दिट्ठिविप्पयुत्तचित्तेसु लोभं, दोसमूलेसु च दोसं ठपेत्वा तंसम्पयुत्ता च **गन्थसम्पयुत्ता** नाम। यथावुत्तो लोभो, दोसो, मोहमूलानि, कुसलाब्याकतानि चित्तानि, रूपनिब्बानानि च **गन्थविप्पयुत्ता** नाम। चेतसिकेसु पन दिट्ठिमानइस्सामच्छरियकुक्कुच्चथिनमिद्धानि गन्थसम्पयुत्ता एव। दोसविचिकिच्छा, कुसलाब्याकता च गन्थविप्पयुत्ता एव, सेसा द्विधापि होन्ति। ततियं।

चत्तारो गन्था **गन्था चेव गन्थनिया च** नाम। तदवसेसा लोकिया **गन्थनिया चेव नो च गन्था** नाम। तथा चेतसिकेसु गन्थवज्जिता अकुसला, अप्पमञ्जा च, सेसा चेतसिका पन तथा च न वत्तब्बा च, इध पन लोकोत्तरा न वत्तब्बा। चतुर्थं।

दिट्ठि **गन्थाचेव गन्थसम्पयुत्ता च** नाम। लोभो तथा च न वत्तब्बो च, गन्थसम्पयुत्तेसु गन्थे ठपेत्वा सेसा **गन्थसम्पयुत्ता चेव नो च गन्था** नाम। इध पन गन्थविप्पयुत्ता न वत्तब्बा। चेतसिकेसु पन मानइस्सामच्छरियकुक्कुच्चथिनमिद्धानि गन्थसम्पयुत्ता चेव नो च गन्था एव, मोहाहिरिकानोत्तप्पउद्धच्चाणि तिजातिका च सिया, तथा नवत्तब्बा च, सेसा न वत्तब्बा। सेसं सुविज्जेय्यमेव। पञ्चमं।

लोकोत्तरवज्जिता **गन्थविप्पयुत्ता गन्थनिया** नाम। लोकोत्तरा पन **गन्थविप्पयुत्ता अगन्थनिया** नाम। इध पन गन्थसम्पयुत्ता न वत्तब्बा। चेतसिकेसु पन दोसो विचिकिच्छा करुणा मुदिता गन्थविप्पयुत्ता गन्थनिया एव, मोहाहिरिकानोत्तप्पउद्धच्चलोभा तथा न वत्तब्बा च, सेसा कुसलाब्याकता द्विधापि होन्ति, तिजातिका पन द्विधापि न वत्तब्बा च, सेसा अकुसलापि न वत्तब्बा च। छट्ठं।

गन्थगोच्छकं निट्ठितं।

ओघयोगगोच्छकानि सब्बथा आसवगोच्छकसदिसानि। पदत्थमत्तमेव, हेत्थ नाममत्तञ्च विसेसो। तत्थ यस्स संविज्जन्ति, तं वट्ठस्मिं ओहनन्ति ओसीदापेन्तीति **ओघा**। आरम्मणं कत्वा अतिक्कमनीयतो ओघेहि अतिक्कमितब्बाति **ओघनिया**। तथा **योगनियाति** एत्थापि। वट्ठस्मिं योजेन्तीति **योगा**। सेसं तादिसमेव।

ओघयोगगोच्छकानि निट्ठितानि।

नीवरणगोच्छके चित्तं नीवरन्ति परियोनन्थन्तीति **नीवरणा**। तत्थ कामच्छन्दनीवरणं ब्यापादनीवरणं थिनमिद्धनीवरणं उद्धच्चकुक्कुच्चनीवरणं विचिकिच्छानीवरणं अविज्जानीवरणन्ति इमे छ नीवरणा नाम। तत्थ थिनन्ति सप्पिपिण्डो विय अविप्फारिकताय चित्तस्स घनभावो, थद्धताति अत्थो। मेधतीति मिद्धं, अकम्मञ्जभावो, पचलायिकभावकरोति अत्थो। इदञ्च सेखपुथुज्जनानं निदाय पुब्बभागे, अपरभागे च पचलायनहेतुकं उप्पज्जति, न निदोक्कमनकाले। खीणासवानम्पि हि करजकायस्स दुब्बलभावेन असम्मिस्सभ्रवङ्गसन्ततिवसेन निदोक्कमनं होति, तं पन तेसं थिनमिद्धहेतुकं न होति, इतरेसमेव होति।

केचि पन रूपमेव “मिद्ध”न्ति वदन्ति, तं न युत्तं, “थिनमिद्धनीवरणं अविज्जानीवरणेन नीवरणञ्चेव नीवरणसम्पयुत्तञ्चा”ति अरूपधम्महेहि सम्पयोगवचनतो अरूपमेव। अकुसलञ्च “थिनमिद्धनीवरणस्स पहीनत्ता”तिआदिपहानवचनतो। अकुसला एव हि पहातब्बा, तस्मा आरुप्पेपि चेतं उप्पज्जति। “नीवरणं धम्मं पटिच्च नीवरणो धम्मो उप्पज्जति न पुरेजातपच्चया”ति (पट्ठा० ३.८.८) एतस्स **विभङ्गे** “आरुप्पे कामच्छन्दनीवरणं पटिच्च थिनमिद्धउद्धच्चअविज्जानीवरण”न्ति (पट्ठा० ३.८.८) सब्बं वित्थारेतब्बं। “सोप्पं पचलायिका”ति (ध० स० ११६३) **पदभाजनीये** पनस्स फलूपचारेन वुत्तन्ति वेदितब्बं। थिनं मिद्धञ्चाति इदं द्वयं नीवरणद्वाने एकनीवरणं वुत्तं, तथा उद्धच्चकुक्कुच्चञ्चाति इदं द्वयं। तत्थ कुक्कुच्चन्ति “अकतं वत मे कल्याणं, कतं पाप”न्तिआदिना उप्पज्जमानो विप्पटिसारो। तेनेवस्स **पदभाजनीये** “चेतसो विप्पटिसारो मनोविलेखो”ति च वुत्तं। “अकप्पिये कप्पियसज्जिता”तिआदि पन कुक्कुच्चमूलदस्सनत्थं। एवंसज्जिताय हि कते वीतिक्कमे पच्छा “दुद्धु मया कत”न्ति सुदिन्नादीनं विय विप्पटिसारो उप्पज्जति। यं पन **विनये** “अथ खो आयस्मा सारिपुत्तो...पे०... कुक्कुच्चायन्तो न पटिग्गहेसी”ति (पाचि० २०४) कुक्कुच्चं आगतं, तं नीवरणकुक्कुच्चं। न हि अरहतो नीवरणं अत्थि, नीवरणवतिरूपकं पन “कप्पति, न कप्पती”ति वीमंसनसङ्घातं विनयकुक्कुच्चं नामेतन्ति वेदितब्बं। सेसनीवरणानि वुत्तत्थानि एव। इमेसु च कुक्कुच्चविचिकिच्छा पठमेन मग्गेन पहीयन्ति, ब्यापादो ततियेन, थिनमिद्धउद्धच्चविज्जा चतुर्थेन, कामच्छन्दो चतूहिपीति वत्तब्बं, “ततियेना”ति पन वुत्तं। इमे च सभावतो अट्ठ धम्मा छ नीवरणा नाम जाता, इमे पन ठपेत्वा सेसा नो नीवरणा नाम। नीवरणदुकं पठमं।

दुतियं सासवदुकसदिसमेव । द्वादस अकुसलचित्तानि **नीवरणसम्पयुत्ता** नाम । सेसचित्तरूपनिब्बानानि **नीवरणविप्पयुत्ता** नाम । चेतसिकेसु अकुसला नीवरणसम्पयुत्ताव, कुसलाब्याकता नीवरणविप्पयुत्ताव, सेसा द्विधापि होन्ति । ततियं ।

छ नीवरणा **नीवरणा चेव नीवरणिया च** नाम । सेसा लोकिया **नीवरणिया चेव नो च नीवरणा** नाम । लोकोत्तरा न वत्तब्बा । सेसं आसवगोच्छके चतुत्थसदिसमेव । चतुत्थं ।

छ नीवरणा **नीवरणा चेव नीवरणसम्पयुत्ता च** नाम । तदञ्जे नीवरणसम्पयुत्ता पन **नीवरणसम्पयुत्ता चेव नो च नीवरणा** नाम । तथा चेतसिकेसु नीवरणविरहिता अकुसला, तिजातिका पन तथा च न वत्तब्बा च, कुसलाब्याकता न वत्तब्बाव । इध पन नीवरणविप्पयुत्ता सब्बे न वत्तब्बा । पञ्चमं ।

लोकोत्तरवज्जिता **नीवरणविप्पयुत्ता नीवरणिया** नाम । लोकोत्तरा **नीवरणविप्पयुत्ता अनीवरणिया** नाम । इध पन नीवरणसम्पयुत्ता न वत्तब्बा । चेतसिकेसु पन करुणामुदिता नीवरणविप्पयुत्ता नीवरणियाव, कुसलाब्याकता द्विधापि होन्ति, तिजातिका तथा च न वत्तब्बा च, अकुसला पन न वत्तब्बाव । छट्ठं ।

नीवरणगोच्छकं निद्वितं ।

परामासगोच्छके धम्मानं यथाभूतं अनिच्चादिआकारं अतिक्कमित्वा “निच्च”न्ति आदिवसेन पवत्तमाना परतो आमसन्तीति **परामासा** । मिच्छादिद्वि । बहुवचननिद्वेसे कारणं वुत्तमेव । तदञ्जे सब्बे धम्मा **नो परामासा** नाम । परामासदुकं पठमं ।

परामासेहि आरम्मणकरणवसेन परामदुत्ता **परामदुत्ता** । सेसं आसवदुकसदिसमेव । दुतियं ।

दिट्ठिसम्पयुत्तचित्तेसु दिट्ठिविरहिता धम्मा **परामाससम्पयुत्ता** नाम । सेसचित्तरूपनिब्बानानि **परामासविप्पयुत्ता** नाम । इध पन दिट्ठि न वत्तब्बा, सेसचेतसिकेसु पन मानदोसइस्सामच्छरियकुक्कुच्चविचिकिच्छा, कुसलाब्याकता च परामासविप्पयुत्ता एव, सेसा द्विधापि होन्ति । ततियं ।

दिट्ठि एव **परामासा चेव परामदुत्ता च** नाम । सेसलोकिया **परामदुत्ता चेव नो च परामासा** नाम । इध पन लोकोत्तरा न वत्तब्बा । सेसं सुविज्जेय्यमेव । चतुत्थं ।

इमस्मिं पन गोच्छके “परामासा चेव धम्मा परामाससम्पयुत्ता चा”ति अयं दुको न लब्धति । न हि दिट्ठि दिट्ठिया सम्पयुज्जति । पच्छिमदुके लोकोत्तरवज्जिता **परामासविप्पयुत्ता परामदुत्ता** नाम । लोकोत्तरा **परामासविप्पयुत्ता अपरामदुत्ता** नाम । इध पन परामासो, तंसम्पयुत्ता च न वत्तब्बा । सेसं वुत्तनयमेव ।

परामासगोच्छकं निद्वितं ।

महन्तरदुकेसु आरम्मणं अगगहेत्वा अप्पवत्तितो सह आरम्मणेनाति **सारम्मणा**, चित्तचेतसिका । नत्थि आरम्मणमेतेसन्ति **अनारम्मणा**, रूपनिब्बानानि । सारम्मणदुकं ।

चिन्तनद्वेन चित्तं, चित्तताय वा चित्तं । तं हि वत्थुद्वारारम्मणकिच्चादिभेदतो, अतीतादिभेदतो च अत्तनो विचित्तताय चित्तन्ति वुच्चति चित्तकरणताय वा । लोकस्मिं हि चित्तकम्मतो उत्तरितरं चित्तं नाम नत्थि, तस्मिम्पि चरणं नाम चित्तं अतिचित्तं होति । यं वा पनञ्जम्पि लोके सिप्पजातं, सब्बं तं चित्तेनेव करीयति । एवं तस्स तस्स चित्तस्स निष्फादकं चित्तम्पि तथैव चित्तं होति । यथा चिन्तितस्स वा अनवसेसस्स अनिप्फज्जनतो ततोपि चित्तमेव चित्ततरं, तथा यदेतं देवमनुस्सनिरयतिरच्छानभेदासु गतीसु कुसलाकुसलकम्मनानत्तं, तेन तासु गतीसु अपदद्विपदादिउच्चत्तनीचत्तादिनानत्तं, तस्मिं तस्मिं अत्तभावे दीघरस्सथूलाथूलसुवण्णदुब्बण्णादिलाभालाभादि चाति एवमादि अज्झत्तं चित्तं, बहिद्वा च पथवीपब्बततिणरुक्खलतादिदेवब्रह्मविमानकप्परुक्खादिभूतं कम्मपच्चयं चित्तं, तम्पि चित्तेनेव कत्तं, ततो चित्तमेव चित्ततरं चिन्तितनियामेन सब्बाकारस्स असम्भवतो । एवं चिन्तनद्वेन, चित्तविचित्तद्वेन, चित्तकरणद्वेन च “चित्त”न्ति विज्जाणं वेदितब्बं, तदेव विज्जाणं **चित्तं** नाम । चेतसिकरूपनिब्बानानि **नो चित्ता** नाम । चित्तदुकं ।

अविप्पयोगवसेन चेतसि नियुत्ता **चेतसिका**, फस्सादयो द्विपज्जास धम्मा । चित्तरूपनिब्बानानि **अचेतसिका** नाम । चेतसिकदुकं ।

चेतसिका एव **चित्तसम्पयुत्ता** नाम । रूपनिब्बानानि **चित्तविप्पयुत्ता** नाम, इध पन चित्तं न वत्तब्बं । चित्तसम्पयुत्तदुकं ।

निरन्तरभावूपगमनताय उप्पादतो याव भङ्गाचित्तेन संसद्वाति **चित्तसंसद्वा** । एकतो वत्तमानापि निरन्तरभावं अनुपगमनताय चित्तेन विसंसद्वाति **चित्तविसंसद्वा** । सेसं अनन्तरदुकसदिसमेव । चित्तसंसद्वादुकं ।



समुद्रहन्ति एतेनाति समुद्रानं, चित्तं समुद्रानं एतेसन्ति **चित्तसमुद्राना**, चेतसिकानि चैव चित्तजरूपकलापा च । चित्तं, पन अचित्तजरूपकलापा, निब्बानञ्च **नो चित्तसमुद्राना** नाम । चित्तसमुद्रानदुकं ।

सह भवन्तीति सहभुनो, चित्तेन सहभुनो **चित्तसहभुनो**, चेतसिकानि चैव कायवचीविज्जित्तियो च । चित्तं, पन विज्जित्तवज्जितरूपनिब्बानानि च **नो चित्तसहभुनो** नाम । चित्तसहभुनदुकं ।

अनुपरिवत्तन्तीति अनुपरिवत्तिनो, किं अनुपरिवत्तन्ति? चित्तं, चित्तस्स अनुपरिवत्तिनो **चित्तानुपरिवत्तिनो** । सेसं अनन्तरदुकसदिसमेव । चित्तानुपरिवत्तिदुकं ।

इतो परे पन तयो दुका चेतसिकदुकसदिसाव, केवलं पदत्थमत्तमेव विसेसो । तत्थ चित्तसंसद्धा च ते चित्तसमुद्राना एव चाति **चित्तसंसद्धसमुद्राना** । चित्तसंसद्धा च ते चित्तसमुद्राना च चित्तसहभुनो एव चाति **चित्तसंसद्धसमुद्रानसहभुनो**, चित्तसंसद्धा च ते चित्तसमुद्राना च चित्तानुपरिवत्तिनो एव चाति **चित्तसंसद्धसमुद्रानानुपरिवत्तिनो** । सेसं सुविज्जेय्यमेव ।

तदनन्तरे पन अज्झत्तिकदुके अज्झत्तज्झत्तं अज्झत्तिके वुत्तवसेन अज्झत्ताव **अज्झत्तिका** । पसादरूपचित्तसङ्घातानि छ अज्झत्तिकानि आयतनानि । ततो बहिभूता **बाहिरा** । सेसरूपचेतसिकनिब्बानपञ्चत्तिसङ्घातानि छ बाहिरायतनानि, इध पन पञ्चत्तियोपि लब्भन्ति । अज्झत्तिकदुकं ।

उपादियन्तेव भूतानि, न भूता विय उपादियन्तीति **उपादा**, चतुवीसति उपादारूपानि एव । न उपादियन्तीति **नो उपादा**, चतुमहाभूतचित्तचेतसिकनिब्बानानि । उपादादुकं ।

द्वित्तिसं लोकियविपाकचित्तानि, कम्मजरूपञ्च **उपादिन्ना** नाम । सेसलोकियलोकुत्तरानि, निब्बानञ्च **अनुपादिन्ना** नाम । सेसं उपादिन्नुपादानियत्तिके वुत्तानुसारेण जातब्बं । उपादिन्नदुकं ।

महन्तरदुका निड्डिता ।

उपादानगोच्छकेभुसं आदियन्तीति **उपादाना**, दळ्ळगगाहं गणहन्तीति अत्थो । दळ्ळत्थो हि एत्थ उप-सद्धो “उपायासो”तिआदीसु विय । ततो अज्जे **नो उपादाना** । तत्थ कामुपादानं दिट्ठुपादानं सीलब्बतुपादानं अत्तवादुपादानन्ति इमे उपादाना नाम । तत्थ वत्थुकामेसु उप्पन्नो किलेसकामोव वुत्तनयेन उपादानन्ति **कामुपादानं** । एवं सेसेसुपि । तत्थ वीसतिवत्थुका सक्कायदिट्ठि **अत्तवादुपादानं** नाम । सेसानि पुब्बे वुत्तानेव । पच्छिमानि पनेत्थ तीणि उपादानानि तथापवत्तदिट्ठि एव । तानि च पठमेन मग्गेन पहीयन्ति, कामुपादानं चतूहिपि । इमे च सभावतो द्वे धम्मा विभागतो चतुरुपादाना नाम जाता । इमे पन ठपेत्वा सेसा सब्बे धम्मा **नो उपादाना** नाम । उपादानदुकं पठमं ।

उपादानियदुको संयोजनियदुकसदिसोव । दुतियं ।

अट्ठलोभसहगतचित्तानि, तंसम्पयुत्तेसु दिट्ठिविप्पयुत्तलोभं ठपेत्वा सेसा च **उपादानसम्पयुत्ता** नाम । दिट्ठिविप्पयुत्तलोभदोसमोहमूलानि, कुसलाब्बाकतानि च चित्तानि, रूपनिब्बानानि च **उपादानविप्पयुत्ता** नाम । चेतसिकेसु पन दिट्ठिमाना उपादानसम्पयुत्ताव, दोसइस्सामच्छरियकुक्कुच्चविचिकिच्छा, कुसलाब्बाकता च उपादानविप्पयुत्ता एव । सेसा दुविधापि होन्ति । ततियं ।

चत्तारि उपादानानि **उपादाना चैव उपादानिया च** नाम । तदवसेसा लोकिया **उपादानिया चैव नो च उपादाना** नाम । इध पन लोकुत्तरा न वत्तब्बा । सेसं वुत्तनयमेव । चतुत्थं ।

पञ्चमछट्ठदुका पाठतो गन्थगोच्छके पञ्चमछट्ठदुकसदिसाव, केवलं पञ्चमदुके “चेतसिकेसु मानो उपादानसम्पयुत्तो चैव नो च उपादानो एव, मोहाहिरिकानोत्तपण्डित्थनिमिद्धानि तिजातिकानि तथा च न वत्तब्बा चा”ति इदञ्च, छट्ठदुके “चेतसिकेसु दोसइस्सामच्छरियकुक्कुच्चविचिकिच्छा अप्पमज्जा उपादानविप्पयुत्ता उपादानिया एव, मोहाहिरिकानोत्तपण्डित्थलोभनिमिद्धानि तथा च न वत्तब्बानि चा”ति एतकमेव पाठतो विसेसो, अत्थतो पन नाममत्तकोव विसेसो । सेसो सुविज्जेय्योव । पञ्चमछट्ठानि ।

उपादानगोच्छकं निड्डितं ।

किलेसगोच्छके संकिलिड्डित्तिके वुत्तनयेन पदत्थो वेदितब्बो । लोभो दोसो मोहो मानो दिट्ठि विचिकिच्छा थिनं उद्धच्चं अहिरिकं अनोत्तपन्ति इमे दस धम्मा **किलेसा** नाम । इमे च वुत्तत्था एव, इध पन लोभो, हेतुगन्थनीवरणउपादानगोच्छकेसु लोभो च निष्पदेसतो चतुमगगवज्झोपि एकेनेव कोट्टासेन ठितो,

सेसगोच्छकेसु सो सब्बोपि लोभो “कामासवो भवासवो”तिआदिना द्वे द्वे कोट्टासा हुत्वा ठितो, इमिना पन अट्टकथावचनेनापि भवासवादिब्यतिरिक्तो सब्बो चतुमगवज्झोपि रागो कामासवादीसु सङ्गहितो। कामच्छन्दनीवरणं पन भवरागोपि न पञ्चकामगुणिकरागमतोवाति पञ्जायति, “आरुपे कामच्छन्दनीवरणं पटिच्च थिनमिद्धनीवरणं”न्तिआदिपाळितो (पट्टा० ३.८.८) चेत्तं दट्ठब्बं पञ्चकामगुणिकरागस्स रूपारूपभूमीसु अनुप्पज्जनतो। इमेसु च किलेसेसु दिट्ठिविचिकिच्छा पठमेन मग्गेन पहीयन्ति, दोसो ततियेन, लोभादयो चतूहिपि। इमे पन दस धम्मे ठपेत्वा सेसा **नो किलेसा** नाम। किलेसदुकं पठमं।

संकिलेसिकदुको सासवदुकसदिसोव। दुतियं।

संकिलिदुदुको, किलेससम्पयुत्तदुको चाति द्वेपि समानत्थाव। ते च नीवरणगोच्छके ततियदुकसदिसाव। ततियचतुत्थानि।

दस किलेसा **किलेसा चेव संकिलेसिका च** नाम। सेसा लोकियधम्मा **संकिलेसिका चेव नो च किलेसा** नाम। इध पन लोकोत्तरा न वत्तब्बा। सेसं नीवरणगोच्छके चतुत्थदुकसदिसमेव। पञ्चमं।

छट्ठसत्तमदुकानिपि अज्जमज्जं समानत्थानेव। तानि छट्ठसत्तमानि नीवरणगोच्छके यथाक्कमं पाठतो पञ्चमछट्ठदुकसदिसानि, अत्थतो पन नाममत्तकोव विसेसो। सेसो सुविज्जेय्यो। छट्ठसत्तमअट्ठमानि।

किलेसगोच्छकं निट्ठितं।

पिट्ठिदुकेसु आदितो चत्तारो दुका दस्सनेनपहातब्बत्तिके, दस्सनेनपहातब्बहेतुके च वुत्तनयेन वेदितब्बा। केवलं पन तत्थ पठमत्तिके वुत्तेसु दस्सनेनपहातब्बे धम्मे ठपेत्वा सेसा इध पठमदुकस्स दुतियपदे दस्सनेनपहातब्बेसु पविसन्ति, भावनायपहातब्बे ठपेत्वा सेसा इध दुतियदुके नभावनायपहातब्बेसु पविसन्ति। तत्थ च दुतियत्तिके वुत्तेसु दस्सनेनपहातब्बहेतुके ठपेत्वा सेसा इध ततियदुके नदस्सनेनपहातब्बहेतुके, भावनायपहातब्बहेतुके च ठपेत्वा सेसा इध चतुत्थदुके नभावनायपहातब्बहेतुकेसु पविसन्ति।

पदत्थो च दस्सनेन पहातब्बो हेतु एतेसं अत्थीति **दस्सनेनपहातब्बहेतुका**। एवं भावनायपहातब्बहेतुकाति एत्थापि अत्थो वेदितब्बो। एवं हि सति अहेतुकानं अग्गहणं सियाति एत्तकमेव विसेसो। तिकद्वयमेव हि भगवा देसनाविलासेन चत्तारो दुके कत्वा देसेसि। सेसं तादिसमेव। चत्तारो दुका निट्ठिता।

पञ्चपञ्जाससवितक्कचित्तेसु वितक्कविरहिता चित्तचेतसिका धम्मा **सवितक्का** नाम। वितक्को, पन सेसचित्तरूपनिब्बानानि च **अवितक्का** नाम। पञ्चमं।

छसट्ठिया सविचारचित्तेसु विचारविरहिता धम्मा **सविचारा** नाम। विचारो, पन सेसचित्तरूपनिब्बानानि च **अविचारा** नाम। सेसं इध, अनन्तरे वुत्तदुके च वितक्कत्तिके वुत्तानुसारेन जातब्बं। छट्ठं।

इतो परेसु सप्पीतिकदुको, पीतिसहगतदुको च समानत्थाव, ते च सुखसहगतउपेक्खासहगतदुका चाति चत्तारोपि दुका पीतित्तिके वुत्तनयाव। केवलं पनेतेसं दुकानं पठमं पदं तत्थ पविसति, पीतित्तिके इतरीतरपदद्वयसङ्गहिता, असङ्गहिता च सब्बे अत्था हेट्ठा वुत्तनयेनेत्थ दुकानं दुतियपदेसु अत्थतो सङ्गहिता, इमे च निष्पदेसदुकाति अयमेव विसेसो। सत्तमअट्ठमनवमदसमा।

तदनन्तरेसु **कामावचरा**ति एत्थ “हेट्ठतो अवीचिनिरयं परियन्तं करित्वा उपरितो परनिम्मितवसवत्ती देवे अन्तो करित्वा यं तस्मिं अन्तरे एत्थावचरा एत्थ परियापन्ना”ति एवं (ध० स० १२८७) **पाळियं** परिच्छिन्नानं चतुन्नं अपायानं, मनुस्सानं, छन्नं देवलोकानज्ज वसेन ओकासतो एकादसविधो कामभवो “कामो”ति वुच्चति उत्तरपदलोपेन यथा “रूपूपपत्तिया”तिआदीसु रूपभवो “रूप”न्ति। तस्मिं कामे अवचरन्ति पवत्तन्तीति **कामावचरा**। येभ्युत्थतो चेत्तं वुत्तं रूपारूपेसु चेतसेज्ज इध पवत्तितो “थलचरा”तिआदीसु विय। कामभवसङ्गाते वा कामे पटिसन्धिं अवचरेन्तीतिपि **कामावचरा**, कुसलाकुसलानि। उद्धच्चसहगतचित्तं पन अब्याकतचित्तसदिसं। तदायत्तताय, आरम्भणकरणवसेन वा किलेसकामो एत्थ अवचरतीतिपि **कामावचरं**। कामज्जेस रूपारूपावचरधम्मेसुपि अवचरति, रुळ्हितो पन “वदतीति वच्छो”तिआदीसु विय इमे एव “कामावचरा”ति वुच्चन्ति। अपिच कामतण्हा रूपतण्हा अरूपतण्हाति एत्थ वुत्तकामतण्हासङ्गातो कामो एत्थ अवचरतीतिपि **कामावचरा**। एवं ब्रह्मानं विमानाभरणादीसु छन्दरागस्सापि कामतण्हाभावो सिद्धो, रूपतण्हाविसयानम्पि च ब्रह्मानं कम्मजरूपादीनं कामतण्हायपि विसयताय कामावचरता सिद्धा होति। न रूपारूपावचरानं तदभावतो तदज्जे **न कामावचरा**। इमिना नयेन रूपावचरादिदुकानम्पि पदत्थो यथाहं जातब्बो। तत्थ चतुपञ्जास कामावचरचित्तानि, सब्बज्ज रूपं कामावचरा नाम। सेसचित्तनिब्बानानि न कामावचरा नाम। चेतसिकेसु वत्तब्बं परियापन्नदुके एव आवि भविस्सति। एकादसमं।

पन्नरस रूपावचरचित्तानि **रूपावचरा** नाम। सेसचित्तरूपनिब्बानानि **न रूपावचरा** नाम। द्वादसमं।

द्वादस अरूपावचरचित्तानि **अरूपावचरा** नाम । सेसचित्तरूपनिब्बानानि **न अरूपावचरा** नाम । तेरसमं ।

तेभूमकवट्टे परियापन्ना अन्तोगधाति **परियापन्ना**, लोकियधम्माव । तत्थ न परियापन्नाति **अपरियापन्ना**, लोकोत्तरा । चेतसिकेसु पन कामावचरादिदुकानं चतुन्नम्पि साधारणो विनिच्छयो एवं वेदितब्बो — अकुसलचेतसिका कामावचराव, अप्पमज्जा कामरूपावचरा, विरतियो पन कामावचरपरियापन्ना, वितक्कविचारपीतियो पन कामरूपावचरपरियापन्ना, सेसा चतुभूमकाति । चुदसमं ।

वट्टमूलं छिन्दन्ता निब्बानं आरम्भणं कत्वा वट्टतो नीयन्तीति **निय्यानिका**, चत्तारि लोकोत्तरमग्गचित्तानि । इमिना लक्खणेन न नियन्तीति **अनिय्यानिका**, सेसचित्तरूपनिब्बानानि । सेसं सुविज्जेय्यमेव । पच्चदसमं ।

चुतिया वा अत्तनो वा पवत्तिया अनन्तरं फलदाने नियतत्ता **नियता**, मिच्छत्तनियता, सम्मत्तनियता च । तथा अनियतत्ता **अनियता**, सेसधम्मा । सेसं वुत्तनयमेव । सोळसमं ।

अज्जे धम्मे उत्तरन्ति अतिक्कमन्तीति उत्तरा, अत्तानं उत्तरितुं समत्थेहि सह उत्तरेहीति **सउत्तरा**, लोकियाव । नत्थि एतेसं उत्तराति **अनुत्तरा**, लोकोत्तरा । सत्तरसमं ।

रणन्ति कन्दन्ति एतेहीति रणा, येहि अभिभूता सत्ता नानप्पकारतो परिदेवन्ति, तेसं अकुसलमूलानं एतं अधिवचनं, तेहि सम्पयोगवसेन, पहानेकट्टतावसेन च सह रणेहीति **सरणा** । एतेनाकारेन नत्थि एतेसं रणाति **अरणा** ।

तत्थ द्वादस अकुसलचित्तानि सरणा नाम । सरणधम्मेषु चेत्य लोभदोसमोहा रणा चेव सरणा च, तेसु लोभदोसा मोहेनेव सम्पयोगतो सरणा, तथा विचिकिच्छुद्धच्चसहगतचित्तं, तंसम्पयुत्ता च । मोहो पन तेसु सम्पयोगतो सरणो, दिट्ठिसम्पयुत्तरागेन, पन भवरागेन च रणभूतेन पहानेकट्टतावसेनेव सरणो । लोभदोसमोहमूलसम्पयुत्तेसु पन मोहो लोभेन चेव दोसेन च, सेसा लोभमोहेन चेव दोसमोहेन च सम्पयोगतो सरणाति वेदितब्बा । सब्बानि कुसलाब्बाकतचित्तानि, रूपनिब्बानानि च अरणा नाम । चेतसिकेसु पन अकुसला सरणाव, कुसलाब्बाकता अरणाव, तिजातिका पन द्विधापि होन्तीति । अट्टारसमं ।

पिट्ठिदुका निट्ठिता ।

अभिधम्मदुकमातिकथवण्णना निट्ठिता ।

### सुत्तन्तिकदुकमातिकथवण्णना

सुत्तन्तिकदुकेसु वेदेति, विविधेन वा आकारेन जानातीति विज्जा, विपस्सनाजाणमनोमयिद्विच्छाभिज्जावसप्पवत्ता पज्जा, तस्मिं विज्जाभागे विज्जाकोट्टासे विज्जासभावे वत्तन्तीति **विज्जाभागिनो** । ता एव विज्जा, तं वा विज्जं सम्पयोगवसेन भजन्तीतिपि **विज्जाभागिनो**, अट्ठविधविज्जासम्पयुत्तधम्मा । तासु या काचि एका विज्जा विज्जा, सेसा विज्जाभागिनोति एवं विज्जापि विज्जासम्पयुत्तधम्मापि विज्जाभागिनोत्वेव वेदितब्बा, इध पन विज्जासम्पयुत्ता धम्माव अधिप्पेता । न विजानातीति अविज्जा, चतुसच्चच्छादकवसेन चतुब्बिधो मोहो, तस्मिं अविज्जाभागे अविज्जाकोट्टासे अविज्जासभावे वत्तन्तीति **अविज्जाभागिनो** । ता एव अविज्जा, तं वा अविज्जं सम्पयोगवसेन भजन्तीतिपि **अविज्जाभागिनो**, अविज्जासम्पयुत्तधम्मा । एवं अविज्जापि अविज्जासम्पयुत्तधम्मापि अविज्जाभागिनोत्वेव वेदितब्बा, इध पन अविज्जासम्पयुत्तधम्माव अधिप्पेता ।

तत्थ अरहत्तमग्गचित्तं, पज्जाविरहिततंसम्पयुत्ता च विज्जाभागिनो च जाणसम्पयुत्तकामावचरजवनानि, जाणविरहिततंसम्पयुत्ता च विपस्सनाभावेन पवत्तियं विज्जाभागिनो, अज्जदा न वत्तब्बा । रूपावचरचतुत्थज्झानिकजवनचित्तानि, पज्जाविरहिततंसम्पयुत्ता च मनोमयिद्विभावेन च पज्जाभिज्जाभावेन च पवत्तियं विज्जाभागिनो, अज्जदा न वत्तब्बा । तत्थ द्वादसाकुसलचित्तानि, अविज्जाविरहिततंसम्पयुत्ता च अविज्जाभागिनोव, इध पन अविज्जा, सेसचित्तरूपनिब्बानानि च न वत्तब्बाव । चेतसिकेसु पन मोहो अप्पमज्जा न वत्तब्बाव, सेसा कुसलाब्बाकता सिया विज्जाभागिनो, सिया न वत्तब्बा, तिजातिका द्विधापि न वत्तब्बा च । सेसं सुविज्जेय्यमेव । पठमं ।

पुन अनज्झोत्थरणवसेन किलेसन्धकारं विद्धंसेतुं असमत्थताय विज्जु उपमा एतेसन्ति **विज्जूपमा**, आदितो तीसु मग्गेषु जाणं । निस्सेसं विद्धंसनसमत्थताय वजिरं उपमा एतेसन्ति **वजिरूपमा**, अरहत्तमग्गे जाणं । यथा हि मेघन्धकारे मग्गपटिपन्नस्स पटिच्छादनअन्धकारं विधमित्वा विज्जुया उप्पन्नक्खणे चातुदिसा मग्गा पाकटा होन्ति, विज्जुया निरुद्धाय पुन अन्धकारो ओत्थरित्वा मग्गं पटिच्छादेति, एवं विपस्सनायानिकस्स यथासकं सच्चच्छादककिलेसन्धकारं विधमित्वा तीसु मग्गेषु यथाक्कमं उप्पन्नेसु चत्तारि सच्चानि पाकटानि होन्ति, तेसु निरुद्धेसु पुन अवसिद्धकिलेसन्धकारो चतुसच्चं पटिच्छादेति, तस्मा तीसु मग्गेषु पज्जा विज्जूपमा वुत्ता । यथा पन वजिरस्स अभेज्जो पासाणो नाम नत्थि, तज्ज निस्सेसतो वजिरं खेपेति, वजिरेन

च गतमग्गे पासाणस्स पुन पाकतिकभावो नत्थि, एवं अरहत्तमग्गजाणस्स अवज्झकिलेसो नाम नत्थि, तच्च निस्सेसतो अरहत्तमग्गजाणं खेपेति, तेन च खेपिते किलेसे अवसिद्धकिलेसाभावतो तस्स पुन पच्चुदावत्तनं नाम नत्थि, तस्मा चतुत्थमग्गे पज्जा वजिरूपमा वुत्ता। पज्जा एव हेत्थ सिया विज्जूपमा, सिया न वत्तब्बा च होति। सेसचेतसिकचित्तरूपनिब्बानानि पन सब्बानि न वत्तब्बानेव। द्रुतियं।

बालेसु ठितत्ता, यत्थ ठिता तदुपचारेन **बाला**, बालकरत्ता वा **बाला**, द्वादसाकुसलचित्तानि। इध पन अहिरिकञ्च अनोत्तप्यञ्च बाला नाम। पण्डितेसु ठितत्ता **पण्डिता**, पण्डितकरत्ता वा **पण्डिता**, एकवीसति कुसलचित्तानि। इध पन हिरी च ओत्तप्यञ्च पण्डिता नाम। सेसचित्तरूपनिब्बानानि न वत्तब्बानि। सेसं सुविज्जेय्यमेव। ततियं।

**कण्हाति** काळका, चित्तस्स अपभस्सरभावकरणा। **सुक्काति** ओदाता, पभस्सरभावकरणा। सेसं सब्बं बालदुकसदिसमेव। चतुत्थं।

इध चेव सम्पराये च तपेन्तीति **तपनीया**। न तपनीया **अतपनीया**। सेसं बालदुकसदिसमेव। पञ्चमं।

“सिरिवट्ठको धनवट्ठको”तिआदयो विय वचनमत्तमेव अधिकारं कत्वा पवत्ता **अधिवचना** नाम। नामधेय्यन्ति तेसं तेसं धम्मानं नामानि। तानि चतुब्बिधानि सामञ्जनामं गुणनामं कित्तिमनामं ओपपातिकनामन्ति। तत्थ पठमकप्पिकेसु महाजनेन सम्मन्नित्वा ठपितत्ता “महासम्मतो”ति रज्जो नामन्ति एवरूपं **सामञ्जनामं** नाम। “धम्मकथिको पंसुकूलिको काळो रस्सो”ति एवरूपं गुणतो आगतं, “भगवा अरहं सम्मासम्बुद्धो”तिआदीनिपि तथागतस्स अनेकानि नामसतानि **गुणनामं** नाम। यं पन जातस्स कुमारस्स जातका कप्पेत्वा पकप्पेत्वा “अयं असुको नामा”ति नामं करोन्ति, इदं **कित्तिमनामं** नाम। या पन पुरिमपज्जति अपरपज्जत्तियं निपतति, सेय्यथिदं — पुरिमकप्पेपि चन्दो चन्दो एव, एतरहिपि अनागतेपि चन्दो एव। तथा “सूरियो समुद्धो पथवी रूपं वेदना सज्जा सङ्खारा विज्जाणं निब्बान”न्ति एवमादि **ओपपातिकनामं** नाम। तानि पुन विज्जमानपज्जति अविज्जमानपज्जति विज्जमानेन अविज्जमानपज्जति अविज्जमानेन विज्जमानपज्जति विज्जमानेन विज्जमानपज्जति अविज्जमानेन अविज्जमानपज्जतीति एवं नामपज्जत्तिवसेन छब्बिधानि होन्ति।

तत्थ परमत्थतो उपलब्धमाना यथावुत्तद्वासत्ततिविधा नामरूपधम्मा विज्जमाना नाम, तेसं पकारेहि आपनतो पज्जति **विज्जमानपज्जति** नाम, “चित्तं फस्सो पथवी रूपं निब्बान”न्तिआदयो परमत्थवाचका सद्वा। उपादिन्ननामरूपधम्मे पन उपादाय पज्जत्ता सत्तपुग्गलइत्थिपुरिसदेवमनुस्सतिरच्छानादिभेदा, अनुपादिन्नरूपधम्मे उपादाय पज्जत्ता भूमिपब्बतरुक्खसकटचन्दसूरियनक्खत्तदिसाकालकसिणादिभेदा च परमत्थतो अनुपलब्धमाना अविज्जमाना नाम, तेसं पज्जति **अविज्जमानपज्जति** नाम। तथा “अत्ता भूमी”तिआदयो अत्थपज्जत्तिवाचका सद्वा च चित्तसन्ततिवण्णुपगन्तिआदि विज्जमानत्थवाचका सद्वा **विज्जमानेन अविज्जमानपज्जति** नाम। “पुरिसस्स चित्तं, मेघवण्णो”तिआदीसु **अविज्जमानेन विज्जमानपज्जति** नाम। “चित्तलहुता पथवीगन्धो”तिआदि **विज्जमानेन विज्जमानपज्जति** नाम। “मनुस्ससरीरं रुक्खसाखा”तिआदि **अविज्जमानेन अविज्जमानपज्जति** नाम। एवं छब्बिधापि चेता अधिप्पायं विज्जापेतुकामताचित्तसमुद्वापितसविज्जत्तिसद्धानुसारेण जातसङ्केतस्स सोतविज्जाणवीथिअनन्तरं उप्पन्नेहि मनोद्वारिकविज्जाणेहि “इमस्सेदं नाम”न्ति अनेकसद्देसु एकत्तमारोपेत्वा ववत्थापिता अत्थाभिमुखं नमनतो पकारेहि अत्थस्स आपनतो “नामपज्जती”ति वुच्चन्ति, तेसं अधिवचनानं पथा अत्था **अधिवचनपथा**, सम्मुतिपरमत्थभेदा सब्बे धम्मा सहवचनीयसभावा। छट्ठं।

इतो परं द्वे दुका अधिवचनदुकसदिसाव, केवलं पदत्थमत्तमेव विसेसो। तत्थ अभिसङ्खरोन्तीति सङ्खाराति एवं निद्दारेत्वा सहेतुकं कत्वा वुच्चमाना **निरुत्ति** नाम, “तक्को वितक्को सङ्कप्पो”ति एवं तेन तेन पकारेण आपनतो पज्जति नाम, यथावुत्तनामपज्जत्तियोव। न हि अधिवचननिरुत्तिपज्जतीसु अत्थतो कोचिपि भेदो अत्थि, निब्बत्तिनिमित्तभेददस्सनत्थं पन नेसं विभागेन पदत्थो दस्सितो। इमेसु च तीसु दुकेसु पज्जत्तिसहिता सब्बे धम्मा लब्धन्ति, अनन्तरे नामरूपदुके पज्जत्तिरहिताति इमे चत्तारो दुका इमेसु सुत्तन्तिकदुकेसु निप्पदेसा, सेसा पन अट्ठत्तिसापि सप्पदेसाति वेदितब्बा। सत्तमट्ठमानि।

नामकरणट्ठेन, नमनट्ठेन, नामनट्ठेन च **नामं**, अरूपक्खन्धनिब्बानानि। तानि हि सब्बदापि वेदना सज्जा सङ्खारा विज्जाणं निब्बानन्ति ओपपातिकनामवसेन अत्तनो नामं करोन्ताव पवत्तन्ति चन्दसूरियादयो विय। न हि तेसं सामञ्जगुणकित्तिमवसेन नामकरणकिच्चं अत्थीति। एवं नामकरणट्ठेन नामं वेदितब्बं। आरम्भणाभिमुखं पन नमनट्ठेन, अज्जमज्जं तत्थ नामनट्ठेन च चत्तारो अरूपक्खन्धाव **नामं**। निब्बानं पन आरम्भणाधिपतिपच्चयताय अत्तनि अनवज्जधम्मानं नामनट्ठेनेव नामं वेदितब्बं। रुपनट्ठेन **रूपं**, रूपक्खन्धो। नवमं।

**अविज्जाति** दुक्खादिपटिच्छादको सब्बो मोहो। **भवतण्हाति** भवपत्थनावसेन पवत्तो लोभो। तथा अप्पवत्तो पनेत्थ लोभो, सेसचेतसिकचित्तरूपनिब्बानानि च न वत्तब्बानि। इतो परं पन एवं नवत्तब्बविभागं अदस्सेत्वा पदत्थसरूपमत्तमेव दस्सयिस्साम, दस्सितावसेसा न वत्तब्बाति गहेतब्बा। दसमं।

भवो वुच्चति सस्सतं। “भविस्सति अत्ता च लोको चा”ति सस्सतवसेन उप्पज्जनकदिट्ठि **भवदिट्ठि** नाम। विभवो वुच्चति उच्छेदो। “न भविस्सति अत्ता च लोको चा”ति उच्छेदवसेन उप्पज्जनकदिट्ठि **विभवदिट्ठि** नाम। उभयेनापि मिच्छादिट्ठि गहिता। तथा अनन्तरेसुपि तीसु दुकेसु। एकादसमं।

खन्धपञ्चकं “अत्ता च लोको चा”ति गहेत्वा “सस्सतो अत्ता च लोको चा”ति पवत्ता दिट्ठि **सस्सतदिट्ठि** नाम । तथा “उच्छिज्जिस्सती”ति पवत्ता दिट्ठि **उच्छेददिट्ठि** नाम । “अन्तवा”ति पवत्ता **अन्तवादिट्ठि** नाम । “अनन्तवा”ति पवत्ता **अनन्तवादिट्ठि** नाम । पुब्बन्तं अनुगता **ब्रह्मजाले** वृत्तनयेन अतीतकोट्टासं आरम्भणं कत्वा पवत्ता अट्ठारसविधा **पुब्बन्तानुदिट्ठि** नाम । अपरन्तं अनुगता तत्थेव आगतनयेन अनागतकोट्टासं आरम्भणं कत्वा पवत्ता चतुचत्तालीसविधा **अपरन्तानुदिट्ठि** नाम । अयमेत्थ सङ्केपो, वित्थारो पन **ब्रह्मजाले** (दी० नि० १.२८), **तदट्ठकथाय** (दी० नि० अट्ठ० १.२८) च वेदितब्बो । द्वादसमतेरसमचुद्दसमानि ।

अहिरिकदुकं, हिरिदुकञ्च सुविज्जेय्यमेव । पञ्चदसमसोळसमानि ।

दुक्खं वचो एतस्मिं विष्पटिकूलगाहिम्हि विपच्चनीकसाते अनादरे पुग्गलेति दुब्बचो, सहधम्मिकं दस्सेत्वा ओवदियमाने अनादरकारको पुग्गलो, तस्स कम्मं दोवचस्सं, तस्स भावो **दोवचस्सता**, अनादरवसेन पवत्ता द्वे पटिघचित्ता, तंसम्पयुत्ता च । पापा अस्सद्वादयो पुग्गला एतस्स मित्ताति पापमित्तो, तस्स भावो **पापमित्तता**, पापपुग्गलेसु दळ्ळभत्तिवसेन, कायचित्तेहि तंसेवनातन्निन्तावसेन च पवत्तानि अट्ठ लोभचित्तानि । सत्तरसमं ।

**सोवचस्सता, कल्याणमित्तता** च वृत्तपटिपक्खवसेन वेदितब्बा । अत्थतो पन तथापवत्तानि सहेतुककामावचरकुसलकिरियचित्तानि । अट्ठारसमं ।

पञ्चसु, सत्तसु वा आपत्तीसु कुसलभावो **आपत्तिकुसलता**, सह वत्थुना तासं आपत्तीनं आपज्जनपरिच्छेदजाननवसेन पवत्ता कामावचरजवनपञ्जा । आपत्तीहि वुट्ठाने कुसलभावो **आपत्तिवुट्ठानकुसलता**, वुट्ठानविधानेन सङ्घि आपत्तिवुट्ठानपरिच्छेदजाननवसेन पवत्ता यथावृत्तचित्तसम्पयुत्तपञ्जाव । एकूनीसतिमं ।

समापज्जितब्बतो समापत्ति, तासु लोकियलोकुत्तरासु सवितक्कसविचारादीसु समापत्तीसु कुसलता **समापत्तिकुसलता**, सह परिकम्मेन अप्पनापरिच्छेदजाननवसेन पवत्ता पञ्जा । समापत्तीहि वुट्ठाने कुसलभावो **समापत्तिवुट्ठानकुसलता**, यथापरिच्छिन्नकालेयेव ताहि वुट्ठानकपञ्जा कामावचरजवनपञ्जाव । वीसतिमं ।

अट्ठारससु धातूसु कुसलभावो **धातुकुसलता**, सवनधारणपटिवेधपच्चवेक्खणपञ्जा । तासज्जेव धातूनं मनसिकारे कुसलभावो **मनसिकारकुसलता**, तासं सम्मसनपटिवेधपच्चवेक्खणपञ्जा । एस नयो **आयतनकुसलतायपि** । तत्थ हि सवनधारणपच्चवेक्खणा कामावचराव, पटिवेधो लोकुत्तरोव, सम्मसनं कामावचरलोकुत्तरं । अज्जमज्जं पटिच्च सहितं फलं उप्पादेतीति पटिच्चसमुप्पादो, अविज्जादीहि निद्विद्वो पच्चयसमूहो, तस्मिं द्वादसङ्गे अनुलोमपटिच्चसमुप्पादे कुसलभावो **पटिच्चसमुप्पादकुसलता**, “इमिना पच्चयेन इदं होती”ति जाननवसेन पवत्ता लोकियजवनपञ्जाव । एकवीसतिमद्वावीसतिमानि ।

तिट्ठति एत्थ फलं तदायत्तवृत्तित्तायाति ठानं, कारणं, तस्मिं ठाने कुसलता **ठानकुसलता** । न ठाने कुसलता **अट्ठानकुसलता** । तेवीसतिमं ।

उजुभावो **अज्जवो** । मुदुभावो **मद्ववो** । कायचित्तुजुकतामुदुकताद्वयं । चतुवीसतिमं ।

अधिवासनसङ्घाता खमनं **खन्ति**, तथापवत्तकामावचरजवनानि । पापतो सुट्ठु ओरतो विरतोति सोरतो, तस्स भावो **सोरच्चं** । कायवचीमनोसंवरसीलसङ्घातानि लोकियलोकुत्तरजवनानि । पञ्चवीसतिमं ।

सम्मोदकपियवादितासङ्घातो सखिलभावो **साखल्यं**, यथा परेहि सङ्घि अत्तनो छिद्दं विवरं न होति, एवं धम्मामिसेहि पटिसन्थरणं पटिच्छादनं **पटिसन्थारो** । आगन्तुकस्स हि पच्चुगमनपत्तचीवरपटिग्गहणआसनदानबीजनपादधोवनमक्खनादिना, पानीयेन आपुच्छनेन, काले आगतस्स यागुआदीनं, विकाले पानकादीनञ्च दानेन, पुनदिवसे पिण्डाय चरणट्टानदस्सनपवेसननिक्खमनकालारोचनादिना च पब्बजिता, गहट्टानञ्च **विनये** आगतनयेन यथानुरूपं आमिसपटिसन्थारो कातब्बो । आगन्तुकं पन उपसङ्कमित्वा “तुम्हे कतरभाणका”ति अपुच्छित्वा “आचरियुपज्झाया वो कतरं गन्थं वळ्ळजेन्ती”ति पुच्छित्वा तस्स विसये पञ्चपुच्छनेन सचे न सक्कोति, सयं कथेत्वा दानेन, धम्मकथनपञ्चवस्सज्जनकम्मट्टानकथनकुक्कुच्चदिट्ठिविनोदनादिना, परिवासादिविनयकम्मकरणेन, पब्बाजनउपसम्पदादिना च धम्मपटिसन्थारो कातब्बो । अयमेत्थ सङ्केपो, वित्थारतो पनायं सङ्घि आनिसंसदीपकवत्थूहि **अट्ठसालिनियं** (ध० स० अट्ठ० १३५१) जातब्बो । एतस्मिं दुविधे पटिसन्थारे कुसलभावो पटिसन्थारकुसलता, तथापवत्तकामावचरजवनानि एव । छब्बीसतिमं ।

इन्द्रियेषु मनच्छट्ठेसु आपाथगतरूपादीसु आरम्भणेषु निमित्तगहणादिना इन्द्रियसंवरभेदसङ्घातो अगुत्तद्वारभावो **इन्द्रियेषु अगुत्तद्वारता** । पटिग्गहणपरिभोगवसेन भोजने मत्तं अजाननभावो **भोजने अमत्तञ्जुता**, तथापवत्तअकुसलचित्तानि । सत्तवीसतिमं ।

अनन्तरदुकेपि वृत्तपटिपक्खवसेन कामावचरसहेतुककुसलकिरियचित्तानि वेदितब्बानि । अट्ठवीसतिमं ।

सतिविष्णवाससङ्घातो मुट्टसतिभावो **मुट्टस्सच्चं**, सब्बे अकुसला धम्मा, असम्पजाननभावो **असम्पजज्जं**, मोहो । एकूनतिसतिमं ।

अनन्तरदुके चतुभूमिका सतिपञ्चाव वुत्ता । तिसतिमं ।

अप्पटिसङ्घाने अप्पटिवानसङ्घाते अकम्पियट्टेन योनिस्सोदस्सनसङ्घातं पटिसङ्घानमेव बलन्ति **पटिसङ्घानबलं**, कामावचरपञ्चाव । सत्तबोज्झङ्गादिभावनावसेन पवत्ता चतुभूमकधम्मा **भावनाबलं** । एकतिसतिमं ।

पच्चनीकधम्मे समेतीति **समथो**, सो तिविधो चित्तसमथो अधिकरणसमथो सब्बसङ्खारसमथोति । तत्थ च पुब्बभागासु अट्टसमापत्तीसु एकग्गता **चित्तसमथो** नाम, सम्मुखविनयादि सत्तविधो **अधिकरणसमथो** नाम, निब्बानं **सब्बसङ्खारसमथो** नाम । इध पन चतुभूमको समाधि अधिप्पेतो । अनिच्चादिवसेन विविधेनाकारेन पस्सतीति **विपस्सना**, लोकियलोकुत्तरा विपस्सनापञ्चाव । बात्तिसतिमं ।

समथोव तं आकारं गहेत्वा पुन पवत्तेतब्बस्स समथस्स निमित्तन्ति **समथनिमित्तं** । **पग्गाहनिमित्तेपि** एसेव नयो । चतुभूमकसमाधिवीरियानि एव । तेत्तिसतिमं ।

अनन्तरदुकेपि वीरियसमाधो एव वुत्ता । चतुत्तिसतिमं ।

सीलविनासिका असंवरसङ्घाता सीलस्स विपत्तीति **सीलविपत्ति**, तथापवत्ता अकुसलधम्मा । सम्मादिट्ठिया विपत्ति **दिट्ठिविपत्ति**, मिच्छादिट्ठि एव । पञ्चतिसतिमं ।

सोरच्चमेव सीलस्स सम्पादनतो सीलपरिपूरणतो सीलस्स सम्पदाति **सीलसम्पदा** । दिट्ठिपारिपूरिभूतं जाणमेव दिट्ठिया सम्पदाति **दिट्ठिसम्पदा** । चतुभूमका सीलपञ्चाव । तथा अनन्तरदुकेपि । छत्तिसतिमं ।

विसुद्धिभावं सम्पत्ता सीलसङ्घाता सीलस्स विसुद्धि **सीलविसुद्धि** । निब्बानसङ्घातं विसुद्धिं पापेतुं समत्था दस्सनसङ्घाता दिट्ठिया विसुद्धि **दिट्ठिविसुद्धि** । सत्तिसतिमं ।

कम्मस्सकतासच्चानुलोमिकमग्गफलसम्पयुत्तपञ्चा **दिट्ठि विसुद्धि** नाम । यथादिट्ठिस्स तदनुरूपं पधानं **यथादिट्ठिस्स च पधानं** नाम । अट्टतिसतिमं ।

संवेगजनकानि जातिजराव्याधिमरणसङ्घातानि कारणानि **संवेजनीयट्ठानानि** नाम, तेसु जातिआदिपटिच्चसमुप्पन्नभयसङ्घातं संविजनं **संवेगो** नाम, तथापवत्तकुसलादि एव । एवं संवेगजातस्स योनिस्सो उपायेन पधानं **संविग्गस्स योनिस्सो पधानं**, लोकियलोकुत्तरवीरियमेव । एकूनचत्तालीसतिमं ।

कुसलधम्मपूरणे असन्तुट्ठिभावो असन्तुट्ठिता । यो पन दानं दत्त्वा ततो तेन असन्तुट्ठो हुत्वा सरणगमनं आकङ्कति, ततो पञ्चसीलादिं, पब्बज्जं, बुद्धवचनानं उग्गण्हनं, समथविपस्सनं, ततो तेनापि असन्तुट्ठो अनुक्कमेन अरहत्तं गण्हाति, अयं **असन्तुट्ठिता कुसलेसु धम्मेसु** । अधिकुसलधम्मानं भावनाय उक्कण्ठमानो पधानं पटिवापेति निवत्तापेतीति पटिवानि, न पटिवानि अप्पटिवानि, तस्स भवो **अप्पटिवानिता** । अरहत्तं अप्पत्वा पधानस्मिं अनिवत्तनता अनोसक्कनता, तथापवत्तलोकियलोकुत्तरकुसला धम्मा । चत्तालीसतिमं ।

विजाननतो **विज्जा**, पुब्बेनिवासचतुपपातआसवक्खयजाणानि । विमुच्चनतो **विमुत्ति**, अट्ट समापत्तियो, निब्बानञ्च । अट्ट समापत्तियो हि आरम्माणे अधिमुच्चनतो, सयं विक्खम्भितकिलेसेहि विमुच्चनट्टेन च विमुत्तीति वुत्ता, निब्बानं पन सब्बकिलेसेहि अच्चन्तविमुच्चनट्टेन । एकचत्तालीसतिमं ।

किलेसक्खयकरेसु चतूसु अरियमग्गेसु जाणं **खये जाणं** नाम । पटिसन्धिवसेन अनुप्पादभूते तंतमग्गवज्झकिलेसानं अनुप्पादपरियोसाने उप्पन्नअरियफले जाणं **अनुप्पादे जाणं** नाम । सेसं सब्बत्थ सुविज्जेय्यमेव । द्वाचत्तालीसतिमं ।

सुत्तन्तिकदुकमातिकथवण्णना निट्ठिता ।

मोहविच्छेदनिया अभिधम्ममातिकथवण्णनाय

धम्मसङ्गणीमातिकथवण्णना निट्ठिता ।

## २. विभङ्गमातिका

इदानीं धम्मसङ्गणीमातिकानन्तरं विभङ्गमातिकाय अत्थवण्णना अनुपत्ता । तस्सा पन —

अत्थतो धम्मभेदेन, विभङ्गनयदस्सना ।  
पाळिमुत्तनया चापि, होति संवण्णनानयो॥

सा पनेसा अट्टारसन्नं विभङ्गानं आदिमिं ठपिता अट्टारसविधा होति — खन्धविभङ्गमातिका-आयतन-धातु-सच्च-इन्द्रिय-पच्चयाकार-सतिपट्टान-सम्मपधान-इद्धिपादबोज्झङ्ग-मग्गङ्गज्ञान-अप्पमज्जा-सिक्खापद-पटिसम्भिदा-जाण-खुदकवत्थु-धम्महृदयविभङ्गमाति

### खन्धविभङ्गमातिकथवण्णना

तत्थ आदिभूताय खन्धविभङ्गमातिकाय अत्थतो ताव — पञ्चकखन्धाति एत्थ पञ्चाति गणनपरिच्छेदो, तेन न ततो हेट्ठा, न उद्धन्ति दस्सेति । खन्धाति परिच्छिन्नधम्मनिदस्सनं । तत्रायं खन्ध-सद्वो सम्बहुलेसु ठानेसु निपतति रासिस्मिं गुणे पण्णत्तियं रुद्धियन्ति । तत्थ “महाउदकखन्धो”तिआदीसु (सं० नि० ५.१०३७; अ० नि० ४.५१; ५.४५; ६.३७) हि रासितो खन्धो नाम । “सीलकखन्धो समाधिकखन्धो”तिआदीसु (दी० नि० ३.३५५) गुणतो । “अदसा खो भगवा महन्तं दारुखन्धो”तिआदीसु (सं० नि० ४.२४१) पण्णत्तितो । “विज्जाणं विज्जाणकखन्धो”तिआदीसु (ध० सं० ६३) एकमि चित्तं रुद्धितो खन्धो नाम, स्वायमिथ रासितो अधिप्पेतो । रासद्वो हि खन्ध-सद्वो, कोट्टासद्वोतिपि वत्तुं वट्टति । लोकस्मिं हि इणं गहेत्वा चोदियमाना “द्वीहि खन्धेहि दस्साम, तीहि खन्धेहि दस्सामा”ति वदन्ति, तस्मा खन्धोति कोट्टासोति वुत्तं होति । रूपकखन्धोति एत्थ रूपतीति रूपं, सीतुण्हादीहि पसिद्धाकारेन रूपति घट्टीयति, पीळियतीति अत्थो । वुत्तं हेतं भगवता —

“रूपतीति खो, भिक्खवे, तस्मा रूपन्ति वुच्चति । केन रूपति? सीतेनपि रूपति, उण्हेनपि रूपति, जिघच्छायपि रूपति, पिपासायपि रूपती”तिआदि (सं० नि० ३.७९) ।

रूपञ्च तं खन्धो चाति रूपकखन्धो, रूपरासि रूपकोट्टासोति अत्थो । वेदनाकखन्धादीसुपि एसेव नयोति अयं तावेत्थ अत्थतो संवण्णनानयो ।

धम्मभेदतो पनेत्थ हेट्ठा कुसलत्तिके विभत्ता अतीतादिभेदभिन्ना सब्बे रूपधम्मा रूपकखन्धो नाम । तथा चतुभूमका वेदनासज्जायो वेदनाकखन्धो नाम, सज्जाकखन्धो नाम । वेदनासज्जा पन ठपेत्वा सेसा फस्सादयो पज्जास चेतसिका सङ्गारकखन्धो नाम । पञ्चसु खन्धेसु निब्बानमेव असङ्गहितं, उपादानकखन्धेसु पन सब्बे लोकुत्तरधम्मा । अयमेव हि खन्धेहि उपादानकखन्धानं विसेसो । खन्धा अविसेसतो वुत्ता, उपादानकखन्धा सासवोपादानियभावेन विसेसेत्वा । इध पन अविसेसेन वुत्तत्ता निब्बानं ठपेत्वा अवसेसा सब्बे धम्मा सङ्गहं गच्छन्तीति अयं धम्मभेदतो संवण्णनानयो ।

विभङ्गनयदस्सनाति विभङ्गपाळिया आगतअत्थनयदस्सनतो । विभङ्गपाळियं हि सुत्तन्तभाजनीयं अभिधम्मभाजनीयं पञ्हापुच्छकन्ति तीहि नयेहि खन्धविभङ्गो विभत्तो । तथा आयतनविभङ्गादयो । केवलं हि इन्द्रियविभङ्गे, सिक्खापदविभङ्गे च सुत्तन्तभाजनीयं नत्थि । पच्चयाकारविभङ्गे पञ्हापुच्छकं नत्थि । जाणविभङ्गादीसु पन तीसु तयोपि नया न सन्ति । तेसु हि जाणविभङ्गो एकविधतो पट्टाय याव दसविधा विभत्तो, खुदकवत्थुविभङ्गो एकविधतो पट्टाय याव द्वासट्ठिपभेदा विभत्तो, धम्महृदयविभङ्गो पन सब्बसङ्गहादीहि दसहि वारेहि विभत्तो, तस्मा तेसं तेसं नयानं मुखमत्तदस्सनवसेन तत्थ तत्थ संवण्णना भविस्सन्ति । तत्रिदं खन्धविभङ्गे तिण्णं नयानं मुखमत्तदस्सनं । सेय्यथिदं — सुत्तन्तभाजनीये ताव रूपकखन्धो —

“तत्थ कतमो रूपकखन्धो? यं किञ्चि रूपं अतीतानागतपच्चुप्पन्नं अज्झत्तं वा बहिद्धा वा ओळारिकं वा सुखुमं वा हीनं वा पणीतं वा यं दूरे सन्तिके वा, तदेकज्झं अभिसज्जूहित्वा अभिसङ्खिपित्वा अयं वुच्चति रूपकखन्धो”ति (विभ० २) —

एवं उद्दिस्सित्वा वित्थारतो विभत्तो, तथा वेदनाकखन्धादयोपि । तत्थ नियकज्झत्तं नाम अज्झत्तरूपं अज्झत्तं नाम, ततो अज्जं परपुग्गलगतं, अविज्जाणञ्च बहिद्धा नाम, तथा वेदनादयोपि । पसादविसयरूपं पन ओळारिकं नाम, सेसं सुखुमं नाम । अनिट्ठरूपं हीनं नाम, इट्ठरूपं पणीतं नाम ।

ननु इट्ठानिट्ठं नाम पाटेक्कं पटिविभत्तं नाम नत्थि, एकं एकच्चस्स इट्ठं होति मनापं, तदेव अज्जस्स च अनिट्ठं होति । वत्थादीनि हि सूकरादीनं नप्पियानि होन्ति, न मनुस्सादीनं, तेसज्ज वत्थाभरणादीनि पियानि, न सूकरादीनन्ति, तस्मा रुचिवसेनेव इट्ठानिट्ठता गहेतब्बा? न, इट्ठानिट्ठानं पाटेक्कं विभत्तत्ता । कुसलकम्मजं हि कुसलविपाकविसयोव इट्ठं नाम, अकुसलकम्मजं अकुसलविपाकविसयोव अनिट्ठं नाम, सज्जाविपल्लासेन पन कोचि इट्ठमेव बुद्धरूपादिं जवनकखणे अनिट्ठतो मनसि करोति, अनिट्ठञ्च निरयगिसत्थविसादिं इट्ठतो मनसि करोति । जवनेहि एव विपल्लासभावो, न विपाकेहीति विपाकवसेन इट्ठानिट्ठं नियतं वेदितब्बं ।

सम्मोहविनोदनिया पन विभङ्गद्वकथाय —

“सुखसम्पत्सं हि गूथकललं चकखुद्वारघानद्वारेसु अनिट्टं, कायद्वारे इट्टं होति । चक्कवत्तिनो मणिरतनेन पोथियमानस्स, सुवण्णसूले उत्तासियमानस्स च मणिरतनसुवण्णसूलानि चकखुद्वारे इट्टानि होन्ति, कायद्वारे अनिट्टानी”ति (विभ० अट्ट० ६) —

एवं द्वारवसेन एकस्सेव वत्थुनो इट्टता, अनिट्टता च वुत्ता । सा च एकक्खणे न युत्ता एककलापगतभूतोपादायरूपानं एकसामगियमुप्पत्तितो । न हि भूतेसु अकुसलवसेन अनिट्टेसु उप्पज्जन्तेसु तदुपादायरूपादिकुसलेन इट्टानि उप्पज्जन्ति, भिन्नक्खणे पन इट्टानि मणिरतनादीनि तेहि पोथियमानस्स अकुसलपच्चयेन उतुना अनिट्टानि विपरिणमन्ति, कुसलपच्चयेन अनिट्टानि गूथकललादीनि इट्टानीति, अयं नो अत्तनोमति । एवं विभत्तेसु च इट्टानिट्टेसु तं तं रूपं उपादायुपादाय हीनं, पणीतज्ज दट्टब्बं । सुखुमं पन रूपं दूरेरूपं नाम, ओळारिकं सन्निकेरूपं नाम । तं तं वा पन रूपं उपादायुपादाय रूपं दूरे सन्निके दट्टब्बं । सेसं वुत्तनयमेव ।

वेदनादीसु पन अकुसला वेदना ओळारिका, इतरा सुखुमा । कुसलाकुसला ओळारिका, अब्याकता सुखुमा । दुक्खा वेदना ओळारिका, इतरा सुखुमा । सुखदुक्खा वा ओळारिका, इतरा सुखुमा । असमापन्नस्स वा वेदना ओळारिका, समापन्नस्स सुखुमा । सासवा ओळारिका, अनासवा सुखुमा । तं तं वा पन वेदनं उपादायुपादाय ओळारिकसुखुमता दट्टब्बा । अकुसला वेदना कुसलाब्याकताहि दूरे, ता च ताय दूरेति एवं जातिसभावपुगलभूमिभेदतो वुत्तनयेन दूरेवेदना दट्टब्बा, कुसला वेदना कुसलाय सन्निकेति एवं जातिआदिसामज्जतो सन्निकेवेदना दट्टब्बा । तं तं वा पन वेदनं उपादायुपादाय वेदना दूरेसन्निके दट्टब्बा । एवं सज्जाक्खन्धादीसुपि यथानुरूपं ओळारिकसुखुमतादयो वेदितब्बाति । अयमेत्थ सङ्खेपो, वित्थारो पन विभङ्गपाळिअट्टकथासु (विभ० ८ आदयो; विभ० अट्ट० ८ आदयो) गहेतब्बोति अयं सुत्तन्तभाजनीयनयो ।

अभिधम्मभाजनीयनये रूपक्खन्धस्स ताव एकविधादितो याव एकादसविधा रूपकण्डे वुत्तनयेन वेदितब्बा । वेदनाक्खन्धो पन एकविधो फस्ससम्पयुत्तो, दुविधो सहेतुकदुकवसेन, तिविधो कुसलत्तिकवसेन, चतुर्विधो चतुभूमकवसेन, पञ्चविधो सभावभेदेन, छब्बिधो छद्धारिकवसेन, सत्तविधो सत्तविज्जाणसम्पयोगवसेन, अट्टविधो तेसु कायविज्जाणसम्पयुत्तं सुखदुक्खवसेन द्विधा भिन्दित्वा, नवविधो तेसु मनोविज्जाणसम्पयुत्तं कुसलत्तिकवसेन तिधा भिन्दित्वा, दसविधो तेसु कायविज्जाणसम्पयुत्तं दुविधा, मनोविज्जाणसम्पयुत्तज्ज तिधा भिन्दित्वाति एवं सहेतुकदुकमूलं पठमवारं वत्त्वा पुन कुसलत्तिकद्वाने वेदनात्तिकपीतित्तिकसनिदस्सनत्तिकवज्जिते सब्बत्तिके योजेत्त्वा याव दसविधा, अपरेपि अट्टारस वारा वुत्ता । यथा चेत्थ सहेतुकदुकमूलिका सब्बत्तिकयोजना, एवं हेतुसम्पयुत्तदुकादीसु अनुरूपदुकमूलिकापि सरणदुकपरियोसाना पच्चकं सब्बत्तिकयोजनापि वेदितब्बाति अयं दुकमूलको योजनानयो । यथा च एकेकदुकेन सब्बत्तिकयोजनावसेन दुकमूलको नयो वुत्तो, एवं एकेकत्तिकेन यथानुरूपं सब्बदुकयोजनावसेन तिकमूलको, तदुभयमिस्सकवसेन उभतोवट्ठनको च नयो वेदितब्बो । यथा चेत्थ वेदनाक्खन्धे, एवं सज्जाक्खन्धादीसुपि यथारहं दुकमूलकादिनया वेदितब्बाति अयं अभिधम्मभाजनीयनयो ।

पङ्हापुच्छकनये पन पञ्चन्नं खन्धानं कति कुसला, कति अकुसला, कति अब्याकता, कति सुखाय वेदनाय सम्पयुत्ता...पे०... कति सरणा, कति अरणाति? रूपक्खन्धो अब्याकतो, चत्तारो खन्धा सिया कुसला, सिया अकुसला, सिया अब्याकता, रूपं, वेदना च वेदनात्तिके न वत्तब्बा, सेसा तिधापि होन्ति, रूपं नेवविपाकनविपाकधम्मधम्मं, सिया उपादिन्नुपादानियं, सिया अनुपादिन्नुपादानियं, असंकलिट्टसंकिलेसिकं, सेसा चत्तारो खन्धा तीहि तिकेहि तिधापि होन्ति । रूपं अवितक्कअविचारं, तयो खन्धा तिधापि होन्ति, सङ्खारक्खन्धो तिधा च न वत्तब्बो च । रूपं न वत्तब्बं, वेदना सिया पीतिसहगता, न वत्तब्बा, तयो तिधा च न वत्तब्बा च । रूपं नेवदस्सनेननभावनायपहातब्बं, नदस्सनेननभावनायपहातब्बहेतुकं, नेवाचयगामिनअपचयगामि, नेवसेखंनासेखं, परित्तं, सेसा तिधापि होन्ति । परित्तरम्मणत्तिके रूपं अनारम्मणं, सेसा तिधा च न वत्तब्बा च । रूपं मज्झिमं, अनियतं, सेसा तिधापि । मग्गारम्मणत्तिके च रूपं अनारम्मणं, सेसा तिधापि वा न वत्तब्बा । उप्पन्नातीतत्तिकेसु पञ्चपि तिधा होन्ति । अतीतारम्मणत्तिके रूपं अनारम्मणं, सेसा तिधा च न वत्तब्बा च । अज्झत्तत्तिके पञ्चपि तिधा होन्ति । अज्झत्तारम्मणत्तिके रूपं अनारम्मणं, सेसा तिधापि न वत्तब्बा च । चत्तारो खन्धा अनिदस्सनअप्पटिघा, रूपक्खन्धो तिधापि होति ।

चत्तारो खन्धा नहेतू, सङ्खारक्खन्धो सिया हेतु, सिया न हेतु । रूपं अहेतुकं, हेतुविष्णयुत्तं, सेसा द्विधापि । तयो खन्धा सिया सहेतुका चेव न च हेतू, सिया न वत्तब्बा च, सङ्खारक्खन्धो द्विधा च न वत्तब्बो च, रूपं न वत्तब्बमेव । तथा अनन्तरदुकेपि । रूपं नहेतुअहेतुकं, तयो द्विधापि, सङ्खारक्खन्धो द्विधा च न वत्तब्बो च । पञ्चपि सप्पच्चया, सङ्खता, चत्तारो अनिदस्सना, अप्पटिघा, रूपं द्विधापि । रूपं रूपी, सेसा अरूपिनो । रूपं लोकियं, सेसा द्विधापि । पञ्चपि केनचि विज्जेय्या, न च केनचि विज्जेय्या च । चत्तारो नो आसवा, सङ्खारा द्विधापि, न वत्तब्बा च । रूपं सासवो, आसवविष्णयुत्तो, सेसा द्विधापि । रूपं सासवा चेव नो च आसवा, तयो तथा च न वत्तब्बा च । सङ्खारो द्विधा च न वत्तब्बो च । रूपं न वत्तब्बमेव, तयो सिया आसवसम्पयुत्ता चेव नो च आसवा, सिया न वत्तब्बा, सङ्खारो द्विधा च न वत्तब्बो च । रूपं आसवविष्णयुत्तं सासवज्ज, सेसा द्विधा च न वत्तब्बा च । इमिना नयेन संयोजनगोच्छकादीसुपि योजना वेदितब्बा । केवलं हि परामाससम्पयुत्तदुके रूपं परामासविष्णयुत्तं, तयो द्विधापि, सङ्खारो द्विधापि, दिट्ठिवसेन न वत्तब्बो च । ततिये एत्तकमेव विसेसो । रूपं अनारम्मणं, सेसा सारम्मणा । विज्जाणं चित्तं, सेसा नो चित्ता । तयो चेतसिका, द्वे अचेतसिका । तयो चित्तसम्पयुत्ता, रूपं चित्तविष्णयुत्तं । विज्जाणं न वत्तब्बं । तथा चित्तसंसट्ठदुकेपि । तयो चित्तसमुट्ठाना, विज्जाणं नो चित्तसमुट्ठानं । रूपं द्विधापि । तथा अनन्तरदुकद्वयेपि । तयो चित्तसंसट्ठसमुट्ठाना, द्वे नो चित्तसंसट्ठसमुट्ठाना । तथा अनन्तरदुकद्वयेपि । विज्जाणं अज्झत्तिकं, तयो बाहिरा, रूपं द्विधापि । चत्तारो नो उपादा । रूपं द्विधापि । पञ्चपि सिया उपादिन्ना,



सिया अनुपादिन्ना, नो उपादाना ।

किलेसगोच्छको वुत्तनयोव । रूपं नेवदस्सनेननभावनाय पहातब्बं, सेसा द्विधापि । एवं यावपीतिदुका योजना वेदितब्बा ।

रूपं न वेदना, न सुखा, न सुखसहगता, सेसा द्विधापि । तथा अनन्तरदुकेपि । रूपं कामावचरं, सेसा द्विधापि । एवं याव सरणदुका योजना वेदितब्बा । अयं पञ्हापुच्छकनयो ।

इमे पन नया वित्थारतो पाळिअट्ठकथाहि जातब्बा । अत्थविनिच्छयो च नेसं धम्मसङ्गणीमातिकत्थसंवण्णनाय वुत्तानुसारेन जातब्बो । इतो परं अतिरेकं अवत्त्वा अपुब्बमेव वण्णयिस्सामाति अयं विभङ्गनयदस्सनतो संवण्णनानयो ।

इदानी पनेत्थ —

कमतोनूनाधिकतो, दट्ठब्बसमभेदतो ।

पाळिमुत्तनयो जेय्यो, खन्धकोसल्लमिच्छता ॥

तत्थ **कमतो**ति एत्थ उप्पत्तिक्कमो पहानक्कमो पटिपत्तिक्कमो भूमिक्कमो देसनाक्कमोति बहुविधेसु कमेसु खन्धानं देसनाक्कमोव युज्जति, न इतरे, असम्भवा । अभेदेन हि पञ्चसु खन्धेसु अत्तग्गाहपतितं वेनेय्यजनं समूहघनविनिब्भोगदस्सनेन अत्तग्गाहतो मोचेतुकामो भगवा हितकामो तस्स तस्स जनस्स सुखगहणत्थं चक्खुआदीनं विसयभूतं ओळारिकं पठमं रूपक्खन्धं देसेसि, ततो इट्ठानिद्विसयसंवेदकं ओळारिकं वेदनं, यं वेदेति, तं सज्जानातीति एवं वेदनाविसयस्स आकारग्गाहिकं सज्जं, सज्जावसेनाभिसङ्खारके सङ्खारे, तेसं वेदनादीनं निस्सयाधिपतिभूतं विज्जाणन्ति अयं तावेत्थ कमो ।

**अनूनाधिकतो**ति कस्मा पन भगवता पञ्चेव खन्धा वुत्ता अनूना अनधिकति? सब्बसङ्खतसभागोकसङ्गहतो, अत्तत्तनियग्गाहवत्थुस्स एतप्परमतो, अज्जेसज्ज तदवरोधतो । अनेकप्पभेदेसु हि सङ्खतधम्मेषु सभागवसेन सङ्गहमानेसु रूपं रूपसभागोकसङ्गहवसेन एको खन्धो होति, वेदना वेदनासभागोकसङ्गहवसेन एको खन्धो होति । एस नयो सज्जादीसुपि, तस्मा सब्बसङ्खतसभागोकसङ्गहतो पञ्चेव वुत्ता । एतपरमज्चेतं अत्तत्तनियग्गाहवत्थु, यदिदं रूपादयो पञ्च, तस्मा अत्तत्तनियग्गाहवत्थुस्स एतपरमतोपि पञ्चेव वुत्ता । येपि चज्जे सीलादयो पञ्च धम्मक्खन्धा वुत्ता, तेपि सङ्खारक्खन्धपरियापन्नत्ता एत्थेव अवरोधं गच्छन्ति, तस्मा अज्जेसं तदवरोधतोपि पञ्चेव वुत्ताति अयं अनूनाधिकतो ।

**दट्ठब्बसमभेदतो**ति दट्ठब्बभेदतो, उपमाभेदतो च । तत्थ दट्ठब्बभेदतो ताव पञ्चुपादानक्खन्धा सामज्जतो उक्खित्तासिकपच्चत्थिकतो, भारतो, खादकतो, अनिच्चदुक्खअनत्तसङ्गातवधकतो च दट्ठब्बा । विसेसतो पन फेणपिण्डं विय रूपं दट्ठब्बं, उदकबुब्बुळमरीचिककदलिक्खन्धमाया विय यथाक्कमं वेदनादयो दट्ठब्बा । यथा हि फेणपिण्डो विमद्दासहो, सो च पत्तथालकादिअत्थं गहितोपि तमत्थं न सार्धेति, भिज्जति, एवं रूपम्पि विमद्दासहं, तज्ज सुभादिवसेन गहितम्पि न तथा तिट्ठति, असुभादियेव होति ।

यथा वा फेणपिण्डो अनेकसन्धिघटितो बहुन्नं उदकसप्पादिपाणकानं आवासो, आदितो चेस बदरपक्कमतो हुत्वा अनुपुब्बवट्ठनको उट्ठितमतोपि चेस भिज्जति, थोकं गन्त्वापि, समुद्दं पत्त्वा पन अवस्समेव भिज्जति, एवं रूपम्पि छिद्दावछिद्दं अनेकसन्धिघटितं असीतिकिमिकुलवोकिण्णं, आदितो चेत्तं कललमतं हुत्वा अनुपुब्बवट्ठनकं, कललमतोपि चेत्तं भिज्जति, अब्बुदादिभावेपि आयुक्खयं पत्त्वा अवस्समेव भिज्जति । एवं फेणपिण्डसदिसं दट्ठब्बं ।

यथा पन बुब्बुळो मुहुत्तरमणीयो अगट्ठुपगो न चिरट्ठितिकोव, एवं वेदनापि । यथा च बुब्बुळो उदकतलं, उदकबिन्दुं, उदकजल्लकं सङ्कट्ठित्वा पुटं कत्वा गहणवातज्जाति चत्तारि कारणानि पटिच्च उप्पज्जति, एवं वेदनापि वत्थुं, आरम्भणं, किलेसजल्लं, फस्ससङ्गट्ठनज्जाति चत्तारि कारणानि पटिच्च उप्पज्जतीति सा बुब्बुळसदिसा दट्ठब्बा ।

यथा पन मरीचिका जलासयादिभावेन विप्पलम्भिका, एवं सज्जापि निच्चादिभावेनाति मरीचिसदिसा दट्ठब्बा । यथा पन कदलिक्खन्धो अगट्ठुपगो बहुवट्ठिसमोधानो, एवं सङ्खारक्खन्धोपि अगट्ठुपगोनिच्चादिसारविरहितो, फस्सादिबहुधम्मसमोधानो च होतीति सो कदलिक्खन्धसदिसो दट्ठब्बो । यथा पन माया असुवण्णरजतादिरूपानिपि तथा गाहापेत्वा महाजनं वज्जेति, एवं विज्जाणम्पि अनिच्चादिरूपं तेनेव चित्तेन आगच्छन्तं विय निच्चादितो च गाहापेत्वा वज्जेतीति तं मायासदिसं दट्ठब्बं । वुत्तज्ज —

“फेणपिण्डूपमं रूपं, वेदना बुब्बुळूपमा ।

मरीचिकूपमा सज्जा, सङ्खारा कदलूपमा ।

मायूपमज्ज विज्जाणं, देसितादिच्चबन्धुना”ति ॥ (सं० नि० ३.९५) ।

अयमेत्थ दट्ठब्भेदो।

**उपमाभेदतो** च पन गिलानसालूपमो रूपुपादानक्खन्थो, गेलज्जूपमो वेदनुपादानक्खन्थो, गेलज्जसमुद्धानूपमो सज्जुपादानक्खन्थो, असप्पायसेवनूपमो सङ्खारुपादानक्खन्थो, गिलानूपमो विज्जाणुपादानक्खन्थो। अपिच चारककारणअपराधकारणकारकअपराधिकूपमा एते भाजनभोजनव्यञ्जनपरिवेसकभुञ्जकूपमा चाति अयमेत्थ उपमाभेदो। एवं **पाळिमुत्तकविनिच्छयनयो** जेय्यो।

खन्धविभङ्गमातिकथवण्णना निड्ढिता।

### आयतनविभङ्गमातिकथवण्णना

आयतनविभङ्गमातिकाय पन **अत्थतो** ताव — **द्वादसायतनानीति** एत्थ आयतनतो, आयानं तननतो, आयतस्स च नयनतो **आयतनानि**। चक्खुरूपादीसु हि तंतं द्वारारम्मणा चित्तचेतसिका धम्मा सेन सेन अनुभवनादिना किच्चेन आयतन्ति उपट्ठहन्ति घटन्ति वायमन्ति, ते च पन आयभूते धम्मे एतानि तनोन्ति वित्थारेन्ति, इदञ्च अतीव आयतं संसारदुक्खं नयन्तेव, पवत्तयन्तीति वुत्तं होति, तस्मा “आयतनानी”ति वुच्चन्ति।

अपिच निवासट्ठानट्ठेन, आकरट्ठेन, समोसरणट्ठानट्ठेन, सज्जाभिदेसट्ठेन, कारणट्ठेन च सासने, लोके च “आयतन”न्ति वुच्चन्ति। चक्खुआदीसु हि ते ते चित्तचेतसिका धम्मा तदायत्तवुत्तिताय निवसन्ति, तेसु च आकरभूतेसु आकिण्णा वत्थारम्मणवसेन च समोसरन्ति, चक्खादयोव नेसं सज्जातिदेसो, कारणञ्च, तस्मा निवासट्ठानादिना अत्थेन चक्खादीनि आयतनानीति वेदितव्वानि।

**चक्खायतनन्ति** आदीसु चक्खतीति **चक्खु**, रूपं अस्सादेति, विभावेति चाति अत्थो। रूपयतीति **रूपं**। वण्णविकारं आपज्जमानं हृदयङ्गतभावं पकासेतीति अत्थो। सुणातीति **सोतं**। सप्पतीति **सद्दो**, उदाहरीयतीति अत्थो। घायतीति **घानं**। गन्धयतीति **गन्धो**, अत्तनो वत्थुं सूचयतीति अत्थो। जीवितं अवायतीति **जिव्हा**। रसन्ति तं सत्ताति **रसो**, अस्सादेन्तीति अत्थो। कुच्छित्तानं सासवधम्मानं आयोति **कायो**, उप्पत्तिदेसो। फुसीयतीति **फोट्टब्बं**। मनतीति **मनो**। अत्तनो लक्खणं धारेन्तीति **धम्मा**। चक्खु च तं यथावुत्तेनत्थेन आयतनञ्चाति **चक्खायतनं**...पे०... धम्मा च ते आयतनञ्चाति **धम्मायतनन्ति** अयं तावेत्थ पदत्थो।

**धम्मभेदतो** पनेत्थ सब्बम्पि विज्जाणं मनायतनं नाम। चेतसिकसुखुमरूपनिब्बानानि धम्मायतनं नाम। सेसानि सुविज्जेय्यानि। इमेसु च आयतनेसु अतीतादिभेदभिन्ना, कालविनिमुत्ता च लोकियलोकुत्तरा सब्बे नामरूपधम्मा, पज्जत्तियो च सङ्गहिताति वेदितव्वा। “जाति द्वीहि खन्धेहि एकेनायतनेन एकाय धातुया सङ्गहिता”ति आदिवचनतो (धातु० ७१) हि रूपारूपलक्खणानं जातिजराभङ्गानं सङ्खारक्खन्धधम्मायतनधम्मधातूसु सङ्गहितत्ता इतरासम्पि पज्जत्तीनं यथारहं तत्थ सङ्गहितभावो वेदितव्वोति अयमेत्थ धम्मभेदो।

**विभङ्गनयतो** पनेत्थ **सुत्तन्तभाजनीये** ताव “चक्खुं अनिच्चं दुक्खं अनत्ता विपरिणामधम्मं। रूपा अनिच्चा दुक्खा अनत्ता विपरिणामधम्मा...पे०... धम्मा अनिच्चा दुक्खा अनत्ता विपरिणामधम्मा”ति (विभ० १५४) एवं विसयिविसयायतनवसेन आयतनानि वुत्तानीति अयं सुत्तन्तभाजनीयनयो।

**अभिधम्मभाजनीये** पन पसादविसयायतनानि ताव “तत्थ कतमं चक्खायतनं? यं चक्खु चतुन्नं महाभूतानं उपादाय पसादो”ति आदिना (विभ० १५६) **रूपकण्डे** (ध० स० ५९७) वुत्तनयेन विभत्तानि। मनायतनं पन एकविधतो पट्ठाय यावदसविधा वेदनाक्खन्धे वुत्तनयेन विभत्तं। धम्मायतनं पन “तत्थ कतमं धम्मायतनं? वेदनाक्खन्धो सज्जाक्खन्धो सङ्खारक्खन्धो, यच्च रूपं अनिदस्सनअप्पटिघं धम्मायतनपरियापन्नं असङ्गता च धातू”ति (विभ० १६७) उद्दिस्त्वा “तत्थ कतमो वेदनाक्खन्धो”ति आदिना (विभ० १६७) वेदनाक्खन्धादीसु वुत्तनयेन विभत्तं। सुखुमरूपनिब्बानानि रूपकण्डे वुत्तनयानेवाति अयं अभिधम्मभाजनीयनयो।

**पज्हापुच्छकनयं** पन इतो परं वित्थारतो अदस्सेत्वा तिकदुकानं आदिअन्तेहि चेव विसेसत्थदीपकेहि च तिकदुकेहि योजेत्वा दस्सयिस्साम, सेसेहिपि तिकदुकेहि योजनानयो खन्धे वुत्तनयेन सक्का जातुन्ति। कथं द्वादसन्नं आयतनानं कति कुसला...पे०... कति अरणानि? दसायतना अब्बाकता, द्वायतना सिया कुसला, सिया अकुसला, सिया अब्बाकता। वेदनात्तिके दसायतनानि न वत्तव्वानि, मनायतनं तिधापि, धम्मायतनं तिधा न वत्तव्वञ्च...पे०... रूपायतनं सनिदस्सनसप्पटिघं, नवायतनानि अनिदस्सनसप्पटिघानि, मनायतनधम्मायतनानि अनिदस्सनअप्पटिघानि, एकादसायतनानि न हेतू, धम्मायतनं सिया हेतु, सिया न हेतु...पे०... एकादसायतनानि सप्पच्चयानि, धम्मायतनं सिया सप्पच्चयं, सिया अप्पच्चयं...पे०... दसायतनानि रूपं, मनायतनं अरूपं, धम्मायतनं द्विधापि...पे०... दसायतनानि अरणानि, द्वायतनानि सिया सरणानि, सिया अरणानीति अयं पज्हापुच्छकनयो।

इदानी पन —

कमतो तावत्ततो च, तेसं दट्ठब्भेदतो।

पाळिमुत्तनयेनेत्थ, विज्जातब्बो विनिच्छयो ॥

तत्थ कमतोति इधापि देसनाक्कमोव युज्जति । अज्झत्तिकेसु हि आयतनेसु सनिदस्सनसप्पटिघविसयत्ता चक्खायतनं पाकटन्ति पठमं देसितं, ततो अनिदस्सनसप्पटिघविसयानि सोतायतनादीनि । अथ वा दस्सनानुत्तरियसवनानुत्तरियहेतुभावतो बहूपकारत्ता चक्खुसोतायतनानि पठमं देसितानि, ततो घानायतनादीनि तीणि, पञ्चन्नम्पि पन गोचरविसयत्ता अन्ते मनायतनं, चक्खायतनादीनं गोचरत्ता तेसं अनन्तरं रूपायतनादीनि । अपिच विज्जाणुप्पत्तिकारणववत्थानतोपि अयमेतेसं कमो वेदितब्बो । वुत्तं हेतं “चक्खुञ्च पटिच्च रूपे च उप्पज्जति चक्खुविज्जाणं...पे०... मनञ्च पटिच्च धम्मो च उप्पज्जति मनोविज्जाणं”न्ति (म० नि० ३.४२१; सं० नि० ४.६०, ११३; महानि० १०७) अयं तावेत्थ कमो ।

तावत्ततोति तावभावतो । इदं वुत्तं होति — चक्खादयोपि हि धम्मा एव, एवं सति धम्मायतनमिच्चेव अवत्वा कस्मा द्वादसायतनानि वुत्तानीति चे? छविज्जाणकायुप्पत्तिया द्वारारम्मणववत्थानतो अयमेतेसं भेदो होतीति द्वादस वुत्तानि । चक्खुविज्जाणवीथिपरियापन्नस्स हि विज्जाणकायस्स चक्खायतनमेव उप्पत्तिद्वारं, रूपायतनमेवारम्मणं । तथा इतरानि इतरेसं । छट्ठस्स पन भवङ्गमनसङ्घातो मनायतनेकदेसोव उप्पत्तिद्वारं, असाधारणञ्च धम्मायतनं आरम्मणन्ति । इति छन्नं विज्जाणकायानं उप्पत्तिद्वारारम्मणववत्थानतो द्वादस वुत्तानीति अयमेत्थ तावत्तता ।

दट्ठब्बभेदतोति एत्थ पन सब्बानि चेतानि आयतनानि अनागमनतो, अनिगमनतो च दट्ठब्बानि । न हि तानि पुब्बे उदया कुतोचि आगच्छन्ति, नपि उद्धं वया कुहिञ्चि गच्छन्ति, अथ खो पुब्बे उदया अप्पटिलद्धसभावानि उद्धं वया परिभिन्नसभावानि, पुब्बन्तापरन्तवेमज्झे पच्चयायत्तवुत्तिताय अवसानि पवत्तन्ति, तस्मा अनागमनतो, अनिगमनतो च दट्ठब्बानि । तथा निरीहतो, अब्यापारतो च । न हि चक्खुरूपादीनं एवं होति “अहो वत अम्हाकं सामगियं विज्जाणं नाम उप्पज्जेय्या”ति, न च तानि विज्जाणुप्पादनत्थं द्वारभावेन, वत्थुभावेन, आरम्मणभावेन वा व्यापारमापज्जन्ति, अथ खो धम्मतावेसा यं चक्खुरूपादिसामगियं चक्खुविज्जाणादीनि सम्भवन्ति, तस्मा निरीहतो, अब्यापारतो च दट्ठब्बानि । अपिच अज्झत्तिकानि सुज्जो गामो विय दट्ठब्बानि धुवसुभसुखत्तभावविरहितत्ता, बाहिरानि गामघातकचोरा विय । तथा अज्झत्तिकानि छपाणका विय दट्ठब्बानि, बाहिरानि तेसं गोचरा वियाति अयमेत्थ दट्ठब्बभेदो । एवं पाळिमुत्तनयेनेत्थ विज्जातब्बो विनिच्छयो ।

आयतनविभङ्गमातिकथवण्णना निट्ठिता ।

### धातुविभङ्गमातिकथवण्णना

धातुविभङ्गमातिकाय पन अत्थतो ताव — अट्ठारस धातुयोति एत्थ विदहति, धीयते, विधानं, विधीयते एताय, एत्थ वा धीयतीति धातु । लोकिया हि धातुयो कारणभावेन ववत्थिता । अनेकप्पकारं संसारदुक्खं विदहन्ति निष्फादेन्ति, सत्तेहि च धीयन्ते धारीयन्ति, दुक्खविधानमत्तमेव चेता, एताहि च कारणभूताहि संसारदुक्खं सत्तेहि अनुविधीयति, यथाविहितञ्च दुक्खं एतास्वेव धीयति ठपीयतीति एतेहि अत्थेहि यथासम्भवं “धातुयो”ति वुच्चन्ति ।

यथा वा सरीरसङ्घातस्स समुदायस्स अवयवभूतेसु रससोणितादीसु अज्जमज्जं विसभागलक्खणपरिच्छिन्नेसु धातुसमज्जा, एवमेतेसुपि पञ्चक्खन्धसङ्घातस्स अत्तभावस्स चक्खादीसु धातुसमज्जा वेदितब्बा । लोकियलोकुत्तरसाधारणत्थवसेन पन अत्तनो सभावं धारेन्तीति धातुयो । निज्जीवमत्तानमेतं अधिवचनं, तस्मा यथावुत्तेनत्थेन चक्खु च तं धातु चाति चक्खुधातु । एवं सेसेसुपीति अयं तावेत्थ पदत्थो ।

धम्मभेदतो पनेत्थ आयतनेसु वुत्तनयेन वेदितब्बो । अपिच पञ्चद्वारावज्जनसम्पटिच्छनद्वयविज्जाणं मनोधातु नाम । पञ्चविज्जाणमनोधातुवज्जितं पन सब्बम्पि विज्जाणं मनोविज्जाणधातु नाम । सेसं सुविज्जेय्यमेव ।

विभङ्गनयतो पनेत्थ सुत्तन्तभाजनीये ताव — “पथवीधातु आपो तेजो वायो आकासविज्जाणधातू”ति छ धातुयो उद्दिसित्वा आदितो पञ्च अज्झत्तिकबाहिरवसेन, पच्छिमा च छ विज्जाणवसेन विभत्ता, अपरापि “सुखधातु दुक्खसोमनस्सदोमनस्सुपेक्खाअविज्जाधातू”ति छ धातुयो उद्दिसित्वा तथा तथा विभत्ता, पुन अपरापि “कामधातु व्यापादविहिंसानेक्खम्मअव्यापादअविहिंसधातू”ति छ धातुयो उद्दिसित्वा, एवं तीहि छक्केहि पच्चेकं तेभूमका अट्ठारस धातुयो सरूपतो, लक्खणाहारतो, निस्सयविसयपयोगविनाभावादितो च वुत्ताति वेदितब्बाति अयं सुत्तन्तभाजनीयनयो ।

अभिधम्मभाजनीये पन सरूपेनेव अट्ठारस धातुयो उद्दिसित्वा पसादविसयधातुयो आयतने वुत्तनयेन विभत्ता, सत्त विज्जाणधातुयो पन —

“तत्थ कतमा चक्खुविज्जाणधातु? चक्खुञ्च पटिच्च रूपे च उप्पज्जति चित्तं...पे०... चक्खुविज्जाणधातु । अयं वुच्चति चक्खुविज्जाणधातु... पे०... कायविज्जाणधातु ।

“तत्थ कतमा मनोधातु? चक्खुविज्जाणधातुया...पे०... कायविज्जाणधातुया...पे०... निरुद्धसमनन्तरा उप्पज्जति चित्तं...पे०... सब्बधम्मेषु वा पन पठमसमन्नाहारो उप्पज्जति चित्तं...पे०... अयं वुच्चति मनोधातु ।

“तत्थ कतमा धम्मधातु? वेदनाक्खन्धो सज्जाक्खन्धो सङ्खारक्खन्धो, यच्च रूपं अनिदस्सनं अण्णट्ठं धम्मायतनपरियापन्नं, असङ्खता च धातु...पे०... अयं वुच्चति धम्मधातु।

“तत्थ कतमा मनोविज्जाणधातु...पे०... मनोधातुयापि उण्णज्जित्वा निरुद्धसमनन्तरा उण्णज्जति चित्तं...पे०... मनञ्च पटिच्च धम्मे च उण्णज्जति चित्तं...पे०... अयं वुच्चति मनोविज्जाणधातू”ति (विभ० १८४) —

एवं विभक्ता। तत्थ **सब्बधम्मेषु वा पन पठमसमन्नाहारो**ति एत्थ पञ्चविज्जाणविसयेसु सब्बधम्मेषूति एवं अत्थो गहेतब्बो। **मनोधातुयापि उण्णज्जित्वा निरुद्धसमनन्तरा**ति एत्थ पन पि-कारो सम्पिण्डनत्थो, तस्मा मनोधातुयापि सन्तीरणवोदुब्बनादिमनोविज्जाणधातुयापीति एवमत्थो गहेतब्बो। **मनञ्च पटिच्चा**तिआदीसु मनोद्वारे भवङ्गमनञ्चेव चतुभूमकधम्माम्मणञ्च पटिच्च सहावज्जनकजवनं निब्बत्ततीति अत्थो। अयं अभिधम्मभाजनीयनयो।

**पञ्हापुच्छकनये** पन अट्टारसन्नं धातूनं कति कुसला...पे०... कति अरणाति? सोळस धातुयो अब्बाकता, द्वे धातुयो तिधापि होन्ति...पे०... दस धातुयो नेवविपाकनविपाकधम्मधम्मा, पञ्च धातुयो विपाका, मनोधातु सिया विपाका, सिया नेवविपाकनविपाकधम्मधम्मा, द्वे धातुयो तिधापि होन्ति। दस धातुयो उपादिन्नुपादानिया, सद्दधातुयो अनुपादिन्नुपादानिया, पञ्च धातुयो सिया उपादिन्नुपादानिया, सिया अनुपादिन्नुपादानिया, द्वे धातुयो तिधापि...पे०... दस धातुयो सिया उण्णन्ना, सिया उण्णादिनो, सद्दधातु सिया उण्णन्ना, सिया अनुण्णन्ना, सिया न वत्तब्बा उण्णादिनोति, छ धातुयो तिधापि। धम्मधातु तिधाव...पे०... रूपधातु सनिदस्सनसण्णट्ठि, नव धातुयो अनिदस्सनसण्णट्ठि, अट्ठ धातुयो अनिदस्सनअण्णट्ठि। सत्तरस धातुयो न हेतू, धम्मधातु द्विधाव...पे०... सोळस धातुयो अरणा, द्वे धातुयो द्विधापीति अयं पञ्हापुच्छकनयो।

इदानी पनेतासं —

कमतावत्ततो दट्ठब्बा, पच्चयानं विभागतो।  
धातूनमिध विज्जेय्यो, पाळिमुत्तविनिच्छयो॥

तत्थ **कमतो** ताव इधापि देसनाक्कमोव युज्जति। सो च पनायं हेतुफलानुपुब्बववत्थानवसेन वुत्तो। चक्खुधातु रूपधातूति इदं हि द्वयं हेतु, चक्खुविज्जाणधातूति इदं फलं। एवं सब्बत्थ। अयं तावेत्थ कमो।

**तावत्ततो** पन या इध **सुत्तन्तभाजनीये** तीहि छक्केहि वुत्ता धातुयो चेव, तेसु तेसु सुत्ताभिधम्मपदेसेसु “आभाधातु...पे०... अनेकधातुनानाधातुलोको”तिआदिना आगता चाति अज्जापि बहुधातुयो दिस्सन्ति, तासम्पि वसेन परिच्छेदं अवत्वा कस्मा अट्टारसेव वुत्ताति? तासम्पि तदन्तो गधत्ता।

अपिच विजाननसभावे विज्जाणे जीवसज्जीनं तस्सा चक्खुविज्जाणादिभेदेन अनेकतं, चक्खुरूपादिपच्चयायत्तवुत्तताय अनिच्चतञ्च पकासेत्वा तस्मिं दीघरत्तानुसयितजीवसज्जासमूहननत्थञ्च अट्टारसेव वुत्ता। किञ्च भिय्यो — वेनेय्यज्झासयवसेन च। वेनेय्या हि अरूपमूळो रूपमूळो उभयमूळोति तिविधा होन्ति। तेसं तिण्णम्पि यथाक्कमं नातिसङ्खेपवित्थारतो अरूपभेदविभाविनी खन्धदेसना, रूपभेदविभाविनी आयतनदेसना, तदुभयभेदविभाविनी धातुदेसना सप्पायाति वेनेय्यज्झासयवसेन अट्टारसेव वुत्ताति। वुत्तञ्च —

“सङ्खेपवित्थारनयेन तथा तथा हि,  
धम्मं पकासयति एस यथा यथास्स।  
सद्धम्मतेजविहतं विलयं खणेन,  
वेनेय्यसत्तहदयेसु तमो पयाती”ति॥ (विभ० अट्ठ० १८३)।

अयमेत्थ तावत्तता।

**दट्ठब्बतो** पनेता सब्बापि सङ्खता धातुयो पुब्बन्तापरन्तविवित्ततो, धुवसुभसुखत्तभावसुज्जतो, पच्चयायत्तवुत्ततो च दट्ठब्बा। विसेसतो पनेत्थ भेरितलं विय चक्खुधातु दट्ठब्बा, दण्डो विय रूपधातु, सहो विय चक्खुविज्जाणधातु। तथा तिरस्सोपि चेता यथाक्कमं आदासतलमुखमुखनिमित्तानि विय। तथा तिलयन्तचक्कतेलानि विय, अधरारणीउत्तरारणीअग्गी विय च दट्ठब्बा। एस नयो सोतधातुआदीसुपि। मनोधातु पन यथासम्भवतो चक्खुविज्जाणधातुआदीनं पुरेचरानुचरा विय दट्ठब्बा। धम्मधातुयं पन वेदना सल्लसूलमिव, सज्जा रित्तमुट्ठि विय, सङ्खारा विसरुक्खमिव, सुखुमरूपं खुरचक्कं विय, असङ्खता धातु खेमन्तभूमि विय च दट्ठब्बा, मनोविज्जाणधातु पन मक्कटो विय, अस्सखळुङ्को विय, यत्थकामनिपातितो वेहासक्खित्तदण्डो विय, रङ्गनटो विय च दट्ठब्बा। अयमेत्थ दट्ठब्बता।

**पचयानं विभागतो** पनेत्थ चक्खुविज्जाणधातुया चक्खु निस्सयपचचयो, रूपं आरम्भणपचचयो, किरियामनोधातु अनन्तरपचचयो, तयो अरूपिनो खन्धा सहजातपचचयो। एवं सोतविज्जाणादीसुपि। मनोविज्जाणधातुया पन मनोधातु अनन्तरपचचयो, धम्मधातु आरम्भणपचचयो, सम्पयुतनिस्सयसहजातादिपचचयोति अयं पचयविभागो। एवं विज्जेय्यो पाळिमुत्तविनिच्छयो।

धातुविभङ्गमातिकथवण्णना निड्ढिता।

### सचयविभङ्गमातिकथवण्णना

सचयविभङ्गमातिकाय पन अत्थतो ताव — **चत्तारि अरियसच्चानीति** एत्थायं सच्च-सद्दो अनेकेसु अत्थेसु दिस्सति। सेय्यथिदं — “सच्चं भणे न कुज्जेय्या”तिआदीसु (ध० प० २२४) वाचासच्चे। “सच्चे ठिता समणब्राह्मणा”तिआदीसु (जा० २.२१.४३३) विरतिसच्चे। “कस्मा नु सच्चानि वदन्ति नाना, पवादियासे कुसलावदाना”तिआदीसु (सु० नि० ८९१) दिड्ढिसच्चे। “एकं हि सच्चं, न दुतियमत्थी”तिआदीसु (सु० नि० ८९०) परमत्थसच्चे, निब्बाने चेव मग्गे च। “चतुन्नं अरियसच्चानं कति कुसला”तिआदीसु (विभ० २१६) अरियसच्चे। स्वायमिधापि अरियसच्चे वत्तति। केनट्ठेन सच्चानि? तथट्ठेन। कोयं तथट्ठो नाम? यो पज्जाचक्खुना उपपरिक्खमानानं मायाव विपरीतो, मरीचीव विसंवादको, तिथियानं अत्था विय अनुपलब्भमानसभावो च न होति, अथ खो बाधनप्पभवसन्तिनिय्यानभूतेन तच्छाविपरीतभूतभावेन अरियजाणस्स गोचरो होति। अयं तथट्ठो सच्चट्ठोति वेदितब्बो। वुत्तञ्च —

“इति तच्छाविपल्लासभूतभावं चतूसुपि।

दुक्खादीस्वविसेसेन, सच्चट्ठं आहु पण्डिता”ति (विभ० अट्ठ० १८९; सारत्थ० टी० महावग्ग ३.१४)॥

अरियानि च तानि सच्चानि चाति **अरियसच्चानि**। अरियानीति उत्तमानि, अविस्वादाकानीति अत्थो। अरियेहि बुद्धादीहि पटिविज्जितब्बानि सच्चानि, अरियस्स वा सम्मासम्बुद्धस्स सन्तकानि सच्चानि तेन उप्पादितत्ता, पकासितत्ता च, अरियभावकरानि वा सच्चानि तेसं अभिसम्बुद्धत्ता अरियभावसिद्धितोति **अरियसच्चानि**। “दुक्खं अरियसच्च”न्तिआदीसु पन दु-इति अयं सद्दो कुच्छिते दिस्सति। कुच्छितं हि पुत्तं “दुपुत्तो”ति वदन्ति। खं-सद्दो पन तुच्छे। तुच्छं हि आकासं “खं”न्ति वुच्चति। इदञ्च पठमसच्चं कुच्छितं अनेकोपहवाधिद्वानतो, तुच्छं बालजनपरिक्कपितधुवसुभसुखत्तभावविरहिततो, तस्मा कुच्छितत्ता, तुच्छत्ता च “दुक्खं”न्ति वुच्चति। सं-इति च अयं सद्दो “समागमो, समेत”न्तिआदीसु संयोगं दीपेति। उ-इति अयं सद्दो “उप्पन्नं उदित”न्तिआदीसु उप्पत्तिं। अय-सद्दो पन कारणं दीपेति। इदञ्च दुतियसच्चं अवसेसपचचयसमायोगे सति दुक्खस्सुप्पत्तिकारणन्ति “दुक्खसमुदयो”ति वुच्चति।

ततियसच्चं पन यस्मा नि-सद्दो अभावो, रोध-सद्दो चारकं दीपेति, तस्मा अभावो एत्थ, एतस्मिं वा अधिगते संसारचारकसङ्घातस्स दुक्खनिरोधस्स सब्बगतिसुज्जत्ता, तप्पटिपक्खत्ता चाति “दुक्खनिरोध”न्ति वुच्चति, दुक्खस्स वा अनुप्पादनिरोधपचचयत्ता। चतुत्थं पन यस्मा एतं दुक्खनिरोधं गच्छति, सत्ता वा तं गमयति आरम्भणवसेन तदभिमुखत्ता, पटिपदा च होति दुक्खनिरोधपत्तिया, तस्मा “दुक्खनिरोधगामिनी पटिपदा”ति वुच्चति।

अपिच दुक्खादीनं चत्तारो चत्तारो अत्था विभत्ता तथा अवितथा अनज्जथा, ये दुक्खादीनि अभिसमेन्तेहि अभिसमेतब्बा। यथाह —

“दुक्खस्स पीळनट्ठो सङ्गतट्ठो सन्तापट्ठो विपरिणामट्ठो, इमे चत्तारो दुक्खस्स दुक्खट्ठा तथा अवितथा अनज्जथा। समुदयस्स आयूहनट्ठो निदानट्ठो संयोगट्ठो पलिबोधट्ठो ...पे०... निरोधस्स निस्सरणट्ठो विवेकट्ठो असङ्गतट्ठो अमत्तट्ठो...पे०... मग्गस्स निय्यानट्ठो हेत्वट्ठो दस्सनट्ठो आधिपतेय्यट्ठो...पे०... अनज्जथा”ति (पटि० म० २.८)।

एवं विभत्तानं चतुन्नं चतुन्नं अत्थानं वसेन दुक्खादीनि वेदितब्बानि। अयं तावेत्थ पदत्थो।

**धम्मभेदतो** पन तण्हावज्जिता सब्बलोकियधम्मा, संकिलेसिकवज्जिता वा **दुक्खसच्चं** नाम, तण्हा पन सब्बा अकुसला वा लोकियकुसला वा धम्मा **समुदयसच्चं** नाम, निब्बानं **निरोधसच्चं** नाम, लोकुत्तरकुसलचित्तसम्पयुत्तानि अट्टमग्गङ्गानि **दुक्खनिरोधगामिनी पटिपदा अरियसच्चं** नाम। इमेहि पन मग्गङ्गेहि सम्पयुत्ता चित्तचेतसिका धम्मा चेव सामज्जफलानि चेत्य असङ्गहितानीति वेदितब्बानि। तानि हि “यदनिच्चं तं दुक्खं”न्ति (सं० नि० ३.१५) वचनतो सङ्गारदुक्खसङ्गहितानिपि। याय परिज्जाय भगवति ब्रह्मचरियं वुस्सति तथत्तेन न होन्ति, दुक्खं अरियसच्चन्ति न वुच्चन्ति, तानि ठपेत्वा सब्बे लोकियलोकुत्तरधम्मा सङ्गहितानि दट्ठब्बा। अयं धम्मभेदो।

**विभङ्गनयतो** पनेत्थ **सुत्तन्तभाजनीये** दुक्खसच्चं ताव —

“तत्थ कतमं दुक्खं अरियसच्चं? जातिपि दुक्खा, जरापि दुक्खा, मरणम्पि दुक्खं, सोकपरिदेवदुक्खदोमनस्सुपायासापि दुक्खा, अप्पियेहि सम्पयोगो दुक्खो, पिपियेहि विप्पयोगो दुक्खो, यम्पिच्छं न लभति, तम्पि दुक्खं, संखित्तेन पञ्चुपादानक्खन्धा दुक्खा”ति (विभ० १९०) —

उद्दिष्टित्वा विभक्तं । तत्थ दुक्खं तिविधं होति दुक्खदुक्खं विपरिणामदुक्खं सङ्गारदुक्खन्ति । तत्थ दुक्खदुक्खं दुविधं परियायदुक्खं निष्परियायदुक्खन्ति । तत्थ कायिकचेतसिकदुक्खदोमनस्सवेदना **निष्परियायदुक्खं** नाम, तदवसेसा पन दुक्खदुक्खस्स वत्थुभूता पञ्चुपादानकखन्था **परियायदुक्खं** नाम । सुखसोमनस्सवेदना **विपरिणामदुक्खं** नाम । सब्बे पन पञ्चुपादानकखन्था, सब्बसङ्गता वा **सङ्गारदुक्खं** नाम । इमेसं तिण्णं दुक्खानं वसेन यथायोगं तीसु भवेसु जातिआदीनं दुक्खदुक्खता वेदितब्बा । कामभवस्मिं हि जाति ताव सयं न दुक्खा, अपायगतिमनुस्सगतिआदीसु पन निरयगिसन्तापादिमूलकं, गम्भोक्कन्तिकदिमूलकं, जिघच्छापिपासादिमूलकञ्च दुक्खं तस्स सब्बस्स कायिकचेतसिकदुक्खस्स वत्थुभावेन परियायतो दुक्खन्ति । तथा जरामरणादयोपि । केवलं जरा कायदुब्बलतामूलस्स, पुत्तदारादिपरिभवमूलस्स च, मरणं पन मारणन्तिकवेदनाभूतस्स, निरयादिगतिनिमित्तदस्सनमूलस्स च दुक्खस्स वत्थुभावतो, सोकादयो सोकादिमूलस्स कायिकचेतसिकदुक्खस्स वत्थुभावता चेव सयं दुक्खत्ता च दुक्खाति वेदितब्बा । विपरिणामदुक्खसङ्गारदुक्खता चेसं पसिद्भायेव । एवं कामभवे जातिआदीनं तीहिपि दुक्खेहि दुक्खता वेदितब्बा । रूपारूपभवेसु पन यस्मा सोकपरिदेवदुक्खदोमनस्सुपायासा न सन्ति, तस्मा तत्थ जातिआदीनं विपरिणामदुक्खसङ्गारदुक्खवसेन च दुक्खता वेदितब्बा, न दुक्खदुक्खवसेनाति अयं दुक्खसच्चे नयो ।

समुदयसच्चं पन “कामतण्हा भवतण्हा विभवतण्हा”ति (विभ० २०३) तत्तकमेव उद्दिष्टित्वा “सा खो पनेसा तण्हा कत्थ उप्पज्जमाना उप्पज्जती”ति (विभ० २०३) पुच्छित्वा छन्नं छन्नं इन्द्रियविसयविज्जाणफस्सवेदनासज्जाचेतनातण्हावितक्कविचारानं विसयभूतानं वसेन तण्हाय “एत्थेसा तण्हा उप्पज्जमाना उप्पज्जती”ति एवं उप्पत्तिं पकासेत्वा वित्थारतो विभक्तं ।

निरोधसच्चं पन “तस्सा एव तण्हाय असेसविरागनिरोधो चागो पटिनिस्सग्गो मुत्ति अनालयो”ति (विभ० २०४) वत्त्वा पुन “सा खो पनेसा तण्हा कत्थ निरुज्झमाना निरुज्झती”ति (विभ० २०४) पुच्छित्वा समुदयसच्चे वुत्तइन्द्रियादीनं वसेन पटिलोमतो तण्हाय निरोधं पकासेत्वा वित्थारतो विभक्तं । तत्थ **असेसविरागनिरोधो**तिआदीनि पदानि निब्बानवेवचनानि । निब्बानं हि आगम्म तण्हा असेसा विरज्जति, निरुज्जति, चजीयति, पटिनिस्सज्जीयति, मुच्चति, न अल्लीयति, तस्मा “असेसविरागनिरोधो चागो पटिनिस्सग्गो मुत्ति अनालयो”ति वुच्चति । एकमेव हि निब्बानं, नामानि पनस्स सब्बसङ्गत्तानं नामपटिपक्खवसेन अनेकानि होन्ति ।

ननु पाटेक्कं निब्बानं नाम नत्थि, किलेसक्खयमत्तमेव निब्बानं, तेनेव च तासु तासु सुत्ताभिधम्मदेसनासु “रागक्खयो दोसक्खयो”तिआदिना (सं० नि० ४.३१४) वुत्तन्ति चे? न, अरहत्तनिब्बानानं एकतापज्जनतो । अरहत्तम्पि हि “यो खो, आवुसो, रागक्खयो दोसक्खयो मोहक्खयो, इदं वुच्चति अरहत्तं”न्ति (सं० नि० ४.३१४) रागादीनं परिक्खयन्ते उप्पन्नता उपचारेन अरहत्तं रागक्खयादिभावेन वुच्चति, तथा रागादीनं खयहेतुत्ता निब्बानम्पि रागक्खयादिभावेन वुत्तन्ति गहेतब्बं । इतरथा निब्बानस्स बहुत्ता आपज्जति रागादीनं बहुन्नं खयस्सापि बहुत्ता । सब्बकिलेसानम्पि खयस्स एकत्तेन पठममग्गेन दिट्ठिआदीनं खये सब्बकिलेसक्खयो आपज्जति, ओळारिकत्तञ्चस्स सिया तिरच्छानानम्पि उप्पन्नरागक्खयस्स पाकटत्तेन निब्बानप्पत्तितो, गोत्रभूक्खणेपि च रागादिक्खयो होति गोत्रभुनो निब्बानविसयत्ता, मग्गस्स पन निब्बानारम्मणताअप्पसङ्गो । न हि अत्तना खेपियमानकिलेसक्खयमारब्ध मग्गो उप्पज्जति, अभावो चस्स आपज्जति रागादिक्खयभूतस्स पन अभावस्स पक्खवसेन तुच्छरूपत्ता, तस्सापि भावत्ताभावाव विवेकलक्खणं न सिया, सङ्गत्तता चस्स सिया । न हि कदाचि उपलब्धमानं असङ्गत्तं भवितुमरहति सब्बेसम्पि अहेतुकत्तापत्तितो, सङ्गत्तत्तेपि चस्स न निब्बानत्तं उप्पत्तिजराभङ्गसमङ्गित्ताय दुक्खत्ता, तथा च अभावस्सापि अभावो, अनवद्वानञ्च खीणानम्पि रागादीनं पुन उप्पज्जनं येसं तेसमेव अभावो अभावस्स विनट्ठत्ता ।

अपिच कारणन्तरेन वा भावे उप्पन्ने रागादीनं न काचि हानि होति । न हि अज्जस्सुप्पत्तियं अज्जं विगच्छति । अभावो भावस्स विरोधि, विरोधिसन्निधाने च इतरं विगच्छतीति चे? किमिदं विगमनं नाम । यदि तम्पि भावरूपं, समानदोसता चस्स सिया अनवद्वानञ्च, न च अत्थसिद्धि । यदि तुच्छरूपं, किं पठममेवस्स तुच्छरूपताय उपगताय दूरम्पि गन्त्वा उपगन्तब्बाति सिद्धा, रागादिक्खयभूतस्स निब्बानस्स तुच्छरूपताय अभावो, न च अभावो एव निब्बानं । अतीतानागतदोसानमभावे निब्बानप्पत्तिया अभावतो वत्तमानानञ्च अभावो नाम । अभावो नाम न किलेसविगममत्तो, अपि तु अनुप्पत्तिभावेन । अच्चन्तविगमो निब्बानेनापि सम्पादीयतीति चे? न, तस्स कारणभावा । विपस्सना कारणमिति चे? न, अत्तादिविकप्पजनकसङ्गत्तधम्मदस्सनेन विना अनत्तादिविकप्पभूताय विपस्सनाय अनुप्पत्तितो । यदि हि उप्पज्जेय्य, ताय सब्बेपि सत्ता विमुत्ता एव सियुं, नो च कदाचि न पुच्छेय्य विरुद्धधम्मदस्सनाभावा । न हि दस्सनं विना विकप्पो सम्भवति, न च अत्ताति विकप्पजनकरूपादिदस्सनमेव तब्बिरुद्धविकप्पजनकं होति । बुद्धानञ्च परम्परोपदेसेन रूपादीसु विपस्सनाविकप्पो उप्पज्जतीति चे? न, तेसम्पि विरुद्धदस्सनाभावेन विपस्सनाविकप्पानुप्पत्तितो । न हि यादिसाय कारणसामगिया यादिसं कारियं उप्पज्जति, तादिसाय एव तब्बिरुद्धं उप्पज्जति अहेतुकत्तप्पसङ्गतो । न च विरुद्धदस्सनाभावेन एकस्स विपस्सनाविकप्पजनकसामत्थियाभावतो तादिसानं परम्परायपि तब्बावो, तदुपदेसो च सम्भवति । तिलक्खणूपदेसनान्तरिकताय पन बुद्धानं निब्बानसच्छिकरिया सिद्धि, तेनेवस्स किलेसानमच्चन्तप्पहानस्स, विपस्सनोपदेससामत्थियस्स च सिद्धीति निब्बानमेव तदुभयकारणं, नाज्जन्ति गहेतब्बं ।

कस्मा पन निब्बानदस्सनेन रागादीनं अच्चन्तप्पहानं, तिलक्खणञ्च होति । न हि अज्जस्स दस्सनेन इतररागप्पहानं, तिलक्खणजाणञ्च युत्तन्ति? न, असङ्गत्तदस्सनेन सङ्गत्तस्स वा दोसस्स वा पाकटत्ता । दिट्ठअच्चन्तसुखानं हि वट्टसुखे, तन्निस्सयारम्मणादीसु च सुखाभिमानो, वट्टाभिरति च पहीयति

दिट्ठपरतीरस्स नाविकस्स नावायेकदेसे सुखाभिमानाभिरतियो विय । अपिच सङ्कतधम्मसे अल्लिना रागादयो असङ्कतधम्मे सण्ठातुं न सक्कोन्ति अग्गिक्खन्धे विय मक्खिका, थले विय च जलचरा, निब्बानदस्सनेन पहीनदोसस्स चित्तस्स याथावतो तेसु सङ्कतेसु तिलक्खणदस्सने सम्भवति भेसज्जालेपेन विहतकाचित्तिमिरादिदोसस्स चक्खुनो घटादिरूपदस्सने विय, दिट्ठदोसेसु चस्स सङ्कारेसु न पुन रागादीनमुप्पत्ति जाता सुचिभावे विय वच्चकूपेति वेदितव्वं ।

कस्मा पन केसञ्चि सत्तानं एव निब्बानसच्छिकिरियासम्भवो, न सब्बेसन्ति? अनादिबुद्धपरम्परोपदेससापेक्खत्ता, तेसञ्च उपदेसकानं सब्बत्थ सब्बदा अभावतो, सोतूनञ्च खणसम्पत्तिया अच्चन्तदुल्लभत्ता, चक्कवाळानञ्च अनन्तत्ता, तस्मा केचि एव बुद्धुप्पादकाले तिलक्खणोपदेसलाभेन निब्बानं सच्छिकरोन्ति, न सब्बेति गहेतव्वं ।

कथं पनेत्थ रागादीनं अच्चन्तविगमो निब्बानेन साधीयतीति? न ताव सो, अतीतानागतानं तेसमिदानि अभावा, पुब्बे च तस्स विज्जमानत्ता, वत्तमानानं सरसनिरोधतो । कथञ्चस्स तुच्छरूपस्स निब्बानस्स हेतुत्ते यथावुत्तदोसानमवसरोति चे? न, तस्स भावरूपत्ता । पुब्बभागपटिपत्तिया हि निब्बानमारब्ध अनुसयाजननभावेन उप्पन्नमग्गा एव किलेसानमनुप्पादनरोधो तदुप्पत्तिया आयत्तिं उप्पज्जनारहानं अनुप्पत्तितो अग्गिसन्निधाने अङ्कुराजनकभावेन उप्पन्नसालिक्खन्धस्स बीजताभावरूपता विय । न हि अभावो नाम कोचि परमत्थतो अत्थि, यो कारणेन जनीयति तब्बिरूद्धक्खणुप्पादनभावोवुप्पादनं अनेकक्खणुप्पादनेन खन्धकाराभावुप्पादनं विय, तस्मा किलेसानं अनुप्पत्तिनिरोधसङ्घातस्स अरियमग्गस्स उपनिस्सयत्ता उपनिस्सयोपचारेन निब्बानं “असेसविरागनिरोधो”ति आदिना वुत्तं । सरूपेनेव कस्मा न वुत्तन्ति चे? अभिसुखुमत्ता, अनुपलब्धपुब्बत्ता च, सुखुमता चस्स भगवतो अप्पोस्सुकतावचनतो, अरियेन चक्खुना पस्सितव्वतो च वेदितव्वत्ता ।

एत्थ पन परवादी आह — “नत्थेव निब्बानं अनुपलब्धनीयतो”ति । न अनुपलब्धनीयं तस्स सिद्धत्ता । उपलब्धति हि तं तदनुरूपपटिपत्तिया अरियेहि । अपिच निब्बानं नत्थीति न वत्तव्वं सब्बसत्तानं विरूद्धधम्मानं भावेन अपवग्गाभावप्पसङ्गतो । न च तं युत्तं उण्हादिपटिपक्खस्स सीतादिनो विय भवपटिपक्खस्स निब्बानस्सपि अवस्संभावा । वुत्तञ्च —

“यथापि उण्हे विज्जन्ते, अपरं विज्जति सीतलं ।

एवं तिविधगि विज्जन्ते, निब्बानं इच्छितव्वक”न्ति ॥ (बु० वं० २.११) —

आदि । अच्चन्तनिरोधहेतुनो विपस्सनोपदेसस्स दस्सनतो च अत्थेव निब्बानं तं विना तस्सासम्भवतोति वुत्तोवायमत्थो । तदेतं पुरिमाय कोटिया अभावतो अप्पभवं, ततोव अजरामरणं, निच्चञ्च होतीति अणुआदीनमि निच्चभावपत्ति निब्बानस्सेव निच्चत्ताति चे? न, भिन्नाधिकरणत्तेन हेतुलक्खणस्सानुपपत्तितो । अणुआदीनमि असङ्कतता इति चे? न, असङ्कततासिद्धितो असङ्कतानञ्चानेकत्तानुपपत्तितो । यदि हि असङ्कतं नाम भवेय्य, एकेनेव भवितव्वं देसकालसभावभेदस्स कारणभेदकत्ता, भिन्नसभावानमि अहेतुकत्ते अतिप्पसङ्गतो ।

सङ्कतेहि सभावभिन्नस्स निब्बानस्स कथं अहेतुकताति चे? असङ्कतसभावेन सङ्कतसभावेहि भिन्नस्स कारणानपेक्खत्ता । असङ्कतत्ते हि समाने भवसभावभेदो कारणभेदं सूचयति, तस्मा एकमेव निच्चं भवितुमरहति, तञ्च यथावुत्तयुत्तितो, सब्बञ्जुवचनतो च परमत्थतो विज्जमानं निब्बानमेव । वुत्तं हेतं भगवता “अत्थि, भिक्खवे, अजातं अभूतं अकतं असङ्कत”न्ति (इतिवु० ४३) । अयं दुक्खनिरोधसच्चे नयो ।

इतरं पन “सम्मादिट्ठि...पे०... सम्मासमाधी”ति उद्दिष्टित्वा वित्थारतो विभत्तं । विनिच्छयो पनेत्थ मग्गङ्गविभङ्गे आवि भविस्सतीति अयं सुत्तन्तभाजनीयनयो ।

**अभिधम्मभाजनीये पन —**

“चत्तारि सच्चानि दुक्खं दुक्खसमुदयो दुक्खनिरोधो दुक्खनिरोधगामिनी पटिपदा । तत्थ तण्हा दुक्खसमुदयो । अवसेसा सासवधम्मा...पे०... दुक्खं । तण्हाय प्हानं दुक्खनिरोधो । अट्ठङ्गिको मग्गो दुक्खनिरोधगामिनी पटिपदा”ति (विभ० २०६) —

वत्त्वा अट्ठ मग्गङ्गानि वित्थारतो निद्दिष्टित्वा “अवसेसा धम्मा दुक्खनिरोधगामिनिया पटिपदाय सम्पयुत्ता”ति (विभ० २०६ आदयो) एवं पठमवारे चत्तारि सच्चानि विभत्तानि । तानि पुन अपरेहिपि “तण्हा, अवसेसा च किलेसा समुदयो, तथा तण्हा, अवसेसा च किलेसा, अवसेसा च अकुसला समुदयो, तथा तण्हा, अवसेसा च किलेसा, अवसेसा च अकुसला, तीणि च कुसलमूलानि, सासवानि समुदयो, तथा तण्हा, अवसेसा च किलेसा, अवसेसा च अकुसला, तीणि च कुसलमूलानि, सासवानि, अवसेसा च सासवकुसलधम्मा समुदयो । अवसेसा सासवधम्मा दुक्खं, तस्स तस्स समुदयस्स प्हानं निरोधो, अट्ठङ्गिको मग्गो पटिपदा”ति इमेहि वारेहि विभत्तानि । तत्थ “अरियसच्चानी”ति अवत्त्वा निप्पदेसतो पच्चयसङ्घातं समुदयं दस्सेतुं “सच्चानी”ति वुत्तं । अरियसच्चेसु हि तण्हाव समुदयो, न इतरे । न च केवलं तण्हाव दुक्खं समुदानेति, अवसेसा कुसलाकुसलापि पच्चयं समुदानेन्तियेवाति तेषि समुदयतो दस्सेतुं

“सच्चानि”त्वेव वृत्तं । ततो परं यस्मा अट्टङ्गिको मग्गोव पटिपदाति । सम्पयुत्ता पन फस्सादयो सब्बेपि धम्मा पटिपदा एव, तस्मा तं नयं दस्सेतुं सब्बसङ्गाहिकवारोपि सब्बानि विभक्तानि । एत्थ हि अरियधनानेव सङ्गहितानि । सेसं सदिसमेवाति अयं अभिधम्मभाजनीयनयो ।

**पञ्हापुच्छकनये** पन चतुन्नं अरियसच्चानं कति कुसला... पे०... कति अरणा? समुदयसच्चं अकुसलं, निरोधसच्चं अब्बाकतं, दुक्खसच्चं तिधापि । समुदयो सवितक्कसविचारो, निरोधो अवितक्कअविचारो, मग्गो तिधापि, दुक्खं तिधापि, न वत्तब्बं च । तीणि सच्चानि अनिदस्सनअप्पटिघानि, दुक्खं तिधापि । समुदयो हेतु, निरोधो न हेतु, सेसा द्विधापि । द्वे सच्चानि लोकियानि, मग्गनिरोधा लोकुत्तरा । समुदयसच्चं सरणं, द्वे सच्चानि अरणानि, दुक्खं दुविधापि । अयं पञ्हापुच्छकनयो । इदानीं पनेत्थ —

कमतोनूनाधिकतो, लक्खणादीहि सुञ्जतो ।  
जाणकिच्चोपमा जेय्यो, पाळिमुत्तविनिच्छयो ॥

तत्थ **कमतो** ताव इधापि देसनाक्कमोव युज्जति । एत्थ ओळारिकत्ता, सब्बसत्तसाधारणत्ता च सुविज्जेय्यन्ति दुक्खसच्चं पठमं वृत्तं, ततो तस्सेव हेतुदस्सनत्थं समुदयसच्चं, ततो “हेतुनिरोधा भवनिरोधो”ति जापनत्थं निरोधसच्चं, तदधिगमुपायदस्सनत्थं अन्ते मग्गसच्चं । भवसुखस्सादगधितानं संवेगजननत्थं पठमं दुक्खमाह, ततो “भवं नेव अहेतुकं आगच्छति, न इस्सरनिम्मानादिना होति, इतो पन होती”ति जापनत्थं समुदयसच्चं, ततो सहेतुकेन दुक्खेन अभिभूतत्ता संविग्गमानसानं तन्निस्सरणदस्सनेन अस्सासजननत्थं निरोधं, ततो निरोधसम्पापकं मग्गन्ति अयमेत्थ कम्पो ।

**अनूनाधिकतो** पन कस्मा चत्तारि एव सच्चानीति चे? ततो अञ्जस्स असम्भवतो, अञ्जतरस्स च अनपनेय्यतो । अपिच पवत्तिमाचिक्खन्तो भगवा सहेतुकं आचिक्खति, निवत्तिञ्च सउपायं । इति पवत्तिनिवत्तितदुभयहेतूनं एतपरमतो चत्तारि एव वृत्तानीति अयमेत्थानूनाधिकतो ।

**लक्खणादीहि** पनेत्थ लक्खणतो बाधनलक्खणं दुक्खसच्चं, सन्तापनरसं, पवत्तिपच्चुपट्टानं । पभवलक्खणं समुदयसच्चं, अनुपच्छेदकरणरसं, पलिबोधपच्चुपट्टानं । सन्तिलक्खणं निरोधसच्चं, अच्चुतिरसं, अनिमित्तपच्चुपट्टानं । निव्यानलक्खणं मग्गसच्चं, किलेसपहानकरणरसं, वुट्ठानपच्चुपट्टानं । अपिच पवत्तिपवत्तकनिवत्तिनिवत्तकलक्खणानि पटिपाटिया, तथा सङ्कततण्हाअसङ्कतदस्सनलक्खणानि चाति इमानेत्थ लक्खणानि ।

**सुञ्जतो** पनेतानि यथाक्कमं वेदककारकनिब्बुतगमकाभावतो सुञ्जानि । वृत्तञ्च —

“दुक्खमेव हि, न कोचि दुक्खितो,  
कारको न, किरियाव विज्जति ।  
अत्थि निब्बुति, न निब्बुतो पुमा,  
मग्गमत्थि, गमको न विज्जती”ति ॥ (विभ० अट्ठ० १८९) ।

अथ वा —

धुवसुभसुखत्तसुञ्जं,  
पुरिमद्वयमत्तसुञ्जममतपदं ।  
धुवसुभसुखअत्तविरहितो,  
मग्गो इति सुञ्जतो तेसु ॥ (विभ० अट्ठ० १८९) ।

निरोधसुञ्जानि वा तीणि । निरोधो च सेसत्तयसुञ्जो । फलसुञ्जो वा हेत्थ हेतु समुदयमग्गोसु दुक्खनिरोधानं अभावा पकतिवादीनं पकति विय । हेतुसुञ्जञ्च फलं दुक्खसमुदयानं, निरोधमग्गानञ्च असमवाया, न हेतुसमवेतं हेतुफलं । हेतुफलसमवायवादीनं द्विअणुकादीनि वियाति अयमेत्थ सुञ्जता ।

**जाणकिच्चतो**ति एत्थ दुविधं सच्चजाणं अनुबोधजाणं, पटिवेधजाणञ्च । तत्थ **अनुबोधजाणं** लोकियं, तं अनुस्सवादिक्खेन निरोधे, मग्गे च पवत्तति । **पटिवेधजाणं** लोकुत्तरं, तं सच्चावबोधपटिपक्खकिलेसे खेपेत्तं निरोधमारम्भणं कत्वा किच्चतो चत्तारिपि सच्चानि पटिविज्जति । यं पनेतं लोकियं, तत्थ दुक्खजाणं परियुट्ठानाभिभवनवसेन पवत्तमानं सक्कायदिट्ठिं निवत्तेति, समुदयजाणं उच्छेददिट्ठिं, निरोधजाणं सस्सतदिट्ठिं, मग्गजाणं अकिरियदिट्ठिं । दुक्खजाणं वा तेसु धुवसुभसुखत्तभावहितेसु खन्धेसु धुवसुभसुखत्तभावसञ्जासङ्गातं फले विष्पटिपत्तिं, समुदयजाणं “इस्सरपधानकालसभावादीहि लोको पवत्तती”ति अकारणे कारणाभिमानपवत्तं हेतुम्हि विष्पटिपत्तिं, निरोधजाणं अरूपलोकादीसु अपवग्गगाहभूतं निरोधे विष्पटिपत्तिं, मग्गजाणं कामसुखल्लिकअत्तकिलमथानुयोगपभेदे अविस्सुद्धिमग्गे विस्सुद्धिमग्गगाहवसेन पवत्तं उपाये विष्पटिपत्तिं निवत्तेति । इदमेत्थ जाणकिच्चं ।



**उपमातो** पनेत्थ भारो विय हि दुक्खसच्चं दट्ठब्बं, भारादानमिव समुदयसच्चं, भारनिकखेपनमिव निरोधसच्चं, भारनिकखेपनपायो विय मग्गसच्चं । अपिच रोगतन्निदानतदुपसमभेसज्जेहि, ओरिमतीरमहोघपारिमतीरतंसम्पापकोपायेहि चाति एवमादीहि यथाक्कमं योजेत्वापि एतानि उपमातो वेदितव्वानि । अयमेत्थ उपमा । एवं जेय्यो पाळिमुत्तविनिच्छयो ।

सच्चविभङ्गमातिकथवण्णना निड्डिता ।

### इन्द्रियविभङ्गमातिकथवण्णना

इन्द्रियविभङ्गमातिकाय पन अत्थतो ताव — **द्वावीसति इन्द्रियानीति** एत्थ इन्द्रियद्वसम्भवतो **इन्द्रियानि** । को पनेस इन्द्रियद्वो नामाति? इन्दलिङ्गद्वो, इन्ददेसितद्वो, इन्ददिद्वो, इन्दसिद्वो, इन्दजुद्वो च, सो सब्बोपि इध यथायोगं युज्जति । कुसलाकुसलं कम्मं इन्दो नाम कम्मसु कस्सचि इस्सरियाभावतो, तेनेवेत्थ कम्मसज्जनितानि ताव इन्द्रियानि अत्तनो जनककम्मं उल्लिङ्गेन्ति, तेन च सिट्ठानीति इन्दलिङ्गद्वेन, इन्दसिद्वेन च **इन्द्रियानि** । सम्पासम्बुद्धो पन परमिस्सरियभावतो इन्दो, ततो सब्बानिपेतानि इन्द्रियानि भगवता यथाभूततो पकासितानि, अभिसम्बुद्धानि चाति इन्ददेसितद्वेन, इन्ददिद्वेन च **इन्द्रियानि** । तेनेव भगवता कानिचि गोचरासेवनाय, कानिचि भावनासेवनाय सेवितानीति इन्दजुद्वेनपि **इन्द्रियानि** । अपिच आधिपच्चसङ्घातेन इस्सरियद्वेनापि एतानि **इन्द्रियानि** ।

**चक्खुन्द्रियन्ति** आदीसु चक्खादीनं पदत्थो हेट्ठा पकासितो । पच्छिमेसु पन तीसु पुब्बभागे अनज्जातं अमत्तं पदं, चतुसच्चधम्मं वा जानिस्सामीति एवं पटिपन्नस्स उपपज्जनतो, इन्द्रियद्वसम्भवतो च **अनज्जातज्जस्सामीतिन्द्रियं** । आजाननतो अज्जा एव इन्द्रियन्ति **अज्जिन्द्रियं** । अज्जाताविनो चतूसु सच्चेषु निद्वितजाणकिच्चस्स खीणासवस्स इन्द्रियन्ति **अज्जाताविन्द्रियं** । तत्थ च पसादिन्द्रियानन्तरं चक्खुविज्जाणादिवीथिचित्तप्पवत्तियं रूपादीनं नियतभावस्स, अत्तनो तिक्खमन्दतानुविधानस्स च आपादनतो आधिपच्चं वेदितव्वं । मनिन्द्रियादीनं पन अत्तनो अत्तनो विजाननादिलक्खणे आधिपच्चं वेदितव्वं । सेसं सुविज्जेय्यमेव । अयं तावेत्थ पदत्थो ।

**धम्मभेदतो** पनेत्थ जीवितिन्द्रियं रूपारूपवसेन द्विधा । सुखिन्द्रियादीनि पज्ज वेदनाभावतो एकधम्मो, तथा पज्जिन्द्रियादीनि चत्तारि अमोहभावतो । सेसानि पन इन्द्रियानि एकेकधम्मा एवाति एवं परमत्थतो सोळस धम्माव द्वावीसतिन्द्रियभावेन देसितानि । सेसानि पनेत्थ चेतसिकरूपनिब्बानानि असङ्गहितानीति अयं धम्मभेदो ।

**विभङ्गनयतो** पनेत्थ सुत्तन्तभाजनीयं नाम न गहितं । कस्मा? सुत्तन्ते इमाय पटिपाटिया द्वावीसतिया इन्द्रियानं अनागतत्ता । सुत्तन्तस्मिं हि कत्थचि द्वे इन्द्रियानि कथितानि, कत्थचि तीणि, कत्थचि पज्ज, एवं पन निरन्तरं द्वावीसति आगतानि नाम नत्थि । **अभिधम्मभाजनीयेपि** विसेसो नत्थि ।

**पज्हापुच्छकनये** पन द्वावीसतिया इन्द्रियानं कति कुसला...पे०... कति अरणाति? अनज्जातज्जस्सामीतिन्द्रियं कुसलं, दोमनस्सिन्द्रियं अकुसलं, सद्भासतिपज्जाअज्जिन्द्रियानि चत्तारि कुसलाब्याकतानि, मनजीवितसोमनस्सउपेक्खावीरियसमाधिन्द्रियानि छ तिधापि, सेसानि दस अब्याकतानि । छ इन्द्रियानि सिया सुखाय वेदनाय सम्पयुत्ता, सिया अदुक्खमसुखाय वेदनाय सम्पयुत्ताति, तीणि तिधापि, जीवितं तिधा च न वत्तब्बज्ज, द्वादसिन्द्रियानि न वत्तव्वानि एव । तीणि विपाकानि, द्वे विपाकधम्मधम्मनि, रूपिन्द्रियानि सत्त नेवविपाकनविपाकधम्मधम्मनि, अज्जिन्द्रियं सिया विपाकं, सिया विपाकधम्मधम्मं, नविन्द्रियानि तिधापि । नविन्द्रियानि उपादिन्नुपादानियानि, दोमनस्सिन्द्रियं अनुपादिन्नुपादानियं, तीणि अनुपादिन्ननुपादानियानि, नव तिधापि । दोमनस्सिन्द्रियं सवितक्कसविचारं, उपेक्खिन्द्रियं तथा च अवितक्कअविचारज्ज, नव अवितक्कअविचारानि, एकादस तिधापि । सत्त रूपिन्द्रियानि चेव सुखदुक्खदोमनस्सिन्द्रियानि चाति दस परित्तानि, पच्छिमानि तीणि अप्पमाणानि, सेसानि नव तिधाव । तत्थ च सोमनस्सिन्द्रियं रूपावचरवसेनेव महग्गतं, तदवसेसानि अरूपावचरवसेनापीति वेदितव्वं । पज्जिन्द्रियानि अनिदस्सनसप्पटिघानि, सत्तरस अनिदस्सनअप्पटिघानेव ।

पज्जिन्द्रियादीनि चत्तारि हेतू, सेसा न हेतू...पे०... दोमनस्सिन्द्रियं सरणं, मनजीवितसोमनस्सउपेक्खावीरियसमाधिन्द्रियानि द्विधापि, सेसानि पन्नरस अरणानेवाति अयं पज्हापुच्छकनयो ।

इन्द्रियेषु पनेत्तेसु, पाळिमुत्तविनिच्छयो ।

कमतो दानि विज्जेय्यो, तत्थ कोसल्लमिच्छता ॥

**कमतोति** अयम्पि देसनाक्कमोव । तत्थ अज्झत्तधम्मो परिज्जाय अरियभूमिपटिलाभो होतीति अत्तभावपरियापन्नानि चक्खुन्द्रियादीनि पठमं देसितानि । सो मनुस्सत्तभावो यं धम्मं उपादाय “इत्थी”ति वा “पुरिसो”ति वा सङ्गं गच्छति, “अयं सो”ति निदस्सनत्थं ततो इत्थिन्द्रियं, पुरिसिन्द्रियज्ज । सो दुविधोपि जीवितिन्द्रियपटिबद्धवुत्तीति आपनत्थं ततो जीवितिन्द्रियं । याव तस्स पवत्ति, ताव एतेसं वेदयितानं अनिवत्ति । यज्ज किज्जि वेदयितं, सब्बं तं सुखं दुक्खन्ति आपनत्थं ततो सुखिन्द्रियादीनि । तन्निरोधत्थं पन एते धम्मा भावेतव्वानि पटिपत्तिदस्सनत्थं ततो सद्भादीनि । “इमाय पटिपत्तिया एस धम्मो पठमं अत्तनि पातुभवती”ति पटिपत्तिया अमोघभावदस्सनत्थं ततो अनज्जातज्जस्सामीतिन्द्रियं । तस्सेव फलत्ता, ततो अनन्तरं भावेतव्वत्ता च ततो अज्जिन्द्रियं ।

इतो परं भावनाय इमस्स अधिगमो, अधिगते च पन इमस्मिं नत्थि किञ्चि उत्तरि करणीयन्ति आपनत्थं अन्ते परमस्सासभूतं अज्जाताविन्दियं देसितन्ति एवं कमतो पाळिमुत्तविनिच्छयनयो विज्जेय्यो ।

इन्द्रियविभङ्गमातिकथवण्णना निट्ठिता ।

### पच्चयाकारविभङ्गमातिकथवण्णना

पच्चयाकारविभङ्गमातिकाय पन अत्थतो ताव — **अविज्जापच्चया**तिआदीसु अविन्दियं कायदुच्चरितादिं विन्दति पटिलभति, विन्दियं वा कायसुचरितादिं न विन्दति, धम्मानं वा यथासभावं अविदितं करोति, अन्तविरहिते वा संसारे सत्ते जवापेति, अविज्जमानेसु वा जवति, विज्जमानेसु वा न जवतीति अविज्जा । पटिच्च फलमेति एतस्माति पच्चयो, धम्मानं उपत्तिया, ठितिया च उपकारको धम्मो । अविज्जा च सा पच्चयो चाति अविज्जापच्चयो, तस्मा **अविज्जापच्चया** । सङ्गतमभिसङ्करोन्तीति सङ्गारा ।

इतो परं **सङ्गारपच्चया विज्जाणन्ति**आदीसु वुत्तं वुत्तनयेनेव वेदितब्बं । अवुत्तेसु पन विजानातीति **विज्जाणं** । नमतीति नामं, रुप्पतीति रूपं, नामञ्च रूपञ्च नामरूपञ्च **नामरूपन्ति** एकदेससरूपेकसेसनयेन वेदितब्बं । आये तनोति, आयतञ्च नयतीति आयतनं, छट्ठायतनञ्च सट्ठायतनञ्च **सट्ठायतनन्ति** एकसेसनयेन वेदितब्बं । फुसतीति **फस्सो** । वेदयतीति **वेदना** । परितस्सतीति **तण्हा** । उपादियतीति **उपादानं** । भवति, भावयति चाति **भवो** । जननं **जाति** । जीरणं **जरा** । मरन्ति एतेनाति **मरणं** । सोचनं **सोको** । परिदेवनं **परिदेवो** । दुक्खयति, उप्पादट्ठितिवसेन द्विधा खणतीतिपि **दुक्खं** । दुम्भनस्स भावो **दोमनस्सं** । भुसो आयासो **उपायासो** । **सम्भवन्तीति** निब्बत्तन्ति । न केवलञ्च सोकादीहेव, अथ खो अविज्जापच्चया सङ्गारा सम्भवन्तीतिआदिना सब्बपदेहिपि सम्भवन्ति-सदस्स योजना कातब्बा । एवं हि पच्चयपच्चयुप्पन्नववत्थानं कतं होति ।

एवन्ति निट्ठिनयनिदस्सनं, तेन अविज्जादीहेव कारणेहि, न इस्सरनिम्मानादीहीति दस्सेति । **एतस्साति** यथावुत्तस्स । **केवलस्साति** असम्मिस्सस्स, सकलस्स वा, **दुक्खक्खन्धस्साति** दुक्खसमूहस्स, न सत्तस्स, न सुखसुभादीनं । **समुदयोति** निब्बत्ति, **होतीति** सम्भवति । अयं तावेत्थ पदत्थो ।

**धम्मभेदतो** पनेत्थ **अविज्जाति** सुत्तन्तपरियायेन दुक्खादीसु चतुसु, अभिधम्मपरियायेन पुब्बन्तादीहि सद्धिं अट्ठसु वा ठानेसु अज्जाणं । **सङ्गारा** पन पुज्जापुज्जानेज्जाभिसङ्गारा तयो, कायवचीचित्तसङ्गारा तयो चाति छब्बिधा । तत्थ अट्ठ कामावचरकुसलचेतना, पञ्च रूपावचरकुसलचेतना चेति तेरस चेतना **पुज्जाभिसङ्गारो** नाम । द्वादस अकुसलचेतना **अपुज्जाभिसङ्गारो** नाम । चतस्सो अरूपावचरकुसलचेतना **आनेज्जाभिसङ्गारो** नाम । इमेसं पन तिण्णं सङ्गारानं एव द्वारतो पवत्तिदस्सनत्थं अयं सङ्गारादित्तिको वुत्तो ।

अट्ठ कामावचरकुसलचेतना चेव द्वादसाकुसलचेतना च कायद्वारे पवत्तियं **कायसङ्गारो**, वचीद्वारे पवत्तियं **वचीसङ्गारो**, एता चेव मनोद्वारे पवत्तियं, मनोद्वारे एव पवत्तनका रूपारूपकुसलचेतना च **चित्तसङ्गारो**ति वुच्चन्ति । अभिज्जाचेतना, पनेत्थ उद्धच्चचेतना च परतो पटिसन्धिविज्जाणपच्चयभावे अपनेतब्बापि अविज्जापच्चया सम्भवतो इध गहेतब्बावाति अयं तिको पुरिमत्तिकमेव पविसतीति अत्थतो लोकियकुसलाकुसलचेतनाव अविज्जापच्चया सङ्गाराति वेदितब्बं । इदञ्च सुत्तन्तभाजनीयनयेन, अभिधम्मभाजनीयनयेन पन लोकियलोक्तरं एकेकचित्तक्खणे द्वादसङ्गस्स पटिच्चसमुप्पादस्स गहणतो सब्बापि चेतना **सङ्गाराति** वेदितब्बं । एवं विज्जाणनामरूपादीसुपि सब्बचित्तसम्पयुत्तवसेन च धम्मभेदो वेदितब्बो । सुत्तन्तभाजनीयनयेनेव पन दस्सयिस्साम ।

सङ्गारपच्चया विज्जाणञ्च चक्खुविज्जाणादिछब्बिधं बात्तिसलोकियविपाकविज्जाणमेव होति, लोकुत्तरानि पन वट्टकथाय न युज्जन्तीति न गहितानि । विज्जाणपच्चया नामरूपं पन सब्बलोकियविज्जाणसम्पयुत्ता तयो अरूपिनो खन्धा । रूपं सब्बानि भूतुपादायरूपाणि । सट्ठायतनं मनच्छट्ठानि इन्द्रियानि । फस्सो चक्खुसम्पस्सादिको छविपाकफस्सो, तथा वेदनापि । तण्हा रूपतण्हादिभेदतो छब्बिधो लोभो । उपादानं कामुपादानादितो चतुब्बिधा लोभदिट्ठियोव । भवो पन दुविधो कम्मभवो, उपपत्तिभवोति । तत्थ **कम्मभवो** तेभूमककुसलाकुसलचेतना च तंसम्पयुत्ता अभिज्झादयो च । **उपपत्तिभवो** पन कम्माभिनिब्बत्ता पञ्चपि खन्धा । सो पभेदतो कामरूपा रूपभवा तयो, सज्जा असज्जा नेवसज्जानासज्जा भवा तयो, एकचतुपञ्चवोकारभवा तयोति नवविधो निट्ठो । जातिआदीनि पुब्बे वुत्तानि । तेसु जातिगहणेन विज्जाणनामरूपसट्ठायतनफस्सवेदनाव गहिता तदविनाभावतो । तथा जरामरणगहणेनापि तेसज्जेव पाकभेदता । सोकादयो पन जरामरणेन द्वादसमेन अङ्गेन एकसङ्केपं कत्वा वुत्ता, न विसुं अङ्गभावेन । किमत्थन्ति चे? भवचक्कस्स अविच्छेददस्सनत्थं । सोकादितो हि अविज्जा सिद्धा होति अविज्जाविषययोगतो, अविज्जासमुप्पत्तितो च । जरामरणभाहत्तस्स हि बालस्सेव ते सम्भवन्ति, तेहि च अविज्जाय सिद्धाय पुन अविज्जापच्चया सङ्गाराति एवं हेतुफलपरम्पराय भवचक्कं अविच्छिन्नं, अनादिकं, अपरियन्तं, अपरियोसानञ्च होति ।

यदि एवं, कस्मा अविज्जा आदितो वुत्ताति? पधानदस्सनत्थं पन आदितो वुत्ता । तिण्णं हि वट्ठानं अविज्जा पधानो हेतु तस्सा भावे भावतो, निरोधेन च निरुज्जनतो । एवं अविज्जादीहि द्वादसहि अङ्गेहि सुत्तन्तभाजनीयनयेन सब्बे लोकियधम्माव पच्चयपच्चयुप्पन्नभावेन वुत्ताति वेदितब्बा ।

अभिधम्मपरियायेन पन लोकुत्तरापीति अयमेत्थ धम्मभेदो ।

**विभङ्गनयतो** पनेत्थ पञ्हापुच्छकनयो नत्थि, सुत्तन्तभाजनीयनयापि धम्मभेदे वुत्तनयेनेव वित्थारतो विभत्ताति वेदितब्बो । **अभिधम्मभाजनीये** पन —

“अविज्जापच्चया सङ्कारो, सङ्कारपच्चया विज्जाणं, विज्जाणपच्चया नामं, नामपच्चया छट्ठायतनं, छट्ठायतनपच्चया फस्सो, फस्सपच्चया वेदना, वेदनापच्चया तण्हा, तण्हापच्चया उपादानं, उपादानपच्चया भवो, भवपच्चया जाति, जातिपच्चया जरामरणं, एवमेतस्स केवलस्स दुक्खक्खन्धस्स समुदयो होति ।

“अविज्जापच्चया सङ्कारो...पे०... विज्जाणपच्चया नामं, नामपच्चया फस्सो...पे०... समुदयो होति ।

“अविज्जापच्चया...पे०... विज्जाणपच्चया नामरूपं, नामरूपपच्चया छट्ठायतनं, छट्ठायतनपच्चया फस्सो...पे०... समुदयो होति ।

“अविज्जापच्चया ...पे०... विज्जाणपच्चया नामरूपं, नामरूपपच्चया सळायतनं, छट्ठायतनपच्चया फस्सो...पे०... समुदयो होती”ति (विभ० २४३) —

एवं पच्चयचतुक्कं, पुन “अविज्जापच्चया सङ्कारो अविज्जाहेतुको”तिआदिना (विभ० २४४) वुत्तनयेनेव हेतुचतुक्कं, पुन “अविज्जापच्चया सङ्कारो अविज्जासम्पयुत्तो”तिआदिना (विभ० २४५) सम्पयुत्तचतुक्कं, पुन “अविज्जापच्चया सङ्कारो, सङ्कारपच्चयापि अविज्जा”तिआदिना (विभ० २४६) अज्जमज्जपच्चयचतुक्कन्ति एवं अविज्जामूलकानि चत्तारि चतुक्कानि वुत्तानि । एवं “सङ्कारपच्चया अविज्जा”तिआदिना सङ्कारादिमूलकादिउपादानमूलकपरियोसानानि अट्टसु पदेसु चत्तारि चत्तारि चतुक्कानीति बात्तिस चतुक्कानि मातिकं कत्वा निक्खिपित्वा पुन अकुसलकुसलविपाककिरियचित्तेसु लोकियलोकुत्तरेसु एकेकस्मिं चित्ते यथानिक्खित्तेहि छत्तिसबात्तिसमातिकाचतुक्केहि वित्थारतो यथानुरूपं पच्चयाकारो विभत्तो । इदञ्च यस्मा न केवलं अयं पच्चयाकारो नानाचित्तेसु एव होति, एकचित्तेपि होतियेव । नापि वट्टचित्ते एव होति, तण्हाभावतो विवट्टचित्तेपि, तस्मा तं निष्पदेसतो एकचित्तक्खणिकं पच्चयाकारं दस्सेतुं वुत्तं । तेनेव हेत्थ “अविज्जापच्चया सङ्कारा”ति अवत्वा “अविज्जापच्चया सङ्कारो”ति एकवचनेन वुत्तं एकचित्तक्खणे बहुचेतनाभावा । तत्थ यदेतं पठमचतुक्कं, तत्थ पठमवारो नामरूपद्वाने नामं, सळायतनद्वाने छट्ठायतनञ्च गहेत्वा रूपरूपादिसम्भवसाधारणवसेन, एकचित्तक्खणपरियापन्नधम्मगहणवसेन च रूपं छट्टेत्वा वुत्तो रूपस्स सम्भवसाधारणत्ता, बहुचित्तक्खणिकत्ता च । दुतियो नामरूपद्वाने नामं, “नामपच्चया फस्सो”ति सळायतनद्वाने फस्समेव गहेत्वा फस्सस्स सळायतनं विनापि पच्चयविसेससम्भवदस्सनवसेन चेव **महानिदानसुत्तनयदस्सनवसेन** (दी० नि० २.९५ आदयो) च वुत्तो । ततियो सळायतनद्वाने छट्ठायतनमेव गहेत्वा गम्भसेय्यकानं अपरिपुण्णायतनानं, रूपभविकादीनञ्च वसेन वुत्तो । चतुत्थो “नामपच्चया सळायतनं, सळायतनपच्चया फस्सो”ति एवं इतरायतनेहिपि सळायतनस्स विसेसतो फस्सपच्चयतवं दस्सेत्वा ओपपातिकानं, परिपुण्णायतनानं कामभविकानञ्च वसेन वुत्तो । एवं दुतियचतुक्कादीसुपि ।

सब्बत्थापि चेत्थ यस्मा सोकादयो सब्बे एकचित्तक्खणे न सम्भवन्ति, सब्बस्मिञ्च चित्ते, भवे च नप्पवत्तन्ति, तस्मा न गहिता । जातिजरामरणानि पनेत्थ अरूपधम्मानं लक्खणमत्तानि, तानि च अचित्तक्खणमत्तानिपि समानानि चित्तक्खणे अन्तो गधत्ता परियायतो पच्चयुप्पन्ने कत्वा अङ्गपरिपूरणत्थं गहितानि । भवोति चेत्थ उपादानादिपच्चयविरहिता चत्तारो अरूपिनो खन्धा, तण्हापच्चया उपादानन्ति एत्थ कामुपादानं वज्जेत्वा तीणि उपादानानि एव गहेतब्बानि । द्विन्मिपि एकलक्खणानं धम्मानं एकक्खणे असम्भवा लोभमूलविरहितेसु दोसमोहमूलेसु चेव कुसलाब्बाकतेसु च चित्तेसु वेदनापच्चया पटिघं विचिकिच्छा उद्धच्चन्ति एवं तण्हाठाने यथायोगं पटिघादयो तयो । तेसु विचिकिच्छावज्जितेसु चेव दिट्ठिविप्पयुत्तेसु च उपादानद्वाने अधिमोक्खो गहितो । विचिकिच्छाय पन सद्धिं अधिमोक्खस्सापि असम्भवा विचिकिच्छापच्चया भवोति च गहितो । उपादानद्वाने च अधिमोक्खो च गहितो । लोकियानञ्चेत्थ कुसलाब्बाकतानं उपनिस्सयवसेन अविज्जापच्चयता वुत्ता । लोकुत्तरानं पन यस्मा अप्पहीनाविज्जो अविज्जाय प्हानत्थं, पटिप्पस्सम्भनत्थञ्च लोकुत्तरं भावेति, तस्मा समतिक्कमनवसेन अविज्जापच्चयता वुत्ता, न सहजातवसेन । तेनेव तेसं **निद्देसवारेसु** “तत्थ कतमा अविज्जा”ति अविभजित्वा “तत्थ कतमो अविज्जापच्चया सङ्कारो”ति (विभ० २४०) विभत्तं । किरियधम्मानं पन केनचि परियायेन अविज्जामूलकत्तं नत्थीति “सङ्कारपच्चया विज्जाणं”न्तिआदिना सङ्कारमूलकादिको नयो वुत्तो, न अविज्जामूलको । अपिच लोकियकुसलादीसु तेसं धम्मानं दुक्खसच्चपरियापन्नत्ता “एवमेतस्स केवलस्स दुक्खक्खन्धस्स समुदयो होती”ति (विभ० २२५) एवं अप्पना कता, लोकुत्तरकुसलादीसु “एवमेतेसं धम्मानं”न्ति । अयं लोकियतो लोकुत्तरानं देसनाय विसेसोति अयं अभिधम्मभाजनीये नयो ।

इदानि पच्चयनया, कारकादीहि सुज्जतो ।

मूलद्वसन्धिसङ्केपाकारवट्टविभागतो ॥

वारणोपमतोपेत्थ, गम्भीरनयभेदतो ।

यथारहं विजानीयो, पाळिमुत्तविनिच्छयो ॥

तत्थ पच्चयनयो सामञ्जतो, विसेसतो चाति दुविधो होति । तत्थ तब्भावभाविमत्ततापकासको सामञ्जतो पच्चयनयो । विसेसतो पन पट्टाने आगतेसु हेतुपच्चयादिचतुवीसतिया पच्चयेसु यथानुरूपं पच्चयविसेसुप्पन्नमत्ततापकासको । सा च नेसं चतुवीसतिया पच्चयानं विभागता पट्टानमातिकथसंवण्णनाय आवि भविस्सति । तत्थ सामञ्जतो सङ्खारादयो अविज्जादिपच्चयभावे एव भाविनोति वेदितब्बा । यस्स हि चतूसु सच्चेसु, पुब्बन्तादीसु च अविज्जा अप्पहीना होति, सो दुक्खे ताव पुब्बन्तादीसु च अज्जाणेन तीसु भवेसु जातिजरारोगमरणादिअनेकादीनववोकिण्णं पुज्जफलसङ्घातं सङ्खारविपरिणामदुक्खं दुक्खतो अजानन्तो सुखसज्जाय पत्थेत्वा तीहि द्वारेहि पुज्जानेज्जाभिसङ्खारे आरभति । समुदये अज्जाणेन दुक्खहेतुभूतेसुपि तण्हापरिक्खारेसु दुक्खहेतुकं आपायिकादिदुक्खं, दुक्खहेतुभूतेसु कामूपसेवनादीसु च आदीनवं अपस्सन्तो सुखहेतुसज्जाय चैव किलेसाभिभूतताय च तिविधेपि सङ्खारे आरभति । निरोधे, पन मग्गे च अज्जाणेन अनिरोधभूते गतिविसेसे निरोधसज्जी, निरोधस्स च वा अमग्गभूतेसुपि यज्जामरतपादीसुपि निरोधमग्गसज्जी हुत्वा तिविधेपि सङ्खारे आरभति । इदपच्चयतापटिच्चसमुप्पन्नेसु धम्मेसु अज्जाणेन “अहेतू अप्पच्चया सत्ता उप्पज्जन्ति, न होन्ति परं मरणा”ति वा “अत्ताव जानाति वा न जानाति वा, सोव सङ्खारे सङ्खरोति, सोव पटिसन्धियं उप्पज्जति, तस्स अणुइस्सरदयो कललादिभावेन सरीरं सण्ठापेत्ता इन्द्रियानि सम्पादेन्ति, सोव इन्द्रियसम्पन्नो फुसति, वेदयति, तण्हियति, उपादानादीनि च करोती”ति वा “सब्बे सत्ता नियतिसङ्गतिभवपरिणता”ति वा विकप्पेति । सो एवं अविज्जाय अन्धीकतो —

“यथापि नाम जच्चन्धो, नरो अपरिणायको ।

एकदा याति मग्गेन, उम्मग्गेनापि एकदा ॥

“संसारे संसरं बालो, तथा अपरिणायको ।

करोति एकदा पुज्जं, अपुज्जमपि एकदा”ति ॥ (विभ० अट्ठ० २२६ सङ्खारपदनिद्देस) —

वुत्तनयेन तिविधे सङ्खारे अभिसङ्खरोतीति । किं पनेत्थ एकाव अविज्जा सङ्खारानं पच्चयो होति, ननु एकस्मा कारणा एकं कारियं उप्पज्जति, अनेकं कारियं न उप्पज्जति, अनेकस्मा वा एकन्ति, अनेकस्मा कारणा अनेकं कारियं उप्पज्जतीति? सच्चं, पधानत्तपाकटत्तअसाधारणत्तदीपनत्थं पनेत्थ अनेकेसु कारणेसुपि एका अविज्जा एव पच्चयभावेन निद्दिट्ठा “फस्सपच्चया वेदना (उदा० ३), सेम्हसमुट्ठाना आबाधा”तिआदीसु (अ० नि० १०.६०; महानि० ५; चूळनि० खग्गविसाणसुत्तनिद्देस १२८) विय । अविज्जा हि पधानो हेतु, सङ्खारानं पाकटो, असाधारणो च तण्हादिहेतूनम्पि हेतुत्ता, न वत्थारम्मणादीनि खीणासवस्स तेसं सम्भवेपि सङ्खारानं अभावाति । एवं तावेत्थ वट्टसङ्खारानं अविज्जाय एव भावे भावो वेदितब्बो । तथा विज्जाणस्सापि उपचितकम्माभावे अभावतो, सब्बत्थ सब्बेसज्ज सब्बविपाकविज्जाणुप्पत्तिप्पसङ्गतो च सङ्खारानं एव भावे भावो वेदितब्बो । यथा चेत्थ, एवं उपरिपि नामरूपादीनं विज्जाणादिभावे भावो यथानुरूपं अनुभवयुत्तीहि जातब्बोति अयं सामञ्जतो पच्चयनयो ।

विसेसतो पन अविज्जा पुज्जाभिसङ्खारानं ताव आरम्मणपच्चयेन, उपनिस्सयपच्चयेन चाति द्विधा पच्चयो होति । सा हि अविज्जं आरब्ध सम्मसनादिवसेन उप्पत्तियं कामावचरानं, अभिज्जाचित्तेन समोहचित्तस्स जाननकाले रूपावचरानज्ज पुज्जाभिसङ्खारानं ताव आरम्मणपच्चयेन पच्चयो होति, अविज्जासमतिक्कमनत्थाय पन अविज्जासम्मूळताय कामरूपभवसम्पत्तियो पत्थेत्वाव कामरूपावचरपुज्जानि करोन्तस्स उपनिस्सयपच्चयेन पच्चयो होति । अपुज्जाभिसङ्खारानं पनेसा अविज्जं आरब्ध रागादीनं उप्पज्जनकाले आरम्मणादिपच्चयेन अविज्जासम्मूळताय पाणातिपातादीनि करोन्तस्स निस्सयपच्चयेन, दुतियजवनादीनं अनन्तरूपनिस्सयासेवननत्थिविगतपच्चयेहि यं किञ्चि अकुसलं करोन्तस्स हेतुसहजातअज्जमज्जनस्सयसम्पयुत्तअत्थिअविगतपच्चयेहीति एवं अनेकधा पच्चयो होति, आनेज्जाभिसङ्खारानं पन एकेन उपनिस्सयपच्चयेनेव पच्चयो होति ।

सङ्खारपच्चया विज्जाणपदे पन तयोपि सङ्खारा विज्जाणस्स यथारहं तीसु भवेसु पटिसन्धिपवतीसु कम्मपच्चयेन चैव उपनिस्सयपच्चयेन चाति द्विधा पच्चया होन्ति । अभिधम्मभाजनीयनयेन सहजातस्स विज्जाणस्स सहजातअज्जमज्जनस्सयसम्पयुत्तकम्मत्थिअविगतादिपच्चयेहि पच्चया होन्ति ।

विज्जाणपच्चया नामरूपपदे पन विज्जाणं विपाकभूतं, अविपाकभूतज्ज नामस्स केवलस्स वा रूपमिस्सकस्स वा पटिसन्धिपवतीसु सहजातअज्जमज्जनस्सयसम्पयुत्तविपाकआहारइन्द्रियअत्थिअविगतपच्चयेहि यथारहं नवधा, अट्ठधा वा पच्चयो होति । पटिसन्धियं विपाकविज्जाणं वत्थुरूपस्स सहजातअज्जमज्जनस्सयविपाकआहारइन्द्रियविष्पयुत्तअत्थि अविगतपच्चयेहि नवधा पच्चयो होति । ठपेत्वा पन वत्थुरूपं सेसरूपस्स तेहेव अज्जमज्जपच्चयरहितेहि अट्ठहि पच्चयो होति । अभिसङ्खारविज्जाणं पन एकवोकारपच्चवोकारभवेसु कम्मजरूपस्स सुत्तन्तिकपरियायेन उपनिस्सयवसेन पच्चयो होति । पवत्तियं पन सब्बम्पि विज्जाणं तस्स तस्स नामरूपस्स यथारहं पच्चयो होति । तत्थ अरूपभवे विज्जाणं नामस्सेव, असज्जिभवे रूपस्सेव, पच्चवोकारभवे नामरूपस्स पच्चयो होतीति वेदितब्बं । तेनेव नामज्ज रूपज्ज नामरूपज्ज नामरूपन्ति निब्बचनं कतन्ति ।

नामरूपपच्चया सळायतनपदे पन नामं विपाकभूतं, अविपाकभूतज्ज अरूपभवे छट्ठायतनस्स अवकंसतो सहजातअज्जमज्जनस्सयसम्पयुत्तविपाकअत्थिअविगतवसेन यथारहं सत्तधा पच्चयो होति । इतरेसं पनेतं पच्चन्नं चक्खायतनादीनं पच्चवोकारभवे पटिसन्धियं चतुमहाभूतसहायं हुत्वा सहजातनिस्सयविपाकविष्पयुत्तअत्थिअविगतवसेन छट्ठा पच्चयो होति । किञ्चि पनेत्थ हेतुपच्चयेन, किञ्चि

आहारपच्येन चाति तेसं वसेन सब्बवारेसु उक्कंसावकंसो वेदितब्बो । पवत्ते पन चक्खादीनं पञ्चन्नं विपाकमविपाकम्पि नामं पच्छाजातविष्युत्तअत्थिअविगतवसेन चतुधा पच्ययो होतीति । एवं ताव नाममेव सळायतनस्स पच्ययो होतीति वेदितब्बं ।

रूपं पन वत्थुभूतं पटिसन्धियं छट्ठायतनस्स सहजातअञ्जमञ्जनिस्सयविष्युत्तअत्थिअविगतवसेन छधा पच्ययो होती । चतुमहाभूतरूपं चक्खादीनं पञ्चन्नं पटिसन्धियं, पवत्ते च सहजातनिस्सयअत्थिअविगतपच्येहि चतुधा पच्ययो होती । रूपजीवितिन्द्रियं पन इन्द्रियअत्थिअविगतवसेन तिविधा । तथा आहारो आहारत्थिअविगतवसेन । सो च आहारूपजीवीनं पवत्तेयेव, नो पटिसन्धियं । तानि पन पञ्च चक्खायतनादीनि पञ्चविज्जाणसङ्घातस्स छट्ठस्स मनायतनस्स निस्सयपुरेजातइन्द्रियविष्युत्तअत्थिअविगतवसेन छधा पच्यया होन्ति पवत्तेयेव, नो पटिसन्धियं । तथा पञ्चविज्जाणविरहितमनायतनस्स वत्थुरूपं निस्सयपुरेजातविष्युत्तअत्थिअविगतवसेन पञ्चधा पच्ययो होतीति । एवं रूपमेव छट्ठायतनस्स, सळायतनस्स च पच्ययो होतीति वेदितब्बं । खन्धत्तयवत्थुरूपसङ्घातं पन नामरूपं छट्ठायतनस्स पटिसन्धियं सहजातअञ्जमञ्जनिस्सयसम्पयुत्तविष्युत्तविपाकअत्थिअविगतादिवसेन यथारहं पच्ययो होतीति । एवं नामञ्च रूपञ्च नामरूपञ्च यथारहं छट्ठायतनस्स, सळायतनस्स च पच्ययो होतीति वेदितब्बं ।

सळायतनपच्यया फस्सपदे पन छट्ठायतनं विपाकं, अविपाकञ्च सब्बत्थ सम्पयुत्तफस्सस्स सहजातादिवसेन नवधा, अट्ठधा वा पच्ययो होती । चक्खायतनादीनि पञ्च यथाक्कमं पवत्ते चक्खुसम्फस्सादीनं पञ्चन्नं निस्सयपुरेजातइन्द्रियविष्युत्तअत्थिअविगतवसेन छधा, रूपायतनादीनि पञ्च तेसं आरम्भणपुरेजातअत्थिअविगतवसेन तिधा । मनोसम्फस्सस्स पन तानि, धम्मारम्भणञ्च तथा च आरम्भणाधिपतिमत्तेन चाति बहुधा पच्यया होन्ति । एवं छट्ठायतनञ्च सळायतनञ्च छब्धिधस्सापि फस्सस्स पच्ययो होतीति वेदितब्बं ।

फस्सपच्यया वेदनापदे सब्बोपि फस्सो सहजातानं वेदनानं सहजातअञ्जमञ्जनिस्सयविपाकआहारसम्पयुत्तअत्थिअविगतवसेन अट्ठधा, सत्तधा वा पच्ययो होती, असहजातानं उपनिस्सयवसेनेवाति ।

वेदनापच्यया तण्हापदे विपाकवेदना अनुसयपतिताय तण्हाय उपनिस्सयवसेन, सहजातादिवसेन च पच्ययो होती । यस्मा पन —

दुक्खी सुखं पत्थयति, सुखी भिय्योपि इच्छति ।  
उपेक्खा पन सन्तत्ता, सुखमिच्चेव भासिता ।  
तण्हाय पच्यया तस्मा, होन्ति तिस्सोपि वेदनाति ॥ (विसुद्धि० २.६४४) ।

तण्हापच्यया उपादानपदे तण्हा असहजाता चतुन्नम्पि उपादानानं उपनिस्सयवसेन चेव अनन्तरादिवसेन च, सहजाता पन कामुपादानवज्जितानं तिण्णं हेतुसहजात अञ्जमञ्जनिस्सयसम्पयुत्तअत्थिअविगतवसेन सत्तधा पच्ययो होती ।

उपादानपच्यया भवपदे चतुब्धिधम्पि उपादानं असहजातस्स सब्बकम्मभवस्स चेव उपपत्तिभवस्स च उपनिस्सयवसेनेव पच्ययो होती, सहजातस्स पन कम्मभवस्स हेतुसहजातादिवसेन पच्ययो होती ।

भवपच्यया जातिपदे भवोति कम्मभवोव अधिप्पेतो, सो च जातिया कम्मपच्ययउपनिस्सयपच्ययवसेन द्विधा पच्ययो होती ।

जातिपच्यया जरामरणादिपदे जाति पन जरामरणानं, सोकादीनञ्च तब्भावभावीभावमत्ततो सुत्तन्तिकनयेन उपनिस्सयकोटियाव पच्ययो होतीति अयं तावेत्थ पच्ययनयो ।

**कारकादीहि सुज्जतो** पनेते अविज्जादयो द्वादस धम्मा यस्मा एवं पच्ययपच्ययुप्पन्नभावेन अञ्जमञ्जं पटिबद्धा अञ्जनिरपेक्खा हुत्वा अविच्छिन्ना अनादिका पवत्तन्ति, तस्मा ततो अञ्जेन ब्रह्मादिना कारकेन, पकतिअणुकालादिहेतुना वा कारकवेदकरूपेन परपरिकम्पितेन अत्तना वा रहिता । न चेते अत्ता, न अत्तनि, न अत्तवन्तो, सुज्जा एते अत्तेन वा अत्तनियेन वा धुवभावेन वा सुभभावेन वा सुखभावेन वाति अयं कारकादीहि सुज्जता ।

**मूलद्वसन्धिसङ्केपाकारवट्टविभागतो**ति एत्थ मूलतो ताव अविज्जा, तण्हा चाति द्वे धम्मा **मूलन्ति** वेदितब्बा । अद्धतो पनेत्थ अविज्जा, सङ्काराति द्वे अङ्गानि अतीतो **अद्धा**, विज्जाणादीनि भवावसानानि अट्ठ पच्युप्पन्नो अद्धा, जाति चेव जरामरणञ्चाति द्वे अनागतो अद्धाति तयो अद्धा वेदितब्बा । सन्धितो पन सङ्कारानं, पटिसन्धिविज्जाणस्स च अन्तरा एको हेतुफलसन्धि, वेदनाय च तण्हाय च अन्तरा एको फलहेतुसन्धि, भवस्स च जातिया च अन्तरा एको हेतुफलसन्धि चाति तयो **सन्धी** वेदितब्बा । सङ्केपतो पन सन्धीनं आदिपरियोसानववत्थिता चत्तारो सङ्केपा होन्ति । सेय्यथिदं — अविज्जासङ्कारा एको सङ्केपो, विज्जाणनामरूपसळायतनफस्सवेदना दुतियो, तण्हुपादानभवा ततियो, जातिजरामरणानि चतुत्थोति एवं चत्तारो **सङ्केपा** वेदितब्बा ।

आकारतो पनेत्थ —

अतीते हेतुयो पञ्च, इदानीं फलपञ्चकं ।  
इदानीं हेतुयो पञ्च, आर्यतिं फलपञ्चकन्ति ॥ —

एवं वीसति आकारा होन्ति ।

एत्थ हि सरूपतो वुत्ता अविज्जासङ्खारा, तेसं गहणेन तदविनाभावतो गहिता तण्हुपादानभवाति इमे पञ्च धम्मा **अतीते हेतुयो** नाम, सरूपतो वुत्ता विज्जाणादयो पञ्च धम्मा **इदानीं फलपञ्चकं** नाम, सरूपतो पन वुत्ता तण्हुपादानभवा, तेसं गहणेन तदविनाभावतो गहिता अविज्जासङ्खाराति इमे पञ्च **इदानीं हेतुयो** नाम । जातिआदिअपदेसेन वुत्ता विज्जाणादयो पञ्च धम्मा **आर्यतिं फलपञ्चकं** नामाति एवं वीसति **आकारा** वेदितब्बा । वट्टतो पनेत्थ सङ्खारभवा कम्मवट्टं, अविज्जातण्हुपादाना किलेसवट्टं, सेसानि विपाकवट्टन्ति तीणि **वट्टानि** होन्ति । याव च तेसु किलेसवट्टं अरियमग्गेन न उपच्छिज्जति, ताव इदं भवचक्रं अनुपच्छिन्नं पवत्ततीति अयमेत्थ मूलद्वसन्धिसङ्खेपाकारवट्टविभागो ।

**वारणोपमतीति** एत्थ वारणतो ताव — “अविज्जापच्चया सङ्खारा”ति इदमहेतुकविसमहेतुकदस्सननिवारणं, “सङ्खारपच्चया विज्जाण”न्ति उच्छेदअत्तसङ्कन्तिदस्सननिवारणं, “विज्जाणपच्चया नामरूप”न्ति अत्ताति परिकप्पितवत्थुभेददस्सनतो घनसञ्जानिवारणं, “नामरूपपच्चया सळायतन”न्तिआदि अत्ता पस्सति...पे०... विजानाति फुसति, वेदयति, तण्हयति, उपादियति, भवति, जायति, जीयति, मीयतीति एवमादिदस्सननिवारणन्ति इदमेत्थ मिच्छादस्सननिवारणं ।

**उपमातो** पनेत्थ अन्धो विय अविज्जा, तस्स उपक्खलनं विय सङ्खारा, पतनं विय विज्जाणं, तेन गण्डपातुभावो विय नामरूपं, तस्स गण्डभेदपीळका विय सळायतनं, तस्स सङ्कट्टनं विय फस्सो, तज्जनितदुक्खं विय वेदना, दुक्खस्स पटिकाराभिलासो विय तण्हा, असप्पायग्गहणं विय उपादानं, असप्पायालेपनं विय भवो, तेन गण्डविकारपातुभावो विय जाति, तब्बिकारभेदो विय जरामरणं । यथासभावदस्सननिवारणादितो वा एते अविज्जादयो अक्खिपटलादि उपमाहिपि वेदितब्बाति अयमेत्थ उपमा ।

**गम्भीरनयभेदतो**ति एत्थ गम्भीरभेदो ताव इमेसं अविज्जादीनं पच्चकं धम्मत्थदेसनापटिवेधगम्भीरता वेदितब्बा । इमे हि अविज्जादयो धम्मा येनाकारेन यदवत्था च सङ्खारादीनं फलानं पच्चया होन्ति, सो नेसं पच्चयट्ठो दुरवबोधतो गम्भीरोति अयमेत्थ **धम्मगम्भीरता** । धम्मोति हेतु “हेतुमिह जाणं धम्मपटिसम्भिदा”ति (विभ० ७२०) वचनतो । जरामरणादीनं फलानं जातिआदीहि पच्चयेहि सम्भूतसमुदागतट्ठो दुरवबोधतो गम्भीरोति अयं **अत्थगम्भीरता** । अत्थोति फलं “हेतुफले जाणं अत्थपटिसम्भिदा”ति (विभ० ७२०) वचनतो । तेसं पन हेतूनं, फलानञ्च तेन तेनाकारेन अविपरीततो देसनापि सब्बज्जुतज्जाणस्सेव गोचरतो गम्भीराति अयं **देसनागम्भीरता** । यो पनेसं अविज्जासङ्खारादीनं अदस्सनायूहनादिसभावो, सो मन्दपञ्जेहि दुप्परियोगाहत्ता गम्भीरोति अयं **पटिवेधगम्भीरता**ति अयमेत्थ गम्भीरभेदो ।

**नयभेदो** पनेत्थ एकत्तनयो नानत्तनयो अब्यापारनयो एवंधम्मतानयोति इमेसं चतुन्नं अत्थनयानं वसेन वेदितब्बो । तत्थ हि “अविज्जापच्चया सङ्खारा, सङ्खारपच्चया विज्जाण”न्ति एवं बीजस्स अङ्कुरादिभावेन रुक्खभावप्पति विय सन्तानानुपच्छेदो **एकत्तनयो** नाम । यं सम्मा पस्सन्तो हेतुफलसम्बन्धेन सन्तानानुपच्छेदावबोधतो उच्छेददिट्ठिं पजहति, मिच्छा पस्सन्तो हेतुफलसम्बन्धेन पवत्तमानस्स सन्तानानुपच्छेदस्स एकत्तगहणतो सस्सतदिट्ठिं उपादियति ।

अविज्जादीनं पन यथासकं लक्खणववत्थानं **नानत्तनयो** नाम । यं सम्मा पस्सन्तो नवनवानं उप्पाददस्सनतो सस्सतदिट्ठिं पजहति, मिच्छा पस्सन्तो एकसन्तानपतितस्स भिन्नसन्तानस्सेव नानत्तगहणतो उच्छेददिट्ठिं उपादियति ।

अविज्जाय पन “सङ्खारा मया उप्पादेतब्बा, सङ्खारानं वा विज्जाणं अम्हेही”ति एवमादिब्यापाराभावो **अब्यापारनयो** नाम । यं सम्मा पस्सन्तोकारकस्स अभाववबोधतो अत्तदिट्ठिं पजहति, मिच्छा पस्सन्तो यो असतिपि ब्यापारे अविज्जादीनं सभावनियमसिद्धो हेतुभावो, तस्स अग्गहणतो अकिरियदिट्ठिं उपादियति ।

अविज्जादीहि पन कारणेहि सङ्खारादीनंयेव सम्भवो खीरादीहि दधिआदीनं विय, न अज्जेसन्ति अयं **एवंधम्मतानयो** नाम । यं सम्मा पस्सन्तो पच्चयानुरूपतो फलावबोधतो अहेतुकदिट्ठिं, अकिरियदिट्ठिञ्च पजहति, मिच्छा पस्सन्तो पच्चयानुरूपं फलप्पवत्तिं अग्गहेत्वा यतो कुतोचि यस्स कस्सचि असम्भवग्गहणतो अहेतुकदिट्ठिं चेव नियतवादञ्च उपादियतीति अयमेत्थ नयभेदोति एवं विजानीयो पाळिमुत्तविनिच्छयो ।

पच्चयाकारविभङ्गमातिकथवण्णना निट्ठिता ।

**सतिपट्टानविभङ्गमातिकथवण्णना**

सतिपट्टानविभङ्गमातिकाय पन **अत्थतो** ताव — **चत्तारो**ति गणनपरिच्छेदो, तेन न ततो हेट्ठा, न उद्धन्ति दीपेति । **सतिपट्टानाति** एत्थ द्वे सतिपट्टाना

सतिगोचरोपि सतिपि । “चतुन्नं, भिक्खवे, सतिपट्टानानं समुदयञ्च अत्थङ्गमञ्च देसेस्सामी”तिआदीसु (सं० नि० ५.४०८) हि सतिगोचरो “सतिपट्टानं”ति वुच्चति, तस्सत्थो पतिट्ठाति तस्मिन्ति पट्टानं, का पतिट्ठाति? सति । सतिया पट्टानं **सतिपट्टानं** । पट्टानं ठानन्ति वा पट्टानं, सतिया पट्टानं **सतिपट्टानं** । “चत्तारो सतिपट्टाना भाविता बहुलीकता सत्त बोझङ्गे परिपूरेन्ती”तिआदीसु (मं० नि० ३.१४७) पन सति । तस्सत्थो पतिट्ठातीति पट्टानं, उपट्ठाति ओक्कन्तित्वा पक्खन्दित्वा पवत्ततीति अत्थो । सतियेव पट्टानत्थेन **सतिपट्टानं** । अथ वा सरणट्ठेन सति, सा च उपट्टानट्ठेन पट्टानन्ति **सतिपट्टानं**, इदमिध अधिप्पेतं । यदि एवं, कस्मा सतिपट्टानाति बहुवचनं कतं? सतिया बहुता । आरम्भणभेदेन हि बहुका ता सतियो ।

**इथाति** इमस्मिं सासने, तेन अज्झत्तादिवसेन सब्बप्पकारचतुचत्तालीसविधसतिपट्टाननिब्वत्तकस्स पुग्गलस्स निस्सयभूतं सासनमेव, नाज्जं सासनन्ति दीपेति । वुत्तं हेतं “इधेव, भिक्खवे, समणो... पे०... सुज्जा परप्पवादा समणेहि अज्जेही”ति (दी० नि० २.२१४; मं० नि० १.१३९; अं० नि० ४.२४१) ।

**भिक्खूति** संसारे भयं इक्खनको । तेन किञ्चापि भगवतो देवलोके निसीदित्वा सतिपट्टानं देसेन्तस्स सन्तिके देवगणं मुञ्चित्वा एकभिक्खुपि निसिन्तो नाम नत्थि, तथापि देवो वा होतु मनुस्सो वा गहट्ठो वा पब्बजितो वा, संसारे भयन्ति सम्मा इक्खमानो यथानुसिद्धं पटिपज्जमानोव भिक्खु नाम होति, नाज्जोति दस्सेति । यथाह “अलङ्कतो चेपी”ति (धं० पं० १४२) ।

**अज्झत्तन्ति** नियकज्झत्तं । **कायेति** एत्थ आयन्ति ततोति आयो । के आयन्ति? कुच्छिता केसादयो, इति कुच्छितानं आयोति कायो । अथ वा अङ्गपचङ्गानं, केसादीनञ्च समूहट्ठेनपि कायो, रूपकायो, तस्मिं अत्तनो कायेति अत्थो । **कायानुपस्सीति** कायं अनुपस्सनसीलो । “काये”ति च वत्वा पुन “कायानुपस्सी”ति दुतियकाय-ग्गहणं “एवं न काये अङ्गपचङ्गविनिमुत्तएकधम्मानुपस्सी, नापि केसलोमादिविनिमुत्तइत्थिपुरिसानुपस्सी, न च भूतपादायविनिमुत्तएकधम्मामुपस्सी, अथ खो रथसम्भारनगरावयवकदलिक्खन्धविभागानुपस्सको विय यथाक्कमं अङ्गपचङ्गकेसादिभूतपादायसमूहानुपस्सी एवा”ति दस्सनत्थं कतं । तथा हेत्थ यथावुत्तधम्मसमूहविनिमुत्तो इत्थिपुरिसादिको, अज्जो वा कोचि धम्मो न दिस्सति, यथावुत्तधम्मसमूहमत्तेयेव पन बाला तथा तथा सुभादितो च मिच्छाभिनिवेसं करोन्ति, अयं पन योगी तत्थ कायानुपस्सी एव अनिच्चदुक्खअनत्तासुभानुपस्सी एवाति वुत्तं होति । अथ वा व्यायं महासतिपट्टाने अस्सासपस्सासादिको चुहसविधो कायो वुत्तो, तस्स सब्बस्स इमस्मिंयेव काये अनुपस्सनतो “काये कायानुपस्सी”ति एवमादिनापि अत्थो दट्ठब्बो ।

**विहरतीति** इरियति, चतूसु इरियापथेसु एकेनागतं सरीरबाधनं अज्जेन इरियापथेन विच्छिन्दित्वा अपतमानं अत्तभावं हरति, पवत्तेतीति अत्थो । **बहिद्धा कायेति** परस्स काये । **अज्झत्तबहिद्धा कायेति** कालेन अत्तनो, कालेन परस्स काये । कालेन हि अज्झत्तबहिद्धाकायेसुपि एकस्मिं खणे कायानुपस्सना उप्पज्जति, पगुणकम्मट्ठानस्स पन अपरापरं सञ्चरणकालो एत्थ कथितो । **आतापीति** कायपरिग्गाहकवीरियेन वीरियवा । सो हि यस्मा किलेसानं आतापनतो आतापो वुच्चति वीरियं, सो चस्स अत्थि, तस्मा आतापीति वुच्चति । **सम्पजानोति** कायपरिग्गाहकेन सम्पजज्जेन समन्नागतो । **सतिमाति** कायपरिग्गाहिकाय सतिया समन्नागतो । अयं पन यस्मा सतिया आरम्भणं परिग्गाहेत्वा पज्जाय अनुपस्सति, वीरियेन च अन्तरा वोसानं नापज्जति, तस्मा येसं धम्मनं आनुभावेन तं सतिपट्टानं सम्पज्जति, तेसं दस्सनत्थं “आतापी सम्पजानो सतिमा”ति इदं वुत्तन्ति वेदितब्बं ।

इति कायानुपस्सनासतिपट्टानं, सम्पयोगङ्गञ्च दस्सेत्वा इदानीं पहानङ्गं दस्सेतुं “**विनेय्य लोके अभिज्झादोमनस्स**”ति वुत्तं । तत्थ **विनेय्याति** तदङ्गविनयेन वा विक्खम्भनविनयेन वा विनयित्वा । **लोकेति** व्यायं अज्झत्तादिभेदो कायो वुत्तो, स्वेव इध लुज्जनपलुज्जनट्ठेन लोको नाम । **विभङ्गे** पन यस्मा रूपकाये पहीनअभिज्झादयो वेदनादीसुपि पहीयन्ति एव, तस्मा पञ्चापि उपादानक्खन्धा “लोको”ति वुत्तं । तस्मिं लोके अभिज्झादोमनस्ससङ्घातं कामच्छन्दब्यापादं विनेय्याति सम्बन्धो । इमस्स च नीवरणेसु बलवधम्मद्वयस्स पहानदस्सनेन सेसनीवरणानमि पहानं वुत्तंयेवाति वेदितब्बं । विसेसेन चेत्थ अभिज्झादोमनस्सविनयेन यथाक्कमं कायसम्पत्तिविपत्तिमूलानं अनुरोधविरोधानं, अत्तअभिरतितदसुभाकारादिभावानानभिरतीनं, अभूतगुणपक्खेपभूतदोसापनयनानञ्च पहानं वुत्तं, तेन योगावचरस्स योगानुभावनिब्वत्तफलं, योगसमत्थता च दीपिता होति ।

**अज्झत्तं वेदनासूति** आदीसुपि अज्झत्तादीनि वुत्तनयेन वेदितब्बानि । एत्थ पन **वेदनाति** तिस्रो वेदना लोकिया, तथा **चित्तं, धम्मा** च, तेसं विभागो विभङ्गनये आवि भविस्सति । केवलं पनेत्थ यथा वेदनादयो अनुपस्सन्तो वेदनादिअनुपस्सी नाम होति, सो नयो दस्सेतब्बो । सेय्यथिदं — वेदनासु ताव सुखा वेदना दुक्खतो, दुक्खा सल्लतो, इतरा च अनिच्चतो अनुपस्सितब्बा । यथाह —

“यो सुखं दुक्खतो अद्द, दुक्खमद्दक्खि सल्लतो ।

अदुक्खमसुखं सन्तं, अद्दक्खि नं अनिच्चतो”ति (सं० नि० ४.२५३; इतिवु० ५३) ॥

सब्बा एव एता दुक्खतो अनुपस्सितब्बा “यं किञ्चि वेदयितं, तं दुक्खस्मिन्ति वदामी”ति (सं० नि० ४.२५९) वचनतो । एवं अनुपस्सन्तो पन अनिच्चादिसत्तानुपस्सनावसेन वा अनुपस्सन्तोपि “इमं वेदनं को वेदयति, कस्सायं वेदना, किं कारणायं वेदना”ति उपपरिक्खित्वा “न कोचि सत्तादिको वेदयति, न केसञ्चि सत्तादीनं वेदना, वत्थारम्भणादिकारणा पनायं वेदना उप्पज्जती”ति अनुपस्सन्तोपि **वेदनानुपस्सी** नाम होति । अथ वा सुखादीनं उप्पत्तिकखणे दुक्खादीनं असम्भवा अनिच्चा अद्दुवा विपरिणामधम्माति एवं वा अनुपस्सन्तो **वेदनानुपस्सी** नाम होति । इमिनाव नयेन पाळिनयानुसारेन

सेसचित्तधम्मनम्मि अनुपस्सनाकारो वेदितब्बो । विसेसतो पनेत्थ चित्तेसु अनिच्चतावसेन, धम्मेसु अनत्ततावसेन च अनुपस्सन्तो **चित्तानुपस्सी**, **धम्मानुपस्सी** च नाम होतीति वेदितब्बं । सेसं सुविज्जेय्यमेव । अयं तावेत्थ पदत्थो ।

**धम्मभेदो** पनेत्थ नत्थि, सरणवसेन च एकाव सति आरम्मणवसेन “चत्तारो सतिपट्ठाना”ति वुत्ताति ।

**विभङ्गनयतो** पनेत्थ **सुत्तन्तभाजनीये** ताव अज्झत्तबहिद्वातदुभयकाये केसादिकोद्वासभावनावसेन पठमं सतिपट्ठानं वित्थारितं । तथा अज्झत्तादीसु पच्चेकं सामिसनिरामिसवसेन दुविधानं सुखदुक्खअदुक्खमसुखवेदनानं वसेन दुतियं, सरागवीतरागसदोसवीतदोससमोहवीतमोहसंखित्तविकिञ्चत्तमहग्गतअमहग्गतसउत्तरानुत्तरसमाहितासमाहितविमुत्ताविमुत्तभेदतो सोळसविधेहि चित्तपजाननवसेन ततियं, पञ्चनीवरणानं, सत्तबोज्झङ्गानञ्च सम्भवासम्भवउप्पादपहानपहीनानुपत्तिभावनापारिपूरिहेतुज्झानवसेन चतुत्थं सतिपट्ठानं वित्थारितं । अयं सुत्तन्तभाजनीयनयो ।

**अभिधम्मभाजनीये** पन ताव “चत्तारो सतिपट्ठाना । इध भिक्खु काये कायानुपस्सी विहरति वेदनासु...पे०... धम्मेसु धम्मानुपस्सी विहरती”ति (विभ० ३८०) एवं मातिकं ठपेत्वा धम्मसङ्गणियं वुत्तनयस्स वित्थारेसु अट्ठसु लोकुत्तरचित्तेसु सम्पयुत्तसतिवसेनेव वित्थारतो विभत्ता ।

**पज्हापुच्छकनयेपि** चतुन्नं सतिपट्ठानानं कति कुसला...पे०... कति अरणा? सिया कुसला, सिया अब्याकता...पे०... अनुपादिन्नअनुपादानियाव, असंकिलिद्धअसंकिलेसिकाव...पे०... अनिदस्सनअप्पटिघाव । न हेतू अहेतुकाव...पे०... अनुत्तरा अरणावाति लोकुत्तरवसेनेव विभत्ता । सम्मासम्बुद्धेन हि सुत्तन्तभाजनीयस्मिञ्जेव लोकियलोकुत्तरमिस्सका सतिपट्ठाना कथिता, अभिधम्मभाजनीयपज्हापुच्छकेसु पन लोकुत्तरायेव । तेसु च लोकिया नानाचित्तेसु एव लब्धन्ति । अज्जेनेव हि चित्तेन कायं पग्गणहन्ति, अज्जेन वेदनादयोति । लोकुत्तरा पन चत्तारोपि मग्गक्खणे एकचित्तेयेव लब्धन्ति । एकस्मिञ्चि मग्गचित्तक्खणे आरम्मणतो निब्बानारम्मणा एकाव सति कायादीसु सुभसुखनिच्चअत्तविपल्लाससमुच्छेदकताय चतुकिच्चसाधनट्ठेन चत्तारिपि नामानि लभतीति अयमेत्थ विभङ्गनयो ।

कमतो सतिपट्ठाने, अनूनाधिकतोपि च ।

पाळिमुत्तनयो जेय्यो, तत्थ कोसल्लमिच्छता ॥

तत्थ **कमतो** ताव अयम्पि देसनाक्कमोव, सोपि पाकटापाकटवसेन वुत्तो । इमासु हि रूपकम्मट्ठानं पाकटन्ति पठमं कायानुपस्सना वुत्ता । ततो अरूपकम्मट्ठानं । तत्थापि आरम्मणं अनुभवन्ती उप्पज्जमाना वेदना पाकटाति अनन्तरा वेदनानुपस्सना, ततो आरम्मणं विजानन्तं विज्जाणं पाकटन्ति चित्तानुपस्सना, चित्ते पाकटे तन्निस्सिता सुखुमापि धम्मा पाकटा होन्तीति अन्ते धम्मानुपस्सना वुत्ता । अयं तावेत्थ कमतो ।

**अनूनाधिकतो**ति एत्थ पन कस्मा भगवता चत्तारोव सतिपट्ठाना वुत्ता, अनूना अनधिकाति? तण्हाचरितदिट्ठिचरितसमथयानिकविपस्सनायानिकानं मन्दतिक्खवसेन द्विधा पवत्तानं विसुद्धिमग्गवसेन । मन्दस्स हि तण्हाचरितस्स ओळारिकं कायानुपस्सनासतिपट्ठानं विसुद्धिमग्गो, तिक्खस्स सुखुमं वेदनानुपस्सनासतिपट्ठानं, दिट्ठिचरितस्सापि मन्दस्स नातिष्पभेदगतं चित्तानुपस्सनासतिपट्ठानं, तिक्खस्स अतिष्पभेदगतं धम्मानुपस्सनासतिपट्ठानं विसुद्धिमग्गो । समथयानिकस्स च मन्दस्स अकिच्छेन अधिगन्तब्बनिमित्तं पठमं सतिपट्ठानं विसुद्धिमग्गो, तिक्खस्स दुतियं, विपस्सनायानिकस्सापि मन्दस्स ततियं, तिक्खस्स चतुत्थं विसुद्धिमग्गोति वेनेय्यज्झासयतो चत्तारो वुत्ता । सुभसुखनिच्चअत्तभावविपल्लासपहानत्थं वा चतुरोघयोगासवगन्थउपादानअगतिप्पहानत्थम्पि चतुब्धिबाहारपरिज्जत्थञ्च चत्तारो वुत्ता, अनूना अनधिकाति अयमेत्थ अनूनाधिकता । एवं पाळिमुत्तनयो जेय्यो ।

सतिपट्ठानविभङ्गमातिकत्थवण्णना निट्ठिता ।

### सम्मप्यधानविभङ्गमातिकत्थवण्णना

सम्मप्यधानविभङ्गमातिकाय पन **अत्थतो** ताव — **सम्मप्यधाना**ति कारणप्यधाना उपायप्यधाना । योनिस्सो पदहनतो परमं धानं पधानं, पधानवीरियानीति अत्थो । **इध भिक्खू**ति इमस्मिं सासने पटिपन्नको भिक्खु । **अनुप्यन्नानन्ति** अनिब्बत्तानं । **पापकानन्ति** लामकानं । **अकुसलानं धम्मनन्ति** अकोसल्लसम्भूतानं धम्मनं । **अनुप्पादायाति** न उप्पादनत्थाय । **छन्दं जनेतीति** कत्तुकम्यतासङ्घातं कुसलच्छन्दं जनेति उप्पादेति । **वायमतीति** पयोगं परक्कमं करोति । **वीरियं आरभतीति** कायिकचेतसिकवीरियं करोति । **चित्तं पग्गणहातीति** तेनेव सहजातवीरियेन चित्तं उक्खिपति । **पदहतीति** पधानवीरियं करोति । पटिपाटिया पनेतानि चत्तारिपि पदानि वीरियस्सेव आसेवनाभावनाबहुलीकम्मसातच्चकिरियाहि योजेतब्बानि ।

**उप्यन्नानन्ति** अनुप्यन्नाति अवत्तब्बतं आपन्नानं । **पहानायाति** पजहनत्थाय । **अनुप्यन्नानं कुसलानं धम्मनन्ति** अनिब्बत्तानं कोसल्लसम्भूतानं धम्मनं । **उप्पादायाति** उप्पादनत्थाय । **उप्यन्नानन्ति** निब्बत्तानं । **ठितियाति** ठितत्थाय । **असम्मोसायाति** अनस्सनत्थं । **भिय्योभावायाति** पुनप्पुनं भवनाय ।



वेपुल्लायाति विपुलभावाय । भावनायाति वड्डिया । पारिपूरियाति परिपूरणत्थाय । सेसं पदतो उत्तानमेव ।

**अत्थतो** पनेत्थ “अनुपन्नानं पापकानं” न्तिआदीसु असमुदाचारवसेन वा अननुभूतारम्मणवसेन वा किलेसानं अनुपत्ति वेदितब्बा । अज्जथा हि अनमतगो संसारे अनुपन्ना अकुसलधम्मा नाम नत्थि । कुसलधम्मेषु पन रतनत्तयप्पसादविपस्सनादिविवट्ठपनिस्सयकुसलादिवसेन अनुपन्नापि अत्थि । तेसम्पि उप्पन्नपुब्बत्ते सति सब्बसत्तानं इतो पुब्बे च आसवक्खयप्पसङ्गतो । एकन्तपवत्तसाधका तेसं । तत्थ एकच्चस्स वत्तगन्धुतङ्गसमाधिविपस्सनानवक्कम्मेसु अज्जतरस्मिं निच्चप्पयुत्तस्स, घटतो, वायमतो च ब्रह्मलोका आगतत्ता भववसेन किलेसेसु अलद्धासेवनस्स सत्तस्स किलेसा न समुदाचरन्ति, अपरभागे पनस्स वत्तादीनि विस्सज्जेत्वा कुसीतस्स चरतो चेव अकल्याणमिप्तादितो किलेसेसु लद्धासेवनस्स च अयोनिमनसिकारं, सतिवोस्सगगञ्च आगम्म उप्पज्जन्ति । एवं ताव असमुदाचारवसेन किलेसानं अनुपत्ति वेदितब्बा ।

एकच्चस्स पन तस्मिं अत्तभावे अननुभूतपुब्बं दिब्बादिभेदं मनापियं आरम्मणं लभित्वा तत्थ अयोनिमनसिकारसतिवोस्सगगे आगम्म किलेसा उप्पज्जन्ति, अलभित्वा एवं अननुभूतारम्मणवसेन किलेसानं अनुपत्ति वेदितब्बा ।

“उप्पन्नानं पापकानं” न्ति एत्थ पन चतुब्बिधं उप्पन्नं वत्तमानभूतापगतओकासकतभूमिलद्धवसेन, तेसं विभागो उप्पन्नत्तिके वुत्तोव । अपरम्पि चतुब्बिधं उप्पन्नं समुदाचारआरम्मणाधिगहितअविकखम्भितअसमुग्धातितवसेन । तत्थ सम्पत्ति वत्तमानयेव **समुदाचारुप्पन्नं** नाम । सेसं पाकटमेव । यस्मा पनेत्थ इमेसु उप्पन्नेसु वत्तमानभूतापगतओकासकतसमुदाचारसङ्घातं चतुब्बिधं उप्पन्नं न मग्गादिवज्झं, तस्मा भूमिलद्धआरम्मणाधिगहितअसमुग्धातितसङ्घातं चतुब्बिधं उप्पन्नं सन्धायेत्थ “उप्पन्नानं पापकानं पहानाया” न्ति वुत्तं ।

कथं पन मग्गक्खणे अनुपन्नानं कुसलानं उप्पादाय वायामो होति, कथञ्च उप्पन्नानं ठितियाति? मग्गप्पवत्तिया एव । मग्गो हि पवत्तमानो पुब्बे अनुपन्नपुब्बत्ता **अनुपन्नो** नाम वुच्चति । या चस्स पवत्ति, अयमेव **ठिति** नामाति अयं तावेत्थ पदत्थो ।

**धम्मभेदो** पनेत्थापि एकस्सेव वीरियस्स किच्चभेदतो चतुधा वुत्ताति अयमेत्थ पाळिमुत्तविनिच्छयो ।

**विभङ्गनयतो** पन सुत्तन्तभाजनीये ताव चत्तारो सम्मप्पधाना लोकियलोकुत्तरकुसलचित्तसम्पयुत्तवीरियवसेन अकुसलादिपदेहि सङ्घि वित्थारतो विभत्ता । अभिधम्मभाजनीयपज्हापुच्छकेसु पनेते लोकुत्तरकुसलचित्तसम्पयुत्तवसेनेव विभत्ता, फलचित्तसम्पयुत्ता पन न गहिता । तेनेव पज्हापुच्छके “कुसला एव, विपाकधम्मधम्मा एव, अपचयगामिनोव, सेखावा” न्तिआदिना वुत्ता । सेसो पनेत्थ विनिच्छयो सतिपट्ठाने वुत्तनयानुसारेन वेदितब्बो ।

सम्मप्पधानविभङ्गमातिकथवण्णना निट्ठिता ।

### इद्धिपादविभङ्गमातिकथवण्णना

इद्धिपादविभङ्गमातिकाय पन **चत्तारो इद्धिपादा**ति एत्थ इज्झतीति इद्धि, समिज्झति निप्फज्जतीति अत्थो, इद्धि एव पादो **इद्धिपादो**, इद्धिकोड्ढासोति अत्थो । इज्झन्ति वा एताय सत्ता इद्धा वुद्धा उक्कंसगता होन्तीतिपि इद्धि, पज्जन्ति एतेनाति पादो, पतिट्ठा अधिगमूपायोति अत्थो, इद्धिया पादो **इद्धिपादो** । **छन्दसमाधिपधानसङ्घारसमन्नागतन्ति** एत्थ छन्दहेतुको, छन्दाधिको वा समाधि **छन्दसमाधि**, कत्तुकम्पताछन्दं अधिपतिं करित्वा पटिलद्धसमाधिरस्सेतं अधिवचनं । पधानभूता सङ्घारा **पधानसङ्घारा**, चतुकिच्चसाधकस्स सम्मप्पधानवीरियस्सेतं अधिवचनं । **समन्नागतन्ति** तेन छन्दसमाधिना, पधानसङ्घारेन च उपेतं । **इद्धिपादन्ति** यथावुत्तत्थेन “इद्धी” न्ति सङ्ख्यं गतानं उपचारज्झानादिकुसलचित्तसम्पयुत्तानं छन्दसमाधिपधानसङ्घारानं अधिद्वानट्ठेन पादभूतसेसचित्तचेतसिकरासिं । **भावेतीति** वड्ढेति, अत्तनो सन्ताने पुनप्पुनं जनेतीति अत्थो । इमिना नयेन सेसेसुपि अत्थो वेदितब्बो । तत्थ **वीमंसाति** पज्जा । सेसं पदतो सुविज्जेय्यमेव ।

**अत्थतो** पनेत्थ तेन किं कथितं? चतुन्नं भिक्खुनं मत्थकप्पत्तं कम्मट्ठानं कथितं । यथा हि चतूसु अमच्चपुत्तेसु ठानन्तरं पत्थेत्वा विचरन्तेसु एको उपट्ठानेन, एको सूरभावेन, एको जातिसम्पत्तिया, एको मन्तबलेनाति एवं ते पच्चेककारणेन राजानं आराधेत्वा ठानन्तरं पापुणन्ति, एवं भिक्खूपि छन्दवीरियचित्तवीमंसासु एकेकं जेड्ढं धुरं पुब्बङ्गमं कत्वा लोकुत्तरधम्मनिब्बत्तका होन्ति । एत्थ च छन्दो समाधि पधानसङ्घारोति तयो धम्मा इद्धीपि होन्ति इद्धिपादापि, सेसा पन सम्पयुत्ता चत्तारो खन्था इद्धिपादा एव । एवं सेसाधिपतियुत्तचित्तेसुपि इद्धिपादाति वेदितब्बा ।

अपिच ज्ञानविपस्सनासु पुब्बभागो इद्धिपादो । यो पटिलाभो, सा इद्धि । पठमज्झानादीनं हि पुब्बभागपरिकम्मानि इद्धिपादो नाम, पठमज्झानादयो इद्धि नाम । पठममग्गादीनं पुब्बभागविपस्सना इद्धिपादो नाम, पठममग्गादयो इद्धि नाम । पटिलाभवसेनापि दीपेतुं वट्ठति । पठमज्झानादयो हि पठममग्गादयो च इद्धिपादो नाम, दुतियज्झानादयो, दुतियमग्गादयो च इद्धि नामाति अयं तावेत्थ पदत्थो ।

**धम्मभेदो** पनेत्थ विभङ्गनयेनेव पाकटो भविस्सति । तत्थ हि **सुत्तन्तभाजनीये** ताव छन्दादीनं पदानं विभङ्गं वत्वा अन्ते “इद्धिपादोति तथाभूतस्स

वेदनाक्खन्धो...पे०... विज्जाणक्खन्धो। इद्धिपादं भावेतीति ते धम्मे आसेवति भावेति बहुलीकरोति, तेन वुच्चति इद्धिपादं भावेतीति (विभ० ४३४) एवं सब्बे लोकियलोकुत्तरधम्मा इद्धिपादोति वुत्ता।

**अभिधम्मभाजनीये** पन छन्दादीनि पदानि विभजित्वा अन्ते “इद्धिपादोति तथाभूतस्स फस्सो...पे०... पग्गाहो अविकखेपो”ति (विभ० ४४७) एवं सब्बे लोकुत्तरकुसलधम्मा इद्धिपादाति वत्त्वा पुन “छन्दिद्धिपादो वीरियिद्धिपादो चित्तिद्धिपादो वीमंसिद्धिपादो”ति (विभ० ४५७) मातिकं ठपेत्वा “तत्थ कतमो छन्दिद्धिपादो? इध भिक्खु यस्मिं समये लोकुत्तरं ज्ञानं भावेति...पे०... यो तस्मिं समये छन्दो छन्दिकता...पे०... अयं वुच्चति छन्दिद्धिपादो”ति आदिना लोकुत्तरकुसलचित्तसम्पयुत्तछन्दवीरियचित्तवीमंसा एव इद्धिपादाति वुत्ता। तथा **पज्हापुच्छके** कुसला एव, अनिदस्सनअप्पटिघा एव, वीमंसिद्धिपादो हेतु, सेसा न हेतू...पे०... चित्तिद्धिपादो न वत्तब्बो, सेसा चित्तसम्पयुत्ता...पे०... अनुत्तराव, अरणावाति। सेसमेत्थ सतिपट्टाने वुत्तसदिसमेव। पाळिमुत्तकनयो पनेत्थापि न उद्धटोति।

इद्धिपादविभङ्गमातिकथवण्णना निट्ठिता।

### बोज्झङ्गविभङ्गमातिकथवण्णना

बोज्झङ्गविभङ्गमातिकाय पन **अत्थतो** ताव — **सत्त बोज्झङ्गा**ति एत्थ बोधिया, बोधिस्स वा अङ्गाति **बोज्झङ्गा**। इदं वुत्तं होति — याय एव धम्मसामगिया मग्गक्खणे उप्पज्जमानाय लीनुद्धच्चादिअनेकेसं उपह्वानं पटिपक्खभूताय सतिधम्मविचयादिसत्तविधाय धम्मसामगिया अरियसावको बुज्झति, किलेसनिदाय उद्धहति, सच्चानि वा पटिविज्झति, तस्सा धम्मसामगिसङ्घाताय बोधिया अङ्गाति **बोज्झङ्गा** ज्ञानङ्गमग्गङ्गानि विय। यो पनेस यथावुत्तप्पकाराय एताय धम्मसामगिया बुज्झतीति कत्वा अरियसावको “बोधी”ति वुच्चति, तस्स बोधिस्स अङ्गाति **बोज्झङ्गा** सेनङ्गरथङ्गादयो विय। अपिच “बोधाय संवत्तन्तीति बोज्झङ्गा”ति आदिना पटिसम्भिदानयेनापि बोज्झङ्गत्यो वेदितब्बो। पसत्थो, सुन्दरो वा बोज्झङ्गो सम्बोज्झङ्गो, सतियेव सम्बोज्झङ्गो **सतिसम्बोज्झङ्गो**। एवं सेसेसुपि। तत्थ धम्मे विचिनाति अनिच्चादितो परिवीमंसति जानाति, धम्मे वा एतेन सत्ता विचिनन्तीति **धम्मविचयो**, पज्जा। उपेक्खति समरसानं धम्मानं हापनवड्डने अवावटताय पटिसङ्खानाकारेन मज्झत्ता होतीति **उपेक्खा**, तत्रमज्झत्तता। पटिसङ्खानलक्खणो हि उपेक्खासम्बोज्झङ्गोति। सेसं सुविज्जेय्यमेव। अयं तावेत्थ पदत्थो। **धम्मभेदो**पेत्थ सुविज्जेय्योव।

**विभङ्गनयतो** पनेत्थ **सुत्तन्तभाजनीये** ताव लोकियलोकुत्तरवसेन सेसेसु लोकुत्तरकुसलविपाकवसेन विभत्ता। **पज्हापुच्छके** पन सिया कुसला, सिया अब्याकता, पीतिसम्बोज्झङ्गो सुखाय वेदनाय सम्पयुत्तोव, सेसा द्वीहि...पे०... पीतिसम्बोज्झङ्गो सुखसहगतोव, सेसा तिधापि, अनिदस्सनअप्पटिघा, धम्मविचयसम्बोज्झङ्गो हेतु, सेसा न हेतू...पे०... रूपावचराव, अरणावाति। सेसं सतिपट्टाने वुत्तनयमेव। अयमेत्थ विभङ्गनयो।

इदानी पन —

कमतो तावत्ततो च, हेतुभूमिविभागतो।  
विवेकतो च विज्जेय्यो, पाळिमुत्तविनिच्छयो॥

तत्थ **कमतो** ताव अयम्पि देसनाक्कमोव। सब्बेसं हि बोज्झङ्गानं उपकारत्ता सतिसम्बोज्झङ्गो पठमं वुत्तो, ततो यस्मा उपट्ठितसतिको धम्मे पज्जाय पविचिनाति, पविचित्तधम्मो वीरियं आरभति, आरब्धवीरियस्स पीति उप्पज्जति, पीतिमनस्स कायोपि चित्तम्पि पस्सम्भति, पस्सद्वाकायस्स सुखिनो चित्तं समाधियति, समाहितचित्तो तं चित्तं साधुकं अज्झुपेक्खिता होति, तस्मा धम्मविचयसम्बोज्झङ्गादयो यथाक्कमं वुत्ताति अयं तावेत्थ कमो।

**तावत्ततो** पन कस्मा ते सत्तेव वुत्ता, अनूना अनधिकति? लीनुद्धच्चपटिपक्खतो, सब्बत्तिकतो च। एत्थ हि तयो बोज्झङ्गा लीनस्स पटिपक्खा। यथाह — “यस्मिं च खो, भिक्खवे, समये लीनं चित्तं होति, कालो तस्मिं समये धम्मविचयसम्बोज्झङ्गस्स भावनाय, कालो वीरिय...पे०... पीतिसम्बोज्झङ्गस्स भावनाया”ति (सं० नि० ५.२३४)। तयो उद्धच्चस्स पटिपक्खा। यथाह — “यस्मिं च खो, भिक्खवे, समये उद्धत्तं चित्तं होति, कालो तस्मिं समये पस्सद्दिसम्बोज्झङ्गस्स भावनाय, कालो समाधि...पे०... उपेक्खासम्बोज्झङ्गस्स भावनाया”ति (सं० नि० ५.२३४)। एको पनेत्थ लोणधूपनं विय सब्बव्यज्जनेसु सब्बबोज्झङ्गेसु इच्छितब्बो। यथाह — “सतिञ्च ख्वाहं, भिक्खवे, सब्बत्थिकं वदामी”ति (सं० नि० ५.२३४)। एवं लीनुद्धच्चपटिपक्खतो च सब्बत्थिकतो च सत्तेव वुत्ताति अयं तावत्ततो।

**हेतुभूमिविभागतो**ति एत्थ हेतुविभागतो ताव — चत्तारो सतिसम्बोज्झङ्गस्स उप्पादाय संवत्तन्ति सतिसम्पज्जं मुट्ठस्सतिपुग्गलपरिवज्जनता उपट्ठितस्सतिपुग्गलसेवनता तदधिमुत्तताति। तथा सत्त धम्मा दुतियस्स परिपुच्छकता वत्थुविसदकिरिया इन्द्रियसमत्तपटिपादना दुप्पञ्चपुग्गलपरिवज्जना पज्जवन्तपुग्गलसेवना गम्भीरजाणचरियपच्चवेक्खणता तदधिमुत्तताति। तत्थ अज्झत्तिकबाहिरानं सरीरपरिक्खारभूतानं वत्थूनं विसदभावकरणं **वत्थुविसदकिरिया** नाम। तथा एकादस धम्मा ततियस्स अपायभयगमनवीथिदायज्जमहत्तसत्थुमहत्तजातिमहत्तसब्रह्मचारिमहत्तानं पच्चवेक्खणता आनिसंसदस्साविता पिण्डपातापचायनता कुसीतपुग्गलपरिवज्जनता आरब्धवीरियपुग्गलसेवनता तदधिमुत्तताति। तत्थ “बुद्धादीहि गतमग्गो मया

गन्तव्वो”ति पच्चवेक्खणा **वीथिपच्चवेक्खणा** नाम । “दायकेहि दिन्नपिण्डपातस्स महप्फलतं सम्पादेस्सामी”ति अत्तानं दमनं **पिण्डपातापचायनं** नाम । तथा एकादस धम्मा चतुत्थस्स बुद्धधम्मसङ्घसीलचागदेवतोपसमानुस्सतियो सत्त, लूखपुग्गलपरिवज्जनता सिनिद्धपुग्गलसेवनता पसादनीयसुतन्तपच्चवेक्खणता तदधिमुत्तताति । तथा सत्त धम्मा पच्चमस्स पणीतभोजनसेवनता, उतुसुखइरियापथसुखसेवनता द्वे मज्झत्तपयोगता सारद्धकायपुग्गलपरिवज्जनता सन्तकायपुग्गलसेवनता तदधिमुत्तताति । एकादस धम्मा छट्ठस्स वत्थुविसदकिरिया इन्द्रियसमत्तपटिपादना निमित्तकुसलता समये चित्तस्स पग्गहनगहसम्पहंसनज्झुपेक्खना चतस्सो, असमाहितसमाहितपुग्गलानं परिवज्जनसेवनता द्वे, ज्ञानविमोक्खपच्चवेक्खणता तदधिमुत्तताति । तत्थ कसिणादिनिमित्तानं उग्गहणकुसलता **निमित्तकुसलता** नाम । पच्च धम्मा सत्तमस्स सत्तसङ्खारकेलायनमज्झत्तपुग्गलानं परिवज्जनसेवनता द्वे द्वे, तदधिमुत्तताति । अयमेत्थ सङ्खेपो, वित्थारो पन **सम्मोहविनोदनिया** विभङ्गदुक्कथाय गहेतव्वोति अयमेत्थ हेतुविभागो ।

**भूमिविभागतो** पनेते कामावचरा, लोकुत्तरा वा होन्ति, कामावचरेसु बलवविपस्सनादीसु एव बोज्झङ्गा लब्भन्ति, न इतरेसु । लोकुत्तरेसु पन सब्बत्थ लब्भन्ति, रूपावचरारूपावचरचित्तसु सब्बथा न लब्भन्ति अबोधिपक्खिकत्ता । केचि पन थेरा विपस्सनापादकेसु कसिणासुभ्रह्मविहारज्ज्ञानेसुपि बोज्झङ्गे उद्धरन्ति, न च ते पटिसिद्धा अट्ठकथाचरियेहि, तस्मा तेसं मतेन रूपावचरापि होन्ति, न केनचि परियायेन अरूपावचराति अयमेत्थ भूमिविभागो ।

**विवेकतो**ति एत्थ विवेकोति विवित्तता, स्वायं पच्चविधो तदङ्गविक्रम्भनसमुच्छेदपटिपस्सद्धिनिस्सरणविवेकवसेन । **तदङ्गविवेको**ति विपस्सना, **विक्रम्भनविवेको**ति अट्ठ समापत्तियो, **समुच्छेदविवेको**ति मग्गो, **पटिपस्सद्धिविवेको**ति फलं, **निस्सरणविवेको**ति सब्बनिमित्तनिस्सटं निब्बानं । तत्रिमे तदङ्गसमुच्छेदपटिपस्सद्धिनिस्सरणविवेकनिस्सिता होन्ति । तथा हेते विपस्सनाक्खणे किच्चतो तदङ्गविवेकनिस्सिता, अज्झासयतो निस्सरणविवेकनिस्सिता । मग्गकाले पन किच्चतो समुच्छेदविवेकनिस्सिता, आरम्मणतो निस्सरणविवेकनिस्सिता, फलक्खणे किच्चतो पटिपस्सद्धिविवेकनिस्सिता । आरम्मणतो निस्सरणविवेकनिस्सिता च होन्ति । केसज्जि थेरानं मते विपस्सनापादकरूपावचरज्ज्ञानक्खणे विक्रम्भनविवेकनिस्सितावाति पच्चविवेकनिस्सितापि होन्तीति अयमेत्थ विवेको । एवं विज्जेय्यो पाळिमुत्तविनिच्छयो ।

बोज्झङ्गविभङ्गमातिकथवण्णना निट्ठिता ।

### मग्गङ्गविभङ्गमातिकथवण्णना

मग्गङ्गविभङ्गमातिकाय पन **अत्थतो** ताव — **अरियो**ति तंतंमग्गवज्झकिलेसेहि आरकत्ता, अरियभावकरत्ता च **अरियो**, अट्ठ अङ्गानि अस्साति **अट्ठङ्गिको**, निब्बानत्थिकेहि मग्गीयति, निब्बानं वा मग्गति, किलेसे वा मारेन्तो गच्छतीति **मग्गो** । **सेय्यथिदन्ति** सो कतमोति चे, इदानी स्वायं मग्गो चतुरङ्गिनी विय सेना अङ्गमत्तमेव होति, अङ्गविनिमुत्तो नत्थीति दस्सेन्तो “**सम्मादिट्ठि...पे०... सम्मासमाधी**”ति आह । तत्थ सम्मा पस्सतीति **सम्मादिट्ठि**, पज्जा । सम्मा सङ्कप्पेति तक्केतीति **सम्मासङ्कप्पो**, वितक्को । सेसं सुविज्जेय्यमेव । ततो **धम्मभेदोपि विभङ्गनयोपि** बोज्झङ्गेसु वुत्तसदिसो ।

**अभिधम्मभाजनीये** पन विरतित्तयवज्जितो पच्चङ्गिकोपि मग्गो विभत्तो, तच्च पच्चन्नं अङ्गानं किच्चाधिकतं, विरतीनच्च अवुत्तसिद्धतं सन्थाय, विरतिवज्जितस्स पन लोकुत्तरमग्गस्स अभावा सोपि अट्ठङ्गिकोवाति वेदितव्वो ।

**पज्हापुच्छकेपि** सम्मासङ्कप्पो सुखाय वेदनाय सम्पयुत्तोव, सेसा द्वीहि । सम्मासङ्कप्पो अवितक्कविचारमत्तो, पीतिसहगतो सुखसहगतोव, न उपेक्खासहगतो, सेसा तिधापि । सम्मादिट्ठि हेतु, सेसा नहेतूति अयं विसेसो । सेसं सममेव । इदानी पन —

कमतो किच्चभेदतो, भूमिभेदविवेकतो ।

मग्गङ्गेसु विजानीयो, पाळिमुत्तविनिच्छयो ॥

तत्थ **कमतो** ताव अयम्पि देसनाक्कमोव । भगवता हि निब्बानाधिगमाय पटिपन्नस्स पज्जापज्जोतपज्जासत्थताय अविज्जन्धकारविधमनतो बहूपकारत्ता पठमं सम्मादिट्ठि देसिता । ततो हेरज्जिकस्स कहापणपरिवत्तकहत्यो विय यथासभावदस्सनस्स सम्मादिट्ठिया बहूपकारत्ता सम्मासङ्कप्पो । स्वायं यथा सम्मादिट्ठिया, एवं सम्मावाचायपि उपकारको । यथाह “पुब्बे खो, गहपति, तक्केत्वा विचारेत्वा पच्छा वाचं भिन्दती”ति (म० नि० १. ४६३), तस्मा तदनन्तरं सम्मावाचा । यस्मा पन वाचाय संविदहित्वा लोके कम्मन्ते पयोजेन्ति, तस्मा तदनन्तरं सम्माकम्मन्तो । कायवचीदुच्चरितं पहाय उभयसुचरितं पूरेन्तस्सेव यस्मा आजीवदुक्कमं सीलं पूरति, न इतरस्स, तस्मा तदुभयानन्तरं सम्माआजीवो वुत्तो । एवं “विसुद्धदिट्ठिसीलेनापि एत्तावता परितोसं अक्त्वा इदं वीरियं आरभितव्व”न्ति दस्सेतुं तदनन्तरं सम्मावायामो । आरद्धवीरियेनापि कायादीसु सति सूपड्डिता कातव्वाति दस्सनत्थं तदनन्तरं सम्मासति । सूपड्डिताय सतिया एकत्तरम्मणे चित्तं समाधातुं सक्काति तदनन्तरं सम्मासमाधि वुत्तोति अयं तावेत्थ कमो ।

**किच्चतो** पनेसं एकेकस्स तीणि तीणि किच्चानि, सेय्यथिदं — सम्मादिट्ठि ताव अज्जेहिपि अत्तनो पच्चनीककिलेसेहि सद्धि मिच्छादिट्ठि पजहति, आरम्मणतो निरोधसच्चं सच्छिकरोति, असम्मोहतो सेससच्चानि पटिविज्जति । एवं सम्मासङ्कप्पादीनं मिच्छासङ्कप्पजहनादिवसेन यथानुरूपन्ति किच्चता वेदितव्वा । विसेसतो पनेत्थ सम्मासङ्कप्पो सहजातधम्मे अभिनिरोपेति, सम्मावाचा परिगणहति, सम्माकम्मन्तो समुट्ठापेति, सम्माआजीवो वोदापेति,

सम्मावायामो पग्गण्हाति, सम्मासति उपट्ठापेति, सम्मासमाधि समादहतीति इदमेत्थ किच्चं ।

**भेदतो** पन पुब्बभागे सम्मादिट्ठि “दुक्खे जाण”न्तिआदिना चतूसु सच्चेसु जाणवसेन नानक्खणा नानारम्मणा नानानामा होति, दुतियो पन नेक्खम्मअब्बापादअविहिंसासङ्कप्पवसेन, विरतियो चतुब्बिधवचीदुच्चरिततिविधकायदुच्चरितमिच्छाजीवविरमणसङ्गातचेतनावसेनपि विरतिवसेनपि, छट्ठसत्तमा चतुब्बिधसम्मपधानसतिपट्ठानवसेन नानक्खणा नानारम्मणा नानानामा होन्ति । मग्गकाले पनेते सम्मादिट्ठिआदयो एकक्खणा एकारम्मणा । किच्चतो पन तानि पुब्बभागे नानानामानि लभन्ति, सम्मासमाधि पन पुब्बभागेपि मग्गक्खणेपि चतुक्कपञ्चकज्झानवसेन नानक्खणो नानानामो, मग्गक्खणे पन एकारम्मणो होति । एकस्स हि पठममग्गो पादकज्झानादिनियमतो पठमज्झानादिको वा दुतियज्झानादीसु अज्जतरज्झानिको वा, दुतियमग्गादयोपिस्स पठममग्गसदिसज्झानिका वा विसदिसज्झानिका वाति सो मग्गकालेपि नानक्खणो नानानामो वाति अयमेत्थ भेदो ।

**भूमितो च विवेकतो** च विनिच्छयो बोज्झङ्गेसु वुत्तानुसारेन वेदितब्बोति एवं विजानीयो पाळिमुत्तविनिच्छयो ।

मग्गङ्गविभङ्गमातिकथवण्णना निट्ठिता ।

### ज्ञानविभङ्गमातिकथवण्णना

ज्ञानविभङ्गमातिकाय पन **अत्थतो** ताव — **पातिमोक्खसंवरसंवुतो**तिआदीसु पातिमोक्खन्ति सिक्खापदसीलं । तं हि यो नं पाति रक्खति, तं मोक्खेति मोचेति आपायिकादीहि दुक्खेहि, तस्मा “पातिमोक्ख”न्ति वुच्चति । संवरणं, संवरन्ति वा तेनाति संवरो, पातिमोक्खमेव संवरो पातिमोक्खसंवरो, कम्मवाचापरियोसाने इज्झनकस्स अत्थतो चेतनादिरूपस्स पातिमोक्खसंवरसीलस्सेवेतं अधिवचनं । तेन संवुतो पिहितकायवचीपयोगोति **पातिमोक्खसंवरसंवुतो** । विहरतीति इरियति पवत्तेति । **आचारगोचरसम्पन्नो**ति एत्थ आचरितब्बतो आचारो, गावो चरन्ति एत्थाति गोचरो, गुन्नं चरणट्ठानं । तंसदिसताय पन सब्बोपि पवत्तिविसयो गोचरोति वेदितब्बो । तेसं विभागो निद्देसे वुत्तनयेनेव वेदितब्बो ।

निद्देसे हि —

“आचारगोचरसम्पन्नोति अत्थि आचारो, अत्थि अनाचारो । तत्थ कतमो अनाचारो? कायिको वीतिक्कमो, वाचसिको वीतिक्कमो, कायिकवाचसिको वीतिक्कमो, अयं वुच्चति अनाचारो, सब्बमि दुस्सील्यं अनाचारो, इधेक्कचो वेळुदानेन वा पत्त...पे०... पुप्फफलसिन्नानदन्तकट्टदानेन वा चाटुकम्यताय वा मुग्गसुप्यताय वा पारिभट्टताय वा जङ्घपेसनिकेन वा अज्जतरज्जतरेन वा बुद्धपतिकुट्टेन मिच्छाआजीवेन जीविकं कप्पेति, अयं वुच्चति अनाचारो ।

“तत्थ कतमो आचारो? कायिको अवीतिक्कमो”तिआदिना (विभ० ५१३) —

वुत्तविपरियायेन आचारो निद्दिट्ठो ।

“गोचरोति अत्थि गोचरो, अत्थि अगोचरो । तत्थ कतमो अगोचरो? इधेक्कचो वेसियागोचरो वा होति, विधवा...पे०... थुल्लकुमारीपण्डकभिक्षुनीपानागारगोचरो वा, संसट्ठो विहरति राजूहि राजमहामत्तेहि तित्थियेहि तित्थियसावकेहि अननुलोमिकेन संसग्गेन, यानि वा पन तानि कुलानि अस्सद्धानि अप्सन्नानि...पे०... तथारूपानि कुलानि सेवति भजति पयिरुपासति, अयं वुच्चति अगोचरो ।

“तत्थ कतमो गोचरो? इधेक्कचो न वेसियागोचरो होती”तिआदिना (विभ० ५१४) —

वुत्तविपरियायेन गोचरो निद्दिट्ठो ।

अपिचेत्थ थेरानं भिक्खून् पुरतो गमननिसीदनचङ्कमनघट्टनाभिभवनादिकायिकाचिक्तीकारकिरियानज्जेव थेरे भिक्खू अनापुच्छा धम्मकथनखुंसनादिवाचसिकाचिक्तीकारकिरियानज्ज अनाचारानं पटिपक्खवसेन कायिकवाचसिको आचारो वेदितब्बो । अपिच भिक्खु सगारवो सप्पतिस्सो हिरोटपसम्पन्नो सुनिवत्थो सुपारुतो पासादिकेन अभिक्कन्तादिना ओक्खित्तचक्खु इरियापथसम्पन्नो आभिसमाचारिकेसु सक्कच्चकारी गरुचिक्तीकारबहुलो विहरति, अयं वुच्चति आचारो । गोचरो पन तिविधो उपनिस्सयगोचरो आरक्खगोचरो उपनिबन्धगोचरोति । तत्थ दसकथावत्थुगुणसमन्नागतो कल्याणमित्तो **उपनिस्सयगोचरो** नाम । अन्तरघरादीसु ओक्खित्तचक्खुतादीहि दिसा विदिसा अनोलोकेत्वा गमनं **आरक्खगोचरो** नाम । चत्तारो पन सतिपट्ठाना **उपनिबन्धगोचरो** नाम । यत्थ चित्तं उपनिबन्धति, अयं तिविधोपेत्य गोचरोति वेदितब्बो । **इमिना**ति इमिना आचारेन, गोचरेन च समन्नागतो **आचारगोचरसम्पन्नो** नाम ।

**अणुमत्तेसु वज्जेसूति** अणुप्पमाणेसु दोसेसु । **भयदस्सावीति** भयदस्सनसीलो, अणुमत्तं रेणुं सिनेरुसदिसं पस्सन्तो विय सब्बलहुकम्पि

दुक्कटदुब्भासितमत्तं पाराजिकसदिसं कत्वा वज्जतो भयतो दस्सनसीलोति अत्थो। **समादाय सिक्खति सिक्खापदे**सूति यं किञ्चि सिक्खापदेसु सिक्खितब्बं, तं सुद्ध आदाय गहेत्वा सिक्खति।

**इन्द्रियेसु गुणद्वारे**ति मनच्छेदेसु इन्द्रियेसु रूपादिआरम्भणनिमित्तादीनं अगगहणसङ्घातसतिसंवरेण पिहितद्वारो। **भोजने मत्तञ्ज्**ति पिण्डपाते पटिगहणपरिभोगेसु पच्चवेक्खणजाणवसेन चेव अपिच्छतादीहि च मत्तजाननको, पिण्डपातवसेन चेत्य चतुन्नं पच्चयानं गहणं वेदितब्बं। अथ वा भुञ्जितब्बतो भोजनन्ति चतुन्नं पच्चयानं गहणं वेदितब्बं। **पुब्बरत्तापररत्तन्ति** एत्थ अट्टरत्तिसङ्घाताय रत्तिया पुब्बे पुब्बरत्तं, इमिना पठमयामञ्चेव पच्छाभत्तञ्च गण्हाति। रत्तिया पच्छा अपररत्तं, इमिना पच्छिमयामञ्चेव पुरेभत्तञ्च गण्हाति। पच्छिमयामो पनस्स भिक्खुनो निदाकिलमथविनोदनोकासोति न गहितो।

**जागरियानुयोगमनुयुत्तो**ति असुभभावनासङ्घातस्स भावनारामस्स अनुयोगसङ्घातं आसेवनभावनं अनुयुत्तो चङ्कमननिसज्जाहि योनिमनसिकारेण आवरणीयेहि धम्मेहि चित्तपरिसोधने युत्तप्पयुत्तोति अत्थो। **सातच्चं नेपक्कन्ति** सततं पवत्तयितब्बतो सातच्चसङ्घातं वीरियं, परिपाकगतत्ता नेपक्कसङ्घातञ्च पञ्चं अनुयुत्तोति सम्बन्धो। इमिना वीरियपज्जाहि युत्तस्सेव जागरियानुयोगसिद्धीति दस्सेति।

इदानीं तं जागरियानुयोगं सरूपतो दस्सेन्तो **“बोधिपक्खिकानं धम्मानं”**न्तिआदिमाह। **बोधिपक्खिकानं धम्मानन्ति** चतुसच्चावबोधसङ्घातस्स मग्गजाणस्स पक्खे भवानं चतुसच्चसतिपट्टानादिसत्ततिसंयधम्मानं। निद्वेसे पनस्स लोकियभावनाय विसेसबोधिपक्खियधम्मे एकारम्मणे पवत्तनसमत्थताय सत्त बोज्झङ्गा एव निद्विद्धा। तेसं गहणेन पन सेसानम्पि तत्थ गहणं वेदितब्बं। **सो अभिक्कन्ते पटिक्कन्ते**तिआदीसु **अभिक्कन्तं** वुच्चति पुरतो गमनं, **पटिक्कन्तं** निवत्तनं, तदुभयञ्च ठाननिसज्जासयनेसुपि पुरतो, पच्छतो च कायस्स अभिगमनअपगमनवसेन लब्धति। **सम्पजानकारी** होतीति सम्पजज्जेन सब्बकिच्चकारी, सम्पजज्जस्सेव वा कारी, सम्पजज्ज-गहणेन चेत्य अविप्पयोगतो सतिपि गहिताव होति। तेनेवस्स निद्वेसे **“सतो सम्पजानो अभिक्कमती”**तिआदि वुत्तं।

**आलोकिते**तिआदीसु **आलोकितं** नाम पुरतो पेक्खनं। **विलोकितं** नाम अनुदिसापेक्खनं। इमेसं पन द्विन्नं गहणेन हेट्ठा उपरि पच्छतो पेक्खनसङ्घातानि ओलोकितुल्लोकितपलोकितानिपि गहितानीति वेदितब्बानि।

**समिज्जिते पसारिते**ति पब्बानं समिज्जने, पसारणे च। **सङ्घाटिपत्तचीवरधारणे**ति एत्थ सङ्घाटिचीवरानं निवासनपारुपनवसेन, पत्तस्स भिक्खापटिगहणादिवसेन च परिभोगो धारणं नाम। **असिते**ति पिण्डपातादिभोजने। **पीते**ति यागुआदिपाने। **खायिते**ति पिट्ठखज्जादिखादने। **सायिते**ति मधुफाणितादिसायिते। **उच्चारपस्सावक्कमे**ति उच्चारस्स च पस्सावस्स च करणे। **गते**ति गमने। **ठिते**ति ठाने। **निसिन्ने**ति निसज्जाय। **सुत्ते**ति सयने। **जागरिते**ति जागरणे। एत्थ च भिक्खाचारगमनादिवसेन **“अभिक्कन्ते”**ति वुत्तं। विहारे पन चङ्कमनादिइरियापथवसेनेव **“गते”**तिआदि वुत्तन्ति वेदितब्बं। **भासिते**ति कथने। **तुण्हीभावे**ति अकथने।

सब्बेसु पन तेसु अभिक्कन्तादीसु पच्चेकं सात्थकसम्पजज्जं सप्पायसम्पजज्जं गोचरसम्पजज्जं असम्मोहसम्पजज्जन्ति चतुब्बिधं सम्पजज्जं वेदितब्बं। तत्थ अभिक्कमितुकामतादिचित्ते उप्पन्ने चित्तवसेनेव गमनादिं अकत्वा **“किं नु मे तत्थ गतेन अत्थो”**ति परिगण्हित्वा चेतियदस्सनादिनो तस्स तस्स अत्थस्स परिगण्हनं **सात्थकसम्पजज्जं** नाम। सात्थकेसु पनेतेसु गमनादीसु जीवितब्रह्मचरियन्तरायानञ्चेव सल्लेखपटिपत्तिविघातकरानं कायिकचेतसिकपरिक्किलेसानञ्च सब्बेसानं सम्भावाभावं परिगहेत्वा सप्पायपरिगण्हनं **सप्पायसम्पजज्जं** नाम। एवं परिगहितसात्थकसप्पायस्स पन अट्टतिसाय कम्मट्ठानेसु, विपस्सनाय वा अत्तनो अभिरुचितं कम्मट्ठानसङ्घातं गोचरं अविस्सज्जेत्वाव अभिक्कमादीनं करणं **गोचरसम्पजज्जं** नाम। अभिक्कमादीसु पन अन्धबालपुथुज्जना **“अत्ता अभिक्कमादीनि करोति, अहं करोमी”**ति वा सम्मुहन्ति, तथा असम्मूहित्वा **“अभिक्कमितुकामतादिचित्तकिरियवायोधातु विष्फारादिकारणसामगिया अयं कायसङ्घातो अट्टिसङ्घातो अभिक्कमादीनि करोति, ततो अज्जो अब्भन्तरे अत्ता वा सत्तो वा अभिक्कमन्तो वा पटिक्कमन्तो वा...पे०... तुण्ही भवन्तो वा नत्थी”**ति एवमादिना याथावतो जाननवसेन पज्जाय पवत्तनं **असम्मोहसम्पजज्जं** नाम। अयमेत्थ सङ्केपो, वित्थारो पन **सम्मोहविनोदनियं** (विभ० अट्ठ० ५०८) गहेतब्बो।

इदानीं यस्मा यस्स अब्भन्तरे यथावुत्ता एत्तका गुणा नत्थि, तस्स अरज्जवासो पन मक्कटादीनं विय अनुच्छविको न होति, उपचारमत्तम्पिस्स ज्ञानं न उप्पज्जति। यस्स पन सन्ति, तस्स अरज्जवासो अनुच्छविको होति। सो हि तत्थ सब्बप्पकारज्ज्ञानं निब्बत्तेतुं सक्कोति, अरज्जवासञ्चेव आरज्जके च उपसोर्भेति, सकलञ्च सासनं पसादेति, तस्मा एवरूपस्स भिक्खुनो उपासनद्वानयोगपथं सप्पायसेनासनं दस्सेन्तो **“सो विवित्तं सेनासनं भजती”**तिआदिमाह। तत्थ **विवित्तन्ति** सुज्जं। सेति चेव आसति च एत्थाति **सेनासनं**, मज्जादि, विहारादि च। तेनेवस्स निद्वेसे **“मज्जो पीठ”**न्तिआदि वुत्तं।

इदानीं अज्जम्पिस्स पभेदं दस्सेतुं **“अरज्ज”**न्तिआदि वुत्तं। तत्थ **अरज्जन्ति** विनयपरियायेन ताव ठपेत्वा गामञ्च गामूपचारञ्च अवसेसं, सुत्तन्तपरियायेन च आरज्जकं भिक्खुं सन्थाय पज्चधनुसतिकं पच्छिमं अरज्जन्ति वुत्तं, अभिधम्मपरियायेन पन गामद्वारस्स इन्द्रीलतो बहि सब्बं

“अरञ्ज”न्ति गहेतब्बं। “निक्खमित्वा बहि इन्दखीला”ति (विभ० ५२९) हि वुत्तं। **कन्दरन्ति** कं वुच्चति उदकं, तेन दरितं उदकेन भिन्नं पब्बतपदेसं, यं “नितुम्ब”न्तिपि “नदीकुञ्ज”न्तिपि वदन्ति। तत्थ हि रजतपट्टसदिसवालिकापुलिने मणिवितानसदिसे सन्दच्छाये वनगहने निसीदित्वा मणिक्वन्थसदिसे उदके सन्दमाने सीतेन वातेन बीजियमानस्स समणधम्मं करोतो चित्तं एकगं होति। **गिरिगुहन्ति** द्विन्नं पब्बतानमन्तरं, एकस्मिञ्जेव वा उमङ्गसदिसं महाविवरं। **वनपत्थन्ति** गामन्तं अतिक्कमित्वा मनुस्सानं अनुपचारद्धानं, यत्थ न कसन्ति न वपन्ति। तेनेवस्स निदेसे “वनपत्थन्ति दूरानमेतं सेनासनानं अधिवचन”न्तिआदि वुत्तं।

**अब्भोकासन्ति** अच्छन्नं। आकङ्खमानो पनेत्थ चीवरकुटिं कत्वा वसति। **पलालपुञ्जन्ति** पलालरासिं। महापलालपुञ्जतो हि पलालं निक्कङ्कित्वा पम्भारलेणसदिसे आलये करोन्ति, गच्छगुम्बादीनम्पि उपरि पलालं पक्खिपित्वा हेट्ठा निसीदन्ति, तं सन्धायेतं वुत्तं। **अप्पसद्दन्ति** आदीसु वचनसद्देन विरहितत्ता अप्पसद्दं। नगरनिग्घोससद्देन चेव मिगपक्खिनिग्घोसेन च रहितत्ता **अप्पनिग्घोसं**। **विजनवातन्ति** अनुसञ्चरकजनस्स सरीरवातेन विरहितत्ता विजनवातं, “विजनवाद”न्तिपि पाठो। सेनासनस्स अन्तो जनवादसद्देन रहितन्ति अत्थो। मनुस्सानं रहस्स किरियारहत्ता **मनुस्सराहस्सेव्यकं**, ततो ततो पटिनिवत्तित्वा सम्मदेव कम्मद्धाने चित्तस्स लीयनतो पटिसल्लानसङ्घातस्स विवेकस्स भावनारामस्स अनुरूपत्ता **पटिसल्लानसारुप्यं**। भजतीति सम्बन्धो। **अरञ्जगतो**तिआदीसु अरञ्जं, रुक्खमूलञ्च ठपेत्वा अवसेसं सब्बम्पि सेनासनं सुञ्जागारेन सङ्गहितं।

**पल्लङ्कं आभुजित्वा**ति समन्ततो ऊरुबद्धासनं बन्धित्वा। **उजुं कायं पणिधायाति** उपरिमकायं उजुं ठपेत्वा, अद्वारस पिट्टिकण्टके कोटिया कोटिं पटिपादेत्वा। एवं निसिन्नस्स हि चम्ममंसनहारूनि न पणमन्ति, अथस्स तेसं अपणमनपच्चया खणे खणे वेदना न उप्पज्जन्ति, ततो चित्तं एकगं होति, कम्मद्धानं वुद्धिं उपगच्छति। **परिमुखं सति उपट्टपेत्वा**ति कम्मद्धानाभिमुखं सति पट्टपेत्वा, मुखसमीपे वा कत्वा। तेनेवस्स **निदेसे** “अयं सति उपट्टिता होति सूपट्टिता, नासिकगो वा मुखनिमित्ते वा”ति (विभ० ५३७) वुत्तं। **मुखनिमित्तन्ति** चेत्थ उत्तरोट्टस्स वेमज्झपदेसो, यत्थ नासिकावातो पटिहञ्जति। अथ वा “परीति परिगहट्ठो, मुखन्ति निव्यानट्ठो, सतीति उपट्टानट्ठो, तेन वुच्चति परिमुखं सति”न्ति (पटि० म० १.१६४) वं **पटिसम्भिदायं** वुत्तनयेनपेत्थ अत्थो दट्ठब्बो। तत्रायं सङ्केपत्थो “परिगहितनिव्यानं सति कत्वा”ति।

**अभिज्झं लोके**तिआदीसु अभिमुखं ज्ञायति चिन्तेतीति **अभिज्झा**, रागो। लुज्जनपलुज्जनट्टेन **लोको**, पञ्चुपादानक्खन्धा। तेसु कामच्छन्दं विक्खम्भेत्वाति अत्थो। विक्खम्भनवसेनेव विगताभिज्झेन, न चक्खुविञ्जाणादिसदिसेनाति अत्थो। **चेतसाति** चित्तेन, इत्थम्भूतो विहरतीति अत्थो। **अभिज्झायाति** अभिज्झातो। **चित्तं परिसोधेतीति** यथा नं सा मुञ्चित्वा न पुन गण्हाति, एवं परिमोचेतीति अत्थो। ब्यापज्जति इमिना चित्तं पूतिकुम्मासादयो विय पकतिं जहातीति **ब्यापादो**। विकारप्पत्तिया पदुस्सति, परं वा पदूसेति विनासेतीति **पदोसो**, उभयम्पेतं कोधस्सेवाधिवचनं। यस्मा चेतं सब्बकम्मद्धानसाधारणवसेन देसीयति, तस्मा “सब्बपाणभूतहितानुकम्पी”ति एवं मेत्तावसेन अवत्वा “अब्यापन्नचित्तो”ति एतकमेव वुत्तं।

**थिनं** चित्तस्स गेलञ्जं, **मिद्धं** चेतसिकानं। **आलोकसञ्जीति** रत्तियम्पि दिवापि दिट्ठआलोकसञ्जाननसञ्जाय समन्नागतो, ताय पन आलोकसञ्जाय थिनमिद्धविनोदनस्स विसेसतो सतिसम्पज्जञ्चं इच्छितब्बन्ति आह “**सतो सम्पजानो**”ति।

**अनुद्धतो**ति अविक्खित्तो तथा एव अज्झत्तं वूपसन्तचित्तो। **तिण्णविचिकिच्छो**ति विचिकिच्छं अतिक्कमित्वा ठितो। **अकथं कथी कुसलेसु धम्मेषू**ति अनवज्जधम्मेषु “कथं इमे, कथं इमे”ति एवं पवत्तनतो कथं कथीसङ्घाताय विचिकिच्छाय विरहितो। एवं पञ्चनीवरणप्पहानं दस्सेत्वा इदानीं यस्मा अप्पहीननीवरणस्स ज्ञानं न उप्पज्जति, न हि कामच्छन्दादीहि नानाविसयविक्खित्तचित्तं एकत्तारम्मणे समाधियति, न कामधातुसमतिक्कमनाय वा पटिपज्जति, तस्मा “**सो इमे पञ्च नीवरणे पहाया**”तिआदि वुत्तं। तत्थ **सोति** यो यथावुत्तसीलादिगुणे पटिद्वाय अरञ्जादिअनुरूपसेनासनगतो अत्तनो चरियानुकुलकम्मद्धाने लीनुद्धच्चरहिताय सातच्चाकिरियाय उप्पादितुपचारज्ज्ञानेन पहीनपञ्चनीवरणो पठमज्ज्ञानाधिगमाय वायमति, सोति अत्थो।

**चेतसो उपक्किलेसे**ति चित्तस्स अप्पभस्सरभावकरणे। **पञ्जाय दुब्बलीकरणे**ति यस्मा इमे नीवरणा उप्पज्जमाना अनुप्पन्नाय लोकियलोकुत्तराय पञ्जाय उप्पज्जितुं न देन्ति, उप्पन्नाय पन लोकियअट्ठसमापत्तिया, अभिञ्जाभूताय वा मूलं उपच्छिन्दित्वा पातेन्ति, तस्मा “पञ्जाय दुब्बलीकरणा”ति वुच्चन्ति। **विविच्चेव कामेही**तिआदीसु **कामेही**ति वत्थुकामकिलेसकामेहि। **विविच्चेवाति** विविच्चित्वा विना हुत्वा, अपक्कमित्वाति अत्थो। नियमत्थेन पनेत्थ **एव**-कारेन ज्ञानपटिपक्खभूतानं कामानं परिच्चागेनेव पठमज्ज्ञानाधिगमो, अन्धकारपरिच्चागेनेव दीपप्पवत्ति वियाति दस्सेति। उत्तरपदेपि चेस एव-कारो आनेत्वा “विविच्चेव अकुसलेहि धम्मेही”ति सम्बन्धितब्बो। न हि सक्का कामतो अज्जेहि नीवरणसङ्घातेहि अकुसलधम्मेहि अविविच्चापि ज्ञानं उपसम्पज्ज विहरितुं। पदद्वयेपि पन “विविच्चा”ति इमिना कायविवेकादीसु, तदङ्गविवेकादीसु च तदङ्गनिस्सरणविवेकवज्जिता सब्बेपि विवेका इध अधिपेत्ता। वत्थुकामविवेकवचनतो हि कायविवेको वुत्तो, किलेसकामेहि पन सेसाकुसलेहि च विवेकवचनतो चित्तउपधिविवेका, विक्खम्भनादिविवेका च वुत्ता। लोकुत्तरज्ज्ञानम्पि सङ्गहितत्ता दट्ठब्बं। एवमेतेन पदद्वयेन यथाक्कमं कामच्छन्दनीवरणसेसनीवरणविक्खम्भनादिको वुत्तो। एवं ओघादीसुपि यथारहं योजेतब्बं।

एत्तावता च पठमस्स ज्ञानस्स पहानङ्गं दस्सेत्वा इदानीं सम्पयोगङ्गं दस्सेतुं “**सवितक्कं सविचार**”न्तिआदि वुत्तं। तत्थ वितक्केन च विचारेन च सह वत्तति रुक्खो विय पुप्फेन, फलेन चाति इदं ज्ञानं “**सवितक्कं सविचार**”न्ति वुच्चति। **विवेकजन्ति** एत्थ विवित्ति विवेको, नीवरणविगमोति अत्थो।

विविक्तोति वा विवेको, नीवरणविवितो ज्ञानसम्पयुतधम्मरासीति अत्थो, तस्मा विवेकतो, तस्मिं वा विवेके जातन्ति विवेकजं। **पीतिसुखं** एत्थ पीतीति अप्पनाप्पत्ता फरणापीति, सुखञ्च तंसम्पयुत्तं, इति अयञ्च पीति इदञ्च सुखं अस्स ज्ञानस्स, अस्मिं वा अत्थीति इदं ज्ञानं **“पीतिसुखं”**न्ति वुच्चति। अथ वा पीति च सुखञ्च पीतिसुखं, विवेकजं पीतिसुखं अस्स, अस्मिं वाति **विवेकजं पीतिसुखं**, एवं एकपदवसेन **“विवेकजपीतिसुखं”**न्ति वत्तब्बे निग्गहीतागमं कत्वा **“विवेकजं पीतिसुखं”**न्तिपि वत्तुं युज्जति। यथेव हि ज्ञानं, एवं पीतिसुखमपि विवेकजमेव होतीति। **पठमं ज्ञानं** गणनानुपुब्बतो पठमं, पठमं उप्पत्तितोपि पठमं। आरम्मणूपनिज्झानतो, पच्चनीकझापनतो वा ज्ञानं, इमिना नयेन उपरि **“दुतियं ज्ञानं”**न्ति आदीसु अत्थो वेदितब्बो। **उपसम्पज्ज विहरतीति** एवं पञ्चङ्गविप्पहीनं पञ्चङ्गसमन्नागतं तिविधकल्याणं दसलक्खणसम्पन्नं पठमं ज्ञानं अधिगन्त्वा तदनुरूपेण इरियापथविहारेण पवत्ततीति अत्थो। एत्थ च चित्तेकग्गता किञ्चापि **“सवितक्कसविचार”**न्ति इमस्मिं पाठे न निदिद्धा, तथापि **विभङ्गे** **“ज्ञानन्ति वितक्को विचारो पीति सुखं चित्तस्सेकग्गता”**ति (विभ० ५६९) वुत्तत्ता अङ्गमेव।

एवं पठमज्झानाधिगमं दस्सेत्वा इदानीं तदनन्तरं अधिगतपठमज्झानस्स तं आवज्जनसमापज्जनवुद्धानाधिद्वानपच्चवेक्खणसङ्घाताहि पञ्चहि वसीहि वसीभूतं कत्वा ततो वुद्दाय तत्थ आसन्ननीवरणपच्चत्थिकताय चैव ओळारिकवितक्कविचारक्खोभसमङ्गिताय च दोसं दिस्वा निकन्तिं परियादाय वितक्कादिभेदोळारिकङ्गप्पहानाय, पीतिआदिसन्तङ्गपटिलाभाय च तदेव कम्मट्ठानं पुनप्पुनं मनसिकरोतो दुतियं ज्ञानं उप्पज्जति, तप्पादकञ्च लोकुत्तरज्झानं पुग्गलाधिद्वानेन दस्सेत्तुं **“वितक्कविचारानं वूपसमा”**ति आदिमाह। तत्थ **वूपसमा**ति समतक्कमा, दुतियज्झानक्खणे अपातुभावाति वुत्तं होती। **अज्झत्तन्ति** अत्तनि जातं, अत्तसन्ताने निब्बत्तन्ति अत्थो। **सम्पसादनन्ति** सद्भासङ्घातसम्पसादनयोगतो ज्ञानमपि सम्पसादनं नीलवण्णयोगतो नीलवत्थं विय। **एकोदिभावन्ति** एत्थ वितक्कविचारेहि अनज्झारुल्लहत्ता एको अग्गो सेट्ठो उदेतीति एकोदि, समाधि। तं भावेति वड्ढेतीति दुतियज्झानं **एकोदिभावं**। सो पनायं एकोदि यस्मा चेतसो, न सत्तस्स, न जीवस्स, तस्मा एतं **“चेतसो एकोदिभाव”**न्ति वुत्तं।

ननु चायं सद्भा पठमज्झानेपि अत्थि, अयञ्च एकोदिनामको समाधि, अथ कस्मा इदमेव एवं वुत्तन्ति? वुच्चते — इमस्मिं हि ज्ञाने वितक्कविचारक्खोभाभावेन बलवती सद्भा, समाधि च, तस्मा इदमेव एवं वुत्तन्ति। **अवितक्कं अविचारन्ति** भावनाय पहीनत्ता नत्थि एतस्मिं, एतस्स वा वितक्को विचारो, न ततियज्झानादि विय, चक्खुविज्जाणादि विय च अभावप्पत्तितो, तस्मा इमस्स **“वितक्कविचारानं वूपसमा”**ति इदं कारणवचनन्ति दड्ढम्। **समाधिजन्ति** पठमज्झानसमाधितो, सम्पयुत्तसमाधितो वा जातं, वितक्कादिक्खोभाभावेन चेतस्स वण्णभणनत्थं इदमेव **“समाधिज”**न्ति वुत्तं। **उपसम्पज्ज विहरतीति** एवं दुवङ्गविप्पहीनं तिवङ्गसमन्नागतं तिविधकल्याणादियुत्तं दुतियं ज्ञानं अधिगन्त्वा वुत्तनयेन वत्ततीति अत्थो।

एवं दुतियज्झानाधिगमं दस्सेत्वा इदानीं तदनन्तरं अधिगतदुतियज्झानस्स तं वुत्तनयेनेव वसीभूतं कत्वा तत्थ आसन्नवितक्कविचारपच्चत्थिकताय चैव ओळारिकपीतङ्गसमङ्गिताय च दोसं दिस्वा निकन्तिं परियादाय तदोळारिकङ्गप्पहानाय सेससन्तङ्गपटिलाभाय तदेवारम्मणं पुनप्पुनं मनसिकरोतो ततियं ज्ञानं उप्पज्जति, तप्पादकञ्च लोकुत्तरं, तं दस्सेत्तुं **“पीतिया च विरागा”**ति आदिमाह। तत्थ विरज्जनं विरागो, समतक्कमो, तस्मा **विरागा। च**-कारेण वितक्कविचारानं वूपसमं सम्पिण्डेति **“पीतिया च विरागा, वितक्कविचारानञ्च वूपसमा”**ति। इदञ्चेतस्स आगमनमग्गपरिदीपनत्थं, वण्णभणनत्थञ्च वुत्तं। **उपेक्खको विहरतीति** एत्थ उपपत्तितो इक्खति अपेक्खपतिता हुत्वा पस्सतीति उपेक्खा, तत्रमज्झत्तता। ताय विसदाय पीतिविरागपदद्वानाय थामगताय समन्नागतत्ता ततियज्झानसमङ्गी **“उपेक्खको”**ति वुच्चति, वितक्कादिक्खोभाभावेन पनेसा एत्थेव परिव्यत्तिकच्चा जाता, न पठमज्झानादीसूति। **सतो च सम्पजानोति** पुग्गलाधिद्वानेन सति च सम्पजञ्जञ्च वुत्तं, इदञ्च सतिसम्पजञ्जबलेनेव ठितं तंपीतिसहचरितं सुखं, ततो अपनीतं वच्चो विय बन्धनबलेन धेनुं पीतिं न उपगच्छति, इमस्मिञ्च सति अतिमधुरे सुखे योगिनो न सारज्जन्ति, नो अज्जत्थाति इममपि अत्थविसेसं दस्सेत्तुं इधेव वुत्तन्ति वेदितब्बं। **सुखञ्च कायेन पटिसंवेदेतीति** एत्थ किञ्चापि ततियज्झानसमङ्गिनो सुखपटिसंवेदनाभोगो नत्थि, एवं सन्तेपि यस्मा तस्स नामकायेन सम्पयुत्तं अतिपणीतं सुखं, तंसमुद्धितेन तस्स अतिपणीतेन रूपेण रूपकायो फुट्ठो, यस्स फुट्ठत्ता ज्ञाना वुद्धितोपि कायिकसुखं पटिसंवेदेय्य, तस्मा एतमत्थं दस्सेन्तो **“सुखञ्च कायेन पटिसंवेदेती”**ति आह। **यं तन्ति** आदीसु यन्ति यस्मा, यं ज्ञानहेतूति अत्थो। तन्ति तं ततियज्झानसमङ्गिपुग्गलं बुद्धादयो **अरिया आचिक्खन्ति** पसंसन्ति। किन्ति? **“उपेक्खको सतिमा सुखविहारी”**ति। एवं एकङ्गविप्पहीनं दुवङ्गसमन्नागतं तिविधकल्याणादियुत्तं ततियं ज्ञानं अधिगन्त्वा पवत्ततीति अत्थो। यं पन ज्ञानं **विभङ्गे** **“ज्ञानन्ति उपेक्खा सति सम्पजञ्जं सुखं चित्तस्सेकग्गता”**ति (विभ० ५९१) वुत्तं, तं सपरिक्खारं ज्ञानं दस्सेत्तुं परियायेन वुत्तं। उपनिज्झानलक्खणानं पन सुखचित्तेकग्गतानं वसेन दुवङ्गिकमेवेतं वेदितब्बं। यथाह — **“दुवङ्गिकं ज्ञानं होती”**ति आदि (विभ० ६२४)।

एवं ततियज्झानाधिगमं दस्सेत्वा इदानीं तदनन्तरं अधिगतततियज्झानस्स तं वसीभूतं कत्वा ततो वुद्दाय तत्थ वुत्तनयेन दोसं दिस्वा निकन्तिं परियादाय ओळारिकसुखङ्गप्पहानाय, उपेक्खेकग्गतासङ्घातसेससन्तङ्गपटिलाभाय च तदेव निमित्तं मनसिकरोतो चतुत्थं ज्ञानं उप्पज्जति, तप्पादकञ्च लोकुत्तरं, तं पुग्गलाधिद्वानेन दस्सेत्तुं **“सुखस्स च पहाना”**ति आदिमाह। तत्थ **सुखस्स च पहाना दुक्खस्स च पहाना**ति कायिकस्स सुखस्स, दुक्खस्स च पुब्बेव पहाना। **पुब्बेवाति** तञ्च खो पुब्बेव, न चतुत्थज्झानक्खणेति अत्थो। **सोमनस्सदोमनस्सानं अत्थङ्गमाति** चेतसिकस्स सुखस्स, दुक्खस्स च पुब्बेव पहाना। कदा पन तेसं पहानं होतीति? चतुत्थं ज्ञानानं उपचारक्खणे। दुक्खदोमनस्ससुखसोमनस्सानि हि यथाक्कमं पठमादिचतुत्थं ज्ञानानं उपचारक्खणे एव पहीयन्ति। यदि एवं, कस्मा पनेस **“विविच्चेव... पे०... पठमं ज्ञानं उपसम्पज्ज विहरति, एत्थुप्पन्नं दुक्खिन्द्रियं अपरिसेसं निरुज्झति... पे०... चतुत्थं ज्ञानं उपसम्पज्ज विहरति, एत्थुप्पन्नं सोमनस्सिन्द्रियं अपरिसेसं निरुज्झती”**ति (सं० नि० ५.५१०) एवं ज्ञानेस्वेव निरोधो वुत्तोति? अतिसयनिरोधस्स वुत्तत्ता।

उपचारकखणेषु हि यो निरोधो, सो निरोधो एव, नातिसयनिरोधो, सो पन ज्ञानकखणेषु एव । ततो एव हि तत्थ तत्थ अपरिसेसगहणं कतन्ति, तत्थ तत्थ पन पहीनापि एता वेदना एत्थ दुविज्जेय्यलकखणाय अदुक्खमसुखाय वेदनाय दुक्खादिब्यतिरेकेन सुखगहणत्थं, वण्णभणनत्थञ्चस्स ज्ञानस्स समाहटा, पच्चयदस्सनत्थञ्चस्स । यथाह — “चत्तारो खो, आवुसो, पच्चया अदुक्खमसुखाय चेतोविमुत्तिया समापत्तिया, इधवुसो, भिक्खु सुखस्स च पहाना”तिआदि (म० नि० १.४५८) ।

**उपेक्खासतिपारिसुद्धि**ति तत्रमज्झत्ततासङ्गाताय उपेक्खाय जनितसतिया पारिसुद्धि । निरुपक्लेसताय हि तं परिसुद्धत्तं । न केवलञ्चेत्थ उपेक्खाय सति एव परिसुद्धा, अपिच खो सब्बेपि सम्मयुत्तधम्मा, सतिसीसेन पनायं देसना कताति । **उपसम्पज्ज विहरती**ति एवं एकङ्गविप्पहीनं दुवङ्गसमन्नागतं तिविधकल्याणादियुत्तं चतुत्थं ज्ञानं अधिगन्त्वा तदनुरूपेण इरियापथविहारेण पवत्ततीति अत्थो ।

एवं रूपावचरलोकुत्तरचतुक्कज्झानं दस्सेत्वा इदानीं अरूपावचरज्झानं दस्सेन्तो यं तत्थ पठमं, एवं अधिगतरूपावचरचतुत्थज्झानस्स करजरूपे दण्डादानादीनञ्चेव चक्खुरोगादिआबाधानञ्च वसेन दिट्ठादीनवस्स करजरूपस्स समतिक्कमाय आकासकसिणविरहितेसु नवसु कसिणेषु अञ्जतरस्मिं चतुत्थं ज्ञानं उप्पादेत्वा तस्सारम्मणभूतं कसिणपटिभागरूपमि करजरूपपटिभागताय, अरञ्जे सप्पानुबन्धस्स भयेन पलायतो रज्जुतालपण्णादिं सप्पपटिभागताय विय समतिक्कमितुकामस्स पञ्चहाकारेहि तं ज्ञानं वसीभूतं कत्वा ततो बुद्धाय तत्थ निब्बेजनीयरूपपटिभागारम्मणताय, आसन्नसोमनस्सपच्चत्थिकताय च दोसं दिस्वा निकन्तिं परियादाय अङ्गेसु समतिक्कमितुब्बाभावेन आरम्मणसमतिक्कमभूतं आकासानञ्चायतनं सन्ततो मनसिकरित्वा चक्कवाळपरियन्तं वा यत्तकं वा इच्छति, तत्तकं कसिणं पत्थरित्वा वा कसिणं अमनसिकरित्वा तेन फुट्टोकासं “आकासो आकासो”ति वा “अनन्तो आकासो”ति वा मनसिकारेण कसिणं उग्घाटेत्वा वा तं कसिणुग्घाटिमाकासनिमित्तं “आकासो”ति पुनप्पुनं मनसिकरोतो आकासानञ्चायतनं उपपज्जति, तं ताव दस्सेतुं “**सब्बसो रूपसज्जानं समतिक्कमा**”तिआदिमाह ।

तत्थ **सब्बसो**ति सब्बाकारेण, सब्बासं वा अनवसेसानन्ति अत्थो । **रूपसज्जानन्ति** सज्जासीसेन वुत्तानं कुसलविपाककिरियवसेन पञ्चदसरूपावचरज्झानानञ्चेव तदारम्मणानञ्च । रूपज्झानमि हि “रूपे सज्जा रूपसज्जा”ति एवं सज्जासीसेन वुच्चति, तदारम्मणकसिणमि रूपन्ति सज्जा नाममस्साति “रूपसज्ज”न्ति वुच्चति । **समतिक्कमा**ति विरागा, निरोधा च । **विभङ्गे** पन सज्जासु समतिक्कन्तासु आरम्मणं समतिक्कन्तमेव होतीति “समापन्नस्स वा उपपन्नस्स वा दिट्ठधम्मसुखविहारिस्स वा”तिआदिना (विभ० ६०२) सज्जानमेव समतिक्कमो वुत्तो, आरम्मणे अविरत्तस्स सज्जासमतिक्कमो नत्थेवाति तं समतिक्कमवसेनापि अत्थवण्णना कातब्बाव ।

**पटिघसज्जानं अत्थङ्गमा**ति चक्खादीनं वत्थूनं, रूपादीनञ्च आरम्मणानं पटिघातेन समुप्पन्ना द्विपञ्चविज्जाणसज्जा **पटिघसज्जा**, तासं अत्थङ्गमा । किञ्चापि ता रूपावचरज्झानसमापन्नस्सापि न सन्ति, अथ खो न पहीनता न सन्ति । न हि रूपविरागाय रूपावचरभावना संवत्तति, रूपायत्ताव एतासं पवत्ति, अयं पन भावना रूपविरागाय संवत्तति, तस्मा ता एत्थ पहीनाति वत्तुं वट्ठति । **नानत्तसज्जानं अमनसिकारा**ति नानत्ते गोचरे पवत्तानं, नानत्तानं वा मनोविज्जाणधातुवसेन पवत्तानञ्च चतुचत्तालीसकामावचरसज्जानं अमनसिकारा अनावज्जना । एत्थ च रूपपटिघसज्जानं इमिना ज्ञानेन निब्बत्तभवेपि अनुप्पत्तितो “समतिक्कमा अत्थङ्गमा”ति एवं अभावो एव वुत्तो । “नानत्तसज्जानं अमनसिकारा”ति अट्ठकामावचरकुसलानं नवकिरियानं दसाकुसलानं वसेन सत्तवीसतिसज्जानं अरूपभवेपि मनसिकारेण उप्पत्तिसम्भवतो तासं अमनसिकारा इच्चेव वुत्तन्ति वेदितब्बं ।

**अनन्तो आकासो**ति एत्थ नास्स उप्पादन्तो वा वयन्तो वा पज्जायतीति **अनन्तो** । **आकासो**ति कसिणुग्घाटिमाकासो वुच्चति, मनसिकारवसेनपेत्थ अनन्तता वेदितब्बा । तेनेव **विभङ्गे** वुत्तं “तस्मिं आकासे चित्तं ठपेति...पे०... अनन्तं फरति, तेन वुच्चति अनन्तो आकासो”ति (विभ० ६०५) । इदं पनस्स भावनाकारदस्सनं । **आकासानञ्चायतनन्ति** एत्थ नास्स अन्तोति अनन्तं आकासमेव अनन्तं आकासानन्तं, आकासानन्तमेव आकासानञ्चं, तदेव आकासानञ्चं अधिद्वानट्टेन, सज्जातिसमोसरणट्टेन च आयतनं, तं आरम्मणमस्स ससम्पयुत्तधम्मस्स ज्ञानस्साति **आकासानञ्चायतनं** । तं उपसम्पज्ज वुत्तनयेन विहरतीति अत्थो ।

एवं आकासानञ्चायतनाधिगमं दस्सेत्वा इदानीं यं तदनन्तरं अधिगतपठमारुप्पस्स तं वसीभूतं कत्वा तत्थ आसन्नरूपज्झानपच्चत्थिकताय, रूपपटिभागाकासारम्मणताय च दोसं दिस्वा निकन्तिं परियादाय तं समतिक्कमाय आकासं फरित्वा पवत्तं विज्जाणं “अनन्तं विज्जाण”न्ति पुनप्पुनं मनसिकरोतो विज्जाणञ्चायतनं उपपज्जति, तं दस्सेतुं “**सब्बसो आकासानञ्चायतनं समतिक्कमा**”तिआदि वुत्तं । तत्थ पुब्बे वुत्तनयेन ज्ञानमि आकासानञ्चायतनं आरम्मणमि । आरम्मणमि हि पुरिमनयेन आकासानञ्चञ्च तं पठमारुप्पस्स आरम्मणत्ता वुत्तनयेन आयतनञ्चाति “आकासानञ्चायतन”न्ति वुच्चति । इति उभयस्सापि अप्पवत्तिकरणेन, अमनसिकरणेन च एकज्झं कत्वा “आकासानञ्चायतनं समतिक्कमा”ति इदं वुत्तन्ति वेदितब्बं ।

**अनन्तं विज्जाणन्ति** तज्जेव पठमारुप्पविज्जाणं आकासं अनन्ततो फरित्वा पवत्तं “अनन्तं विज्जाण”न्ति एवं मनसिकरोतोति वुत्तं होति, मनसिकारवसेन वा अनन्तं । **विभङ्गे**पि हि “अनन्तं फरती”ति (विभ० ६१०) वुत्तं । **विज्जाणञ्चायतनन्ति** एत्थ वुत्तनयेन अनन्तमेव आनञ्चं, विज्जाणञ्च तं आनञ्चञ्चाति विज्जाणानन्तन्ति वत्तब्बे रुळ्हितो “विज्जाणञ्च”न्ति वुत्तं, तदेव आयतनमारम्मणमस्साति **विज्जाणञ्चायतनं** । सेसं वुत्तनयमेव ।



एवं विज्जाणञ्जायतनं दस्सेत्वा इदानीं यं तदनन्तरं अधिगतदुतियारुप्पस्स तं वसीभूतं कत्वा तत्थ आसन्नाकासानञ्जायतनपच्चत्थिकताय, तदारम्पणताय च दोसं दिस्वा निकन्तिं परियादाय तं समतिक्कमाय पठमारुप्पविज्जाणाभावं “नत्थि नत्थी”ति वा “सुज्जं सुज्ज”न्ति वा “विवित्तं विवित्त”न्ति वा पुनप्पुनं मनसिकरोतो आकिञ्चञ्जायतनं उप्पज्जति, तं दस्सेतुं “सब्बसो”तिआदिमाह । इधापि वुत्तनयेन ज्ञानस्स, तदारम्पणस्स च विज्जाणञ्जायतनस्स समतिक्कमोव वेदितब्बो । नत्थि किञ्चीति “नत्थि नत्थि, सुज्जं सुज्जं, विवित्तं विवित्त”न्ति एवं मनसिकरोतोति अत्थो ।

**आकिञ्चञ्जायतनन्ति** एत्थ नास्स किञ्चनन्ति अकिञ्चनं, अन्तमसो भङ्गमत्तम्पिस्स अवसिट्ठं नत्थीति वुत्तं होति, अकिञ्चनस्स भावो आकिञ्चञ्जं, आकासानञ्जायतनविज्जाणापगमस्सेतं अधिवचनं, आकिञ्चञ्जं आयतनमारम्पणमस्साति **आकिञ्चञ्जायतनं** । सेसं सुविज्जेय्यमेव ।

एवं आकिञ्चञ्जायतनाधिगमं दस्सेत्वा इदानीं यं तदनन्तरं अधिगतततियारुप्पस्स तं वसीभूतं कत्वा तत्थ आसन्नविज्जाणञ्जायतनपच्चत्थिकताय दोसं दिस्वा निकन्तिं परियादाय तं समतिक्कमाय तदेव आकिञ्चञ्जायतनं “सन्तं सन्त”न्ति पुनप्पुनं मनसिकरोतो नेवसज्जानासज्जायतनं उप्पज्जति, तं दस्सेतुं “सब्बसो”तिआदिमाह । तत्थ **नेवसज्जानासज्जायतनन्ति** ओळारिकाय सज्जाय अभवतो, सुखुमाय च भावतो नेवस्स ससम्पयुत्तधम्मस्स ज्ञानस्स सज्जा नासज्जाति नेवसज्जानासज्जं, तदेव धम्मयायतनमनायतनपरियापन्नता आयतनन्ति **नेवसज्जानासज्जायतनं** ।

अथ वा यायमेत्थ सज्जा, सा पटुसज्जाकिच्चं कातुं असमत्थताय नेवसज्जा, सङ्खारावसेससुखुमभावेन विज्जमानत्ता नासज्जाति नेवसज्जानासज्जा, नेवसज्जानासज्जा च सा सम्पयुत्तधम्मानं अधिद्वानट्टेन आयतनञ्चाति **नेवसज्जानासज्जायतनं** । न केवलज्जेत्थ सज्जाव एदिसी, अपि तु फस्सोपि नेवफस्सो नाफस्सो, चित्तम्पि नेवचित्तं नाचित्तं, एवं सेससम्पयुत्तधम्मापि, सज्जासीसेन पनायं देसना कताति वेदितब्बा । तत्थ **सङ्खारावसेससुखुमभावेनाति** अच्चन्तसुखुमभावप्पत्तसङ्खारभावेन । सेसं वुत्तनयमेव ।

अयं पनेत्थ आदितो पट्टाय पिण्डत्थप्पकासना — “इध भिक्खु पातिमोक्खसंवरसंवृतो”तिआदिना सासने लोकियलोकुत्तरज्ज्ञाननिब्बत्तकपुग्गलस्स पतिट्ठाभूतसीलेसु पातिमोक्खसंवरसीलविसुद्धिं उपदिसति । “विहरती”ति इमिना तदनुरूपविहारसमङ्गिभावं । “आचारगोचरसम्पन्नो”ति इमिना आजीवपारिसुद्धिसीलं, तदुपकारके च धम्मे । “अणुमत्तेसू”तिआदिना यथावुत्तसीलेहि अचवनं, तेसज्ज अनवसेसतो समादानं । “इन्द्रियेसु गुत्तद्वारो”ति इमिना इन्द्रियसंवरसीलं । “भोजने मत्तज्जू”ति इमिना पच्चयसन्निस्सितसीलं, सन्तोसादिगुणज्ज । “पुब्बरत्तापररत्त”न्तिआदिना सीलधुतङ्गेसु पतिट्ठितस्स भावनारामस्स तदुपकारके धम्मे । “बोधिपक्खिकान”न्तिआदिना पटिपत्तिया निब्बेधभागियतं । “सो अभिक्कन्ते”तिआदिना यथावुत्तगुणानं अपरिहानाय, वक्खमानानज्ज पटिलाभाय सतिसम्पयोगं । “सो विवित्त”न्तिआदिना भावनानुरूपसेनासनपरिगहं । “सो अरज्जगतो”तिआदिना ज्ञानभावानारम्भप्पकारं । “सो अभिज्झ”न्तिआदिना ज्ञानभावनाभियोगेन पहीनपञ्चनीवरणस्स उपचारज्ज्ञानुप्पत्तिं । “सो इमे पञ्च नीवरणे”तिआदिना तस्स उपरूपरि वायमतो रूपारूपज्ज्ञानुप्पत्तिकमं उपदिसति । अयं तावेत्थ पदत्थो ।

**धम्मभेदो** पनेत्थ विभङ्गनये पाकटो भविस्सति । तीसु हि नयेसु महग्गतलोकुत्तरा कुसलविपाककिरियचित्तसम्पयुत्ता वितक्कविचारपीतिसुखउपेक्खाएकग्गतासङ्खता ज्ञानधम्मा नानानयेहि विभत्ता, ज्ञानसम्पयुत्ता पन सेसकामावचरधम्माव इध सङ्गहिता । किञ्चापि पनेत्थ पातिमोक्खसंवरसीलादयोपि वुत्ता, तथापि ते ज्ञानानं पुब्बभागप्पटिपत्तिदस्सनवसेन चेव ज्ञानसम्पयुत्तधम्मवसेन च वुत्ता, इध पन न सङ्गहिताति वेदितब्बा ।

**पज्हापुच्छके** पन सिया कुसला, सिया अब्याकता, तीणि ज्ञानानि सुखाय वेदनाय सम्पयुत्ता, चतुत्थं अदुक्खमसुखाय वेदनाय सम्पयुत्तं, उपेक्खा पनेत्थ वेदना न वत्तब्बा, सिया विपाका, सिया विपाकधम्मधम्मा, पठमज्ज्ञानं वितक्कविचारवज्जितं सवितक्कसविचारं, वितक्को पनेत्थ अवितक्कविचारमतो, विचारो न वत्तब्बो, तीणि ज्ञानानि अवितक्कविचारा, द्वे ज्ञानानि पीतिवज्जितानि पीतिसहगतानि, तीणि सुखवज्जितानि सुखसहगतानि, चतुत्थं उपेक्खावज्जितं उपेक्खासहगतं, ततियज्ज्ञाने सुखं, उपेक्खा च इध न वत्तब्बं... पे०... सिया महग्गता, सिया अप्पमाणा, तीणि सिया अप्पमाणारम्पणा, सिया न वत्तब्बा, चतुत्थं तिधापि न वत्तब्बज्ज, तीणि सिया मग्गहेतुका, सिया मग्गाधिपतिनो, सिया न वत्तब्बा, चतुत्थं तिधापि न वत्तब्बज्ज... पे०... पीति बहिद्धारम्पणानि, चतुत्थं तिधापि न वत्तब्बज्ज... पे०... अनिदस्सनअप्पटिघा न हेतू... पे०... नोचित्तचेतसिका अरणाति । सेसं सुविज्जेय्यमेव । पाळिमुत्तनयो पनेत्थ नत्थि, इतो परं पन एत्तकम्पि अवत्वा विज्जमानद्वाने एव वक्खाम ।

ज्ञानविभङ्गमातिकथवण्णना निट्ठिता ।

**अप्पमज्जाविभङ्गमातिकथवण्णना**

अप्पमज्जाविभङ्गमातिकाय पन **अत्थतो** ताव — **चतस्सो अप्पमज्जायो**तिआदीसु फरणअप्पमाणवसेन अप्पमज्जायो । एता हि आरम्पणवसेन अप्पमाणे वा सत्ते फरन्ति, एकसत्तम्हि वा अनवसेसफरणवसेन अप्पमाणतो फरन्तीति एवं फरणअप्पमाणवसेन “**अप्पमज्जायो**”ति वुच्चन्ति, सत्त अप्पमाणवसेनापि वत्तुं वट्ठति । **मेत्तासहगतेनाति** मेत्ताय समन्नागतेन । **एकं दिसन्ति** पुरत्थिमादीसु चतूसु दिसासु यं किञ्चि एकं दिसं, तंदिसापरियापन्नसत्तफरणवसेन चेतं वुत्तं । **फरित्वा**ति फुसित्वा आरम्पणं कत्वा । **विहरती**ति पवत्तेति । **तथा दुतियन्ति**आदीसु । यथा एकं दिसं फरित्वा,

तथैव तदनन्तरं दुतियं, ततियं, चतुर्थञ्चाति अत्थो। **इति उद्धमथो तिरियन्ति** एतेनेव नयेन उपरिमं दिसं, हेडिमं दिसं, अनुदिसञ्च अनुक्कमेन मेत्तासहगतेन चेतसा फरित्वा विहरतीति अत्थो। एत्तावता एकमेकं दिसं परिग्गहेत्वा ओधिसो मेत्ताफरणतं दस्सितं।

**सब्बधीति** आदि पन अनोधिसो दस्सनत्थं वुत्तं। तत्थ **सब्बधीति** सब्बत्थ। **सब्बत्ततायाति** सब्बेसु हीनमज्झिमुक्कट्टमित्तसपत्तमज्झत्तादिप्पभेदेसु अत्तताय, तेसु विभागं अक्त्वा अत्तसमतायाति वुत्तं होति। अथ वा **सब्बत्ततायाति** सब्बेन चित्तभावेन, ईसकम्पि बहि अविक्खेपमानोति अत्थो। **सब्बावन्तन्ति** सब्बसत्तवन्तं, सब्बसत्तयुत्तन्ति अत्थो। **लोकन्ति** सत्तलोकं। पुन “मेत्तासहगतेना”ति इदं “विपुलेना”ति आदीहि विसेसनेहि सम्बन्धदस्सनवसेन वा वुत्तं, निगमनवसेन वा। तत्थ फरणवसेन विपुलता वेदितब्बा। भूमिवसेन पन महग्गतता। पगुणवसेन, अप्पमाणसत्तारम्माणवसेन च अप्पमाणता। ब्यापादपच्चत्थिकप्पहानेन अवेरता। दोमनस्सप्पहानेन निहुक्खता, सङ्कतता, अब्यापज्जता च दट्ठब्बा। एवं **करुणासहगतेना**ति आदीसुपि अत्थो वेदितब्बोति अयं तावेत्थ पदत्थो।

**धम्मभेदो** पनेत्थ सुविज्जेय्यो। **विभङ्गनयेन** पन तीसु रूपावचरकुसलविपाककिरियाचित्तेसु सम्पयुत्ता सत्तेसु मेत्तादिब्रह्मविहारभूता अदोसो करुणा मुदिता तत्रमज्झत्ताति चत्तारो धम्मा नानानयेहि विभत्ता, तंसम्पयुत्ता पन कामावचरभूता च एता इथ न गहिता। अरूपावचरलोकुत्तरेसु पनेता अप्पमज्जा नत्थेवाति। **पञ्हापुच्छके** पनेता ताव सिया कुसला, सिया अब्याकता। तिरस्सो सुखाय, चतुत्था अदुक्खमसुखाय वेदनाय सम्पयुत्ता। विपाकत्तिके तिधापि, उपेक्खा अवितक्कअविचारा, सेसा तिधापि, महग्गताव, परित्तरम्माणअतीतारम्माणत्तिकेसु न वत्तब्बाव, बहिद्धारम्माणव, अनिदस्सनअप्पटिघाव, मेत्ता हेतु, सेसा न हेतु, नो चित्ता, चेतसिका, रूपावचरा, सउत्तराव। सेसं सुविज्जेय्यमेवाति।

अप्पमज्जाविभङ्गमातिकथवण्णना निट्ठिता।

### सिक्खापदविभङ्गमातिकथवण्णना

सिक्खापदविभङ्गमातिकाय पन **अत्थतो** ताव — **सिक्खापदानीति** सिक्खितब्बपदानि, सिक्खाकोट्टासाति अत्थो। अपिच सब्बेपि कुसला धम्मा सिक्खितब्बतो सिक्खा, तासं पतिट्ठानट्ठेन पदं, पञ्चसु पन सीलङ्गेसु यं किञ्चि अङ्गं। पाणातिपातादीसु पाणस्स अतीव पातो पाणातिपातो, पाणवधोति अत्थो। **पाणोति** चेत्थ वोहारतो सत्तो, परमत्थतो जीवित्तिन्द्रियं, तस्मिं पन पाणे पाणसज्जिनो जीवित्तिन्द्रियपच्छेदकउपक्कमसमुट्ठापिका कायवचीद्वारानं अज्जतरद्वारप्पवत्ता वधकचेतना पाणातिपातो, तस्मा **पाणातिपाता**। **वेरमणीति** विरति, सा एव वुत्तनयेन सिक्खापदन्ति **वेरमणिसिक्खापदं**। **अदिन्नन्ति** न दिन्नं, परपरिग्गहितं, परपरिग्गहितस्स अदिन्नस्स आदानं अदिन्नादानं। परस्स हरणं थ्येयं चोरिकाति वुत्तं होति। अत्थतो पन परपरिग्गहिते तथासज्जिनो तदादायकउपक्कमसमुट्ठापिका थ्येयचेतना **अदिन्नादानं**। **कामेसूति** वत्थुकामेसु। **मिच्छाचाराति** किलेसकामवसेन लामकाचारा, पुरिसस्स मातुरक्खितादिसङ्गतासु, इत्थिया अत्तनो नियमितपुरिसतो परपुरिससङ्गतेसु च अगमनीयद्वानेसु वीतिक्कमाचाराति वुत्तं होति। अत्थतो पन अगमनीयवत्थूसु मग्गेनमग्गप्पटिपादनोपक्कमसमुट्ठापिका, अधिवासनाकारप्पवत्ता वा मेथुनचेतना **कामेसुमिच्छाचारो**। **मुसाति** अभूतं अतच्छं वत्थु, **वादोति** तस्स अभूततं जत्वाव भूततो तच्छतो विज्जापनं। लक्खणतो पन अतथं वत्थुं जत्वा तथतो परं विज्जापेतुकामस्स अत्थभज्जककायवचीपयोगसमुट्ठापिका चेतना **मुसावादो**। **सुराति** पिट्ठसुरा पूवसुरा ओदनसुरा किण्णपक्खित्ता सम्भारसंयुत्ताति पञ्च सुरा। **मेरयन्ति** पुष्पासवो फलासवो गुळासवो मध्वासवो सम्भारसंयुत्तोति पञ्च आसवा। तदुभयम्पि मदनीयट्ठेन **मज्जं**, याय चेतनाय तं मज्जं पिबति, सा पमादकारणत्ता **पमादट्ठानं**, तस्मा **सुरामेरयमज्जपमादट्ठाना**। सेसं सुविज्जेय्यमेवाति अयं तावेत्थ पदत्थो।

**धम्मभेदो** पन विभङ्गनये पाकटो भविस्सति। एवं उपरिपि। विभङ्गनयेसु चेत्थ सुत्तन्तभाजनीयं नत्थि, **अभिधम्मभाजनीये** पनेतानि पञ्च सिक्खापदानि कामावचरकुसलचित्तसम्पयुत्तानं विरतीनं वसेन नानप्पकारतो पठमवारे विभत्तानि, तथा दुतियवारे चेतनावसेन, विरतिचेतनासम्पयुत्ता पनेत्थ धम्मा न सिक्खापदानि, सिक्खापदसम्पयुत्ता पन होन्ति, तथा ततियनये फस्सादीनं सब्बेसं धम्मानं वसेन नानप्पकारतो विभत्ताति।

**पञ्हापुच्छके** पन चेतनाय, फस्सादीनञ्च परियायसिक्खापदत्ता निप्परियायसिक्खापदभूतानं विरतीनं वसेनेव विभत्तानि। तत्थ हि पञ्च सिक्खापदानि कुसला एव, सिया सुखाय, सिया अदुक्खमसुखाय सम्पयुत्ता...पे०... परित्तरम्माणव, पच्चुप्पन्नारम्माणव, बहिद्धारम्माणव, अनिदस्सनअप्पटिघाव, न हेतु, सहेतुका, नो चित्ता, चेतसिका, कामावचरा, सउत्तराव, अरणावाति। एत्थ च यानि सिक्खापदानि सत्तारम्माणानि वुत्तानि, तानि च विरतिसभावत्ता यस्मा “सत्तो”ति सङ्कं गते परित्तधम्मे एव पच्चुप्पन्ने एव धम्मे आरम्भणं करोन्ति, तस्मा परित्तरम्माणानि च वुत्ताति वेदितब्बा। इदानीं विरमितब्बपाणातिपातादीनं

धम्मकम्मपथालम्ब-वेदनामूलकम्मतो।

सावज्जङ्गादितो जेय्यो, पाळिमुत्तविनिच्छयो॥

तत्थ **धम्मतो** ताव — पञ्चपेते पाणातिपातादयो चेतनासभावाव होन्ति। **कम्मपथतो** पञ्च कम्मपथाव। **आरम्भणतो** पन पाणातिपातो

जीवित्तिन्द्रियारम्भणो, अदिन्नादानं सत्तारम्भणं, सङ्खारारम्भणं वा, तथा मुसावादो, मिच्छाचारो इत्थिपुरिसारम्भणो, सुरापानं सङ्खारारम्भणं । **वेदनातो** पन पाणातिपातो दुक्खवेदनो, अदिन्नादानं तिवेदनं, तथा मुसावादो, मिच्छाचारो पन सुखमञ्जत्तवसेन द्विवेदनो, तथा सुरापानं । **मूलतो** पन पठमो दोसमोहमूलो, दुतियं सिया लोभमोहमूलं, सिया दोसमोहमूलं, तथा मुसावादो, मिच्छाचारो पन लोभमोहमूलोव, तथा सुरापानं । **कम्मतो** पनेत्थ मुसावादो वचीकम्मं, सेसा कायकम्ममेव ।

**सावज्जतो** पन पाणातिपातो ताव अमनुस्सके पाणे अप्पसावज्जो, मनुस्सके महासावज्जो । तेसु च खुद्दकसरीरे अप्पसावज्जो, महासरीरे महासावज्जो । कस्मा? पयोगमहन्तताय । पयोगसमत्तेपि अप्पगुणे अप्पसावज्जो, महागुणे महासावज्जो । सरीरगुणानं समभावे सति किलेसानं, उपक्कमानञ्च मुदुतिब्बताय अप्पमहासावज्जो होति, खीणासवे पन महासावज्जतरोति । अदिन्नादानं वत्थुनो हीनप्पणीतताय चेव गुणविरहिततब्बन्तसन्तकताय च । तत्थापि तं तं उपादायुपादाय च अप्पमहासावज्जं, खीणासवसन्तके महासावज्जतरन्ति वेदितब्बं । मिच्छाचारो दुस्सीलसीलवन्तवत्थुवीतिककमने । तत्थापि तं तं उपादायुपादाय च अप्पमहासावज्जो, खीणासववत्थुवीतिककमने महासावज्जतरोति च वेदितब्बो । मुसावादो यमत्थं भज्जति, तस्स अप्पमहन्तत्तं, वत्थुसामिनो गुणविरहितत्तं, तब्बन्ततञ्च उपादायुपादाय अप्पमहासावज्जो होति । अपिच अत्तनो सन्तकं अदात्तकामताय, हसाधिप्पायेन वा “नत्थेत”न्तिआदिनयप्पवत्तो अप्पसावज्जो, अदिट्ठं “दिट्ठ”न्तिआदिना कूटसक्खिआदिभावेन वा पवत्तो महासावज्जो, मुसा वत्त्वा पन सङ्गभेदेन महासावज्जतरो । सुरापानं बिन्दुमत्ततो पट्टाय तं तं उपादायुपादाय अप्पसावज्जं, बहुके महासावज्जं, कायविकारजननपहोनकपाने पन महासावज्जतरमेव ।

**अङ्गादितो** पन पाणातिपातस्स पाणो पाणसज्जिता वधकचित्तं उपक्कमो तेन मरणन्ति पञ्च अङ्गानि । साहत्थिको आणत्तिको निस्सग्गिको थावरो विज्जामयो इद्धिमयोति छ पयोगा । अदिन्नादानस्स परपरिग्गहितता तथासज्जिता थैय्यचित्तं उपक्कमो तेन हरणन्ति पञ्च अङ्गानि । साहत्थिकादयो छ एव पयोगा । ते च खो यथानुरूपं थैय्यावहारादीनं वसेन पवत्ता । मिच्छाचारस्स अगमनीयवत्थुता सेवनचित्तं मग्गेन मग्गप्पटिपत्तीति तीणि अङ्गानि । साहत्थिको एकोव पयोगो । एवं सेसानम्पि पयोगो वेदितब्बो । मुसावादस्स अतथं वत्थु, विसंवादनचित्तं, तज्जो वायामो, परस्स तदत्थविजाननन्ति चत्तारि अङ्गानि । सुरापानस्स सुरादीनं अज्जतरता अज्झोहरणन्ति द्वे अङ्गानीति ।

एवं पाणातिपातादीनं धम्मादितो विनिच्छयं जत्त्वा इदानि पाणातिपातावेरमणिआदीनं पञ्चन्नम्पि —

धम्मकम्मपथालम्ब-समादानपयोगतो ।

खण्डतो च विजानीयो, पाळिमुत्तविनिच्छयो ॥

तत्थ **धम्मकम्मपथतो** विनिच्छयो वुत्तनयोव । **आरम्भणतो** पनेतानि जीवित्तिन्द्रियादितंतवीतिककमितब्बवत्थारम्भणानि । **समादानतो** एकस्स सन्तिके वा सयमेव वा “पञ्च सीलानि अधिद्वहामी”ति एकतो वा पाटिएक्कं वा समादियन्तेन एतानि समादिन्नानेव होन्ति । **पयोगतो** पन सब्बानिपि साहत्थिकपयोगानेव । **खण्डतो** गहट्टा यं यं वीतिककमन्ति, तं तदेव खण्डं होति, नेतरे । गहट्टा अनिबद्धसीला होन्ति, यं यं सक्कोन्ति, तं तदेव गोपेन्ति । सामणेरानं पन एकस्मिं वीतिककमिते सब्बानिपि भिज्जन्तीति एवं विजानीयो पाळिमुत्तविनिच्छयो ।

सिक्खापदविभङ्गमातिकत्थवण्णना निट्ठिता ।

### पटिसम्भिदाविभङ्गमातिकत्थवण्णना

पटिसम्भिदाविभङ्गमातिकाय **अत्थतो** ताव — **चतस्सो पटिसम्भिदाति** चत्तारो पभेदा । **निद्वेसे** पन “अत्थे जाणं अत्थप्पटिसम्भिदा”तिआदिना (विभ० ७१८) जाणवसेन निद्विट्ठता जाणस्सेव, न अज्जस्स कस्सचीति वेदितब्बं । **अत्थपटिसम्भिदाति** अत्थविसयजाणप्पभेदा, अत्थप्पभेदसल्लक्खणविभावनववत्थानकरणसमत्थतावसेन अत्थे पभेदगतं जाणन्ति अत्थो । सेसपदेसुपि एसेव नयो । एत्थ च **अत्थो**ति हेतुफलं । सो हि हेतुवसेन अरणीयतो गन्तब्बतो, उप्पादेतब्बतो च “अत्थो”ति वुच्चति । पभेदतो पनेसोपि पञ्चविधो होति यं किञ्चि पच्चयुप्पन्नं, निब्बानं, भासितत्थो, विपाको, किरियाति ।

**धम्मो**ति पच्चयो, सो हि फलं विदहति पवत्तेति उप्पादेति चेव पापेति चाति “धम्मो”ति वुच्चति । पभेदतो पनेसोपि पञ्चविधो होति यो कोचि फलनिब्बत्तको हेतु, अरियमग्गो, भासितं, कुसलं, अकुसलन्ति ।

**निरुत्तीति** यथावुत्तानं धम्मानं, अत्थानञ्च वाचको सभावनिरुत्तिसङ्घातो सट्ठो । इमा धम्मत्थनिरुत्तियो आरम्भणं कत्वा पच्चवेक्खन्तस्स तत्थ तत्थ पभेदगतं जाणं **निरुत्तिपटिसम्भिदा** नाम ।

एत्थ च निरुत्तिपटिसम्भिदा सट्ठारम्भणा, न पञ्जत्तारम्भणा, पटिसम्भिदापत्तो हि “फस्सो वेदना”तिआदिकं सट्ठं सुत्वा “अयं सभावनिरुत्ती”ति

जानाति, “फस्सा वेदनो”ति आदिकं पन “न सभावनिरुत्ती”ति जानाति। सभावनिरुत्तीति (विभ० अट्ट० ७१८) च मागधिका भासा, याय सम्मासम्बुद्धा तेपिटकं बुद्धवचनं तन्ति आरोपेन्ति, ब्रह्मानो च अगामके अरञ्जे किञ्चि वचनं असुत्वा वड्ढितदारका च अत्तनो धम्मताय भासन्ति, या च अपायेसु मनुस्से देवलोके चेव मागधभासा उस्सन्ना, पच्छा च ततो अन्धकयोनकदमिळादिदेसभासा चेव सक्कतादिअट्टारसमहाभासा च निब्बत्ता, सा हि यस्मा इतरासु भासासु परिवत्तन्तासुपि न परिवत्तति, सब्बकालं अत्तनो सभावे एव तिड्ढति, तस्मा “सभावनिरुत्ती”ति वुच्चति। या ब्रह्मवोहारो, अरियवोहारोति च वुच्चति, ताय पन मागधभासाय तन्ति आरुळ्हस्स बुद्धवचनस्स पटिसम्भिदापत्तानं सोतपथागमनमेव पपज्जो। सोते पन सङ्गट्टितमते एव नयसतेन नयसहस्सेन अत्थो उपट्ठाति। अज्जाय पन भासाय तन्ति आरुळ्हं तं तेसं चित्तं सहसा नारोहति, किच्छेन उग्गहेतब्बं होति, पुथुज्जनानज्ज सकलं बुद्धवचनं उग्गहेत्वापि पटिसम्भिदापत्ति नाम नत्थि, अरियसावको नो पटिसम्भिदापत्तो नाम नत्थि, पटिसम्भिदापत्तो अज्जं सद्दं नामाख्यातोपसग्गनिपातभेदतो जानाति, न जानातीति? यदग्गेन सद्दं सुत्वा “अयं सभावनिरुत्ति, अयं न सभावनिरुत्ती”ति जानाति, तदग्गेन एतम्पि जानिस्सति, न चेत्तं पटिसम्भिदाकिच्चन्ति वेदितब्बं।

**पटिभानन्ति** धम्मत्थादिविसयं सब्बत्थकजाणं, तं जाणं आरम्भणं कत्वा पच्चवेकखन्तस्स पभेदगतं जाणं **पटिभानपटिसम्भिदा** नाम, इमा चतस्सोपि पटिसम्भिदा अधिगमेन परियत्तिउग्गहणेन सक्कच्चधम्मस्सवनेन अत्थपरिपुच्छाय पुब्बयोगेनाति पज्जहि कारणेहि विसदा होन्ति, सेखभूमियं, असेखभूमियज्जाति द्वीसु ठानेसु पभेदं गच्छन्तीति वेदितब्बा। अयं तावेत्थ पदत्थो।

**धम्मभेदो** पनेत्थापि विभङ्गनये पाकटो भविस्सति। विभङ्गनयेसु हि तीसुपि धम्मनिरुत्तिपटिभानपटिसम्भिदा तिस्सोपि कामावचरजवनसम्पयुत्तजाणानं वसेन तब्बिसयपभेदेन सद्धिं नानप्पकारतो विभत्ता। अत्थपटिसम्भिदा पन तेसं जाणानज्जेव अट्टलोकुत्तरचित्तसम्पयुत्तानज्ज वसेन तब्बिसयपभेदेन सद्धिं। लोकोत्तरजाणानिपि हि मग्गप्पत्तब्बताय अत्थभूतनिब्बानारम्भणत्ता “अत्थपटिसम्भिदा”ति वुच्चति।

**पज्हापुच्छके** पन सिया कुसला, सिया अब्याकता, तिस्सो पटिसम्भिदा सिया विपाकधम्मधम्मा, सिया नेवविपाकनविपाकधम्मधम्मा, अत्थपटिसम्भिदा तिधापि, तिस्सो पटिसम्भिदा परित्ता, अत्थपटिसम्भिदा सिया परित्ता, सिया अप्पमाणा, निरुत्तिपटिसम्भिदा परित्तारम्भणा, बहिद्धारम्भणा च, सेसा तिधापि, निरुत्तिपटिसम्भिदा पच्चुप्पन्नारम्भणाव, अत्थपटिसम्भिदा तिधापि न वत्तब्बा च, अनिदस्सनअप्पटिघा, हेतू, सहेतुका, तिस्सो पटिसम्भिदा सउत्तरा, अत्थपटिसम्भिदा द्विधापि, अरणा चाति। सेसं सुविज्जेय्यमेव।

पटिसम्भिदाविभङ्गमातिकथवण्णना निट्ठिता।

### जाणविभङ्गमातिकथवण्णना

जाणविभङ्गमातिकाय पन **अत्थतो** ताव — **एकविधेना**ति एकप्पकारेन, एककोट्ठासेन वा। **जाणवत्थू**ति एत्थ पन जाणज्ज तं वत्थु च नानप्पकारानं सम्पत्तीनन्ति जाणवत्थु। **पज्ज विज्जाणा**ति चक्खुविज्जाणादीनि पज्ज। **न हेतू अहेतुका**ति आदीसु हेट्ठा हेतुदुकादीसु वुत्तनयानुसारेन सब्बत्थ अत्थो वेदितब्बो। अपिच हेतुदुकादीसु पज्ज विज्जाणा हेतू धम्माति वा सहेतुका धम्माति वा न वत्तब्बा, एकन्तेन पन न हेतू एव, अहेतुका एवाति। एवं “याथावकवत्थुविभावना पज्जा”ति इमिना उपरि एकविधपरिच्छेदावसानेन वक्खमानेन सम्बन्धोति। इमिना नयेन सब्बत्थ यथानुरूपं अत्थो वेदितब्बो। तत्थ च **अचेतसिका**ति चित्तानि एव पज्जविज्जाणसम्पयुत्तानं इध अपरामट्ठता।

**उप्पन्नवत्थुका उप्पन्नारम्भणा**ति खणपच्चुप्पन्नवसेन अनागतपटिक्खेपो। न हि तानि अनागतेसु पज्जसु वत्थारम्भणेसु उप्पज्जन्ति। **पुरेजातवत्थुका पुरेजातारम्भणा**ति सहप्पत्तिपटिक्खेपो। न हि तानि सहप्पन्नं वत्थारम्भणं पटिच्च उप्पज्जन्ति। **अज्झत्तिकवत्थुका**ति अज्झत्तज्झत्तभूते पज्ज पसादे वत्थुं कत्वा उप्पज्जनका। एत्थ च पज्ज विज्जाणा सयम्पि अज्झत्तिका, अज्झत्तिकवत्थुका च, मनोविज्जाणं हृदयनिस्सितं अज्झत्तिकं, बाहिरवत्थुकं, पज्जविज्जाणसम्पयुत्ता तयो खन्था बाहिरा, अज्झत्तिकवत्थुका, मनोविज्जाणसम्पयुत्ता तयो खन्था बाहिरा, बाहिरवत्थुकाति एवं चतुक्कं वेदितब्बं।

**असम्भिन्नवत्थुका असम्भिन्नारम्भणा**ति अनिरुद्धवत्थारम्भणा। न हि तानि निरुद्धवत्थारम्भणं पटिच्च उप्पज्जन्ति। **नानावत्थुका नानारम्भणा**ति तानि यथाक्कमं चक्खुरूपादिनियतेकेकवत्थारम्भणताय अज्जमज्जं भिन्नवत्थुका, भिन्नारम्भणा च। न हि चक्खुविज्जाणं चक्खुं मुञ्चित्वा सोतादीसु अज्जतरं वत्थुं कत्वा रूपं मुञ्चित्वा सद्दादीसु अज्जतरारम्भणं पटिच्च उप्पज्जति, न इतरानि चेतारानि। **न अज्जमज्जस्स गोचरविसयं पच्चनुभोन्ती**ति इमिना च नेसं नानारम्भणतयेव विभावेति। **न असमन्नाहारा उप्पज्जन्ती**ति अनावज्जने न उप्पज्जन्ति, पज्जद्वारावज्जनेन अनावज्जिते विसये न उप्पज्जन्तीति अत्थो। **न अमनसिकारा**ति तमेवेत्थ परियायन्तरेन विभावेति। **न अब्बोकिण्णा**ति अज्जमज्जं निरन्तरा हुत्वा न उप्पज्जन्ति। **न अपुब्बं अचरि**मन्ति एकक्खणेपि सह न उप्पज्जन्ति। न केवलज्ज एतानि, अज्जानिपि विज्जाणानि द्वे वा तदुत्तरिं वा एकतो न उप्पज्जन्ति, एकेकमेव पन विज्जाणं उप्पज्जतीति वेदितब्बं। यथाह — “अज्जं उप्पज्जते चित्तं, अज्जं चित्तं निरुज्झती”ति आदि (दी० नि० अट्ट० १.२१४; म० नि० अट्ट० १.१०९; सं० नि० अट्ट० ३.५.३६८; विभ० अट्ट० ५२३)। **न अज्जमज्जस्स समनन्तरा**ति इमिना अनब्बोकिण्णताय एव विभावना।

अनाभोगाति अनावज्जनभूता आवज्जनद्वाने उत्वा आवज्जनकिच्चं कातुं न समत्थाति अत्थो । न कञ्चि धम्मं पटिविजानातीति “मनोपुब्बङ्गमा धम्मा”ति (ध० प० १-२) एवं वुत्तं एकम्पि कुसलाकुसलं धम्मं कोचिपि पुग्गलो न पटिविजानाति, तेहि विज्जाणेहि न साधेतीति अत्थो । अज्जत्र अभिनिपातमत्ताति ठपेत्वा रूपादिआरम्माणं अभिनिपातमत्तं आपाथगमनमत्तं, ब्यत्ततरोपि पुग्गलो पञ्चविज्जाणेहि आपाथगतारम्माणपटिविजाननमत्ततो अज्जं कुसलाकुसलपटिविजाननं कातुं न सक्कोतीति अत्थो ।

पञ्चन्नं विज्जाणानं समनन्तरापीति मनोधातुयापि । अपि-सदो चेत्थ सम्पिण्डनत्थो, तेन न केवलं मनोधातुयाव, ततो परेहिपि पञ्चद्वारिकविज्जाणेहि तदारम्माणपरियोसानेहि न किञ्चि कुसलाकुसलं धम्मं पटिविजानातीति अयमत्थो दस्सितोति गहेतब्बो । किञ्चापि पञ्चद्वारे कुसलाकुसलादीनि जवनानि उप्पज्जन्ति, तथापि तानि मोघपुष्फानि विय अब्बोहारिकानीति दट्ठब्बानि । न कञ्चि इरियापथं कप्पेतीति आदीसुपि एसेव नयो । न हि पञ्चद्वारिकविज्जाणेहि गमनादीसु कञ्चि इरियापथं कप्पेति, न कायवचीकम्मं पटुपेति, न विज्जति वा समुट्ठापेति, न कुसलाकुसलं धम्मं समादियति, न लोकियलोकुत्तरं समाधिं समापज्जति, न ततो वुट्ठाति, न भवतो चवति, न भवन्तरे उप्पज्जति, सब्बप्पेतं किच्चं मनोद्वारिकचित्तेनेव होति । यथा चेतेसं एतानि किच्चानि नत्थि, एवं नियामोक्कमनादीनिपि । न हि कोचि पञ्चद्वारिकजवनेहि मिच्छत्तनियामं, सम्पत्तनियामं वा ओक्कमति, न चेतानि नामगोत्तं वा कसिणादिपज्जति वा तिलक्खणादि वा आरम्भ भवन्ति । न सुपतीति आदीसु सब्बेहि पञ्चद्वारिकचित्तेहि न निदं ओक्कमति, न किञ्चि सुपिनं पस्सति । निदायन्तस्स हि इन्द्रियेसु महापदीपतुरियसद्दादिओळारिकेहिपि रूपादिपञ्चारम्माणेहि घट्टितेसु पठमं पञ्चद्वारिकानि आवज्जनानि भवङ्गं आवट्टेतुं न सक्कोन्ति, मनोद्वारिकमेव आवज्जनं सक्कोति, तस्मिञ्च उप्पन्ने मनोद्वारिकजवनं जवित्वा भवङ्गं ओतरति । दुतियवारे पन पञ्चद्वारिकआवज्जनेसु यं किञ्चि यथारहं भवङ्गं आवट्टेति, ततो तदारम्माणपरियोसानानि तंतंद्वारिकवीथिचित्तानि यथाक्कमं पवत्तित्वा भवङ्गं ओतरन्ति । ततियवारे पन मनोद्वारिकावज्जनजवनानि पवत्तन्ति, तस्मिं खणे रूपादिपञ्चारम्माणववत्थानं होति, सत्तो च निदाय पटिबुद्धोति, एवं मनोद्वारिकचित्तेनेव पटिबुद्धीति ।

सुपिनम्पि हि तेनेव पस्सति, न पञ्चद्वारिकेन, तज्ज पनेतं सुपिनं पस्सन्तो चतूहि कारणेहि पस्सति धातुक्खोभतो वा अनुभूतपुब्बतो वा देवतोपसंहारतो वा पुब्बनिमित्ततो वा । इमेसं पन संसग्गसन्निपाततोपि बहुधा पपज्जन्ति । तत्थ यं वातपित्तादिधातुक्खोभतो, अनुभूतपुब्बतो च सुपिनं पस्सति, न तं सच्चं । यं देवतोपसंहारतो पस्सति, तं सच्चं वा होति अलिकं वा । कुद्धा हि देवता विपरीतम्पि कत्वा दस्सेन्ति । यं पुब्बनिमित्ततो पस्सति, तं एकन्तसच्चमेव बोधिसत्तकोसलराजादीनं पञ्चसोळसमहासुपिनानि विय । तज्ज पनेतं चतुब्बिधं सुपिनं सेखपुथुज्जनाव पस्सन्ति, न असेखा पहीनविपल्लासता । किं पनेतं पस्सन्तो सुत्तो पस्सति पटिबुद्धो वा? किञ्चेत्थ, यदि सुत्तो पस्सति, सुपिनस्स कुसलादिसभावतो, भवङ्गस्स च तदभावा अभिधम्मविरोधो आपज्जति । अथ पटिबुद्धो, सुपिनं पस्सन्तेन कतस्स अब्बोहारिकस्सापि वीतिक्कमस्स सब्बोहारिकस्सेव एकन्तसावज्जत्ता अनापत्ति न सियाति विनयविरोधो आपज्जति । पकारन्तरो च नत्थि, येन सुपिनं पस्सेय्याति सुपिनस्स अभावोव आपज्जतीति? नापज्जति । कस्मा? यस्मा कपिमिद्धपरेतो पस्सति “कपिमिद्धपरेतो खो, महाराज, सुपिनं पस्सती”ति (मि० प० ५.३.५) वचनतो, या पन निदा मक्कटनिदा विय पुनप्पुनं कुसलादिचित्तवोकिण्णता लहुपरिवत्ता, तं कपिमिद्धं, तेन सुत्तो सुपिनं पस्सति, तस्मा सुपिनो कुसलोपि होति अकुसलोपि, आवज्जनतदारम्माणवसेन अब्बाकतोपि, सुपिने च कतं कुसलाकुसलदुब्बलताय पटिसन्धिं आकट्टितुं न सक्कोति, पवत्ते वेदनीयं पन होति । “याथावकवत्थुविभावना पज्जा”ति एत्थ यो पञ्चन्नं विज्जाणानं यथावुत्तो न हेतुकट्ठो, अहेतुकट्ठो...पे०... न सुपिनं पस्सन्टो, सो याथावट्ठो, तंतंयाथावत्थुं विभावतेतीति याथावकवत्थुविभावना पज्जा । एवं एकविधेन जाणवत्थूति एवं वुत्तेन एकेन पकारेन एकेन आकारेन, एककोट्ठासेन जाणवत्थु होतीति ।

एककं निड्ढितं ।

दुकेसु अत्थजापिकाति एत्थ अत्थपटिसम्भिदाविभङ्गे वुत्तेसु पञ्चसु अत्थेसु यथानुरूपं अत्थं जापेति जनेति पवत्तेतीति अत्थजापिका, चतुभूमककुसलचित्तेसु चेव असेखानं अभिज्जासमापत्तीनं परिकम्मादिभूतकामावचरकिरियाचित्तेसु च सम्पयुत्ता पज्जा । तासु हि यस्मा कुसलसम्पयुत्ताव पज्जा अत्तनो अत्तनो भूमिपरियापन्नं विपाकसङ्घातं अत्थं जापेति जनेति । कामावचरकिरियासम्पयुत्ता पन परिकम्मादिभूता अभिज्जासमापत्तिकिरिया अरहत्तफलसङ्घातं अत्थं जापेति जनेति, तस्मा एता अत्थजापिकाति वुत्ता । अट्ठकथासु पन पाळियं अवुत्तापि तीसु भूमीसु किरियजवनपज्जा अनन्तरादिपच्चयवसेन अत्तनो अनन्तरं किरियत्थं जापेतीति “अत्थजापिका”त्वेव वुत्ता । जापितत्था पज्जाति सहजातं विपाकत्थं जापेत्वा ठिता, अत्तनो वा कारणेहि जापिता जनिता पवत्तिता सयम्पि अत्थभूताति जापितत्था । चतुभूमकविपाकेसु च किरियाभिज्जासमापत्तीसु च सम्पयुत्ता पज्जा । अट्ठकथासु पन पाळियं अवुत्ता सेसकिरियासम्पयुत्तापि पज्जा यथासकं कारणेहि जापिता, सयञ्च अत्थभूताति “जापितत्था”त्वेव वुत्ता । सेसं सुविज्जेय्यमेव ।

दुकं निड्ढितं ।

तिकेसु पन चिन्तामयत्तिके परतो अदिस्वा असुत्वाव अत्तनो धम्मताय “एवं सति एवं भविस्सती”ति एवं चिन्तामयअनुबुद्धिया उप्पादिता अनवज्जकम्मायतनसिप्पायतनविज्जाद्वानेसु पज्जा चेव कम्मस्सकतजाणं, सच्चानुलोमिकजाणञ्च चिन्तामया नाम पज्जा । तत्थ वड्ढिककम्मपुप्फहुककम्मादि हीनज्चेव कसिवाणिज्जादि उक्कट्टञ्च कम्ममेव कम्मायतनं । नळकारपेसकारसिप्पादि हीनज्चेव मुद्दागणनालेखादि उक्कट्टञ्च सिप्पमेव सिप्पायतनं । नागमण्डलपरित्तादि धम्मिकविज्जाव विज्जाद्वानं । तेसु चिन्ताबलेनेव उप्पन्ना पज्जा । बोधिसत्तादयो हि सत्तहिताय

अदिदं असुतं तंतं अनवज्जकम्मसिप्पतदुपकरणकरणणकारञ्च जाणबलेन चिन्तेत्वा निष्फादेन्ति । नागमण्डलपरित्तादिविज्जम्पि उप्पादेन्ति, एवं कतानिपि तानि पुब्बे उग्गण्हित्वा करोन्तेहि कतसिप्पसदिसानेव होन्ति । **कम्मस्सकतजाणं** नाम कुसलकम्मं सत्तानं सकं, अकुसलं नो सकन्ति एवं जाननपज्जा । अथ वा कुसलकम्ममेव सत्तानं सकं तदायत्थवृत्तिताय, नाञ्जन्ति एवं जाननपज्जापि । **सच्चानुलोमिकं जाणन्ति** विपस्सनाजाणं । तं हि मग्गसच्चस्स परमत्थसच्चस्स अनुलोमनतो “सच्चानुलोमिक”न्ति वुच्चति । इदम्पि हि जाणद्वयं परतो असुत्वा चिन्ताबलेन उप्पादितं चिन्तामयजाणमेव होति । इदञ्च न येसं केसञ्चि सत्तानं उप्पज्जति, अभिज्जातानं पन पुज्जवन्तानं महासत्तानमेव उप्पज्जति । तथापि सच्चानुलोमिकजाणं पच्छिमभविकानं द्विन्नञ्जेव बोधिसत्तानं उप्पज्जतीति वेदितव्वं । **सुतमया पज्जाति** परतो सुत्वा सुतवसेन उप्पादिता यथावुत्तकम्मायतनादिपज्जाव । परतो असुत्वा पन कम्मायतनादि परेन कथिरमानं, कतं वा दिस्वा उग्गहेत्वा वा पटिलद्धापि पज्जा “सुतमया”त्वेव वुच्चति । तदुभयापि चिन्तामया, सुतमया च कामावचराव । **भावनामया** पन पज्जा चिन्तामयवसेन, सुतमयवसेन वा पवत्तितकामावचरपुब्बभागभावनानिष्फत्तिया समुप्पन्ना महग्गतलोकुत्तरजवनपज्जा ।

दानमयत्तिके देय्यधम्मपरिच्चागवसेन पवत्ता **दानमया**, सीलपूरणवसेन पवत्ता **सीलमया**, तदुभयापि कामावचराव । **भावनामया** पनेत्थ समथविपस्सनावसेन पवत्ता चतुभूमकपज्जा । निदेसे पनस्स किञ्चापि “समापन्नस्स पज्जा”ति (विभ० ७६८) एवं महग्गतलोकुत्तरपज्जाव वुत्ता, तथापि तं उक्कट्टवसेन वुत्तं । कामावचरानं पन पुब्बभागभावनां, अनुस्सतिउपचारभावनाञ्च भावनामये सङ्गहोति दट्टव्वं । पुरिमत्तिके पनेतासं चिन्तामये सङ्गहितत्ता भावनामये असङ्गहो, तथापि भावनाबलनिष्फन्नानमेव सङ्गहो दट्टव्वो ।

अधिसीलत्तिके पातिमोक्खसंवरसीलं विपस्सनाहेतुत्ता सेससीलतो अधिकं सीलन्ति अधिसीलं, तस्मिं सम्पयुत्ता पज्जा **अधिसीले पज्जा** । विपस्सनापादिका पन अट्ट समापत्तियो सेसचित्तेहि अधिकत्ता अधिचित्तं, तस्मिं पज्जा **अधिचित्ते पज्जा**, चित्तसीसेन चेत्य समाधि निद्विडो । सविपस्सना पन मग्गफलपज्जा सेसाहि अधिकत्ता अधिपज्जा नाम । सा च अधिपज्जाय पज्जाति देसनाय समरसताय वुत्ता । सीलादयो “सीलं चित्तं पज्जा, अधिसीलं अधिचित्तं अधिपज्जा”ति पच्चेकं दुविधा होन्ति । तेसु पुरिमा पञ्चसीलदससीलानि, वट्टपादिकअट्टसमापत्तियो, निब्बेधभागियकम्मस्सकतपज्जा च यथाक्कमं होन्ति । ते च धम्मा अनुप्पन्नेपि तथागते बोधिसत्तानं, तापसपरिब्बाजकानं, चक्कवत्तिराजादीनञ्च काले पवत्तन्ति, पच्छिमा पन वुत्तावसेसा उप्पन्ने एव तथागते वित्थारिका होन्ति, नो अनुप्पन्नेति वेदितव्वो । एत्थ च रतनत्तये दानापचायनादिवसेन, सरणगमनसद्धम्मसवनादिवसेन च पवत्ता विवट्टूपनिस्सयभूता कुसलधम्मापि अधिसीलअधिपज्जासु गहिता एवाति गहेतव्व्वा ।

आयकोसल्लत्तिके **आयो**ति वट्ठि, सा अकुसलादिअनत्थहानितो, कुसलादिअत्थुप्पत्तितो च दुविधा । **अपायो**ति अवट्ठि, सापि कुसलादिअत्थहानितो, अकुसलादिअनत्थुप्पत्तितो च दुविधा । तेसु कोसल्लं, कुसलसभावा पज्जा । अपायकोसल्लं पज्जवतो एव “एवं मनसिकारादिप्पवत्तियं अवट्ठि उप्पज्जति, वट्ठि परिहायती”ति जत्त्वा तदुभयपटिपत्तिसम्भवतो । **उपायकोसल्लन्ति** अत्र उपायो अच्चायिककिच्चादीसु ठानुप्पत्तिकउपायजाननपज्जा, तिबिधापि चेता कामावचरपज्जाति वेदितव्व्वा । सेसं सुविज्जेय्यमेव ।

तिकं निद्वित्तं ।

चतुक्केसु पन पठमे **कम्मस्सकतजाणं सच्चानुलोमिकं जाणञ्च** वुत्तमेव, इध पन ठपेत्वा सच्चानुलोमिकजाणं सब्बापि सासवा कुसला पज्जा कम्मस्सकतजाणन्ति वेदितव्वं । चतूसु मग्गोसु, फलेसु च पज्जाव मग्गसमङ्गिस्स जाणं, फलसमङ्गिस्स जाणञ्चाति ।

सच्चचतुक्के अरियमग्गफलपज्जाव चतूसु सच्चेसु एकपटिवेधवसेन “दुक्खे जाण”न्तिआदिना चतूसु ठानेसु गहिता । किञ्चापि हि कामावचरजाणम्पि चतूसु सच्चेसु आरम्मणवसेन पवत्तति, पटिवेधकिच्चवसेन पन इधाधिप्पेतत्ता पाळियं तं न गहितन्ति वेदितव्वं ।

धम्मचतुक्के मग्गफलेसु पज्जा **धम्मे जाणं** नाम । तेसु हि मग्गजाणं ताव चतुसच्चधम्मानं एकपटिवेधवसेन जाननतो “धम्मे जाण”न्ति वुच्चति । फलजाणं पन निरोधसच्चवसेन **धम्मे जाणन्ति** वेदितव्वं । मग्गानुभावनिब्वत्तं पन अतीतानागतेसु सच्चपटिवेधनयसङ्गहणवसेन पवत्तं पच्चवेक्खणजाणं **अन्वये जाणं** नाम । तस्स च येहि नयेहि अरिया अतीतमद्धानं चतुसच्चधम्मं जानिंसु, तेपि इमञ्जेव चतुसच्चं एवमेव जानिंसु, अनागतमद्धानम्पि जानिस्सन्तीति एवं जाननवसेन पवत्ति आकारो वेदितव्वो । सरागादिवसेन परचित्तपरिच्छेदजाणं **परिये जाणं** नाम । धम्मन्वयपरियजाणानि पन ठपेत्वा सब्बलोकियपज्जाजाणन्ति सम्मतत्ता सम्मुतिमहि जाणन्ति **सम्मुतिजाणं** नाम ।

आचयचतुक्के कामावचरकुसले पज्जा **आचयाय नो अपचयाय** । सा हि चुतिपटिसन्धिं आचिनोति एव, नो अपचिनोति । मग्गपज्जा पन **अपचयाय नो आचयाय** । रूपारूपकुसलपज्जा **आचयाय चेव अपचयाय च** । सा हि विक्खम्भनवसेन किलेसे च तम्मूलके च विपाकधम्मे अपचिनोति । सेसा अब्याकता पज्जा **नेवाचयाय नो अपचयाय** ।

निब्बिदाचतुक्के रूपावचरपठमज्ज्ञानपज्जा **निब्बिदाय नो पटिवेधाय** । सा हि कामविवेकेन पत्तव्वत्ता किलेसनिब्बिदाय पवत्तति, अभिज्जापादकभावं पन अपत्तताय नेवाभिज्जापटिवेधाय संवत्तति । चतुत्थज्ज्ञानपज्जा **पटिवेधाय नो निब्बिदाय** । सा हि अभिज्जापादकभावनापि

अभिज्ञाभावप्राप्तिरपि पटिवेधाय संवत्तति । पठमज्झानक्खणे एव नीवरणनिब्बिन्दनत्ता नो निब्बिदाय । दुतियततियज्झानपञ्जा पन सोमनस्ससहगतताय पठमज्झानसन्निस्सिता वा अवितक्कताय चतुत्थज्झानसन्निस्सिता वा कातब्बा । मग्गपञ्जा पन निब्बिदाय चेव पटिवेधाय च । एत्थ हि चतुसच्चपटिवेधवसेन निब्बिदाय चेवेतासं छळभिज्ञाप्राप्तिरपि पटिवेधाय च संवत्तनं वेदितव्वं । सेसा लोकियलोकुत्तरा पञ्जा नेव निब्बिदाय नो पटिवेधाय ।

हानभागियचतुक्के हानं भजतीति हानभागिनी, एवं सेसेसुपि । निब्बेधोति चेत्थ अरियमग्गो तन्निब्बत्तकविपस्सनापादकत्ता । निब्बेधभागिनीति चतुसुपि ठानेसु रूपारूपकुसलपञ्जाव वुत्ता । तानि हि अत्तनो सभावा परिहायित्वा हेट्ठा ओरोहणपच्चयभूता हानभागिनी । उपनिज्झानपच्चयभूता विसेसभागिनी, तं पन ज्ञाननिकन्तिर्या बलवताय विसेसं, हानिं वा अनुस्सुक्कित्वा ठितिकोट्टासिका ठितिभागिनी, अरियमग्गपदद्वानविपस्सनापादकभूताव निब्बेधभागिनी च होन्तीति वेदितव्वा ।

चतस्सो पटिसम्भिदाति अत्थधम्मनिरुत्तिपटिभानपटिसम्भिदाव । चतस्सो पटिपदाति दुक्खापटिपदादन्धाभिज्ञादयो हेट्ठा वुत्ताव । चत्तारि आरम्माणानीति परिता, परित्तरम्मणातिआदिका हेट्ठा वुत्तनयाव । जरामरणादिचतुक्केसुपि मग्गजाणवसेनेव चतस्सो योजना वुत्ता । सेसं सुविज्जेय्यमेव ।

चतुक्कं निट्ठितं ।

पञ्चकेसु पन पञ्चङ्गिको सम्मासमाधीति पीतिफरणता सुखफरणता चेतोफरणता आलोकफरणता पच्चवेक्खणनिमित्तन्ति एवं पाळियं वुत्तेहि पञ्चहि जाणङ्गेहि समन्नागतो समाधि । तत्थ पीतिं फरमाना उपपज्जतीति द्वीसु ज्ञानेसु पञ्जा पीतिफरणता नाम, सुखं फरमाना उपपज्जतीति तीसु ज्ञानेसु पञ्जा सुखफरणता नाम । परेसं चेतोफरमाना उपपज्जतीति चेतोपरियजाणं चेतोफरणता नाम । आलोकफरणे उपपज्जतीति दिब्बचक्खुजाणं आलोकफरणता नाम । पच्चवेक्खणजाणं पच्चवेक्खणनिमित्तं नाम । एत्थ च पीतिफरणता, सुखफरणता च द्वे पादा विय, चेतोफरणता, आलोकफरणता च द्वे हत्था विय, पच्चवेक्खणनिमित्तं सीसं विय, अभिज्ञापादकज्झानं मज्झिमकायो विय । इति भग्वा पञ्चङ्गिकं सम्मासमाधिं अङ्गपच्चङ्गसम्पन्नं पुरिसं विय कत्वा दस्सेति । इमिना च समाधिना अङ्गानि पञ्च जाणङ्गानि वुत्तानीति वेदितव्वानि ।

पञ्चजाणिको सम्मासमाधीति —

“अयं समाधि पच्चुप्पन्नसुखो चेव आयतिज्ज सुखविपाको”ति पच्चत्तज्जेव जाणं उपपज्जति, ‘अयं समाधि अरियो निरामिसो’ति...पे०... ‘महापुरिससेवितो’ति...पे०... ‘सन्तो पणीतो पटिपस्सद्धिलद्धो एकोदिभावाधिगतो न ससङ्खारनिगग्रहवारितगतो’ति...पे०... ‘सो खो पनाहं इमं समाधिं सतोव समापज्जामि, सतो वुट्ठहामी’ति पच्चत्तज्जेव जाणं उपपज्जती”ति (विभ० ८०४) —

एवं पाळियं वुत्तेहि पञ्चहि पच्चवेक्खणजाणेहि युत्तो अरहत्तफलसङ्गातो समापत्तिफलसमाधि । सो एवं हि अप्पितप्पितक्खणे सुखत्ता पच्चुप्पन्नसुखो, पुरिमो पुरिमो पच्छिमस्स पच्छिमस्स समाधिसुखस्स चेव अत्तना समुट्ठापितम्पि पणीतरूपेन फुट्ठसकलकायताय फलसमापत्तितो वुट्ठितकाले अतिपणीतं कार्यविज्ञाणसुखस्स पच्चयत्ता आयति सुखविपाको उपपज्जति, इमिनापि परियायेन आयति सुखविपाकोति एकं अङ्गं, किलेसेहि आरक्कता अरियो कामामिसवट्ठामिसलोकाभिसानं अभावा निरामिसोति एकं, बुद्धादीहि महापुरिसेहि सेवितत्ता अकापुरिससेविसोति एकं, अङ्गारम्मणे सन्तताय, सब्बकिलेसदरथसन्तताय च सन्तो अतप्पनीयट्ठेन पणीतो किलेसपटिपस्सद्धिभावस्स लद्धत्ता पटिपस्सद्धिलद्धो एकोदिभावेन च अधिगतो अप्पगुणसासवसमाधि विय ससङ्खारेन सप्पयोगेन पच्चनीकधम्मे निगग्रह किलेसे वारेत्वा अनधिगतत्ता न ससङ्खारनिगग्रहवारितगतो । पुग्गलस्सायं समाधीति एवं खीणासवस्स सतिवेपुल्लप्पत्तिर्या यथापरिच्छिन्नकालवसेन इमं समाधिं सतोव समापज्जति, उट्ठहति चाति एकमङ्गन्ति इमेहि पञ्चहि अङ्गेहि सब्बाकारतो युत्तत्ता “पञ्चजाणिको सम्मासमाधी”ति वुच्चति ।

पञ्चकं निट्ठितं ।

छक्के छसु अभिज्ञासु पञ्जाति इद्धिविधे जाणं, दिब्बसोतधातुया जाणं, चेतोपरिये जाणं, पुब्बेनिवासानुस्सतियं जाणं, चुतूपपाते जाणं, आसवानं खये जाणन्ति एवं वुत्तानि छळभिज्ञाचित्तसम्पयुत्तानि जाणानि । तेसु पच्छिमं लोकुत्तरं, सेसानि रूपावचरपच्चमज्झानिकानीति ।

छक्कं निट्ठितं ।

सत्तके सत्तसत्तति जाणवत्थूनीति “अविज्जापच्चया सङ्खारा”ति पच्चवेक्खणजाणं एकं, “असति अविज्जाय नत्थि सङ्खारा”ति एकन्ति द्वे जाणानि, एवं अतीतेपि द्वे, अनागतेपि द्वेति छ, तं छब्बिधम्पि जाणं “खयधम्म”न्तिआदिना पच्चवेक्खणजाणेन सद्धि सत्त जाणानि । एवं सेसेसुपि जातिपरियोसानेसु चाति एवं एकादससु पटिच्चसमुप्पादङ्गेसु पच्चकं कालत्तयेपि अन्वयव्यतिरेकजाणं तेसं वयदस्सनजाणस्स च वसेन सत्त सत्त कत्वा सत्तसत्तति जाणानि ।

सत्तकं निद्रितं ।

अट्टकं सुविज्जेयमेव ।

नवके नवसु अनुपुब्बविहारसमापत्तीसु पञ्जाति निरोधसमापत्तिं समापज्जन्तस्स अनुपटिपाटिया विहातब्बतो उप्पादेतब्बतो अनुपुब्बविहारसङ्घातासु रूपारूपसमापत्तीसु सम्पयुत्ता अट्ट पञ्जा चेव तदनन्तरं निरोधं फुसित्वा वुट्ठितस्स निरोधं सन्ततो पच्चवेक्खणजाणञ्चाति नव ।

नवकं निद्रितं ।

दसके तथागतस्साति यथा विपस्सीआदयो पुब्बका इसयो आगता, तथा आगतस्स सम्मासम्बुद्धस्स । तथागतबलानीति अज्जेहि असाधारणानि तथागतस्सेव बलानि, यथा वा पुब्बबुद्धानं बलानि पुञ्जस्सयसम्पत्तिया आगतानि, तथा आगतानि बलानीतिपि अत्थो । तत्थ दुविधं तथागतस्स बलं कायबलं, जाणबलञ्च । तेसु कायबलं हत्थिकुलानुसारेण वेदितव्वं । वुत्तं हेतं पोरणेहि —

“काळावकञ्च गङ्गेय्यं, पण्डरं तम्बपिङ्गलं ।

गन्धमङ्गलहेमञ्च, उपोसथछदन्तिमे दसा”ति ॥ (विभ० अट्ट० ७६०; म० नि० अट्ट० १.१४८; सं० नि० अट्ट० २.२.२२; अ० नि० १०.२१; उदा० अट्ट० ७५; बु० वं० अट्ट० १.३९; पटि० म० अट्ट० २.२.४४; चूलनि० अट्ट० ८१) ।

इमानि हि दस हत्थिकुलानि । तत्थ काळावकन्ति पकतिहत्थिकुलं, यं दसन्नं पुरिसानं कायबलं, तं एकस्स काळावकहत्थिनो बलं, यं तेसं दसन्नं बलं, तं एकस्स गङ्गेय्यस्स, तेसं दसन्नं पण्डरस्स, तेसं दसन्नं तम्बस्स, तेसं दसन्नं पिङ्गलस्स, तेसं दसन्नं गन्धहत्थिनो, तेसं दसन्नं मङ्गलस्स, तेसं दसन्नं हेमस्स, तेसं दसन्नं उपोसथस्स, तेसं दसन्नं बलं छदन्तस्स, यं दसन्नं छदन्तानं बलं, तं तथागतस्स नारायणबलन्ति वुच्चति । तदेतं पकतिहत्थिगणनाय हत्थीनं कोटिसहस्सं, पुरिसगणनाय दसन्नं पुरिसकोटिसहस्सानं बलं होति । इदं ताव तथागतस्स कायबलं । यानि पन दसबलचतुवेसारज्जादीनि अनेकानि जाणसहस्सानि, एतं जाणबलं नाम । इधापि जाणबलमेव अधिप्पेतं । जाणज्झि अकम्पियट्ठेन, उपत्थम्भनट्ठेन च बलन्ति वुत्तं ।

येहि बलेहि समन्नागतोति येहि दसहि जाणबलेहि उपेतो । आसभण्ठानन्ति सेट्ठानां । अपिच गवसतजेट्ठको उसभो, गवसहस्सजेट्ठको वसभो । वजसतजेट्ठको वा उसभो, वजसहस्सजेट्ठको वसभो, सब्बगवसेट्ठो निसभो, सेतो पासादिको महाभारवहो सब्बपरिस्सयसहो असनिसतसद्देहिपि अकम्पनीयो निसभो, सो इध उसभोति अधिप्पेतो । इदम्पि हि तस्स परियायवचनं । उसभस्स इदन्ति आसभं । ठानन्ति तस्स निसभबलसमन्नागतस्स चतूहि पादेहि पथविं उप्पीळेत्वा अचलट्ठानं, इदं पन आसभं वियाति आसभं । यथेव हि निसभसङ्घातो उसभो उसभबलेन समन्नागतो चतूहि पादेहि पथविं उप्पीळेत्वा अचलट्ठानेन तिट्ठति, एवं तथागतोपि हि दसबलसमन्नागतो चतुवेसारज्जपादेहि अट्ठपरिसपथविं उप्पीळेत्वा सदेवके लोके केनचि अप्पधंसियो अचलेन ठानेन तिट्ठति, तज्जेस पटिजानाति उपगच्छति न पच्चक्खाति अत्तनि आरोपेति, तेन वुत्तं “आसभं ठानं पटिजानाती”ति (विभ० ७६०) ।

परिसासूति अट्ठसु परिसासु । सीहनादं नदतीति सेट्ठनादं अभीतनादं, सीहनादसदिसं वा नादं नदति । अयमत्थो सीहनादसुत्तेन दीपेतब्बो । यथा वा सीहो सहनतो च हननतो च “सीहो”ति वुच्चति, एवं तथागतोपि लोकधम्मानं सहनतो, परप्पवादानञ्च हननतो “सीहो”ति वुच्चति, तस्स नादं नदति ।

ब्रह्मचक्कन्तिआदीसु ब्रह्मन्ति उत्तमं विसुद्धं । चक्क-सदो पनायं “चत्तारिमानि, भिक्खवे, चक्कानि, येहि समन्नागतानं देवमनुस्सान”न्तिआदीसु (अ० नि० ४.३१) सम्पत्तियं दिस्सति । “पादतलेसु चक्कानि जातानी”तिआदीसु (दी० नि० २.३५; ३.२०४; म० नि० २.३८६) लक्खणे । “चक्कं वहतो पद”न्ति (ध० प० १) एत्थ रथङ्गे । “चतुचक्कं नवद्वार”न्ति (सं० नि० १.२९) एत्थ इरियापथे । “चक्कं पवत्तय सब्बपाणिन”न्ति (जा० १.७.१४९) एत्थ दाने । “दिब्बं चक्करतनं पातुरहोसी”ति (दी० नि० ३.८५) एत्थ रतनचक्के । “इच्छाहतस्स पोसस्स, चक्कं भमति मत्थके”ति (जा० १.१.१०४; १.५.१०३) एत्थ उरचक्के । “खुरपरियन्तेन चेपि चक्केना”ति (दी० नि० १.१६६) एत्थ पहरणचक्के । “असनचक्क”न्ति (दी० नि० ३.६१; सं० नि० २.१६२) एत्थ असनिमण्डले । “मया पवत्तितं चक्क”न्ति (सु० नि० ५६२) एत्थ धम्मचक्के । इध पन धम्मचक्के पवत्तति ।

धम्मचक्कञ्च दुविधं होति पटिवेधजाणञ्च देसनाजाणञ्च । तत्थ पञ्जापभावितं अत्तनो अरियफलावहं लोकुत्तरं पटिवेधजाणं, करुणापभावितं सावकानं अरियफलावहं कामावचरं देसनाजाणं, उभयम्पि पनेतं अज्जेहि असाधारणं बुद्धानज्जेव ओरसजाणं, तं पवत्तेति उप्पादेति विभावेति वित्थारिकं करोतीति अत्थो ।

इदानीं यानि दस जाणानि आदितो “तथागतबलानी”ति निक्खित्तानि, तानि वित्थारेतुं “कतमानि दस? इध तथागतो”तिआदिमाह । तत्थ ठानञ्च ठानतोति कारणञ्च कारणतो । कारणं हि यस्मा तत्थ फलं तिट्ठति तदायत्तवुत्तिताय उप्पज्जति चेव पवत्तति च, तस्मा ठानन्ति वुच्चति । अट्ठानञ्च अट्ठानतोति अकारणञ्च अकारणतो । यम्पीति येन जाणेन यथाभूतं पजानाति, इदम्पि ठानाठानजाणं तथागतस्स तथागतबलं नाम होतीति अत्थो । एवं उपरिपि सब्बत्थ योजना वेदितव्वा । कथं पनेत्थ भगवा ठानञ्च ठानतो, अट्ठानञ्च अट्ठानतो यथाभूतं पजानातीति? अट्ठानमेतं अनवकासो, यं दिट्ठिसम्पन्नो



पुगलो कञ्चि सङ्खारं निच्यतो उपगच्छेय्य...पे०... कञ्चि धम्मं अत्ततो उपगच्छेय्य, मातरं जीविता वोरोपेय्य, पितरं...पे०... अरहन्तं जीविता वोरोपेय्य, पदुङ्गचित्तेन तथागतस्स लोहितं उपादेय्य, सङ्खं भिन्देय्य, अञ्जं सत्थारं उद्दिसेय्य, अट्ठमं भवं निब्बत्तेय्य, नेतं ठानं विज्जति, पुथुज्जनो पनेतं सब्बं करेय्याति ठानमेतं विज्जतीति पजानाति, तथा यं एकस्सा लोकधातुया द्वे अरहन्तो सम्मासम्बुद्धा अपुब्बं अचरिमं उप्पज्जेय्युं, तथा द्वे राजानो चक्कवत्ती उप्पज्जेय्युं, नेतं ठानं विज्जति, एको पन उप्पज्जति, ठानमेतं विज्जतीति पजानाति, तथा यं कायदुच्चरितादीनं तिण्णं दुच्चरितानं इट्ठो विपाको, सुचरितानञ्च अनिट्ठो विपाको निब्बत्तेय्याति नेतं ठानं विज्जति, तब्बिपरीतो पन नेसं विपाको निब्बत्तेय्याति ठानमेतं विज्जतीति, ये ये धम्मा येसं येसं धम्मानं हेतू पच्चया उपादाय, तं तं ठानं, इतरे अट्ठानन्ति यथाभूतं पजानाति, एत्थ पनायं सङ्खेपतो अट्ठकथाविनिच्छयो । “सुखतो उपगच्छेय्या”ति इदं “एकन्तसुखी अत्ता”तिआदिना (म० नि० ३.२७) दिट्ठिविपल्लासवसेन सुखतो गाहं सन्धाय वुत्तं, सञ्जाचित्तविपल्लासवसेन पन अरियसावकोपि किलेसपरिळाहाभिभूतो मत्तहत्थिपरितासितो विय, सुचिकामो गूथकूपं विय कञ्चि सङ्खारं सुखतो उपगच्छति, अत्ततो उपगमनवारे कसिणादिपण्णत्तिया, निब्बानस्स च सङ्गणहनत्थं “सङ्खार”न्ति अवत्वा “कञ्चि धम्म”न्ति वुत्तं ।

मातरन्तिआदीसु किञ्चापि अरियसावको सीसच्छेदं पापुणन्तोपि कुन्थकिपिल्लिकं उपादाय पाणातिपातं, अदिन्नादानादीसु वा यंकिञ्चि दुच्चरितं अपायहेतुभूतं कातुं भवन्तरेपि न सक्कोति, पुथुज्जनभावस्स पन महासावज्जतादस्सनत्थमेत्थ पञ्चानन्तरियानेव उद्धटानि । सावज्जो हि पुथुज्जनभावो, यत्र हि नाम आनन्तरियानिपि करिस्सतीति । एत्थ च मनुस्सभूतस्सेव मनुस्सभूतं जनिकं मातरं, पितरं वा अपि परिवत्तलिङ्गं जीविता वोरोपेत्तस्स कम्मं आनन्तरियं होति । तिरच्छानभूतं पन मातरं, पितरं वा सयं वा तिरच्छानभूतो मनुस्सभूतं, तिरच्छानभूतं वा जीविता वोरोपेत्तो आनन्तरियं न फुसति, कम्मं पन भारियं, आनन्तरियं आहच्चेव तिट्ठति । अरहन्तम्पि मनुस्सभूतमेव घातेन्तो आनन्तरियं फुसति । तस्स च पुथुज्जनकाले पहारं दत्त्वा अरहत्तं पत्वा तस्मिं तेनेव रोगेन मतेपि अरहन्तघातको होति, न यक्खभूतं अरहन्तं, सेसअरियपुग्गले वा मनुस्सभूतेपि घातेन्तो, कम्मं पन आनन्तरियसदिसं होति । यं पन पुथुज्जनकाले दिन्नं दानं अरहत्तं पत्वा परिभुज्जति, पुथुज्जनस्सेव तं दिन्नं होति, सेसअरियपुग्गले मारेन्तस्स आनन्तरियं नत्थि, कम्मं पन गरुकं होति । एत्थ च एळकादिचतुक्कं वेदितब्बं — “एळकं मारेमी”ति हि अभिसन्धिना एळकट्टाने निपन्नं मातरं, पितरं, अरहन्तं वा मारेन्तो आनन्तरियं फुसति, एळकाभिसन्धिना वा मातादिअभिसन्धिना वा एळकं मारेन्तो आनन्तरियं न फुसति, मातादिअभिसन्धिना ते एव मारेन्तो फुसतेव । एस नयो चोरचतुक्कादीसुपि ।

लोहितुप्पादे तथागतस्स अभेज्जकायताय कुब्बचित्तस्स परस्स उपक्कमेन चम्मच्छेदो, लोहितपग्घरणं वा नत्थि, देवदत्तेन पन पविद्धसिलतो भिज्जित्वा गतसक्खलिकप्पहारेन विय सरीरस्स अन्तोयेव एकस्मिं ठाने यथा खुद्धिकमक्खिकापिवनमत्तम्पि लोहितं विसमं समोसरति, तथा करोन्तस्स आनन्तरियं होति, न पन जीवकस्सेव मुदुचित्तेन दुट्ठलोहितं नीहरित्वा फासुकं करोन्तस्स, पुज्जमेव पनस्स होति, परिनिब्बुते भगवति चेतियं भिन्दन्तस्स, बोधिं छिन्दन्तस्स, धातुसु उपक्कमन्तस्स च आनन्तरियं न होति, कम्मं पन आनन्तरियसदिसं होति । बोधिरुक्खस्स पन थूपं वा सधातुकं पटिमं वा बाध्यमानं साखं, चेतियवत्थुं भिन्दित्वा गच्छन्तं बोधिमूलञ्च छिन्दित्वा हरितुं वट्टति । सचेपि साखाय निलीना सकुणा चेतिये वच्चं पातेन्ति, छिन्दितुं वट्टति । परिभोगचेतियतो हि सरीरचेतियमेव महन्ततरं । धातुनिधानरहितं पटिमाघरं वा बोधिघरं वा बाधेन्तं साखं छिन्दितुं न वट्टति, ओजोहरणसाखं, पनस्स पूतिट्ठानं वा छिन्दितुं वट्टति, सरीरपटिजग्गने विय पुज्जमेव होति ।

सङ्खभेदे समानसंवाससीमाय समानसंवासके सङ्खे एकतो ठिते विसुं वग्गसङ्खं गहेत्वा पञ्चहि कारणेहि सङ्खं भिन्दन्तस्स सङ्खभेदो होति आनन्तरियकम्मञ्च । वुत्तं हेतं “पञ्चहि, उपालि, आकारेहि सङ्खो भिज्जति । कतमेहि पञ्चहि? कम्मेन उद्देसेन वोहरन्तो अनुस्सावनेन सलाकग्गाहेना”ति (परि० ४५८) । तत्थ कम्मेनाति अपलोकनादीसु चतूसु अज्जतरेन कम्मेन । उद्देसेनाति पातिमोक्खुद्देसेन । वोहरन्तो कथयन्तो ताहि ताहि उपपत्तीहि “अधम्मं धम्मो”तिआदीनि अट्ठारस भेदकरवत्थूनि दीपेन्तो । अनुस्सावनेनाति “ननु तुम्हे जानाथ मय्हं बहुस्सुतादिभावं, कथं हि नाम मादिसो उद्धम्मं उब्बिनयं सत्थुसासनं गाहेय्य, किमहं अपायतो न भायामी”तिआदिना नयेन कण्णमूले वचीभेदं कत्वा अनुस्सावनेन । सलाकग्गाहेनाति एवं वोहारानुस्सावनेहि तेसं चित्तं उपत्थम्भेत्वा अनिवत्तिधम्मं कत्वा “गण्हथ इमं सलाक”न्ति सलाकग्गाहेन ।

एत्थ च कम्ममेव उद्देसो वा पमाणं, वोहारानुस्सावनसलाकग्गाहा पन पुब्बभागा । तेसु निप्फन्नेसुपि अभिन्नोव होति सङ्खो । यदा पन वोहारानुस्सावनेहि चत्तारो वा अतिरेके वा भिक्खू सलाकं गाहेत्वा वग्गं सङ्खं गहेत्वा विसुं कम्मं वा उद्देसं वा करोति, तदा सङ्खो भिन्नो नाम होति । अभेदपुरेक्खारस्स पन समग्गसज्जाय वट्टति । समग्गसज्जाय हि करोन्तस्स नेव भेदो होति, न आनन्तरियं, तथा ततो ऊनपरिसाय करोन्तस्स । वुत्तं हेतं “एकतो, उपालि, चत्तारो होन्ति एकतो चत्तारो, नवमो अनुस्सावेत्ती”तिआदि (चूळव० ३५१) ।

इमेसु पन पञ्चसु आनन्तरियेसु सङ्खभेदो वचीकम्मं, सेसानि कायकम्मानि, सब्बानेव खो तानि कायद्वारतोपि वचीद्वारतोपि समुट्ठहन्ति । सङ्खभेदोपि हि हत्थमुद्दाय भेदं करोन्तस्स कायद्वारतोपि समुट्ठाति, सङ्खभेदो चेत्थ कप्पट्ठितियो । कप्पविनासे एव हि सङ्खभेदतो मुच्चति, सेसानं पन तथा नियमो नत्थि । येन च पञ्चपेतानि कम्मानि कतानि होन्ति, तस्स सङ्खभेदोव निरये विपच्चति, सेसानि “अहोसि कम्मं नाहोसि कम्मविपाको”ति एवमादीसु सङ्खं गच्छन्ति । सङ्खभेदाभावे लोहितुप्पादो, तदभावे अरहन्तघातो, तदभावे मातुघातो, पितुघातो वा, तस्मिम्पि सीलसम्पन्नतरे । पुरिमानि चेत्थ चत्तारि सब्बेसं गहट्ठपब्बजितानं साधारणानि, सङ्खभेदो पन पकतत्तस्स भिक्खुनोव, असाधारणो अज्जेसं, भिक्खुनीपि हि सङ्खं न भिन्दति, पगेव इतरे । पञ्चपि चेतानि

दुक्खवेदनासम्पयुतानि, दोसमूलानि चाति वेदितव्वानि ।

**अट्टमं भवं निब्बत्ते**त्याति एत्थ अरियसावकस्स अट्टमभवागहणं केन नियमितन्ति? विपरसनाय । यस्स हि सा तिकखा, सो एकं एव भवं निब्बत्तित्वा अरहत्तं पत्वा **एकवीजी** नाम होति । यस्स मन्दा, सो दुतिये...पे... छट्ठे वा भवे अरहत्तं पत्वा **कोलंकोलो** नाम होति । यस्स पन अतिमन्दा, सो सत्तमं भवं नातिक्कमति, तत्थ नियमेन अरहत्तं पापुणित्वा **सत्तक्खत्तुपरमो** नाम होति । सचेपि हिस्स सत्तमे भवे निदं ओक्कन्तस्स मत्थके असनि वा पब्बतकूटो वा पतेय्य, तस्मिम्पि काले अरहत्तं पत्वाव परिनिब्बाति । उत्तमकोटिया हि सत्तमभवानतिक्कमनञ्जेव सन्धायेव “नियतो सम्बोधिपरायणो”ति (म० नि० १.६६; २.१६९; सं० नि० ५.९९८) वुत्तोति ।

**एकस्सा लोकधातुया द्वे अरहन्तो सम्मासम्बुद्धा**तिआदीसु दससहस्सचक्कवाळसङ्कातं जातिखेत्तं एका लोकधातु नाम आणाविसयखेत्तेसु बुद्धुप्पत्तिसङ्काय एवाभावतो । तत्थ द्विन्नं बुद्धानं उप्पत्तिपटिसेधं अकत्वा जातिखेत्ते एव कतो । ठपेत्वा इमं चक्कवाळं अञ्जस्मिं चक्कवाळे बुद्धा न उप्पज्जन्ति बुद्धत्तहेतून् अनादिबुद्धपरम्परादीन् तथाभावा । ततो एव हि सत्ता निरवसेसतो निब्बुत्तिं न पापुणन्ति । यदि हि सब्बचक्कवाळेसु बुद्धा उप्पज्जेय्युं, सब्बे सत्ता इतो पुब्बे निरवसेसतो निब्बुत्तिं पापुणेय्युं, न च तं अत्थि, तस्मा अनादिबुद्धपरम्पराय विवट्टूपनिस्सयसम्पन्नानं निवासभूते इमस्मिं चक्कवाळे एव उप्पज्जन्तीति वेदितव्वा । ते चेत्यापि दुल्लभा, तेसं दुल्लभत्ता एवेत्थ कप्पानं असङ्ख्येय्यमि बुद्धुप्पादरहितं होति । यदि च ते सुलभा भवेय्युं, एकस्मिं विवट्टुट्ठायिअसङ्ख्येय्ये चतुसङ्ख्येय्ये बुद्धानमि उप्पज्जितुं सक्का भवेय्य अन्तरकप्पस्स बुद्धन्तरत्ता । भद्दकप्पेसु चेत्य पञ्च बुद्धा एव उप्पज्जन्ति । कथं पनेत्थापि दुल्लभतरा चक्कवाळन्तरेसु उप्पज्जेय्युं, बुद्धानञ्च दुल्लभता कारणदुल्लभताय, तस्मा इमस्मिञ्जेव चक्कवाळे बुद्धा उप्पज्जन्ति? एत्थापि न देवब्रह्मलोकेसु, मनुस्सलोके एव पन उप्पज्जन्ति एत्थेव सब्बसो तिबिधसद्दम्माधारस्स सङ्करतनस्स पातुभावतो, इतरलोकेसु निरवसेसतो पकारासम्भवतो च ।

यदि हि बुद्धा देवलोकादीसु उप्पज्जेय्युं, मनुस्सा भयेन उपसङ्कमितुमेव न सक्कोन्ति, पणोव धम्मसवनपब्बज्जादिं कातुं, तेनेव अम्हाकं बोधिसत्तो अत्तनो रूपकायानुभावादिसम्पत्तिया उप्पन्नमनुस्ससङ्काकुतूहलं जनं निज्झापेतुं उत्तानसेय्यकादिनियामेन वड्ढित्वा दारपरिग्गहादिं अकासि, एवं कत्वा पब्बजितमि नं राजगहे पिण्डाय पविसित्वा पण्डवपब्बतपस्से निसीदित्वा पिण्डपातं परिभुज्जन्तं बिम्बिसारो नानप्पकारतो मनुस्सभावं विचिन्तित्वा उपसङ्कमितुं विसहि, नो अञ्जथा । लोकनित्थारणत्थाय हि बुद्धा उप्पज्जन्ति, न अत्तनो सक्कारादिअत्थाय, तस्मा मनुस्सेसु एव उप्पज्जन्तीति वेदितव्वो । तत्थापि इमस्मिं जम्बुदीपे एव, तत्थापि इमस्मिं मज्झिमपदेसे एव । न केवलञ्च बुद्धाव, पच्चेकबुद्धा, अग्गसावकमहासावका च चक्कवत्तिआदयो च अञ्जेपि पुज्जवन्तसत्ता एत्थेव उप्पज्जन्ति ।

**अपुब्बं अचरिमन्ति** एत्थ मातुकुच्छिस्मिं पटिसन्धिगहणतो पुरे पुब्बं नाम, धातुअन्तरधानतो पच्छा चरिमं नाम, उभिन्नमन्तरा अपुब्बं अचरिमं नाम । एत्थन्तरे अञ्जस्स बुद्धस्स उप्पत्ति निवारिता, धातुअन्तरधाने पन जाते अञ्जस्स उप्पत्ति न निवारिता । किञ्चापि न निवारिता, अन्तरकप्पं पन खेपेत्वाव उप्पज्जन्तीति वेदितव्वं ।

पञ्च हि अन्तरधानानि नाम अधिगमअन्तरधानं पटिपत्तिअन्तरधानं परियत्तिअन्तरधानं लिङ्गअन्तरधानं धातुअन्तरधानन्ति । तत्थ अधिगमोति मग्गफलाभिज्जापटिसम्भिदायो, सो परिहायमानो पटिसम्भिदातो पट्टाय परिहायति । परिनिब्बानतो हि वस्ससहस्समेव पटिसम्भिदा निब्बत्तेतुं सक्कोन्ति, ततो परं अभिज्जा, तापि निब्बत्तेतुं असक्कोन्ता सुक्खविपरस्सकखीणासवा होन्ति, ततो अनागामिनो, ततो सकदागामिनो, सोतापन्ना च होन्ति, तेसु धरन्तेसुपि अधिगमो अनन्तरहितोव होति, पच्छिमकस्स पन सोतापन्नस्स जीवितक्खयेन अधिगमो अन्तरहितो नाम होति । इदं **अधिगमअन्तरधानं** ।

ततो मग्गफलानि निब्बत्तेतुं असक्कोन्ता “नत्थि दानि नो अरियधम्मपटिवेधो”ति ज्ञानविपरस्सनासु वोसानं आपज्जित्वा कोसज्जबहुला चतुपारिसुद्धिसीलमत्तं रक्खन्तो अञ्जमञ्जं न चोदेन्ति, न सारेन्ति, अकुक्कुच्चका होन्ति, ततो पट्टाय खुद्धानुखुद्दकानि मद्दन्ति, ततो गरुकापत्तिं आपज्जन्ति, पाराजिकमत्तमेव रक्खन्ति, तेसु धरन्तेसुपि पटिपत्ति अनन्तरहिताव होति, पच्छिमकस्स पन भिक्खुनो सीलभेदेन वा जीवितक्खयेन वा पटिपत्ति अन्तरहिता नाम होति । इदं **पटिपत्तिअन्तरधानं** नाम ।

परियत्तीति साट्ठकथं तेषिटकं बुद्धवचनं, गच्छन्ते गच्छन्ते काले अधम्मिकेहि कलियुगराजादीहि विपन्नसस्सादिसम्पत्तिताय पच्चयदायका दुग्गता होन्ति, भिक्खू च पच्चयेहि किलमन्ता अन्तेवासिके गहेतुं न सक्कोन्ति । ततो अट्ठकथा परिहायति, पाळिवसेनेव परियत्तिं धारेन्ति, ततो पाळिं सकलं धारेतुं न सक्कोन्ति, पठमं अधिधम्मपिटकं परिहायति, तञ्चस्स परिहायनं मत्थकतो पठाय । पठमेव हि महापकरणं परिहायति, ततो यमकं कथावत्थु पुग्गलपज्जति धातुकथा विभङ्गो धम्मसङ्गहो च अनुक्कमेन परिहायन्ति, ततो मत्थकतो पट्टाय सुत्तन्तपिटकं परिहायति, पठमं हि अङ्गुत्तरनिकायो एकादसकनिपाततो पट्टाय यावएककनिपाता परिहायति, ततो मत्थकतो पट्टाय संयुत्तनिकायो, पठमं हि महावग्गो परिहायति, ततो सळायतनवग्गो खन्धकवग्गो निदानवग्गो सगाथावग्गोति, एवं मज्झिमनिकायदीघनिकायादयो च मत्थकतो पट्टाय परिहायन्ति, ततो विनयपिटकमेव तिड्ढति, तस्मि परिवारतो पट्टाय याव महाविभङ्गा परिहायति, ततो उपोसथक्खन्धकतो मातिकामत्तमेव धारेन्ति, तदापि याव चतुप्पदिकापि गाथा मनुस्सेसु पवत्तति, ताव परियत्ति अनन्तरहिताव होति, ताव अन्तरहिताय परियत्ति अन्तरहिता नाम होति । इदं **परियत्तिअन्तरधानं** नाम ।

गच्छन्ते गच्छन्ते काले पत्तचीवरगहणादिआकर्षणं न पासादिकं होति, निगण्टादयो विय अलाबुपत्तादिं अगगबाहाय पक्खिपित्वापि ओलम्बित्वापि सिक्काय ओलग्गेत्वापि विचरन्ति, चीवररजनम्पि न सारुप्पं, ओट्टुट्टिकवण्णं कत्वा धारेन्ति, ततो रजनम्पि ओवट्टिकविज्झनम्पि न होति, दसा छेत्वा परिब्बाजका विय कासावमत्तमेव धारेन्ति, ततो परिकखीणे काले खुद्वककासावखण्डं हत्थे वा गीवाय वा बन्धित्वा कसिकम्मादीनि कत्वा दारभरणादिं करोन्ति, तदा दक्खिणं देन्तो जनो सङ्गं उद्दिस्स एतेसं देति, इदं सन्धाय भगवता वुत्तं “भविस्सन्ति खो पनानन्द, अनागतमद्धानं गोत्रभुनो कासावकण्ठा दुस्सीला पापधम्मा, तेसु दुस्सीलेसु सङ्गं उद्दिस्स दानं दस्सन्ति, तदापहं, आनन्द, सङ्गगतं दक्खिणं असङ्ख्येय्यं अप्पमेय्यं वदामी”ति (म० नि० ३.३८०)। ततो “पपञ्चो एस, किं इमिना अम्हाकं”न्ति तं कासावखण्डं छिन्दित्वा अरञ्जे खिपन्ति, एतस्मिं काले लिङ्गं अन्तरहितं नाम होति। इदं **लिङ्गअन्तरधानं** नाम।

ततो तत्थ तत्थ सक्कारसम्मानं अलभमाना धातुयो बुद्धानं अधिद्वानबलेन सक्कारसम्मानलब्भमानकट्टानं गमिस्सन्ति, ततो सब्बत्थ अलभमाना सब्बधातुयो महाबोधिमण्डमेव गमिस्सन्ति। सासपमत्तापि हि धातु न अन्तरा नस्सिस्सति, ता पन बोधिमण्डे पल्लङ्केन निसिन्नबुद्धसरीरसिरिं, यमकपाटिहारियञ्च दस्सेस्सन्ति, ततो धातुसरीरतो तेजो समुट्ठाय तं सरीरं अपण्णत्तिकभावं गमेति, तदा दससहस्सचक्कवाळे देवता परिनिब्बानदिवसे विय परिदेवित्वा पूजासक्कारं कत्वा पक्कमन्ति। इदं **धातुअन्तरधानं** नाम।

इमस्स पञ्चविधस्स अन्तरधानस्स परियत्तिअन्तरधानमेव मूलं। परियत्तियं हि सति पटिवेधादयोपि नट्टा नाम न होन्ति, असति नट्टाति। यथा च निधिकुम्भिया जाननत्थाय पासाणपिट्टे उपनिबद्धअक्खरेसु धरन्तेसु निधिकुम्भि नट्टा नाम न होति, अक्खरेसु पन नट्टेसु नट्टा, एवंसम्पदमिदं वेदितब्बं। यथाह

“याव तिट्ठन्ति सुत्तन्ता,  
विनयो याव दिप्पति।  
ताव दक्खन्ति आलोकं,  
सूरिये अब्भुट्ठिते यथा॥

“सुत्तन्तेसु असन्तेसु,  
पमुट्ठे विनयमिहि च।  
तमो भविस्सति लोके,  
सूरिये अत्थङ्गते यथा॥

“सुत्तन्ते रक्खिते सन्ते,  
पटिपत्ति होति रक्खिता।  
पटिपत्तियं ठितो धीरो,  
योगक्खेमा न धंसती”ति। (अ० नि० अट्ठ० १.१.१३०; सारत्थ० टी० पाचित्तिय ३.४३८)।

एवमिमेसु पञ्चसु अन्तरधानेसु धातुअन्तरधानतो पच्छा चरिमं नामाति वेदितब्बं।

कस्मा पन द्वे सम्मासम्बुद्धा अपुब्बं अचरिमं न उप्पज्जन्तीति? निरत्थकतोव। एकोव हि सम्मासम्बुद्धो अनन्तेसु चक्कवाळेसु सब्बसत्तानम्पि यदि उपनिस्सयो भवेय्य, एकक्खणे सपाटिहारियं सब्बानुकूलं धम्मं देसेत्वा ते विनेतुं सक्कोति, किमङ्गं पन नानक्खणेसु, तस्मा एकस्मिं काले अनेकेसं सम्मासम्बुद्धानं उप्पत्ति निरत्थिकाव। अनत्थकता पन अनच्छरियअगारवविवादादिदोसतो चेव महापथविया द्विन्नं बुद्धानं धारणे असमत्थताय विकिरणादिदोसतो च वेदितब्बा। चक्कवत्तिनो पन एकस्मिं चक्कवाळे द्वे एकतो न उप्पज्जन्ति, एकोव उप्पज्जति। नानाचक्कवाळेसु पन बहूपि एकतो उप्पज्जन्तीति वेदितब्बा। एत्थ हि “एकिस्सा लोकधातुया”ति एतस्स एकस्मिं चक्कवाळेति अत्थो गहेतब्बो। अपुब्बं अचरिमञ्चेत्थ चक्करतनपातुभावअन्तरधानानं वेमज्झं वेदितब्बं। अन्तरधानञ्चस्स चक्कवत्तिनो कालकिरियतो, पब्बज्जातो वा सत्तमे दिवसे होति, तस्स च आनुभावेन द्विन्नं एकत्थ सहअनुपत्ति च वेदितब्बा। सेसं सुविज्जेय्यमेव। ठानाठानजाणबलं पठमं।

दुतिये **कम्मसमादानान्ति** समादित्वा कतानं कुसलाकुसलानं, कम्ममेव वा कम्मसमादानं। **ठानसो हेतुसो**ति पच्चयतो चेव हेतुसङ्घातकारणतो च। तत्थ गतिउपधिकालपयोगा विपाकस्स पच्चया, कम्मं हेतु। तदुभयतो कम्मविपाकं यथाभूतं पजानाति। कथं? भगवा हि “एकच्चस्स बहूनि पापकम्मानी गतिउपधिकालपयोगानं सम्पत्तिया पटिबाहितानि न विपच्चन्ति, तेसं विपत्तिं आगम्म विपच्चन्ति, एकच्चस्स बहूनि कल्याणकम्मानी तेसं विपत्तिया पटिबाहितानि न विपच्चन्ति, तेसं सम्पत्तिं आगम्म विपच्चन्ती”ति पजानाति।

तत्थ गतिविपत्तीति चत्तारो अपाया। गतिसम्पत्तीति मनुस्सदेवगतियो। उपधीति अत्तभावो। तस्स समिद्धि सम्पत्ति नाम, असमिद्धि विपत्ति नाम। कालसम्पत्तीति सुराजसुमनुस्सकालसङ्घातो सम्पन्नकालो, तप्पटिपक्खो कालविपत्ति नाम। तस्स तस्स पन कम्मस्स सम्पापयोगो पयोगसम्पत्ति, मिच्छापयोगो पयोगविपत्ति नाम। तत्थ हि एकच्चस्स कुसलकम्मेन देवगतिआदीसु गतियं निब्बत्तस्स तं गतिसम्पत्ति आगम्म कुसलानि एव विपच्चन्ति। तां पन गतिसम्पत्तिया पटिबाहितानि अकुसलानि तत्थ विपच्चित्तुं न सक्कोन्ति। तानि पुन निरयादीसु अपायेसु निब्बत्तस्स तं गतिविपत्ति आगम्म यथासुखं विपच्चन्ति। तां पन गतिविपत्तिया पटिबाहितानि कुसलानि तत्थ विपच्चित्तुं न सक्कोन्ति। एकच्चस्स दस्सनीयेनाभिरूपेन कायेन समन्नागतस्स यदिपि सो दासो वा होति हीनजच्चो वा, तं उपधिसम्पत्ति आगम्म कुसलानि एवस्स विपच्चन्ति। तादिसं हि सुरूपं “अयं किलिङ्गकम्मस्स नानुच्छविको”ति उच्चेषु अमच्चादिद्धानेसु ठपेन्ति, चण्डालिम्पि सुरूपं अगमहेसिआदिद्धानेसु ठपेन्ति। तां पन उपधिसम्पत्तिया पटिबाहितानि अकुसलानस्स विपच्चित्तुं न सक्कोन्ति। तानि पन उपधिविपत्तियं च ठितस्स यथासुखं विपच्चन्ति। राजकुलादीसु हि उपन्नम्पि दुरूपं हीनेसु ठपेन्ति। एकच्चस्स पन पठमकप्पिकानं वा चक्कवत्तिरज्जो वा बुद्धानं वा सुराजसुमनुस्सानं सम्पन्ने काले निब्बत्तस्स तं कालसम्पत्ति आगम्म कुसलानि एव विपच्चन्ति, न अकुसलानि। तानि पुन दुराजदुमनुस्सानं विपन्ने काले तं कालविपत्ति आगम्म विपच्चन्ति, न पन कुसलानि तां कालविपत्तिया पटिबाहितत्ता। एकच्चस्स पन सीलसंयमादिअनवज्जपयोगेन चैव सावज्जेन वा अनवज्जेन वा देसकालानुसारेण आयुधसिप्पादिपयोगसामत्थियेन च समन्नागतस्स तं पयोगसम्पत्ति आगम्म कुसलानि एव विपच्चन्ति, न अकुसलानि। तानि पुन यथावुत्तविपरीतपयोगविपत्ति आगम्म विपच्चन्ति, न पन कुसलानि तां पटिबाहितत्ता। युद्धादीसु हि पाणातिपातादिअकुसलं करोन्तापि तंतं आयुधसिप्पादिपयोगसम्पत्ति निस्सायेव सेनापतिद्धानादिमहासम्पत्तिं लभन्ति, न पन तं अकुसलं निस्साय। यथा दानवेय्यावच्चादीसु कुसलं करोन्तापि अधिमत्तवायामादिपयोगविपत्तिं निस्साय अनयव्यसनम्पि पापुणन्ति, न पन तं कुसलं निस्साय। एवमेताहि चतूहि सम्पत्तीहि, विपत्तीहि च कुसलाकुसलानं विपच्चनाविपच्चनविभागं भगवा यथाभूतं पजानाति। अयं तावेत्थ विभङ्गनयेन दुतियबलस्स विभावना।

अपरेण चस्स —

“अहोसि कम्मं अहोसि कम्मविपाको, अहोसि कम्मं नाहोसि कम्मविपाको, अहोसि कम्मं अत्थि कम्मविपाको, अहोसि कम्मं नत्थि कम्मविपाको, अहोसि कम्मं भविस्सति कम्मविपाको, अहोसि कम्मं न भविस्सति कम्मविपाको, अत्थि कम्मं नत्थि कम्मविपाको, अत्थि कम्मं नत्थि कम्मविपाको, अत्थि कम्मं भविस्सति कम्मविपाको, अत्थि कम्मं न भविस्सति कम्मविपाको, भविस्सति कम्मं भविस्सति कम्मविपाको, भविस्सति कम्मं न भविस्सति कम्मविपाको”ति (पटि० म० १.२३४) —

इमिना पटिसम्भिदायं वुत्तेनापि नयेन विभावना वेदितव्वा। तत्थ यं अतीतत्तभावे आयूहितं कम्मं वुत्तं, हेतुपच्चयं आगम्म तत्थेव विपाकं अदासि। इदं सन्धाय “अहोसि कम्मं अहोसि कम्मविपाको”ति पठमं पदं वुत्तं। यं अतीतेसु पन दिट्ठधम्मवेदनीयादीसु बहूसु एकं दिट्ठधम्मवेदनीयं लद्धपच्चयं विपाकं देति, सेसानि अविपाकानि। एकं उपपज्जवेदनीयं पन पटिसन्धिं आकङ्कितं, एकं आनन्तरियं निरयपटिसन्धिं देति, सेसानि अविपाकानि। अट्ठसु समापत्तीसु एकाय ब्रह्मलोके निब्बत्तति, सेसा अविपाका। इदं सन्धाय “अहोसि कम्मं नाहोसि कम्मविपाको”ति दुतियं पदं वुत्तं। यं अतीतं कम्मं एतरहि विपाकं देति, इदं सन्धाय ततियं। यं पुरिमनयेन न विपच्चति, इदं सन्धाय चतुत्थं। यं अनागते विपाकं दस्सति, इदं सन्धाय पच्चमं। यं न विपच्चति, इदं सन्धाय छट्ठं। यं एतरहि आयूहितं कम्मं एतरहेव विपाकं देति, इदं सन्धाय सत्तमं। यं न विपच्चति, इदं सन्धाय अट्ठमं। इमिना नयेन सेसपदानम्पि अत्थो दट्ठव्वो। इदं तथागतस्साति इदं सब्बेहि एतेहि पकारेहि अतीतानागतपच्चुप्पन्नानं कम्मन्तरविपाकन्तरानं यथाभूततो जाननजाणन्ति अत्थो। दुतियबलं।

ततिये सब्बत्थगामिनिन्ति सब्बगतिगामिनिञ्च अगतिगामिनिञ्च। पटिपदन्ति मग्गं। यथाभूतं पजानातीति बहूसुपि मनुस्सेसु पाणातिपातादीसु एकमेव अकुसलं एकतो करोन्तेसु इमस्स चेतना निरयगामिनी भविस्सति, इमस्स तिरिच्छानयनिगामिनी, इमस्स पेत्तिविसयगामिनी, निरयादीसुपि पनेसा एवरूपे एवरूपे ठाने एवज्जेवञ्च विपाकं दस्सति, इमस्स पटिसन्धिं आकङ्कितं न सक्कोति, अज्जेन कम्मेन दिन्नपटिसन्धिकस्स दुब्बलं उपधिवेपक्कं भविस्सति। बहूसु वा एकतो दानादिअकुसलं, विपस्सना वा पट्टपेन्तेसु इमस्स चेतना मनुस्सगतिगामिनी भविस्सति, इमस्स देवगतिगामिनी, तत्थापि एवज्जेवञ्च विपाकं दस्सति, इमस्स वा विपस्सना एकं मग्गं द्वे वा तयो वा चत्तारो वा पटिसम्भिदादिसहिते वा रहिते वा निष्पादेस्सति, इमस्स न कञ्चि पटिवेधं साधेस्सतीतिआदिना अनन्तेहि आकारेहि एकवत्थुस्मिम्पि उप्पन्नं कुसलाकुसलसङ्घातं सब्बत्थगामिनिपटिपदं अविपरीततो पजानातीति। ततियबलं।

चतुत्थे अनेकधातुन्ति चक्खुधातुआदीहि, कामधातुआदीहि वा बहुधातुं। नानाधातुन्ति तासज्जेव धातून् विलक्खणत्ता नानप्पकारं धातुं। लोकन्ति खन्धायतनधातुलोकं। यथाभूतं पजानातीति तासं तासं धातून् खन्धायतनधातुविभङ्गादीसु वुत्तनयेन अनन्तप्पभेदं नानत्तं अविपरीततो पजानाति। न केवलञ्च तथागतो उपादिन्नकसङ्खारलोकस्सेव नानत्तं पजानाति, अथ खो अनुपादिन्नकसङ्खारलोकस्सापि पच्चेकबुद्धादीहि पटिविज्झितुं असक्कुण्यं नानत्तं पजानातियेव। तेहि उपादिन्नकलोकस्सापि नानत्तं एकदेसतोव जानन्ति, अनुपादिन्नस्स पन नेव जानन्ति, सब्बज्जुबुद्धस्सेवेतं विसयो। एवं हि इमाय नाम धातुया उस्सन्नाय इमेसं रुक्खगच्छलतादीनं, खन्धदण्डवल्लितचपत्तपुष्पफलादीनो सण्ठानवण्णगन्धरसओजाहि, देसकालेहि च अनन्तप्पभेदं नानत्तं, पथवीपब्बतादीनञ्च नानत्तं होतीति अनन्तेहि आकारेहि जानितुं सक्कोति, नाज्जेति। चतुत्थबलं।

पञ्चमे नानाधिमुत्तिकन्ति हीनादीहि अधिमुत्तीहि नानाधिमुत्तिकभावं । यथाभूतं पजानातीति तीसुपि कालेसु हीनाधिमुत्तिका हीनाधिमुत्तिके एव सेवन्ति, पणीताधिमुत्तिका च पणीताधिमुत्तिके । तत्थापि अस्सद्वा अस्सद्दे, दुस्सीला दुस्सीले, मिच्छादिट्टिका मिच्छादिट्टिके, सद्वा सद्धे, सीलसुतचागपज्जादिसम्पन्ना च ते ते एव सेवन्तीति नानपकारतो जानाति । सद्वासीलादिसम्पन्ना हि तब्बिरहिते अत्तनो आचरियुपज्जायेपि न सेवन्ति, तेपि इतरे, अत्तना अत्तना पन सदिसे एव सेवन्तीति । पञ्चमबलं ।

छट्ठे परसत्तानन्ति पधानसत्तानं । परपुग्गलानन्ति ततो परेसं हीनसत्तानं । एकत्थमेव वा एतं पदद्वयं वेनेय्यवसेन द्विधा वुत्तं । इन्द्रियपरोपरियत्तन्ति सद्वादीनं इन्द्रियानं परभावञ्च अपरभावञ्च, बुद्धिञ्च हानिञ्चाति अत्थो । यथाभूतन्ति सब्बेसं सत्तानं आसयानुसयचरिताधिमुत्तिआदीहि सद्वादि तिक्विन्द्रियमुदिन्द्रियतं सब्बाकारतो जानाति । तत्थ आसयोति निवासट्ठानं, यत्थ सत्तानं चित्तसत्तानं निच्चं निवसति । सो दुविधो वट्ठासयो विवट्ठासयो च । तत्थ सस्सतुच्छेदवसेन पवत्तं सब्बं दिट्ठिगतं वट्ठासयो नाम । सप्पच्चयनामरूपपरिग्गहतो पट्ठाय सब्बं विपस्सनाजाणं, मग्गजाणञ्च विवट्ठासयो नाम । मग्गजाणम्पि हि “दसयिमे, भिक्खवे, अरियावासा, यदरिया आवसिंसू”तिआदिवचनतो (अ० नि० १०.१९) आसयोव । इमं पन भगवा सत्तानं आसयं जानन्तो उभिन्नं दिट्ठिजाणानं अप्पवत्तिकखणेपि जानाति एव । कामरागादिकिलेसाधिमुत्तञ्जेव हि पुग्गलं भगवा तथेव जानाति । “अयं नेक्खम्मादिअभिरतो विवट्ठासयो”ति नेक्खम्मादिं सेवन्तञ्जेव जानाति, “अयं कामादिअभिरतो वट्ठासयो”ति अनुसयचरितादिजाननेपि एसेव नयो । तत्थ अनुसयो कामरागानुसयादितो सत्तविधो । चरितन्ति तीहि द्वारेहि अभिसङ्गतलोकियकुसलाकुसलं । अधिमुत्तीति अज्झासयो । एवमेत्थ आसयानुसयजाणं, इन्द्रियपरोपरियत्तजाणञ्चाति द्वे जाणानि एकतो हुत्वा एकं बलजाणं नाम जातन्ति । छट्ठबलं ।

सत्तमे ज्ञानविमोक्खसमाधिसमापत्तीनन्ति पठमादीनं चतुन्नं ज्ञानानं, “रूपी रूपानि पस्सती”तिआदीनं अट्ठन्नं विमोक्खानं, सवितक्कसविचारादीनं तिण्णं समाधीनं, पठमज्ज्ञानसमापत्तिआदीनं नवन्नं अनुपुब्बसमापत्तीनं । संकिलेसन्ति हानभागियधम्मं । वोदानन्ति विसेसभागियं धम्मं । वुट्ठानन्ति येन कारणेन ज्ञानादीहि वुट्ठहन्ति, तं कारणं । तं पन दुविधं वोदानम्पि भवङ्गम्पि । हेट्ठिमं हि पगुणं ज्ञानं अत्तनो वोदानवसेन उपरिमस्स ज्ञानस्स पदट्ठानतो “वुट्ठान”न्ति वुच्चति, तम्हा तम्हा पन समाधिम्हा भवङ्गवसेनेव वुट्ठानतो भवङ्गम्पि । निरोधतो पन फलसमापत्तियाव वुट्ठहन्ति । इदं पाळिमुत्तकवुट्ठानं नाम, तं सब्बं भगवा यथाभूतं सब्बाकारेन पजानाति । सत्तमबलं ।

अट्ठमे पुब्बेनिवासानुस्सतीति पुब्बेनिवुत्थक्खन्धानुस्सरणं, तं नामगोत्तवण्णाहारसुखदुक्खादीहि तत्थ तत्थ भवे विज्जमानेहि अनन्तेहि आकारेहि यथाभूतं पजानातीति । अट्ठमबलं ।

नवमे चुतूपपातन्ति चुतिञ्च उपपातञ्च, तं चवमानउपपज्जमानहीनपणीतसुवण्णदुब्बण्णादितो अनन्तपभेदे यथाकम्मूपगे सत्ते दिब्बचक्खुजाणेन वण्णायतनगहणमुखेन दिस्वा सब्बाकारतो पजानातीति । नवमबलं ।

दसमे आसवानं खयन्ति आसवनिरोधं निब्बानं, तं अरहत्तमग्गजाणेन चतुसच्चपटिवेधतो पजानातीति । दसमबलं ।

इमानीति यानि हेट्ठा “तथागतस्स दस तथागतबलानी”ति अवोच, इमानि तानीति अप्पनं करोति । यस्मा चेतोपरियजाणादीनि सावकादीनम्पि यथारहं विज्जमानानिपि सविसयं किञ्चिदेव जानन्ति, न च सब्बाकारतो । बुट्ठानं पन सब्बज्जुतज्जाणं विय सब्बधम्मेषु यथासकं विसये सब्बत्थ सब्बाकारतो एकक्खणे अप्पटिहतं पवत्तति, तस्मा “तथागतबलानी”ति वुच्चन्ति । यदि एवं सब्बज्जुतज्जाणस्सेवायं पभेदो होति, कस्मा पन “दसबलजाणानी”ति विसुं विभत्तानीति? विसयकिच्चभूमिभेदतो नेसं अज्जत्ता । दसबलजाणेषु हि पठमं कारणाकारणमेव जानाति, दुतियं कम्मन्तरविपाकन्तरमेव जानाति, ततियं कम्मपरिच्छेदमेव, चतुत्थं नानत्तकारणमेव, पञ्चमं सत्तानं अज्झासयाधिमुत्तिमेव, छट्ठं इन्द्रियानं तिक्वमुदुभावमेव, सत्तमं ज्ञानादीहि सद्धि तेसं संकिलेसादिमेव, अट्ठमं पुब्बेनिवुत्थक्खन्धसन्ततिमेव, नवमं सत्तानं चुतिपटिसन्धिमेव, दसमं सच्चपरिच्छेदमेव, नाज्जं ।

सब्बज्जुतज्जाणं पन एतेहि जानितब्बञ्च ततो उत्तरिञ्च सब्बं अतीतादिभेदं एकक्खणे सब्बाकारतो जानाति, एतेसं पन किच्चं न सब्बं करोति । तं हि ज्ञानं हुत्वा अप्पेतुं, इद्धि हुत्वा विकुब्बितुं, मग्गो हुत्वा किलेसे खेपेतुं न सक्कोति । दसबलजाणानि पन तं सब्बं यथारहं कातुं सक्कोन्ति । तेसु च पटिपाटिया सत्त जाणानि कामावचरानि, ततो द्वे रूपावचरानि, अवसाने एकं लोक्कतरं । सब्बज्जुतज्जाणं पन कामावचरमेवाति एवं विसयकिच्चभूमिभेदतो अज्जमेव दसबलजाणं । अज्जं सब्बज्जुतज्जाणन्ति । अयं ताव पदत्थानुसारतो विनिच्छयो । धम्मभेदादितो पन सब्बोपि विनिच्छयो एकविधकोट्टासतो पट्ठाय एत्थ वुत्तानुसारतोव जातब्बो, सुत्तन्तभाजनीयादयो हि विभङ्गनयभेदा एत्थ, इतो परेसु च विभङ्गेषु नुत्थीति ।

जाणविभङ्गमातिकथवण्णना निट्ठिता ।

खुदकवत्थुविभङ्गमातिकथवण्णना

खुदकवत्थुविभङ्गमातिकाय पनायं निक्खेपपरिच्छेदेन सद्धि अत्थतो विनिच्छयो । मातिकाय हि आदितो ताव — जातिमदोतिआदयो तेसत्तति एकका निक्खित्ता, ततो कोथो च उपनाहो चातिआदयो अट्ठारस दुका, अकुसलमूलादयो पञ्चतिस तिका, आसवचतुक्कादयो चुदस चतुक्का,

ओरम्भागियसंयोजनादयो पन्नरस पञ्चका, विवादमूलादयो चुदस छक्का, अनुसयादयो सत्त सत्तका, किलेसवत्थुआदयो अट्ट अट्टका, आघातवत्थुआदयो नव नवका, किलेसवत्थुआदयो सत्त दसका, छन्नं अट्टारसकानं वसेन अट्टसततण्हाविचरितानि च यथाक्कमं निक्खिपित्वा अन्ते द्वासट्ठि दिट्ठिगतानि ब्रह्मजालसुत्ते अतिदस्सितानीति सब्बानिपि तेसट्ठिअधिकानि अट्टकिलेससतानि निक्खित्तानीति वेदितब्बानि। अयं ताव निक्खेपपरिच्छेदो।

अथतो पन “**जातिमदो**”तिआदीसु जातिउच्चाकुलीनतं निस्साय “**खत्तियादीनं चतुन्मिपि वण्णानं अहं उत्तमजातिको, इमे न उत्तमजातिका**”ति एवं अत्तुक्कंसनपरवम्भनवसेन उप्पन्नो मज्जनाकारप्पवत्तो मानो **जातिमदो** नाम। सेसपदेसुपि एसेव नयो। तत्थ आदिच्चगोत्तकस्सपगोत्तादिउत्तमगोत्तं निस्साय **गोत्तमदो**। निराबाधत्तं, योब्बज्जं, “चिरं सुखं जीवि जीवामि जीविस्सामी”ति एवं जीवितं, बहुलाभञ्च निस्साय यथाक्कमं **आरोग्यमदादयो** वुत्ता। सुकतपणीतपच्चयलाभं, माननवन्दनादिगरुकारं मज्जेव पमुखं कत्वा पञ्चं पुच्छन्ति, परिवारेत्वा गच्छन्तीति एवं पुरेक्खारं, महापरिवारं, सुचिपरिवारञ्च निस्साय यथाक्कमं **सक्कारमदादयो** च वेदितब्बा। भोगो पन किञ्चापि लाभगहणेनेव गहितो, निहितधनवसेन पनेत्थ लाभो वेदितब्बो, “अन्नपानवत्थाभरणमालागन्धादिउपभोगसमिद्धिवसेनापि वत्तुं वट्ठी”तिपि वदन्ति। सरीरवण्णं, गुणवण्णञ्च निस्साय **वण्णमदो**। बाहुसच्चं, पटिभानं, “वण्णं बुद्धवंसं राजवंसं जनपदवंसं गामवंसं रत्तिन्दिवपरिच्छेदं नक्खत्तमुहुत्तयोगं जानामी”ति एवं रत्तञ्जुतं वा निस्साय यथाक्कमं **सुतमदादयो** च वेदितब्बा। जातिपिण्डपातिकत्तं, अनवज्जातत्तं, इरियापथपासादिकत्तं, महिद्धिकतञ्च निस्साय यथाक्कमं **पिण्डपातिकमदादयो**। किञ्चापि परिवार-गहणेन यसो गहितो। परिवारस्स पन सवसवत्तकभावेन पत्थटत्तं कित्तियसज्जेव वा निस्साय **यसमदो**। परिसुद्धसीलं, उपचारप्पनाज्ञानं, सिप्पकोसल्लं, सरीरस्स आरोहसम्पदं, परिणाहसम्पदं, अनूननिद्दोसअङ्गपच्चङ्गताय सरीरपारिपूरिञ्च निस्साय **सीलमदादयो** वेदितब्बा।

इमिना एत्तकेन ठानेन सवत्थुकं मानं दस्सेत्वा इदानीं अवत्थुकमेव सामज्जतो मानं दस्सेन्तो “**मदो**”ति आह। **पमादो**तिआदीसु पञ्चकामगुणेषु चित्तवोस्सगसङ्घातो सुचरितासेवनाय, दुच्चरितसेवनाय च हेतुभूतो पमज्जनाकारप्पवत्तो अकुसलचित्तुप्पादो **पमादो** नाम, स्वायं सतिवोस्सगलक्खणो। वातभरितभत्ता विय मातापितृसुपि अनोणतभावसङ्घातो कक्खळमानो **थम्भो** नाम, स्वायं चित्तस्स उद्धमातभावलक्खणो। अज्जेसं गेहादिउपकरणसम्पदं, विज्जासम्पदं वा दिस्वा तद्दिगुणसमारम्भनवसप्पवत्तो अकुसलचित्तुप्पादो **सारम्भो** नाम। गन्थोपि हि सारम्भवसेन उग्गहेतुं न वट्ठति, अकुसलमेव होति। स्वायं करणुत्तरियलक्खणो।

अत्र अत्र विसये इच्छा अस्साति अत्रिच्छो, पुग्गलो, तस्स भावो **अत्रिच्छता**। एवं **महिच्छता**दीसुपि अत्थो वेदितब्बो। तत्थ यं यं लद्धं, तेन तेन असन्तुस्सित्वा अपरस्स अपरस्स पत्थनावसेन पवत्तो लोभो **अत्रिच्छता**। याय अत्तना लद्धं पणीतम्पि लामकं विय खायति, परेन लद्धं लामकम्पि पणीतं विय खायति। सायं अपरापरलाभपत्थनालक्खणा। सन्तगुणविभावनावसप्पवत्तो चेव तदुप्पन्नेहि अतिमहन्तेहिपि वत्थूहि असन्तुस्सनाकारप्पवत्तो च लोभो **महिच्छता**। याय समन्नागतो पुग्गलो पच्चयेहि दुप्पूरो अग्गि विय उपादानेन, समुद्दो विय च उदकेन। या चायं सन्तगुणसम्भावना, पटिग्गहणे च परिभोगे च अमत्तञ्जुता, एतं महिच्छतालक्खणं।

असन्तानं पन सद्धासीलानं, मग्गफलादीनञ्च लोकियलोकुत्तरानं गुणानं विभावनावसप्पवत्तो चेव तदुप्पन्नेहि अतिमहन्तेहिपि पच्चयेहि असन्तुस्सनाकारप्पवत्तो च लोभो **पापिच्छता**। या चायं असन्तगुणसम्भावना, पटिग्गहणे च परिभोगे च अमत्तञ्जुता एतं पापिच्छतालक्खणं।

**सिङ्गन्ति** विज्झनट्ठेन सिङ्गं, नागरिकभावसङ्घातस्स किलेससिङ्गस्सेतं अधिवचनं, तं अथतो सिङ्गारकरणवसप्पवत्तो लोभोव। **तिन्तिणन्ति** खीयनं, तं अथतो निवासट्ठाने सुनखानं विय अज्जमज्जं सत्तानं “तव सन्तकं, मम सन्तकं”न्ति खिथ्यनाकारप्पवत्तो दोसोव। **चापल्यन्ति** चपलता, तं पत्तचीवरादिपरिक्खारानं, अत्तभावस्स च मण्डनविभूसनकेळायनवसप्पवत्तो रागोव, येन समन्नागतो जिण्णोपि दहरो विय होति। **असभागवुत्तीति** विसभागवुत्ति विसभागकिरिया, सा गरुट्टानियेसुपि अनादरवसेन विपच्चनीकग्गाहितावसप्पवत्तो दोसोव, याय समन्नागतो गिलानेपि मातापितुआचरियुपज्झायादिके न ओलोकेति, तेहि सद्धिं लाभसक्कारकारणा कलहं करोति, तेसु हिरोत्तपं, चेतियादीसु चित्तीकारञ्च न पच्चुपट्ठपेति। **अरतीति** पन्तेसु सेनासनेसु, समथविपस्सनासु च अनभिरमणा उक्कण्ठितता, सा तथापवत्तो अकुसलचित्तुप्पादो। **तन्दीति** आलस्यं। **विजम्भिताति** कायस्स आनमनादिआकारेन फन्दना विजम्भना। **भत्तसम्मदोति** भत्तमुच्छाय कायस्स अकम्मज्जता। **चेतसो च लीनत्तन्ति** चित्तसङ्कोचो। अथतो पनेतानि सब्बानिपि थिनमिद्धवसेन चित्तस्स गिलानाकारोव।

**कुहनाति**आदीसु लाभसक्कारसिलोकसन्निस्सितस्स पापिच्छस्स तेन तेन उपायेन विम्हापना **कुहना** नाम। सा तिविधा पच्चयपटिसेवनसामन्तजप्पनइरियापथसण्ठापनवसेन। तत्थ चीवरादीहि निमन्तितस्स तदत्थिकस्सेव सतो पापिच्छत्तं निस्साय पटिक्खिपनेन, ते च गहपतिके अत्तिन सुप्पतिट्ठितसद्धे जत्त्वा पुन तेसं “अहो अय्यो अप्पिच्छो न किञ्चि पटिग्गण्हितुं इच्छति, सुलद्धं वत नो अस्स, सचे अप्पमत्तकं किञ्चि पटिग्गण्हेय्या”ति नानाविधेहि उपायेहि पणीतानि चीवरादीनि उपनामेन्तानं तदनुग्गहकामतज्जेव आविक्त्वा पटिग्गहणेन च ततो पभुति अपि सकटभारेहि उपनामनहेतुभूतं विम्हापनं **पच्चयपटिसेवनसङ्घाता कुहना** नाम। पापिच्छस्सेव पन सतो “यो एवरूपं चीवरं धारेति, सो समणो महेसक्खो”तिआदिना उत्तरिमनुस्सधम्माधिगमपरिदीपनवाचाय तथा तथा विम्हापनं **सामन्तजप्पनसङ्घाता कुहना** नाम। पापिच्छस्सेव पन सतो समाहितस्सेव

सम्भावनाधिष्णायकतेन पणिधाय सण्ठपितेन गमनादिइरियापथेन विम्हापनं **इरियापथसण्ठपनसङ्घाता कुहना** नाम ।

**आलपना**तिआदिना पन वुत्तपच्चयपटिसंयुत्ता वाचायेव दस्सिता । अनुप्पियभाणिता, चाटुकम्यता, मुग्गसूयता, पारिभटयता च **आलपना** नाम । तत्थ **आलपना**तिआदितोव लपना । **अनुप्पियभाणिता**ति सच्चानुरूपं, धम्मनुरूपं वा अनपलोकेत्वा पुनप्पुनं पियभणनं । **चाटुकम्यता**ति नीचवुत्तिता, अत्तानं हेट्ठतो ठपेत्वा पवत्तनं । **मुग्गसूयता**ति मुग्गसूपसदिसता, अपक्कमुग्गसदिसेन अप्ससच्चेन समन्नागतवचनता । **पारिभटयता**ति कुलदारकानं अङ्केन परिहरणादिकं परिभटस्स किच्चं । एवमयं सब्बोपि किरियाभेदो “लपना”त्वेव वुच्चति । परेसं पन पच्चयदानसञ्जाजनकं कायवचीकम्मं **नेमित्तिकता** नाम, या “परिकथोभासनिमित्तकम्म”न्ति वुच्चति । अक्कोसनवम्भनगरहणादीहि यथा दायको अवण्णं भायति, एवं तं निप्पीळनं **निप्पेसिकता** नाम । अयं हि यस्मा वेळुपेसिकाय विय अब्भङ्गं इमाय परस्स गुणं निप्पेसेति निपुञ्छति, यस्मा वा गन्धजातं पिसित्वा गन्धमग्गना विय परगुणे निप्पिसित्वा विचुण्णेत्वा एसा लाभमग्गना होति, तस्मा “निप्पेसिकता”ति वुच्चति । एकस्मिं पन कुले लद्धामिसं अञ्जत्थ दानवसेन लाभेन लाभस्स पत्थना **लाभेन लाभं निजिगीसना** नाम । इमे च कुहनादयो पञ्चपि तथा तथा पवत्ता लोभादिअकुसलचित्तुप्पादाति वेदितब्बा । “सेय्योहमस्मी”तिआदयो द्वादस माना हेट्ठा संयोजनगोच्छके वुत्तानुसारेन सुविज्जेय्याव । तत्थ च आदितो तयो माना पुगलं अनिस्साय जातिगोत्तरूपभोगसिप्पसुतादिमानवत्थुवसेनेव कथिता, ततो परं पन नव माना सेय्यसदिसहीनपुगले निस्साय कथिता ।

एवमेतेहि द्वादसहि पदेहि सवत्थुके माने कथेत्वा इदानी अवत्थुकं दस्सेतुं “**मानो**”तिआदि वुत्तं । ततो परं **अतिमानो**तिआदीसु “जातिआदीहि मया सदिसो नत्थी”ति अतिक्कमित्त्वा मञ्जनावसेन पवत्तो मानो **अतिमानो** नाम । “इमे मया पुब्बे सदिसा, इदानी अहं सेट्ठो, इमे हीनतरा”ति उप्पन्नो मानो भारातिभारो विय **मानातिमानो** नाम । अत्तानं पन अवमञ्जनावसेन पवत्तो मानो **ओमानो** नाम, सो “हीनोहमस्मी”ति पवत्तहीनमानसदिसोव । अनधिगतेसु अरियधम्मसेसु “अधिगता मया”ति उप्पन्नो मानो अधिकमानत्ता **अधिमानो** नाम, अयं पन सोतापन्नादिअरियसावकानं “अहं सकदागामी”तिआदिना न उप्पज्जति तेसं मग्गाफलनिब्बानपहीनकिलेसावसिद्धिकिलेसपच्चवेकखणेन अरियगुणपटिवेधे निक्कङ्कत्ता । दुस्सीलस्स पन न उप्पज्जतेव, सीलवतोपि परिच्चत्तकम्मट्टानस्स न उप्पज्जति, परिसुद्धसीलस्सेव पन सुद्धसमथलाभिन्नो, सुद्धविपस्सनालाभिन्नो, तदुभयलाभिन्नो वा उप्पज्जति । तेसु तदुभयलाभी अरहत्ते एव अधिमज्जित्वा पटिट्ठाति सुविक्खम्भितकिलेसत्ता, परिमद्वितसङ्गारत्ता च, इतरे सोतापन्नादीसुपीति वेदितब्बा । पञ्चसु पन खन्धेसु “अहमस्मी”तिआदिना पवत्तो मानो **अस्मिमानो** नाम । पापकेन पन परूपघातकेन कम्मायतनसिप्पायतनविज्जाट्टानादिना अत्तानं सेय्यादितो जप्पनवसेन पवत्तो मानो **मिच्छामानो** नाम ।

**जातिवितक्को**तिआदीसु “मय्हं जातका सुखजीविनो सम्पत्तियुत्ता”ति एवं गेहसितपेमेन जातके उद्दिस्स उप्पन्नो वितक्को **जातिवितक्को** नाम, “जातका खयं गता वयं गता सद्धा पसन्ना”तिआदिना पन नेक्खम्मसितो जातिवितक्को नाम न होति । एवं **जनपदवितक्के**पि, तस्स पन “अम्हाकं जनपदो सुभिक्षो सुन्दरो”तिआदिना पवत्तिआकारो वेदितब्बो । अमरत्थाय वितक्को, अमरो वा वितक्कोति **अमरवितक्को** । तत्थ यो उक्कुटिकप्पधानादीहि दुक्खे निज्जिण्णे सम्पराये अत्ता सुखी अमरो होतीति एवं पवत्तो, सो अमरत्थाय वितक्को नाम । यो पन दिट्ठिगतिकस्स एकस्मिं पक्खे असण्ठहित्वा “एवम्पि मे नो, तथापि मे नो, अञ्जथापि मे नो”तिआदिना अमरमच्छो विय गहेतुं असक्कुण्येय्यताय पवत्तो, सो अमरो वितक्को नाम । तं दुविधम्पि एकतो कत्वा इध “अमरवितक्को”ति वुत्तो ।

अनुद्दयता पतिरूपकेन पन गिहीहि सहसोकिहसहनन्दितादिवसेन गेहसितपेमेन युत्तो **परानुद्दयतापटिसंयुत्तो वितक्को** नाम । लाभेन चेव सक्कारेन च कित्तिस्सेन च सद्धि आरम्भणकरणवसेन युत्तो गेहसितो वितक्को **लाभसक्कारसिलोकपटिसंयुत्तो वितक्को** नाम, तस्स पन “अहो वत मे लाभादयो उप्पज्जेय्यु”न्तिआदिना पवत्तिआकारो वेदितब्बो । “अहो वत मं परे न अवजानेय्यु”न्ति उप्पन्नो गेहसितो वितक्को **अनवज्जत्तिपटिसंयुत्तो वितक्को** नाम । एककं ।

दुकादीसु कोधादयो हेट्ठा वुत्तत्थे वज्जेत्वा अवसेसानञ्जेव वण्णना होति । तत्थ दुकेसु ताव **उपनाहो**तिआदीसु पुब्बभागे कोधो “अक्कोच्छिम”न्तिआदिना आसेवनेन अपरकाले वेरचित्ते दळ्ढतरं आबद्धो **उपनाहो** नाम, येन समन्नागतो वेरं निस्सज्जितुं न सक्कोति वसातेलमक्खितपिलोतिका विय, सोधियमानम्पिस्स चित्तं न परिसुज्झति, स्वायं वेरुपनिबन्धनलक्खणो ।

परगुणं पन विनासेत्वा तत्थ दोसमक्खनवसेन पवत्तो कोधो **मक्खो** नाम । अयं हि पठमतरं अत्तनो चित्तं गूथो विय गूथग्गाहकं हत्थं मक्खेति, पच्छा परन्ति “मक्खो”ति वुत्तो, स्वायं परगुणमक्खनलक्खणो । पळासेतीति **पळासो**, परस्स गुणे दस्सेत्वा अत्तनो गुणेहि समे करोतीति अत्थो । तथापवत्तो लोभो, स्वायं युग्गाहलक्खणो ।

द्वारत्तयेपि विज्जमानस्सेव दोसस्स पटिच्छादनतो चक्खुमोहनमाया वियाति **माया**, सा कतदोसपटिच्छादनलक्खणा । सठस्स भावो, कम्मं वा **साठेय्यं**, केराटियं, तं अविज्जमानगुणप्पकासनलक्खणं ।

**अनज्जवा**दयो हेट्ठा वुत्तअज्जवादिपटिपक्खअकुसलवसेन वेदितब्बा । **अज्झत्तसंयोजन**न्तिआदीसु अज्झत्तन्ति कामभावो, तत्थ सत्ते बन्धनवसेन

पवत्तानि पञ्चोरम्भागियसंयोजनानि **अज्झत्तसंयोजनं** नाम । बहिद्वाति रूपारूपभवो । तत्थ बन्धनवसेन पवत्तानि पञ्च उद्धम्भागियसंयोजनानि **बहिद्वासंयोजनं** नाम । कामभवे हि सत्तानं आलयो बहुको, न इतरेसु, तस्मा सो अज्झत्तं इतरे च बहिद्वाति वेदितब्बा । दुक्कं ।

तिकेसु पन लोभादीनि **तीणि अकुसलमूलानि** नाम । कामब्यापादविहिंसासम्पयुक्ता वितक्का **तयो अकुसलवितक्का** नाम । ते एव सज्जासीसेन **तिस्सो अकुसलसज्जा** । सभावट्टेन **तिस्सो अकुसलधातुयो**ति च वुच्चन्ति । कायवचीमनोदुच्चरितानि **तीणि दुच्चरितानि** नाम, तानि द्वारत्तयप्पवत्तानं पाणातिपातादीनं, सब्बाकुसलानं वा वसेन योजेतब्बानि । सुत्तन्तपरियायेन पन दिट्ठासववज्जिता कामासवादयो **तयो आसवा** नाम । सक्कायदिट्ठिविचिकिच्छासीलब्बतपरामासा **तीणि संयोजनानि** नाम ।

कामतण्हा भवतण्हा विभवतण्हा च **तिस्सो तण्हा** नाम । तत्थ सस्सतदिट्ठिसहगतो रागो **भवतण्हा**, उच्छेददिट्ठिसहगतो रागो **विभवतण्हा**, अवसेसा पन सब्बापि तण्हा **कामतण्हा** । कामधातुपटिसंयुक्तो वा रागो कामतण्हा, रूपारूपधातुपटिसंयुक्तो भवतण्हा, उच्छेददिट्ठिसहगतो विभवतण्हाति वेदितब्बा । कामतण्हा रूपतण्हा अरूपतण्हा च **अपरापि तिस्सो तण्हा** नाम । रूपतण्हा अरूपतण्हा निरोधतण्हा च पुन **अपरापि तिस्सो तण्हा** नाम । तत्थ **निरोधतण्हा**ति उच्छेददिट्ठिसहगतो । कामेसना भवेसना ब्रह्मचरियेसना च **तिस्सो एसना** नाम । तत्थ **ब्रह्मचरियेसना**ति सस्सतुच्छेददिट्ठिसङ्घातब्रह्मचरियस्स गवेसना । “सेय्योहमस्मीति विधा, सदिसोहमस्मीति विधा, हीनोहमस्मीति विधा”ति एवं वुत्तमानविधा **तिस्सो विधा** नाम । मानो हि सेय्यादिवसेन विदहनतो मज्जनतो “विधा”ति वुच्चति । जातिजरामरणानि पटिच्च उप्पन्नानि भयानि **तीणि भयानि** नाम । “अतीतं वा अद्धानं आरब्भा”तिआदिना वुत्तानि तीणि, बुद्धादीसु कङ्कनविचिकिच्छनवसेन पवत्ता तिस्सो अविज्जा **तीणि तमानि** नाम । विचिकिच्छासीसेन तस्स विभङ्गे तंसम्पयुक्ता अविज्जाव वुत्ता, तस्सा एव पटिच्छादकत्तेनपि तमभावतोति दट्ठब्बं ।

यं किञ्चि पन सत्तस्स सुखादिकं उप्पज्जति, तं सब्बं पुब्बेकतहेतूति एकं तित्थायतनं, इस्सरनिम्मानहेतूति दुतियं, अहेतुअप्पच्चयाति ततियन्ति इमानि **तीणि तित्थायतनानि** नाम । तत्थ पठमवादी कुसलाकुसलकिरियउतुचित्ताहारादिकं, गतिउपधिआदिकं, सप्पुरिसूपनिस्सयसद्धम्मस्सवनादिकञ्च सब्बं पच्चयपच्चयुप्पन्नं पटिक्खिपित्वा एकं कम्मविपाकमेव सम्पटिच्छति, इतरे पन द्वेपि सब्बं हेतुं पटिक्खिपित्वा इस्सरहेतुकं, अहेतुकञ्च सम्पटिच्छन्ति, तेसं तिण्णं वादानं वसेनेव पयोजनाभावादितो यथानुरूपं दोसो जातब्बो । गन्थवित्थारभयेन पनेत्थ न वित्थारयिम्ह ।

रागदोसमोहा पन तयो पलिबोधट्टेन **किञ्चना** नाम । ते एव हि किलेसट्टेन **अङ्गणानि**, मलीनभावकरणट्टेन **मलानि**, पक्खलनपातहेतुतो **विसमानि** च होन्ति । पाणातिपातादीनि कायवचीमनोविसमानि **अपरापि तीणि विसमानि** नाम । रागदोसमोहा अनुदहनट्टेन **तयो अग्गी**, कसट्ठिनरोजट्टेन **कसावा** च होन्ति । पाणातिपातादीनि कायकसावादयो पन **अपरेपि तयो कसावा** नाम । अस्साददिट्ठित्तिके कामपरिभोगे “नत्थि कामेसु दोसो”ति एवं पवत्ता सस्सतदिट्ठि **अस्साददिट्ठि** नाम । वीसतिवत्थुका पन अत्तदिट्ठि अत्तानं अनुगतत्ता **अत्तानुदिट्ठि** नाम । तस्सा पन “रूपं अत्ततो समनुपस्सति, रूपवन्तं वा अत्तानं, अत्तनि वा रूपं, रूपस्मिं वा अत्तानं समनुपस्सती”ति एवं रूपक्खन्धे चतस्सो दिट्ठियो । एवं सेसक्खन्धेसुपीति वीसतिवत्थुकता वेदितब्बा ।

तत्थ च **रूपं अत्ततो**दिआदिना पञ्चक्खन्धे अत्ततो गहणवसेन पवत्ता पञ्च उच्छेददिट्ठियो, सेसा पन सस्सतदिट्ठियोति वेदितब्बा । “**नत्थि दिन्न**”न्तिआदिनयप्पवत्ता पन नत्थिकदिट्ठि **मिच्छादिट्ठि** नाम, लामकदिट्ठीति अत्थो । अरतित्तिके पाणिलेड्डुदण्डादीहि सत्तानं विहिंसना **विहेसा** नाम । द्वारत्तयप्पवत्तअकुसलधम्मस्स चरिया **अधम्मचरिया** नाम । दोवचस्सतातिके साव कामब्यापादविहिंसासज्जा नानारम्मेणोसु पवत्तितो, नानाभूतत्ता च **नानत्तसज्जा** नाम । उद्धच्चत्तिके कुसीतस्स भावो **कोसज्जं**, पमादोव । अनादरियत्तिके ओवादस्स अनादियनवसप्पवत्तो कोधो **अनादरियं** नाम । अस्सद्धियत्तिके रतनत्तयकम्मफलानं असद्वहनवसप्पवत्ता अकुसलधम्मा **अस्सद्धियं** नाम । पञ्चविधमच्छरियवसेन “देही”ति वचनस्स अजानना **अवदञ्जुता** नाम ।

उद्धच्चत्तिके मनच्छट्टेसु इन्द्रियेसु अगुत्तद्वारता **असंवरो** नाम । कायिकवाचसिकवीतिक्कमो **दुस्सील्यं** नाम । अरियत्तिके बुद्धपच्चेकबुद्धसावकानं दस्सनोपासनादीसु अनिच्छा **अरियानं अदस्सनकम्यता** नाम । बोधिपक्खिकसद्धम्मस्स सवनधारणादीसु अनिच्छा **सद्धम्मं असोतुकम्यता** नाम । परस्स दोसारोपने रन्धगवेसितासङ्घातो उपारम्भोव **उपारम्भचित्तता** नाम । मुट्ठस्सच्चत्तिके उद्धच्चं **चेतसो विक्खेपो** नाम । अयोनिमोमनसिकारत्तिके “अनिच्चे निच्च”न्तिआदिना, सच्चपटिपक्खवसेन वा अनुपायमनसिकारसङ्घातं आवज्जनचित्तं **अयोनिमोमनसिकारो** नाम । मिच्छादिट्ठिमिच्छासङ्कप्पादयो अट्ठ मिच्छामग्गा कुम्मग्गो नाम, मिच्छामग्गस्स आसेवना **कुम्मग्गसेवना** नाम । थिनमिद्धं **चेतसो च लीनत्तं** नाम । तिकं ।

चतुक्केसु चीवरादीसु चतूसु पच्चयेसु “कत्थ मनापं लभिस्सामी”ति तण्हाय उप्पादो **चत्तारो तण्हुप्पादा** नाम । न गच्छन्ति एताहि अरियाति अगतियो, छन्दोसमोहभया । ता हि अगन्तब्बमग्गमनानि अकत्तब्बकरणानि **चत्तारि अगतिगमनानि** नाम । तत्थ **छन्दो**ति पक्खपातरागो । **भयन्ति** तथापवत्तो दोसो । अनिच्चादीसु “निच्चं सुखं अत्ता सुभ”न्ति एवं पवत्ता **चत्तारो विपरियासा** विपरीततो धम्मे एसनतो । तेसु वा आसनतो पविसनतो **चत्तारो विपरियासा** नाम । ते सज्जाचित्तदिट्ठिविपरियासवसेन पच्चेकं तयो तयो हुत्वा द्वादस होन्ति । तेसु अनिच्चे निच्चं, अनत्तनि अत्ताति सज्जाचित्तदिट्ठिविपरियासा छ, दुक्खे सुखं, असुभे सुभन्ति दिट्ठिविपरियासा द्वे चाति अट्ठ सोतापत्तिमग्गेन पहीयन्ति, असुभे सुभन्ति सज्जाचित्तविपरियासा द्वे अनागामिमग्गेन, दुक्खे सुखन्ति सज्जाचित्तविपरियासा द्वे अरहत्तमग्गेनाति वेदितब्बा ।



अदिद्वे दिद्वं, असुते सुतं, अमुते मुतं, अविज्जाते विज्जातन्ति एवं पवत्ता **चत्तारो अनरियवोहारा** नाम । दिद्वदीसु पन अदिद्वं असुतं अमुतं अविज्जातन्ति एवं पवत्ता **अपरेपि चत्तारो अनरियवोहारा** नाम । इमे च पुरिमेहि सद्धिं अद्व अनरियवोहारातिपि वुच्चन्ति । पाणातिपातअदिन्नादानकामेसुमिच्छाचारमुसावादा **चत्तारि दुच्चरितानि** नाम । मुसावादादिवचीदुच्चरितानि **अपरानिपि चत्तारि वचीदुच्चरितानि** नाम । जातिजराव्याधिमरणभयानि **चत्तारि भयानि** नाम । राजचोरअग्गिउदकभयानि चत्तारि, समुद्वं ओरोहन्तस्स पन उप्पज्जनकानि ऊमिकुम्भीलआवट्टसुसुकाभयानि च चत्तारि, अत्तानुवादपरानुवाददण्डदुग्गतिभयानि चत्तारि चाति इमानि वा **अपरानि** तीणि चतुक्कानि **चत्तारि भयानि** नाम । तत्थ **सुसुकाति** चण्डमच्छा । सब्बानिपि चेतानि भयानि पटिघचित्तानीति वेदितब्बानि । सब्बं सुखदुक्खादिकं सयंकतं परंकतं उभयकतं अधिच्चसमुप्पन्न्ति एवं उप्पज्जमाना इमा **चतस्सो दिद्वियो** नाम । चतुक्कं ।

पञ्चकेसु **पञ्चोरम्भागियाति**आदीसु ओरं वुच्चति कामधातु हेट्ठाभावतो, तत्थ उपपत्तिनिष्पादनतो तं ओरं भजन्तीति सक्कायदिद्विविचिकिच्छासीलब्वतपरामासकामरागपटिघा **पञ्च ओरम्भागियसंयोजनानि** नाम । उद्वन्ति रूपारूपधातु उपरिभावतो, तं वुत्तनयेन भजन्तीति रूपरागअरूपरागमानउद्वच्चअविज्जा **पञ्च उद्वम्भागियसंयोजनानि** नाम । रागदोसमोहमानदिद्वियो पञ्च लग्गनट्टेन **सङ्गा** नाम । ते एव पञ्च अनुपविसनट्टेन, तुदनट्टेन च पञ्च **सल्ला** नाम । सत्थुधम्मसङ्घसिक्खासु कङ्कनानि चत्तारि, सब्रह्मचारीसु कुपितचित्तता चाति इमे पञ्च चित्तस्स थद्धकचवरखाणुकभावकरणत्ता **चेतोखिला** नाम । कामेसु अवीतरागो । काये...पे०... रूपे...पे०... यावदत्थं भुज्जित्वा सेय्यसुखं पस्ससुखं मिद्धसुखं अनुयुत्तो विहरति, अज्जतरं देवनिकायं पणिधाय ब्रह्मचरियं चरतीति एवं पवत्ता पञ्च धम्मा चित्तं बन्धित्वा मुट्ठियं कत्वा विय गहणतो **चेतसोविनिबन्धा** नाम । तत्थ **कायेति** अज्जत्तिके काये, **रूपेति** बहिद्धारूपे । सज्जी अत्ता, असज्जी अत्ता, नेवसज्जीनासज्जी अत्ता, संविज्जमानो पन अत्ता उच्छिज्जति, दिद्वधम्मनिब्बानं वा पापुणातीति एवं पवत्ता **पञ्च दिद्वियो** नाम ।

पाणातिपातादिमज्जपानपरियोसाना पञ्च वेरकरणट्टेन **वेरा** नाम । जातिभोगरोगसीलदिद्विब्यसनानि **पञ्च व्यसना** नाम । तत्थ **व्यसनाति** विनाससहजाता, ततो उप्पन्ना अकुसला । बहुजनस्स अप्पियता, वेरबहुलता, वज्जबहुलता, सम्मूळहमरणं, अपायगमनन्ति इमे पञ्च **अक्खन्तिया आदीनवा**, अनधिवासनाय दोसाति अत्थो । आजीवकभयं असिलोकभयं परिससारज्जभयं मरणभयं दुग्गतिभयन्ति इमानि **पञ्च भयानि** नाम । यावदत्थं पञ्चकामगुणपरिभोगेन चैव पठमज्झानादीहि चतूहि ज्ञानेहि चाति पञ्चहि कारणेहि अत्ता परमदिद्वधम्मनिब्बानप्पत्तो होतीति पवत्ता वादा **पञ्च दिद्वधम्मनिब्बानवादा** नाम । पञ्चकं ।

छक्केसु पन कोधो मक्खो इस्सा साठेय्यं पापिच्छता सन्दिद्विपरामासिताति इमानि **छ विवादमूलानि** । मनापियेसु रूपादीसु छसु आरम्मणेसु छन्दरागोति इमे **छ छन्दरागा** गेहसिता धम्मा नाम । अमनापियेसु छसु आरम्मणेसु पटिघो **छ विरोधवत्थूनि** नाम । विरोधो एव वत्थु विरोधवत्थु । छसु आरम्मणेसु तण्हाव **छ तण्हाकाया** नाम । सत्थुधम्मसङ्घसिक्खासु, अप्पमादे, पटिसन्थारे च अगारवा **छ अगारवा** नाम । कम्मारामता, भस्सनिद्वासङ्गणिकसंसग्गपपञ्चारामता च **छ परिहानिया धम्मा** नाम, परिहानिकराति अत्थो । तत्थ सवनदस्सनसमुल्लपनपरिभोगकायसंसग्गेसु पञ्चसु युत्तपयुत्तता **संसग्गारामता** । तण्हामानदिद्विपपञ्चेसु युत्तपयुत्तता **पपञ्चारामता**ति वेदितब्बं । कम्मभस्सनिद्वासङ्गणिकारामता चत्तारो, दोवचस्सता, पापमित्ता द्वा चाति इमे **अपरेपि छ परिहानिया धम्मा** नाम ।

सोमनस्सट्ठानियेसु रूपादीसु छसु आरम्मणेसु उप्पन्ना गेहसितसोमनस्ससम्पयुत्ता विचारा **सोमनस्सुपविचारा** नाम, वितक्कादयो धम्मा, तंसम्पयुत्ता चाति गहेतब्बा । एस नयो इतरद्वयेपि । अज्जाणसहिता पनेत्थ वेदनुपेक्खा उपेक्खाति वेदितब्बा, या “अज्जाणुपेक्खा”तिपि वुच्चति । इट्ठानिट्ठमज्झत्तेसु छसु आरम्मणेसु यथाक्कमं उप्पन्ना वेदना “**छ गेहसितानि सोमनस्सानी**”तिआदिना छक्कत्तयेन वुत्ता । “अत्थि मे अत्ता”ति वा, “नत्थि मे अत्ता”ति वा, “अत्तना वा अत्तानं सज्जानामी”ति वा, “अत्तना वा अनत्तानं सज्जानामी”ति वा, “अत्तना वा अत्तानं सज्जानामी”ति वा, “सो मे अयं अत्ता कारको वेदको निच्चो धुवो”ति एवं उप्पज्जमाना इमा **छ दिद्वियो** नाम । तत्थ **अत्थीति** सस्सत्तदिद्वि । **नत्थीति** उच्छेददिद्वि । पञ्चपि खन्धे “अत्ता”ति गहेत्वा सज्जाक्खन्धेन सेसानं जाननवसेन **अत्तना वा अत्तानं सज्जानामीति दिद्वि**, सज्जाक्खन्धं पन “अत्ता”ति, इतरे च “अनत्ता”ति गहेत्वा **अत्तना वा अनत्तानं सज्जानामीति दिद्वि**, सज्जाक्खन्धं पन “अनत्ता”ति, इतरे च “अत्ता”ति गहेत्वा **अनत्तना वा अत्तानं सज्जानामीति दिद्वि** च वेदितब्बा । छक्कं ।

सत्तकेसु पन कामरागपटिघमानदिद्विविचिकिच्छाभवरागअविज्जा सत्त थामगतट्टेन, अप्पहीनट्टेन च चित्तसन्ताने अनु अनु सयनतो **अनुसया** नाम । ते एव सत्ते वट्ठस्मिं संयोजनतो **संयोजनानि** । समुदाचारवसेन परियुट्ठानतो **परियुट्ठानाति** वेदितब्बा । अस्सद्धियं अहिरिकं अनोत्तप्यं अप्पस्सुतता कोसज्जं मुट्ठस्सच्चं दुप्पज्जताति इमे सत्त असत्तं असप्पुरिसानं, असन्ता वा लामका धम्माति **असद्धम्मा** नाम । पाणातिपातादयो कायवचीदुच्चरितानि **सत्त दुच्चरितानि** नाम । मानो अतिमानो मानातिमानो ओमानो अधिमानो अस्मिमानो मिच्छामानोति इमे **सत्त माना** नाम । “मनुस्सलोके मातापैत्तिकसम्भवो अत्ता उच्छिज्जति, तथा छसु देवलोकेसु दिब्बो कबळीकारभक्खो अत्ता, रूपलोके रूपी मनोमयो अत्ता, चतूसु अरूपभवेसु चतुब्बिधो अरूपी अत्ता तत्थ तत्थ उच्छिज्जति विनस्सति न होति परं मरणा”ति एवं पवत्ता सत्त उच्छेददिद्वियो **सत्त दिद्वियो** नाम । एत्थ च आदितो तित्सो दिद्वियो रूपक्खन्धं अत्ततो गहेत्वा पवत्ता उच्छेददिद्वियो, सेसा चतस्सो अरूपक्खन्धेति जातब्बा । सत्तकं ।

अट्टकेसु पन लोभो दोसो मोहो मानो दिट्ठि विचिकिच्छा थिनं उद्धच्चञ्चाति **अट्ट किलेसवत्थूनि** नाम । “यं किञ्चि कम्मं कत्तब्बं मे”ति एकं, तथा “कत्तं मे”ति, “मग्गो मे गन्तब्बो”ति, “गतो”ति, “अप्पकं मे भुत्त”न्ति, “सुभुत्त”न्ति, “आबाधो मे उप्पन्नो”ति, “अचिरवुट्ठितो गेलज्जा”ति एकन्ति इमानि **अट्ट कुसीतवत्थूनि** नाम, कुसीतस्स कोसज्जकारणानीति अत्थो । लाभे अलाभे च यसे अयसे च पसंसाय निन्दाय च सुखे दुक्खे च यथाक्कमं रागदोसेहि चित्तस्स पटिहननं **अट्टसु लोकधम्मेषु चित्तस्स पटिघातो** नाम । हेट्ठा द्वीहि चतुक्केहि वुत्ता **अट्ट अनरियवोहारा** नाम । मिच्छादिट्ठिमिच्छासङ्कप्पादयो **अट्ट मिच्छन्ता** नाम । भिक्खुहि विज्जमानाय आपत्तिया चोदियमानस्स “न सरामी”ति निब्बेठनं एकं, “त्वं बालो”ति आदिना चोदकपटिप्परणं एकं, तथा “तुवं चेतमापन्नो”ति चोदकस्स पच्चारोपनं, अज्जेनज्जं पटिचरणं, सङ्गे बाहाविकखेपभणनं, तुण्हीभावेन विहेठनं, सङ्गं, चोदकञ्च अनादियित्वा पक्कमनं, चोदनाभया सिक्खापच्चक्खानन्ति इमे **अट्ट पुरिसदोसा** नाम । असज्जी अत्ता रूपी, अरूपी, रूपी च अरूपी च, नेवरूपीनारूपी, अन्तवा, अनन्तवा, अन्तवा च अनन्तवा च, नेवन्तवानानन्तवाति एवं पवत्ता **अट्ट असज्जीवादा** नाम । नेवसज्जीनासज्जी अत्ता रूपी अरूपीति आदिना पवत्ता **अट्ट नेवसज्जीनासज्जीवादा** नाम । अट्ठकं ।

नवकेसु पन “अनत्थं मे अचरि, चरति, चरिस्सति, पियस्स मे अनत्थं अचरि, चरति, चरिस्सति, अप्पियस्स मे अत्थं अचरि, चरति, चरिस्सती”ति एवं पवत्ता नव आघाता एव **आघातवत्थूनि** नाम । कोथो मक्खो इस्सा मच्छरियं माया साठेय्यं मुसावादो पापिच्छता मिच्छादिट्ठीति इमानि **नव पुरिसमलानि** नाम । “सेय्यस्स सेय्योहमस्मी”ति आदयो **नवविधा माना** नाम । “तण्हं पटिच्च परियेसना, परियेसनं पटिच्च लाभो, तं पटिच्च विनिच्छयो, तं पटिच्च छन्दरागो, तं पटिच्च अज्झोसानं, तथा परिग्गहो, मच्छरियं, आरक्खो, आरक्खाधिकरणं दण्डादानसत्थादानकलहविग्गहविवादादिअनेके पापका धम्मा”ति एवं वुत्ता इमे **नव तण्हामूलका धम्मा** नाम । तत्थ **विनिच्छयो**ति जाणतण्हादिट्ठिवितक्कवसेन चतूसु विनिच्छयेसु वितक्कविनिच्छयो इध अधिपेत्तो । लाभं हि लभित्वा “इदं रूपारम्मणत्थाय, इदं सद्धारम्मणादिअत्थाया”ति एवं वितक्केनेव विनिच्छयो । **छन्दरागो** दुब्बलरागो, **अज्झोसानन्ति** बलवसन्निट्ठानं । **परिग्गहो**ति तण्हादिट्ठिवसेन परिग्गहकरणन्ति वेदितब्बं । “अस्मी”ति, “अहमस्मी”ति, “अयमहमस्मी”ति, “भविस्स”न्ति, “रूपी भविस्स”न्ति, “अरूपी भविस्स”न्ति, “सज्जी भविस्स”न्ति, “असज्जी भविस्स”न्ति, “नेवसज्जीनासज्जी भविस्स”न्ति एवं वुत्तानि इमानि नव चलनट्टेन **इज्जितानि** नाम । इमानेव मज्जनट्टेन **मज्जितानि**, विप्फन्दनतो **विप्फन्दितानि**, पपञ्चनतो **पपञ्चितानि**, तानेव तेहि तेहि कारणेहि सङ्कतत्ता **सङ्कतानि** च नाम होन्ति । सब्बेहि तेहि पञ्चहि नवकेहि मानो एव कथितो । सोपि हि “अस्मी”ति आदीहि सज्जीहि च आकारेहि दिट्ठि विय पवत्ततीति । नवकं ।

दसकेसु पन लोभो दोसो मोहो मानो दिट्ठि विचिकिच्छा थिनं उद्धच्चं अहिरिकं अनोत्तप्पन्ति इमे दस किलेसा एव **किलेसवत्थूनि** नाम । “अनत्थं मे अचरी”ति आदयो नव खाणुकण्टकादीसु अट्ठानआघातेन सङ्गि **दस आघातवत्थूनि** नाम । पाणातिपातादयो **दस अकुसलकम्मपथा** नाम । कामरागसंयोजनं पटिघमानदिट्ठिविचिकिच्छासीलब्बतपरामासभवरगइस्सामच्छरियअविज्जासंयोजनन्ति इमानि **दस संयोजनानि** नाम । मिच्छादिट्ठिमिच्छासङ्कप्पादयो अट्ठ, मिच्छाजाणमिच्छाविमुत्तीहि सङ्गि **दस मिच्छन्ता** नाम । तत्थ **मिच्छाजाणन्ति** पापकिरियासु उपायचिन्तावसेन चैव पापकं कत्वा “सुकत्तं मया”ति पच्चवेक्खणवसेन च पवत्तो मोहो । **मिच्छाविमुत्तीति** अविमुत्तस्सेव सतो विमुत्तसज्जिता । “नत्थि दिन्नं, नत्थि यिट्ठ”न्ति आदीहि दसहि आकारेहि पवत्तं नत्थिकदस्सनं **दसवत्थुका मिच्छादिट्ठि** नाम । “सस्सतो लोको, तथा असस्सतो, अन्तवा, अनन्तवा, तं जीवं तं सरीरं”न्ति वा, “अज्जं जीवं अज्जं सरीरं”न्ति वा, “होति तथागतो परं मरणा”ति वा, “न होति...पे... होति च न होति च, नेव होति न न होति तथागतो परं मरणा”ति वा एवं पवत्ता **दसवत्थुका अन्तग्गाहिका दिट्ठि** नाम । तत्थ **लोको**ति खन्धादयो, “अन्तवा”ति इदं परित्तं कसिणज्झानं सन्धाय वुत्तं । “अनन्तवा”ति इदं विपुलन्ति गहेतब्बं । **तथागतो**ति सत्तो । दसकं ।

अट्ठारसकेसु **तण्हाविचरितानीति** तण्हासमुदाचारा तण्हापवत्तियो । **अज्झत्तिकस्सुपादायाति** अज्झत्तिकं खन्धपञ्चकं उपादाय । इदं हि उपयोगत्थे सामिवचनं । तत्थ “अस्मीति होति, इत्थस्मीति होति, एवस्मीति होति, अज्जथास्मीति होति, तथा भविस्सन्ति, इत्थं भविस्सन्ति, एवं भविस्सन्ति, अज्जथा भविस्सन्ति होति, तथा अस्मीति, सातस्मीति होति, तथा सियन्ति, इत्थं सियन्ति, एवं सियन्ति, अज्जथा सियन्ति होति, तथा अपाहं सियन्ति, अपाहं इत्थं सियन्ति, अपाहं एवं सियन्ति, अपाहं अज्जता सियन्ति होती”ति एवं वुत्तानि इमानि अज्झत्तिकस्सुपादाय **अट्ठारस तण्हाविचरितानि** नाम ।

तत्थ **अस्मीति होतीति** अज्झत्तिकेसु खन्धपञ्चकेसु समूहतो “अहमस्मी”ति गहणे सतीति अत्थो । एवं पन गहणे सति ततो परं अनुपनिधाय, उपनिधाय वाति द्विधा गहणं होति । तत्थ **अनुपनिधाय**ति अज्जं आकारं अनुपनिधाय अनुपगम्म सकभावमेवारम्मणं कत्वा इत्थस्मीति होति । तस्स “खत्तियादीसु इदंपकारो अह”न्ति तण्हामानदिट्ठिवसेन गहणं होतीति अत्थो । उपनिधाय गहणं पन दुविधं होति समतो च असमतो च । तत्थ समतो गहणं एवस्मीति इदं, तस्स यथा अयं खत्तियो, ब्राह्मणादयो वा देवमनुस्सरूपीअरूपिआदयो वा, एवमहमस्मीति अत्थो । **अज्जथास्मीति** इदं पन असमतो गहणं, तस्स यथा इमे खत्तियादयो, ततो अज्जथा अहं हीनो वा अधिको वाति अत्थो । इमानि ताव पच्चुप्पन्नवसेन चत्तारि तण्हाविचरितानि, **भविस्सन्ति**आदीनि पन चत्तारि अनागतवसेन वुत्तानि । तेसं पुरिमचतुक्के वुत्तनयवसेन अत्थो वेदितब्बो । तत्थ **अस्मीति**आदिद्वयं सस्सतुच्छेदग्गाहवसेन वुत्तं । तत्थ हि अस्मीति सस्सतं, सीदतीति **सातं**, असस्सतं, इतो परानि **सियन्ति**आदीनि चत्तारि संसयपरिवितक्कवसेन वुत्तानि । **अपाहं सियन्ति**आदीनि चत्तारि “अपि नामाहं भवेय्य”न्ति एवं पवत्तपत्थनाकप्पनवसेन वुत्तानीति दट्ठब्बं । अट्ठारसकं पठमं ।

दुतिये **बाहिरस्सुपादायाति** बाहिरं खन्धपञ्चकं उपादाय । तत्थ “इमिना अस्मीति होति, इमिना इत्थस्मीति होति, इमिना एवस्मीति होति, इमिना

अञ्जथास्मीति होती”ति आदिना अनन्तरे वृत्तनयेन बाहिरस्सुपादाय **अट्टारस तण्हाविचरितानी**ति वेदितव्वानि । “इमिना”ति पदमत्तमेव हेत्थ पुरिमेहि विसेसो । तत्थ **इमिना**ति इमिना बाहिरेन रूपेन वा...पे०... विञ्जाणेन वाति अत्थो । तत्थ च छत्तखग्गबीजनिअन्नपानधनधञ्जादिउपकरणवसेन बाहिरं रूपं वेदितव्वं । दासदासिजातिपरिजनहत्थिअस्सादिउपकरणवसेन वेदनादयो वेदितव्वो । इमेहि बाहिरेहि रूपादीहि “इत्थस्मीति एवस्मी”ति आदिना सब्बत्थ योजना वेदितव्वो । अट्टारसकं दुतियं ।

इतरेसु पन **तदेकज्झं अभिसंयूहि**त्वाति आदीसु तदुभयं अट्टारसकं एकतो योजेत्वा छत्तिसतण्हाविचरितानि होन्ति, एवं एकेकस्स पुग्गलस्स अतीतकाले द्विन्नं अट्टारसकानं वसेन छत्तिस, तथा अनागते छत्तिस होन्ति । पच्चुप्पन्ने पन एकस्स यथालाभवसेन तानिपि लब्धन्ति, सब्बसत्तानं वसेन पच्चुप्पन्नेपि छत्तिस लब्धन्ति । इति एवं वृत्तेन प्रकारेण तं सब्बं एकतो कत्वा सब्बसत्तानं कालत्तयेपि छन्नं अट्टारसकानं वसेन अट्टसतं तण्हाविचरितानि होन्तीति अत्थो । **अट्टतण्हाविचरितसतं** होतीति एत्थापि एवमेव अत्थो दट्टव्वो ।

तण्हाविचरितानि निट्ठितानि ।

**यानि चाति** आदीसु यानि चेत्थ द्वासट्ठि दिट्ठिगतानि वत्तव्वानि, तानि ब्रह्मजालनामके **दीघनिकायस्स** पठमसुत्तन्ते (दी० नि० १.२९ आदयो) सत्थारा सयं आहच्च भासितानीति अत्थो । ब्रह्मजाले हि चत्तारो सस्सतवादा, चत्तारो एकच्चसस्सतिका, चत्तारो अन्तानन्तिका, चत्तारो अमराविकखेपिका, द्वे अधिच्चसमुप्पन्निका, सोळस सञ्जीवादा, अट्ट असञ्जीवादा, अट्ट नेवसञ्जीनासञ्जीवादा, सत्त उच्छेदवादा, पञ्च दिट्ठधम्मनिब्बानवादाति इमानि **द्वासट्ठि दिट्ठिगतानि** सनिदानानि नानानयतो वृत्तानि, तत्थ वृत्तनयेनेव नेसं विभागो वेदितव्वो । अयं तावेत्थ पदत्थानुसारतो विनिच्छयो, सेसोपेत्य विनिच्छयो पदत्थे वृत्तानुसारतोव सुविञ्जेय्योति ।

खुदकवत्थुविभङ्गमातिकथवण्णना निट्ठिता ।

### धम्महदयविभङ्गमातिकथवण्णना

धम्महदयविभङ्गमातिकाय पन पदत्थादितो विनिच्छयो पुब्बे वृत्तोव । यस्मा पन भगवता हेट्ठा नानानयतो विभत्तानञ्जेव खन्धायतनादीनं द्वादसन्नं धम्मकोट्टासानं पुन सब्बसङ्गाहिकचतुभूमुप्पत्तितप्परियापन्तादीहि दसहि वारेहि अपुब्बनयसहस्सविभावकेहि सब्बधम्माधिप्पायसङ्घातेहि धम्महदयेहि विभागदस्सनत्थमेवायं विभङ्गो वृत्तो, तस्मा विभङ्गनयतो चेत्थ विनिच्छयो होति । विभङ्गे हि पठमं “कति खन्धा”ति आदिना सपुच्छकं द्वादसपदिकं मातिकं निक्खिपित्वा हेट्ठा वृत्तानुसारेनेव चतुभूमकसामञ्जतो सब्बसङ्गाहिकवारो नाम विभत्तो, तत्थ सत्त फस्सादयो सत्तन्नं विञ्जाणधातूनं वसेन वेदितव्वो ।

दुतियो पन वारो तेसं चतूसु भूमीसु चतूहि कोट्टासेहि उप्पत्तानुप्पत्तिदस्सनवसेन पवत्तो । तत्थ पठमकोट्टासे ताव —

“कामधातुया कति खन्धा...पे०... कति चित्तानि? कामधातुया पञ्चक्खन्धा, द्वादसायतनानि, अट्टारस धातुयो, तीणि सच्चानि, बावीसतिन्द्रियानि, नव हेतू, चत्तारो आहारा, सत्त फस्सा, वेदना, सञ्जा, चेतना, चित्तानी”ति —

मातिकं निक्खिपित्वा विभत्ता । तत्थ यस्मा चतुभूमकापि धम्मा येभुय्येन कामावचरसत्तानं उप्पज्जन्ति, न कामावचराव । तेनेत्थ “पञ्चक्खन्धा”ति आदिना चतुभूमकापि वृत्ता । तत्थुप्पज्जनकधम्मा हेत्थ अधिप्पेता, न तंभूमिपरियापन्नाव । रूपधातुआदीसुपि एसेव नयो ।

एत्थ च **तीणि सच्चानी**ति इदं निरोधसच्चस्स देसविनिमुत्तताय कत्थचि देसे अनिद्विसितव्वतो तं वज्जेत्वा वृत्तं । कारणसापेक्खा हि धम्मा अत्तनो निस्सयकारणभूतं देसं समावसन्ति अकारणस्स अनिस्सयत्ता, यथा वा कदाचि उपलब्धमाना धम्मा कालनियतताय अत्तनो सङ्घतत्तं सूचेन्ति । अञ्जथा इतरकालेसुपि भावस्स च पसङ्गतो, एतरहिपि वा अभावस्स, एवं क्वचि देसे उपलब्धमानापीति गहेतव्वं । सब्बदेसअव्यापिता पन असङ्घतस्स, सङ्घतस्स वा असम्भवतो एव नोपपज्जति, तस्मा देसकालविनिमुत्तमेव असङ्घतन्ति गहेतव्वं ।

दुतियकोट्टासे पन —

“रूपधातुया पञ्चक्खन्धा, छ आयतनानि, नव धातुयो, तीणि सच्चानि, चुदिसिन्द्रियानि, अट्ट हेतू, तयो आहारा, चत्तारो फस्सा...पे०... चत्तारि चित्तानी”ति —

मातिकं निक्खिपित्वा विभत्ता । यस्मा पन रूपीनं धानादीनं अभावेन विज्जमानानिपि गन्धायतनादीनि आयतनादिकिच्चं न करोन्ति, तस्मा ते वज्जेत्वा “छ आयतनानि, नव धातुयो”ति आदि वृत्तं न तेसं अभावा । केचि पन “रूपलोके गन्धरसा कबळीकारो आहारो च महाभूतानञ्च फोट्ठब्बकिच्चता नत्थि, तेनेव पाळियं न उट्ठटा”ति वत्ता तं साधेतुं बहु हेतुपटिरूपकं वत्ता पपज्जेन्ति, तं तेसं मतिमत्तमेवाति न गहेतव्वं । गन्धादीनं अविनिब्भोगत्ता, फोट्ठब्बत्ता,

धातुसंभावता च धानादित्तयभावद्वयसुखदुःखदोमनस्सिन्द्रियानि, पन दोमनस्सहेतुकबळीकाराहारधानादित्तयसम्पत्सादीनि च वज्जेत्वा चुद्वसिन्द्रियादिभावो वेदितब्बो ।

ततियकोट्ठासे पन —

“अरूपधातुया चत्तारो खन्धा, द्वे आयतनानि, द्वे धातुयो, तीणि सच्चानि, एकादसिन्द्रियानि, अट्ट हेतू, तयो आहारा, एको फस्सो...पे०... एकं चित्तं”न्ति —

मातिकं निक्खिपित्वा विभत्ता । एत्थ च चक्खुसोतअनज्जातज्जस्सामीतिन्द्रियानमि अभावा एकादसिन्द्रियानि वेदितब्बानि ।

चतुत्थकोट्ठासे पन —

“अपरियापन्ने चत्तारो खन्धा, द्वे आयतनानि, द्वे धातुयो, द्वे सच्चानि, द्वादसिन्द्रियानि, छ हेतू, तयो आहारा, एको फस्सो...पे०... एकं चित्तं”न्ति —

मातिकं निक्खिपित्वा विभत्ता । यस्मा च ओकासवसेन वा सत्तुप्पत्तिवसेन वा अपरियापन्नधातु नाम नत्थि, तस्मा “अपरियापन्नधातुया”ति अवत्वा निब्बत्तितलोक्ततरमेव दस्सेतुं “अपरियापन्ने चत्तारो खन्धा”तिआदि वुत्तं । एवं चतूहि कोट्ठासेहि दुतियो वारो वेदितब्बो ।

ततियो पन वारो —

“रूपक्खन्धो कामधातुपरियापन्नो, चत्तारो खन्धा सिया कामधातुपरियापन्ना, सिया न कामधातुपरियापन्ना”तिआदिना —

चतूसु भूमीसु चतूहि कोट्ठासेहि तंतंभूमिपरियापन्नधम्मदस्सनवसेन पवत्तो, सो च हेट्ठा वुत्तानुसारेण सक्का जातुन्ति न वित्थारितो । तत्थ च **कामधातुपरियापन्नो**ति कामावचरभावेन तत्थ अन्तोगथो कामावचरोति अत्थो । सेसेसुपि एसेव नयो ।

चतुत्थो पन वारो तीसु भूमीसु चतूहि कोट्ठासेहि पटिसन्धिक्खणे उप्पज्जनकानुप्पज्जनकधम्मदस्सनवसेन पवत्तो । तत्थ पठमकोट्ठासे ताव —

“कामधातुया उपपत्तिक्खणे सब्बेसं पञ्चक्खन्धा पातुभवन्ति, कस्सचि एकादसायतनानि पातुभवन्ति, कस्सचि दसायतनानि पातुभवन्ति, कस्सचि अपरानि दस, कस्सचि नव, कस्सचि सत्त, कस्सचि एकादस धातुयो...पे०... सत्त धातुयो । सब्बेसं एकं सच्चं पातुभवति । कस्सचि चुद्वसिन्द्रियानि, कस्सचि तेरस, कस्सचि अपरानि तेरस, कस्सचि द्वादस, कस्सचि दस, कस्सचि नव, कस्सचि अपरानि नव, कस्सचि अट्ट, कस्सचि अपरानि अट्ट, कस्सचि सत्त, कस्सचि पञ्च, कस्सचि चत्तारिन्द्रियानि पातुभवन्ति, कस्सचि तयो हेतू पातुभवन्ति, कस्सचि द्वे, कस्सचि अहेतुका पातुभवन्ति । सब्बेसं चत्तारो आहारा, एको फस्सो...पे०... एकं चित्तं पातुभवती”ति —

मातिकं निक्खिपित्वा विभत्ता । तत्थ पटिसन्धिक्खणे कामावचरानं ओपपातिकानं, आपायिकानं, देवमनुस्सानं परिपुण्णायतनानं सद्दायतनवज्जितानि एकादसायतनानि पातुभवन्ति, तानेव एकादस धातुयो होन्ति । सद्दो हि एकन्तेन पटिसन्धियं न उप्पज्जति, तेसज्जेव पन जच्चन्धानं दस, जच्चबधिरानं अपरानि दस, जच्चन्धबधिरानं नव, गम्भसेय्यकानं रूपगन्धरसकायफोड्डम्भमनोधम्मवसेन सत्त आयतनधातुयो पातुभवन्ति । ओपपातिकानं तिहेतुकानं मनच्छद्धानि इन्द्रियानि, भावद्वये एकं, जीवित्तिन्द्रियं, सोमनस्सुपेक्खिन्द्रियेसु एकं, सद्दादीनि पञ्चाति चुद्वसिन्द्रियानि, तेसं द्विहेतुकानं पञ्चिन्द्रियं वज्जेत्वा तेरस, पठमकणिकानं मनुस्सानं तिहेतुकानं भाविन्द्रियं वज्जेत्वा अपरानिपि तेरस, तेसज्जेव दुहेतुकानं द्वादस, गम्भसेय्यकानं पन तिहेतुकानं पुरिमेसु चुद्वससु चक्खादीनि चत्तारि वज्जेत्वा दस, तेसं दुहेतुकानं नव, ओपपातिकानं अहेतुकानं परिपुण्णायतनानं पुरिमेसु चुद्वससु सद्दादीनि वज्जेत्वा अपरानि नव, तेसज्जेव जच्चन्धानं अट्ट, तथा बधिरानं, अन्धबधिरानं पन सत्त, गम्भसेय्यकानं पन अहेतुकानं कायमनोभावजीवितउपेक्खिन्द्रियानि पञ्च, तेसज्जेव नपुंसकानं चत्तारि पातुभवन्ति । अहेतुकचित्तेसु हि विज्जमानापि एकगता समाधिन्द्रियतं न गच्छति, मनोविज्जाणधातुवसेन पन “एको फस्सो”तिआदयो वेदितब्बा ।

दुतियकोट्ठासे पन —

“रूपधातुया उपपत्तिक्खणे ठपेत्वा असज्जसत्तानं देवानं पञ्चक्खन्धा पातुभवन्ति । पञ्चायतनानि, पञ्च धातुयो, एकं सच्चं, दसिन्द्रियानि, तयो हेतू, तयो आहारा, एको फस्सो...पे०... एकं चित्तं”न्ति —

मातिकं निक्खिपित्वा विभत्ता । तत्थ चक्खुरूपसोतमनोधम्मानं वसेन पञ्चायतनधातुयो वेदितब्बा । एत्थापि गन्धरसफोड्डब्बानं अग्गहणे कारणं पुब्बे

वृत्तमेव । चक्षुषोतमनोजीवितन्द्रियानि, सोमनस्सुपेक्खानं अज्जरं, सद्वादीनि पञ्चाति दसिन्द्रियानि वेदितब्बानि ।

ततियकोट्ठासे पन —

“असज्जसत्तानं देवानं उपपत्तिक्खणे एको खन्धो पातुभवति रूपक्खन्धो, द्वे आयतनानि रूपायतनं धम्मायतनं, द्वे धातुयो रूपधातु धम्मधातु, एकं दुक्खसच्चं, एकं रूपजीवितन्द्रियं, असज्जसत्ता देवा अहेतुका, अनाहारा, अफस्सका...पे०... अचित्तका”ति —

सनिद्देसमातिका निक्खित्ता । एत्थ च रूपम्पि किञ्चापि तेसं आयतनादिकिच्चं न करोति, सविज्जाणकरूपीसु पन गहितत्ता इधापि गहितं । गन्धादयो पन तत्थ न गहितत्ता इधापि न गहिता, नो अविज्जमानताय । एकतलवासिकानं वा सेसब्रह्मानं चक्षुषोविसयत्ता इधापि रूपायतनं उद्धटं, असज्जीनं पन पञ्चायतनानि, एको आहारो उप्पज्जतीति वेदितब्बं ।

चतुत्थकोट्ठासे —

“अरूपधातुया उपपत्तिक्खणे चत्तारो खन्धा, द्वे आयतनानि, द्वे धातुयो, एकं सच्चं, अट्ठिन्द्रियानि, तयो हेतू, तयो आहारा, एको फस्सो...पे०... एकं चित्तं”न्ति —

मातिकापदानि निक्खिपित्वा विभत्ता । एत्थ च मनोजीवितउपेक्खिन्द्रियानि, सद्वादीनि पञ्चाति अट्ठिन्द्रियानि वेदितब्बानि । सेसं सुविज्जेय्यमेव । एवं चतूहि कोट्ठासेहि चतुत्थो वारो वेदितब्बो ।

पञ्चमो पन वारो तेसं धम्मानं भूमन्तरवसेन “कामावचरधम्मा, न कामावचरा...पे०... परियापन्ना”ति चत्तारो दुके मातिकावसेन निक्खिपित्वा विभजनवसेन पवत्तो, सो हेट्ठा वृत्तत्थोव ।

छट्ठो पन वारो सम्मुतिदेवउपपत्तिदेवविषुद्धिदेवे निद्विसित्वा मनुस्सदेवगतीसु उप्पादककम्मआयुप्पमाणदस्सनवसेन वृत्तो । तत्थायं सङ्खेपत्थो — सत्ता हि दानसीलादिकामावचरकुसलं कत्वा मनुस्सलोके खत्तियमहासालादिकुलेसु चेव चातुमहाराजिकतावतिसयामतुसितनिम्मानरतिपरनिमित्तवसवत्तिसङ्घातेसु छसु देवलोकेसु च उप्पज्जन्ति, तत्थ सिनेरुपब्बतवेमज्झपरिभण्डपब्बततो पट्ठाय हेट्ठा याव भूमि तिरियं चक्कवाळपब्बतं आहच्च एत्थन्तरे पब्बतआकासरुक्खपथविनिस्सिता चातुमहाराजचन्दसूरिया सब्बे चातुमहाराजिका । ततो उद्धं चक्कवाळपरियन्तं तावतिसादयो यथाक्कमं उपरुपरि ठिताति वेदितब्बा । देवलोकोपि परम्परचक्कवाळपब्बतं अप्पत्तो नाम नत्थि ।

पठमज्झानं पन परित्तं भावेत्वा ब्रह्मपारिसज्जेसु उप्पज्जन्ति, मज्झिमं भावेत्वा ब्रह्मपुरोहितेसु, पणीतं भावेत्वा महाब्रह्मेसु, इमे तयोपि जना पठमज्झानभूमियं एकतले वसन्ति । आयुआभादिभेदेन पनेसं भेदो, एवं उपरिपि ।

चतुक्कनये पन दुतियज्झानं, पञ्चकनये दुतियततियज्झानञ्च परित्तं, मज्झिमं, पणीतञ्च भावेत्वा परित्ताभाअप्पमाणाभाआभस्सरेसु उप्पज्जन्ति । ततियज्झानं परित्तादिवसेन भावेत्वा परित्तसुभअप्पमाणसुभसुभकिण्हेसु । चतुत्थज्झानं पन भावेत्वा आरम्मणमनसिकारछन्दाधिमुत्तिआदिनानत्ततो केचि असज्जीसु, केचि वेहफलेसु, केचि अविहेसु, अतप्पेसु, सुदस्सेसु, सुदस्सीसु, केचि अकनिट्ठेसु, आकासानज्जायतनादीसु चतूसु च यथाक्कमं उप्पज्जन्ति । तत्थ हि एकच्चे तित्थिया “चित्तं निस्साय रज्जनदुस्सनादयो, तन्निदानानि च दुक्खानि समुप्पज्जन्ती”ति चित्ते दोसं दिस्वा “दिट्ठधम्मनिब्बानमेत”न्ति सज्जाविरागं जनेत्वा ततूपपत्तिया ज्ञानं भावेत्वा रूपकायमत्ता ठिता वा निसिन्ना वा निपन्ना वा हुत्वा निब्बत्तित्वा तत्थेव पञ्चकप्पसतानि तिट्ठन्तीति वेदितब्बा ।

अट्ठसमापत्तिलाभीनं कतरं ज्ञानं विपच्चतीति? पगुणं, सब्बेसु पगुणेसु यस्स विपाकभूमि पत्थेति, तंपत्थनाय च असति यं मरणसमये समापज्जति, तं, तस्मिम्पि असति उत्तमवसेन नेवसज्जानासज्जायतनं विपच्चति । सुद्धावासेसु च अविहादीसु अनागामिवज्जिता सत्ता न उप्पज्जन्ति, अनागामिनो पन असज्जीवज्जितब्रह्मलोकेसु सब्बत्थ उप्पज्जितुं लभन्ति । सब्बेसम्पि च अरियानं ततूपपत्तितो उपरूपपत्तिपि, न हेट्ठूपपत्ति । ते हि पठमज्झानभूमियं निब्बत्ता अनागामिनो नव ब्रह्मलोके सोधेत्वा मत्थके वेहफलेसु ठिता परिनिब्बन्ति, न निवत्तन्ति अरियानं हेट्ठूपपत्तिअभावा ।

वेहफलअकनिट्ठनेवसज्जानासज्जायतनभवा तयोपि सेट्ठभवा नाम । इमेसु तीसु ठानेसु निब्बत्ता अनागामिनो नेव उद्धं गच्छन्ति, न अधो । तत्थेव परिनिब्बायन्ति । मनुस्सलोके च सेखा गिहिभावे यावजीवं तिट्ठन्ति, न असेखा । ते हि अरहतं पत्तदिवसे पब्बज्जन्ति वा, परिनिब्बन्ति वा । भुम्मदेवेसु पन खीणासवापि यावजीवं तिट्ठन्ति । छसु कामावचरदेवेसु सोतापन्नसकदागामिनोव तिट्ठन्ति, अनागामिनो पन तदहेव रूपभवं गन्तुं वट्ठति खीणासवेन परिनिब्बातुन्ति गहेतब्बं । एवं इमासु सत्तवीसतिया भूमीसु परियापन्नमनुस्सदेवब्रह्मलोकेसु निब्बत्तसत्तेसु मनुस्सानं ताव इमस्मिं बुद्ध्यादेव वस्ससतं आयुप्पमाणं, अप्पं वा भिय्यो । आपायिकानं, भुम्मदेवानञ्च कदाचि आयुपरिच्छेदो नत्थि, कम्ममेव पमाणं । ते हि सत्ताहेनपि मरन्ति, कप्पम्पि तिट्ठन्तीति ।

चातुमहाराजिकानं पन मानुसकानि पञ्जास वस्सानि एकं रत्तिन्दिवं, ताथ रत्तिया तिस रत्तियो मासो, तेन मासेन द्वादसमासियो संवच्छरो, तेन संवच्छरेन दिब्बानि पञ्चवस्ससतानि आयुप्पमाणं । तानि मनुस्सगणनाय नवुतिवस्ससतसहस्सानि होन्ति । तावतिसानं मानुसकं वस्ससतं एकं रत्तिन्दिवं कत्वा एवमागतं दिब्बं वस्ससहस्सं । एवं यामादीनं वस्सगणनञ्च दिगुणं कत्वा हेट्ठिमतो दिगुणचतुग्गुणं आयुप्पमाणं वेदितब्बं ।

ब्रह्मेसु पन ब्रह्मपारिसज्जानं कप्पस्स ततियो भागो आयुप्पमाणं, ब्रह्मपुरोहितानं उपड्डकप्पो, महाब्रह्मानं एको कप्पो, परित्ताभानं द्वे कप्पाति एवं उपरूपरि दिगुणं कत्वा याव सुभकिण्हा योजेतब्बं । सुभकिण्हानं हि चतुसट्ठिकप्पं आयुप्पमाणं, असज्जीनं, वेहप्फलानञ्च पञ्चकप्पसतानि, अविहानं कप्पसहस्सन्ति उपरूपरि दिगुणवसेन याव अकनिट्ठा योजेतब्बं । अकनिट्ठानं हि सोळसकप्पसहस्सानि, अरूपानं चतुन्नं यथाक्कमं वीसति, चत्तारि, सट्ठि, चतुरासीति कप्पसहस्सानि आयुप्पमाणन्ति ।

उक्खित्ता पुज्जतेजेन, कामरूपगतिं गता ।  
भवग्गतम्पि सम्पत्ता, पुनागच्छन्ति दुग्गतिं ॥

ताव दीघायुका सत्ता, चवन्ति आयुसङ्ख्या ।  
नत्थि कोचि भवो निच्चो, इति वुत्तं महेसिना ॥

तस्मा हि धीरा निपका, निपुणा अत्थचिन्तका ।  
जरामरणमोक्खाय, भावेन्ति मग्गमुत्तमं ॥

भावयित्वा सुचिं मग्गं, निब्बानोगधगामिनं ।  
सब्बासवे परिज्जाय, परिनिब्बन्ति अनासवाति ॥ (विभ० १०२९) ।

अयं छट्ठवारे नयो ।

सत्तमो पन वारो तेसं खन्धादीनं अभिज्जेय्यादिभावविभावनवसेन पवत्तो । तत्थ हि —

“रूपक्खन्धो अभिज्जेय्यो, परिज्जेय्यो, न पहातब्बो, न भावेतब्बो, न सच्छिकातब्बो । चत्तारो खन्धा अभिज्जेय्या परिज्जेय्या, सिया पहातब्बा, सिया भावेतब्बा, सिया सच्छिकातब्बा, सिया न पहातब्बा न भावेतब्बा न सच्छिकातब्बा”तिआदिना —

द्वादसपि कोट्टासा वित्थारतो विभत्ता । तत्थ लक्खणपरिग्गाहिकाय पञ्जाय खन्धादयो सब्बे धम्मा अभिज्जेय्या । जाततीरणपहानपरिज्जासु यथायोगं याय कायचि परिज्जाय वसेन सब्बेपि धम्मा परिज्जेय्या । लोकुत्तरधम्मापि जातपरिज्जेय्याव । अकुसला पन पहातब्बा । मग्गो भावेतब्बो, फलं, निब्बानञ्च सच्छिकातब्बं । तत्थ रूपक्खन्धो जाततीरणवसेन परिज्जेय्यो । विपस्सनाविसये हि सब्बं तीरणपरिज्जाय परिज्जेय्यन्ति । इमिना नयेन सब्बत्थ अभिज्जेय्यादिभावो वेदितब्बो ।

अट्ठमो पन वारो तेसं सारम्मणताविभावनवसेन पवत्तो, नवमो पनेसं दिट्ठसुतमुतविज्जातेसु सङ्गहदस्सनवसेन । दसमो कुसलत्तिकादीहि सरणदुकपरियोसानेहि तिकदुकेहि विभागदस्सनवसेन पवत्तो, तेपि हेट्ठा वुत्तनयावाति अयमेत्थ सङ्केपो, वित्थारो पनेत्थ हेट्ठा वुत्तोयेव । आदितो पट्ठाय सब्बत्थ **विभङ्गपाळिअट्ठकथासु** (विभ० ९७८ आदयो; विभ० अट्ठ० ९७८ आदयो) गहेतब्बोति ।

धम्महृदयविभङ्गमातिकथवण्णना निट्ठिता ।

मोहविच्छेदनिया अभिधम्ममातिकथवण्णनाय

विभङ्गमातिकथवण्णना निट्ठिता ।

### ३. धातुकथामातिका

इदानीं विभङ्गमातिकानन्तरं —

अयं धातुकथादीनं, सम्पत्ता अत्थवण्णना ।  
मातिकानं यतो तस्मा, पञ्चन्नम्पि यथारहं ॥

अनुत्तानत्थतो चेव, सङ्खेपेनत्थनिच्छया ।  
विभङ्गनयतो चेव, होति संवण्णनानयो ॥

तत्थ धातुकथामातिकाय ताव संवण्णना होति । सा पनेसा निक्खेपतो पञ्चधा ठिता — नयमातिका अब्भन्तरमातिका नयमुखमातिका लक्खणमातिका बाहिरमातिकाति । तत्थ “सङ्गहो, असङ्गहो...पे... विप्पयुत्तेन सङ्गहितं असङ्गहित”न्ति अयं चुदसहि पदेहि निक्खित्ता सङ्गहादिकेन नयेन धातुकथाय धम्मा विभत्ताति दस्सेतुं ठपितत्ता **नयमातिका** नाम, या “मूलमातिका”तिपि वुच्चति ।

“पञ्चक्खन्धा...पे... मनसिकारो”ति अयं पञ्चवीसाधिकेन पदसतेन निक्खित्ता सङ्गहादिनयेन विभजितब्बभावेन धातुकथाय अब्भन्तरे एव ठपितत्ता **अब्भन्तरमातिका** नाम, या “धातुकथामातिका”तिपि वुच्चति ।

“तीहि सङ्गहो, तीहि असङ्गहो, चतूहि सम्पयोगो, चतूहि विप्पयोगो”ति अयं चतूहि पदेहि निक्खित्ता खन्धादीसु च कुसलत्तिकादीसु च मातिकाधम्मेसु तीहि खन्धायतनधातुपदेहेव सङ्गहो असङ्गहो च, तथा चतूहि अरूपक्खन्धेहि सम्पयोगो, विप्पयोगो चाति इमेसं सङ्गहासङ्गहादीनं नयानं मुखानीति दस्सेतुं ठपितत्ता **नयमुखमातिका** नाम ।

“सभागो विसभागो”ति अयं द्वीहि पदेहि निक्खित्ता सभागविसभागलक्खणवसेनेव सङ्गहासङ्गहनया चेव सम्पयोगविप्पयोगनया च होन्तीति दस्सेतुं ठपितत्ता **लक्खणमातिका** नाम । सब्बापि धम्मसङ्गणी धातुकथाय मातिकाति अयं छसट्ठि तिकपदानि, द्वे च दुक्कपदसतानि सङ्घिपित्वा निक्खित्ता धातुकथा मातिकातो बहि ठपितत्ता **बाहिरमातिका** नाम । एवमेतित्सा पञ्चविधाय मातिकाय अयमनुत्तानत्थवण्णना ।

**सङ्गहो**तिआदीसु हि सङ्गहो ताव जातिसज्जातिकिरियागणनवसेन चतुब्बिधो । तत्थ “सब्बे खत्तिया आगच्छन्तु, या चावुसो विसाख, सम्मावाचा, यो च सम्माकम्मन्तो, यो च सम्माआजीवो, इमे धम्मा सीलक्खन्धे सङ्गहिता”ति (म० नि० १.४६२) अयं **जातिसङ्गहो** नाम । “सब्बे कोसलका आगच्छन्तु, यो चावुसो विसाख, सम्मावायामो, या च सम्मासति, यो च सम्मासमाधि, इमे धम्मा समाधिक्खन्धे सङ्गहिता”ति (म० नि० १.४६२) अयं **सज्जातिसङ्गहो** नाम, एकद्वाने जातिसम्बन्धभावेन सङ्गहोति अत्थो । “सब्बे हत्थारोहा आगच्छन्तु, या चावुसो विसाख, सम्मादिट्ठि, यो च सम्मासङ्कप्पो, इमे धम्मा पज्जाक्खन्धे सङ्गहिता”ति (म० नि० १.४६२) अयं **किरियासङ्गहो** नाम । “हज्जि चक्खायतनं रूपक्खन्धगणनं गच्छति, तेन वत रे वत्तब्बे ‘चक्खायतनं रूपक्खन्धेन सङ्गहित’”न्ति (कथा० ४७१) अयं **गणनसङ्गहो** नाम, अयमिध अधिपेत्तो । तप्पटिपक्खेन **असङ्गहो** वेदितब्बो । तेसं विकप्पतो **सङ्गहितेन असङ्गहितादीनि**, एकुप्पादेकनिरोधैकवत्थुकएकारम्माणतावसेन **सम्पयोगो**, तप्पटिपक्खतो **विप्पयोगो**, तेसं विकप्पतो सम्पयुत्तेन **विप्पयुत्तादीनि**, तदुभयसंसर्गविकप्पतो **सङ्गहितेन सम्पयुत्तं विप्पयुत्तन्ति**आदीनि च वेदितब्बानि । सेसं वुत्तत्थमेव । अयं तावेत्थ अनुत्तानपदत्थो ।

### सङ्गहासङ्गहपदत्थवण्णना

**अत्थविनिच्छयतो** पन यस्मा अब्भन्तरमातिकाय रूपक्खन्धादीनि, बाहिरमातिकाय कुसलादीनि च “सङ्गहो असङ्गहो”तिआदिकेहि नयमातिकापदेहि “तीहि सङ्गहो, तीहि असङ्गहो”तिआदिनयमुखमातिकावसेन यथारहं निद्देसत्थाय भगवता ठपितानि, तस्मा खन्धादीनं सङ्गहादीनं पाळियं वुत्तानुसारेनेव सङ्खेपतो अत्थविनिच्छयो होति । इमिना नयेन **विभङ्गनयो** सक्का जातुन्ति तं विसुं न वक्खाम ।

तत्थ सङ्गहासङ्गहवारे खन्धानं ताव अयं निद्देसे नयो — रूपक्खन्धो एकेन खन्धेन एकादसहि आयतनेहि एकादसहि धातूहि सङ्गहितो । चतूहि खन्धेहि एकेनायतनेन सत्ति धातूहि असङ्गहितो । तत्थ **एकादसहीति** मनायतनवज्जेहि । धम्मायतनेनापि हि केचि रूपधम्मा सङ्गहिता । **एकादसहीति** सत्तविज्जाणधातुवज्जाहि । सेसं सुविज्जेय्यमेव ।

वेदनादयो तयो खन्धा यथासकं एकेन खन्धेन एकेनायतनेन एकाय धातुया सङ्गहिता, चतूहि खन्धेहि एकादसहि आयतनेहि सत्तरसहि धातूहि असङ्गहिता, तथा विज्जाणक्खन्धोपि । केवलं पनेत्थ सत्तिहि विज्जाणधातूहि सङ्गहितो, एकादसहि धातूहि असङ्गहितोति एतकमेव विसेसो । तत्थ हि वेदनादीनं तिण्णं खन्धानं एकेन धम्मायतनेन च एकाय धम्मधातुया च सङ्गहितता वेदितब्बा । पाळियं पनेत्थ खन्धपदनिद्देसे, उपरि आयतनादिनिद्देसेसु च “रूपक्खन्धो च वेदनाक्खन्धो च द्वीहि खन्धेहि एकादसहायतनेहि एकादसहि धातूहि सङ्गहिता”तिआदिना (धातु० १५) द्विमूलकादिनयेनापि वित्थारनयो विभत्तो, सोपि इमिना एकमूलनयानुसारेन सब्बत्थ सुविज्जेय्योति न वित्थारयिम्हा । अयं खन्धपदनिद्देसनयो ।

आयतनधातुपदानमि खन्धपदे वुत्तानुसारेनेव तीहि सङ्गहो, तीहि असङ्गहो च यथायोगं योजेत्वा जातब्बो । केवलं पनेत्थ धम्मायतनधम्मधातूसु असङ्गत्तस्स खन्धसङ्गहाभावा तं ठपेत्वा सेसानं खन्धेसु सङ्गहो वेदितब्बो ।

सच्चेसु दुक्खसच्चं सब्बेहि खन्धायतनधातूहि । समुदयमगगसच्चाणि सङ्खारक्खन्धेन, धम्मायतनधम्मधातूहि च सङ्गहितानि । निरोधसच्चं खन्धेन असङ्गहितं, धम्मायतनधम्मधातूहि एव सङ्गहितं ।

इन्द्रियेषु जीवितिन्द्रियं द्वीहि रूपकखन्धसङ्खारकखन्धेहि । सुखिन्द्रियादीनि पञ्च वेदनाकखन्धेन, सङ्खादीनि सङ्खारकखन्धेन, सब्बानि चेतानि जीवितिन्द्रियादीनि, इत्थिन्द्रियपुरिसिन्द्रियादीनिपि धम्मायतनधम्मधातूहि सङ्गहितानि । सेसिन्द्रियानि सुविज्जेय्यानि ।

पटिच्चसमुप्पादेसु नामरूपं विज्जाणवज्जितेहि चतूहि खन्धेहि, एकादसहि आयतनधातूहि च सङ्गहितं । एत्थ हि पवत्तियं नामरूपस्सापि गहितत्ता सदायतनम्पि गहितन्ति वेदितब्बं । सदायतनं द्वीहि खन्धेहि, पसादविज्जाणभूतेहि छहि आयतनेहि, द्वादसहि धातूहि सङ्गहितं । उपपत्तिभवो पन कामभवभूतो पञ्चहि खन्धेहि, सदायतनवज्जितेहि एकादसहि आयतनेहि, सत्तरसहि धातूहि । रूपभवो पञ्चहि खन्धेहि, सदादिचतुक्कघानादित्तयतब्बिज्जाणवज्जेहि पञ्चहायतनेहि, अट्ठहि धातूहि सङ्गहितो । असञ्जीभवो एकेन रूपकखन्धेन, रूपधम्मवसेन द्वीहि आयतनधातूहि सङ्गहितो । घानादित्तयं पनेत्थ आयतनादिकिच्चाकरणतो आयतनधातूहि असङ्गहितम्पि रूपकखन्धेन सङ्गहितन्ति दट्ठब्बं । भवस्स च एकन्तमुपादिन्नत्ता पवत्तिविपाकानं चक्खुविज्जाणादीनं गहणेपि अनुपादिन्नसदायतनस्स इध अगगहणं दट्ठब्बं । अरूपभवो चतूहि खन्धेहि द्वीहि आयतनधातूहि । जातिजरामरणानि नामरूपधम्मनं लक्खणत्ता द्वीहि रूपकखन्धसङ्खारकखन्धेहि । सोकदुक्खदोमनस्सानि वेदनाकखन्धेन । उपायासो सङ्खारकखन्धेन, धम्मायतनधम्मधातूहि च सङ्गहितो । परिदेवो रूपकखन्धसदायतनसद्धातूहि । सेसानि पनेत्थ पटिच्चसमुप्पादङ्गानि, सतिपट्टानसम्मप्यधाना च सुविज्जेय्याव ।

इद्धिपादा द्वीहि खन्धेहि, आयतनेहि, धातूहि सङ्गहिता । एत्थ च चित्तिद्धिपादस्स धम्मधातुमनोविज्जाणधातुनियमतो सोळसहि धातूहि असङ्गहो वेदितब्बो । झानानि द्वीहि वेदनासङ्खारकखन्धेहि, एकेनायतनेन, एकाय धातुया च सङ्गहितानि । अप्पमज्जा एकेन खन्धेन, एकेन आयतनेन, एकाय धातुया सङ्गहिता । एवं पञ्चिन्द्रियादीनिपि । केवलं पन चित्तं सत्तहि विज्जाणधातूहि सङ्गहितन्ति एत्तकमेव विसेसो । सब्बेसम्पि चेस वुत्तावसेसेहि खन्धायतनधातूहि असङ्गहितभावो वेदितब्बो ।

इमिना नयेन बाहिरमातिकायपि “कुसला धम्मा, अकुसला धम्मा चतूहि खन्धेहि, द्वीहि आयतनेहि, धातूहि सङ्गहिता । अब्बाकता पन असङ्गहो खन्धतो ठपेत्ता पञ्चहि खन्धेहि द्वादसहि आयतनेहि अट्ठारसहि धातूहि सङ्गहिता”तिआदिना योजेत्ता सङ्गहासङ्गहो जातब्बोति अयमेत्थ सङ्खेपो, वित्थारो पन धातुकथापाळिअट्ठकथासु (धातु० ७७ आदयो; धातु० अट्ठ० ७७) गहेतब्बोति ।

निद्धितो “सङ्गहो असङ्गहो”ति पदस्स

अत्थविनिच्छयो ।

### सङ्गहितेन असङ्गहितपदत्थवर्णना

सङ्गहितेन असङ्गहितपदे सब्बेसं रूपकखन्धादिपदानं निद्देशो न सम्भवति । यानि पनेत्थ पदानि रूपेकदेसं, अरूपेन असम्मिस्सं विज्जाणेकदेसज्ज अज्जेन असम्मिस्सं दीपेन्ति, तेसमिध निद्देशो । तानि पन मनायतनधम्मायतनवज्जितानं दसायतनानं, धम्मधातुवज्जितानं सत्तरसन्नं धातूनं, सत्तरूपिन्द्रियानञ्च वसेन वेदितब्बानि, न रूपकखन्धादीनं । तेनेव पाळियं —

“दसायतना सत्तरस धातुयो,  
सत्तिन्द्रिया असञ्जाभवो एकवोकारभवो ।  
परिदेवो सनिदस्सनसप्पटिघं,  
अनिदस्सनं पुनदेव सप्पटिघं उपादा”ति ॥ (धातु० १७८) —

एवं उद्दानगाथा वुत्ता । रूपकखन्धेन हि रूपकखन्धोव सङ्गहितो, एवं वेदनाकखन्धादीहि च वेदनाकखन्धादयोव । तेषि च येहि केहिचि आयतनधातूहि असङ्गहिता नाम नत्थीति तेसं सङ्गहितेन असङ्गहितत्ताभावा यथावुत्तायतनानं वसेनेवेत्थ अत्थविनिच्छयो होति । इदं हेत्थ लक्खणं — यं खन्धपदेन सङ्गहितं हुत्वा आयतनधातुपदेहि असङ्गहितं, खन्धायतनपदेहि वा सङ्गहितं हुत्वा धातुपदेन असङ्गहितं, तस्स खन्धायतनधातूहि असङ्गहो वुच्चति । कथं? चक्खायतनेन ये धम्मा खन्धसङ्गहेन सङ्गहिता, आयतनसङ्गहेन, धातुसङ्गहेन च असङ्गहिता, ते धम्मा कतिहि खन्धेहि, आयतनेहि, धातूहि असङ्गहिता? ते धम्मा चतूहि खन्धेहि द्वीहि आयतनेहि अट्ठहि धातूहि असङ्गहिता । एवं रूपायतनादीसुपि पसादविसयभूतेसु धातूसु, रूपिन्द्रियादीसु च योजनक्कमो वेदितब्बो ।

तत्रायं नयो — चक्खायतनेन ये रूपधम्मा खन्धसङ्गहेन रूपकखन्धोति सङ्गहिता, आयतनधातुसङ्गहेन चक्खायतनेन असङ्गहिता, चक्खुधातुया असङ्गहिता, चक्खायतनचक्खुधातूहि एकस्सेवेतस्स चक्खुस्स विसुं आयतनधातूसु सङ्गहितत्ता ते चक्खायतनविरहिता सब्बे रूपधम्मा चतूहि अरूपकखन्धेहि चक्खायतनं मनायतनन्ति द्वीहि आयतनेहि चक्खुधातु सत्तविज्जाणधातूति अट्ठहि धातूहि असङ्गहिता । उपरि रूपायतनादीसुपि एसेव नयो । इमस्मिं हि वारे चक्खायतनस्स अत्तनो तीहिपि खन्धायतनधातुसङ्गहेहि सङ्गहितताय असङ्गहितत्ताभावा खन्धसङ्गहेन सङ्गहितं, आयतनसङ्गहेन असङ्गहितं, धातुसङ्गहेन असङ्गहितन्ति एवं तीहिपि सङ्गहितासङ्गहितविसेसनेहि विसिट्ठस्सेव “कतिहि खन्धेहि”तिआदिना खन्धादीहि असङ्गहस्स वुच्चमानत्ता च



अरूपकखन्धेहि सह बहिभूतता वेदितव्वा । यथा चेत्थ चक्खायतनेन उपलक्खितानं रूपधम्मानंयेव सङ्गहितेन असङ्गहितता, न चक्खायतनस्स, एवं उपरि रूपायतनादीहि उपलक्खितवारेपि यथारहं जातव्वा ।

सेसेसु पन चक्खुविज्जाणधातुया ये धम्मा खन्धसङ्गहेन सङ्गहिता, आयतनसङ्गहेन सङ्गहिता, धातुसङ्गहेन असङ्गहिता, ते धम्मा चतूहि खन्धेहि एकादसहि आयतनेहि द्वादसहि धातूहि असङ्गहिता । एवं सेसविज्जाणधातूसुपि । पटिच्चसमुप्पादङ्गेषु असज्जीभवेन ये धम्मा...पे०... ते धम्मा चतूहि खन्धेहि दसहायतनेहि सोळसहि धातूहि असङ्गहिता । उपादाधम्मोहि ये धम्मा...पे०... ते धम्मा चतूहि खन्धेहि एकादसहायतनेहि सत्तरसहि धातूहि असङ्गहिताति इमे चत्तारो वारा अपुब्बविसेसा समायेव । तत्थ चक्खुविज्जाणवारे द्वादसहीति छ विज्जाणधातुयो वज्जेत्वा अवसेसाहि धातूहि सेसा छ विज्जाणधातुयोव खन्धायतनसङ्गहेहि सङ्गहिता, धातुसङ्गहेनेव असङ्गहिता । अवसेसाहि द्वादसहि धातूहि असङ्गहिताति । एस नयो सेसविज्जाणधातूसुपि ।

दुतिये तीहायतनेहीति रूपायतनधम्मायतनमनायतनेहि । असज्जिब्रह्मलोके हि रूपायतनधम्मायतनवसेन द्वे आयतनानि उपपत्तिभवभावेन पाळियं आगतानि, ते पन खन्धेहि सङ्गहितानि, आयतनधातूसु असङ्गहितानि । तदवसेसानि नव रूपायतनानि, तानि तेहेव च द्वीहि मनायतनधम्मायतनेहि च असङ्गहितानि नाम होन्ति । नवहि धातूहीति रूपधातुधम्मधातूहि सङ्गि सत्तहि विज्जाणधातूहि ।

ततिये दसहीति रूपायतनधम्मायतनवज्जेहि । सोळसहीति रूपधातुधम्मधातुवज्जाहि । अनिदस्सनसप्पटिधानि नाम नव ओळारिकायतनानि, तानि तेहि खन्धसङ्गहेन सङ्गहितानि, आयतनधातुसङ्गहेहि च असङ्गहितानि, रूपायतनधम्मायतनानि द्वेपि सेसेहि आयतनधातूहि असङ्गहितानि नाम होन्ति ।

चतुत्थे एकादसहीति फोडुब्बायतनवज्जेहि फोडुब्बायतनस्स उपादाधम्मोहि आयतनादीसु असङ्गहितता । सेसं सुविज्जेय्यमेव । अयं सङ्गहितेन असङ्गहितपदे नयो ।

### असङ्गहितेन सङ्गहितपदत्थवण्णना

असङ्गहितेन सङ्गहितपदे पन यानि पदानि विज्जाणेन वा ओळारिकरूपेन वा असम्मिस्सं धम्मायतनेकदेसं दीपेन्ति, तानेव निद्वितीयन्ति, तानि पन वेदनादीनं तिण्णं खन्धानं, दुक्खसच्चवज्जितानं तिण्णं सच्चानं, पसादमनोवज्जितानं सोळसन्नं इन्द्रियानं, अविज्जासङ्खारफस्सवेदनातण्हुपादानकम्मभवजातिजरामरणसोकदुक्खदोमनस्सुपायासवसेन चुद्वसपच्चयाकारपदानञ्च वसेन वेदितव्वानि, न रूपकखन्धादीनं । तेनेव अट्ठकथायं —

“तयो खन्धा तथा सच्चा, इन्द्रियानि च सोळस ।

पदानि पच्चयाकारे, चुद्वसूपरि चुद्वस ॥

“समतिंस पदा होन्ति, गोच्छकेसु दसस्वथ ।

दुवे चूळन्तरदुका, अट्ठ होन्ति महन्तरा”ति ॥ (धातु० अट्ठ० १७९) —

एवं उद्दानगाथा वुत्ता । इदं हेत्थ लक्खणं — यं खन्धपदेन असङ्गहितं, आयतनधातुपदेहि सङ्गहितं, तस्सेव तीहि विसेसनेहि विसिद्धस्स खन्धादीहि सङ्गहो वुच्चति । कथं? वेदनाकखन्धेन ये धम्मा खन्धसङ्गहेन असङ्गहिता, आयतनधातुसङ्गहेहि सङ्गहिता, ते धम्मा कतिहि खन्धेहि, आयतनेहि, धातूहि सङ्गहिता? ते धम्मा असङ्गहितं खन्धतो ठपेत्वा तीहि खन्धेहि एकेनायतनेन एकाय धातुया सङ्गहिताति ।

तत्रायं नयो — वेदनाकखन्धेन हि निब्बानं, सुखुमरूपं, सज्जासङ्खारा च खन्धसङ्गहेन असङ्गहिता हुत्वा धम्मायतनधम्मधातुसङ्गहेन सङ्गहिता । तेसु निब्बानं खन्धसङ्गहं न गच्छति, सेसा तीहि रूपसज्जासङ्खारकखन्धेहि सङ्गहं गच्छन्ति, आयतनधातुयो पनेत्थ धम्मायतनधम्मधातूनं वसेनेव सब्बत्थ वेदितव्वा इतरासं असम्भवा, इमेसु च निब्बानमपि सङ्गहं गच्छति । तेनेव हि “असङ्गहितं खन्धतो ठपेत्वा”ति वुत्तं । तस्सायमत्थो — खन्धसङ्गहे एव असङ्गहितं ठपेत्वा, न इतरसङ्गहेसूति एवं सज्जाकखन्धादीसुपि योजना वेदितव्वा । अयं पन विसेसो — जीवितिन्द्रियेन ये धम्मा...पे०... ते धम्मा द्वीहि वेदनासज्जाकखन्धेहि सङ्गहिता, रूपारूपजीवितिन्द्रियेहि निब्बानवेदनासज्जाविज्जाणकखन्धा खन्धसङ्गहेन असङ्गहिता, तेसु च निब्बानवेदनासज्जाव आयतनधातुसङ्गहेन सङ्गहिताति । सेसं सुविज्जेय्यमेव । अयं असङ्गहितेन सङ्गहितपदे नयो ।

### सङ्गहितेन सङ्गहितपदत्थवण्णना

सङ्गहितेन सङ्गहितपदे पन यानि पदानि सङ्खारेकदेसं अज्जेन असम्मिस्सं दीपेन्ति वेदनेकदेसं वा सुखुमरूपं वा सद्देकदेसं वा, तानेव निद्वितीयन्ति । खन्धायतनधातूसु एकमपि कोट्टासं सकलेन गहेत्वा ठितपदानि न युज्जन्ति । तानि पन द्विन्नं समुदयमग्गसच्चानं, पन्नरसिन्द्रियानं, एकादसपटिच्चपदादीनञ्च वसेन वेदितव्वानि । इदं हेत्थ लक्खणं — यं अत्तना खन्धादिवसेन सङ्गहितेहि खन्धादितो सङ्गहितं, तस्सेव पठमं उद्धटपदस्स पुन

खन्धादीहि सङ्गहो वुच्चति ।

तत्रायं आदिपदे नयो — समुदयसच्चेन ये धम्मा खन्धादीहि तीहि सङ्गहेहिपि सङ्गहिता, तेहि धम्मेहि ये धम्मा खन्धादीहि तीहिपि सङ्गहिता, ते धम्मा एकेन खन्धेन एकेनायतनेन एकाय धातुया सङ्गहिताति । समुदयसच्चेन हि तण्हावज्जा सेसा सङ्गारा खन्धादीहि सङ्गहेहि सङ्गहिता, पुन तेहि च तण्हाव सङ्गहिता, सा च पुन सङ्गारक्खन्धधम्मायतनधम्मधातूहि सङ्गहिता । सेसेसुपि एसेव नयो । अयं सङ्गहितेनसङ्गहितपदे नयो ।

### असङ्गहितेनअसङ्गहितपदत्ववण्णना

असङ्गहितेनअसङ्गहितपदे पन यानि पदानि पञ्चक्खन्धाहकेहि दुक्खसच्चादीहि, विज्जाणेन सङ्गि सुखुमरूपगाहकेहि अचेतसिकादीहि च पदेहि विवज्जितानि रूपक्खन्धादीनि, तानेव निदिशीयन्ति । इदं हेत्थ लक्खणं — यं पठमं उद्धटेन रूपक्खन्धादिपदेन खन्धादितो असङ्गहितं, यं तेहि असङ्गहितं, तस्सेव पुन खन्धादीहि असङ्गहो वुच्चति ।

तत्रायं एकपदयोजना — रूपक्खन्धेन ये धम्मा खन्धादीहि तीहिपि असङ्गहेहि असङ्गहिता, तेहि धम्मेहि ये धम्मा खन्धादीहि तीहि असङ्गहिता, ते धम्मा एकेन खन्धेन एकेनायतनेन सत्तहि धातूहि असङ्गहिता । रूपक्खन्धेन हि चत्तारो खन्धा, निब्बानञ्च खन्धसङ्गहेन असङ्गहिता, आयतनादीहि पन विज्जाणमेव ठपेत्वा वेदनादयो धम्मायतनेन रूपक्खन्धेकदेसेन सङ्गहिताति विज्जाणमेव तीहिपि खन्धसङ्गहादीहि रूपक्खन्धेन असङ्गहितं नाम । तेन पुन विज्जाणेन सङ्गि सनिब्बाना चत्तारो खन्धा खन्धादीहि असङ्गहिता, ते सब्बेपि पुन विज्जाणभूतेन एकेन खन्धेन एकेनायतनेन सत्तहि धातूहि असङ्गहिताति । अयं असङ्गहितेनअसङ्गहितपदे नयो ।

### सम्पयोगविषययोगपदत्ववण्णना

सम्पयोगविषययोगपदे पन यानि पदानि निब्बानेन, रूपेन वा मिस्सेसु सत्तसु विज्जाणधातूसु एकायपि अविष्युत्ते अरूपधम्मे पकासेन्ति, तेसं धम्मायतनदुक्खसच्चादीनं निद्देसो न सम्भवति । काहिचि पन विज्जाणधातूहि विष्युत्तानं रूपमिस्सारूपधम्मानं, केवलानारम्माणानं वा सकलरूपक्खन्धानं वा पकासकानं रूपभवरूपक्खन्धकुसलादिपदानं सम्पयोगपदे एव निद्देसो न सम्भवति, विषययोगपदे पन सम्भवति । अरूपक्खन्धानं पन पच्चेकं, द्विन्नं, तिण्णं, तदेकदेसानं वा तदुभयेपि सम्भवति । “चतूहि सम्पयोगो, चतूहि विषययोगो, सभागो विसभागो”ति हि वचनतो चतूहि अरूपक्खन्धेव सभागानं एकसन्तानेन एकक्खणेव उप्पन्नानं अरूपक्खन्धानं एव अज्जमज्जं सम्पयोगो लब्धति । रूपधम्मानं पन रूपेन, निब्बानेन वा, निब्बानस्स च रूपेन सङ्गि सम्पयोगो नाम नत्थि, तथा रूपनिब्बानानं अरूपक्खन्धेहि । विसभागा हि ते तेसं यथा अरूपक्खन्धानं रूपनिब्बानेहि, एवं भिन्नसन्तानिकेहि नानक्खणिकेहि अरूपधम्मेहिपि सङ्गि नत्थियेव । तेषि हि तेसं सन्तानक्खणविसभागताय विसभागा एव । अयं पन विसभागता इध सामज्जतो न गहिता तेसं अविसेसेन सम्पयोगस्सापि सम्भवा । यत्थ पन विससेत्वा चक्खुविज्जाणतंसम्पयुत्तादयो निक्खित्ता, तत्थायम्पि विसभागता गहिता । यत्थ पन ये अनिद्धारितविससेना, तत्थापि सब्बथा सम्पयोगलक्खणं न सम्भवति । सो च तस्स एकन्तेन विसभागोति इध गहति ।

तत्रायं नयो — रूपक्खन्धो केनचि सम्पयुत्तोति? नत्थि । कतिहि विष्युत्तो? चतूहि खन्धेहि एकेनायतनेन सत्तहि धातूहि विष्युत्तो, एकेनायतनेन एकाय धातुया केहिचि विष्युत्तो । एस नयो चक्खायतनादिअनारम्माणेसुपि । सारम्माणेसु पन वेदनाक्खन्धो तीहि खन्धेहि एकेनायतनेन सत्तहि धातूहि सम्पयुत्तो, एकेनायतनेन एकाय धातुया केहिचि सम्पयुत्तो । एकेन खन्धेन दसहि आयतनेहि दसहि धातूहि विष्युत्तो, एकेनायतनेन एकाय धातुया केहिचि विष्युत्तो । एस नयो सज्जाक्खन्धादीसुपि ।

तत्थ एकेनाति मनायतनेन । सत्तहीति विज्जाणधातूहि । केहिचीति धम्मायतनधम्मधातुपरियापन्नेहि वेदनासज्जासङ्गारेहि । दुतियनये तीहीति अत्तानं ठपेत्वा सेसेहि अरूपक्खन्धेहि । केहिचि विष्युत्तोति धम्मायतनधम्मधातूसु सज्जासङ्गारेहि । केहिचि विष्युत्तोति रूपनिब्बानेहि । एवं उपरिपि सब्बत्थ यथानुरूपं जातब्बं । सेसं वुत्तनयमेव । अयं पन विससेो “समुदयमगसच्चादयो एकाय मनोविज्जाणधातुया सम्पयुत्ता, अधिमोक्खो पन मनोधातुमनोविज्जाणधातूहि द्वीहेवा”ति । अयं सम्पयोगविषययोगपदे नयो ।

### सम्पयुत्तेनविष्युत्तपदत्ववण्णना

सम्पयुत्तेनविष्युत्तपदे पन सम्पयोगारहपदेसु यानि पदानि धम्मधातुया सम्पयुत्ते धम्मे, विज्जाणञ्च अज्जेन असम्मिस्सं दीपेन्ति, तेसमेव निद्देसो । तानि पन चतुन्नं अरूपक्खन्धपदानं, मनायतनस्स, सत्तन्नं विज्जाणधातुनं, मनोपेक्खावसेन द्विन्नं इन्द्रियानं, विज्जाणफस्सवेदनानं तिण्णं पटिच्चसमुप्पादपदानं, फस्ससत्तकस्स, अदुक्खमसुखसवितक्कसविचारउपेक्खासहगतानं वसेन तिण्णं तिकपदानं, सत्तमहन्तरदुक्कपदादीनञ्च वसेन वेदितब्बानि, न इतरेसं असम्भवा । तेनेव अट्ठकथायं —

“चत्तारो खन्धायतनञ्च एकं,

द्वे इन्द्रिया धातुपदानि सत्त ।  
 तयो पटिच्चा अथ फस्ससत्तकं,  
 तिके तयो सत्त महन्तरे च ।  
 एकं सवितक्कं सविचारमेकं,  
 युत्तं उपेक्खाय च एकमेवा'ति ॥ (धातु० अट्ठ० ३०६) —

उद्दानगाथा वुत्ता । इदं हेत्थ लक्खणं — ये धम्मा पठमं उद्धटपदेन सम्पयुत्ता, तेहि ये धम्मा विप्पयुत्ता, तेसं खन्धादीहि विप्पयोगो वुच्चति ।

तत्रायं नयो — वेदनाक्खन्धेन ये धम्मा सम्पयुत्ता, तेहि धम्मेहि ये धम्मा विप्पयुत्ता, ते धम्मा चतूहि खन्धेहि एकेनायतनेन सत्तहि धातूहि विप्पयुत्ता, एकेनायतनेन एकाय धातुया केहिचि विप्पयुत्ता । चक्खुविज्जाणधातुया ये धम्मा सम्पयुत्ता, तेहि धम्मेहि ये धम्मा विप्पयुत्ता, ते धम्मा न केहिचि खन्धायतनेहि विप्पयुत्ता, एकाय पन धातुया विप्पयुत्ताति एवं सब्बत्थ योजना वेदितब्बा ।

तत्थ ते धम्माति रूपनिब्बानधम्मा, ते वेदनाय सम्पयुत्तेहि विप्पयुत्ता । एकेनाति मनायतनेन । दुतियनये ते धम्माति सप्पीतिका ते धम्मा । न केहिचीति पठमं उद्धटं चक्खुविज्जाणधातुं ठपेत्वा सेसा छविज्जाणधातु, तंसम्पयुत्ता, रूपं, निब्बानञ्च । तेहि सब्बेसं खन्धायतनानं सङ्गहितत्ता न केहिचि खन्धेहि, आयतनेहि वा विप्पयुत्ता । न हि सयं अत्तना विप्पयुज्जति, सम्पयुज्जति वाति । एकायाति चक्खुविज्जाणधातुया । सेसं सुविज्जेय्यमेव । अयं सम्पयुत्तेनविप्पयुत्तपदे नयो ।

### विप्पयुत्तेनसम्पयुत्तपदत्थवण्णना

विप्पयुत्तेनसम्पयुत्तपदे पन विप्पयुत्तेन सम्पयुत्तो नाम धम्मो नत्थि, देसनासम्पदमत्ताय पन मोघम्पेतं पदं उद्धटं, तेनेव पाळियं सब्बवारेसुपि “नत्थि नत्थि” इच्चेव वुत्तं । रूपक्खन्धादिअनारम्भणधम्मेहि विप्पयुत्ता चत्तारो खन्धा, तेसञ्च अज्जेहि सम्पयोगो नत्थि । वेदनादीहिपि रूपनिब्बानादीनि विप्पयुत्तानि, तेसञ्च केनचि सम्पयोगोव नत्थीति । अयं विप्पयुत्तेनसम्पयुत्तपदे नयो ।

### सम्पयुत्तेनसम्पयुत्तपदत्थवण्णना

सम्पयुत्तेनसम्पयुत्तपदे पन यानि पदानि रूपेन असम्मिस्सं अरूपक्खन्धेकदेसमेव दीपेन्ति, तेसमेव निद्वेसो, न रूपारूपसम्मिस्सानं, सब्बरूपक्खन्धदीपकानं तेसं सम्पयुत्ततायोगाभावा । सब्बारूपक्खन्धेनापि हि कुसलादिना अज्जो सम्पयुत्तो नाम नत्थि । इदं हेत्थ लक्खणं — ये धम्मा पठमं उद्धटा, अत्तना सम्पयुत्तेन पुन सम्पयुत्ता, तेसञ्जेव खन्धादीहि सम्पयोगो वुच्चति ।

तत्रायं नयो — वेदनाक्खन्धेन ये धम्मा सम्पयुत्ता, तेहि धम्मेहि ये धम्मा सम्पयुत्ता, ते धम्मा तीहि खन्धेहि एकेनायतनेन सत्तहि धातूहि सम्पयुत्ता, एकेनायतनेन...पे०... केहिचि सम्पयुत्ता । समुदयसच्चेन ये धम्मा सम्पयुत्ता, तेहि धम्मेहि ये धम्मा सम्पयुत्ता, ते धम्मा तीहि खन्धेहि एकेनायतनेन एकाय मनाविज्जाणधातुया सम्पयुत्ता, एकेन खन्धेन एकेनायतनेन एकाय धातुया केहिचि सम्पयुत्ताति । सेसं सुविज्जेय्यमेव । अयं सम्पयुत्तेनसम्पयुत्तपदे नयो ।

### विप्पयुत्तेनविप्पयुत्तपदत्थवण्णना

विप्पयुत्तेनविप्पयुत्तपदे पन सम्पयोगपदे वुत्तपदानेव निद्विसीयन्ति । इदं हेत्थ लक्खणं — ये धम्मा पठमं उद्धटपदेन विप्पयुत्तेहि पुन विप्पयुत्ता, तेसं खन्धादीहि विप्पयोगो वुच्चति ।

तत्रायं नयो — रूपक्खन्धेन ये धम्मा विप्पयुत्ता, तेहि धम्मेहि ये धम्मा विप्पयुत्ता, ते धम्मा चतूहि खन्धेहि एकेनायतनेन सत्तहि धातूहि विप्पयुत्ता, एकेनायतनेन...पे०... केहिचि विप्पयुत्ता । वेदनाक्खन्धेन ये धम्मा विप्पयुत्ता, तेहि धम्मेहि ये धम्मा विप्पयुत्ता, ते धम्मा एकेन खन्धेन दसहायतनेहि दसहि धातूहि विप्पयुत्ता, एकेन...पे०... केहिचि विप्पयुत्ताति । सेसं सुविज्जेय्यमेव । अयं विप्पयुत्तेनविप्पयुत्तपदे नयो ।

### सङ्गहितेनसम्पयुत्तविप्पयुत्तपदत्थवण्णना

सङ्गहितेनसम्पयुत्तविप्पयुत्तपदे पन सङ्गहितेनसङ्गहितपदे निद्विट्ठानि समुदयसच्चादिपदानेव निद्विसीयन्ति । इदं हेत्थ लक्खणं — ये धम्मा पठमं उद्धटपदेन खन्धादीहि तीहिपि सङ्गहिता, तेसं खन्धादीहि सम्पयोगो, विप्पयोगो च वुच्चति ।

तत्रायं नयो — समुदयसच्चेन ये धम्मा खन्धादीहि तीहिपि सङ्गहेहि सङ्गहिता, ते धम्मा तीहि खन्धेहि एकेनायतनेन सत्तहि धातूहि सम्पयुत्ता, एकेन खन्धेन एकेनायतनेन एकाय धातुया केहिचि सम्पयुत्ता । एकेन खन्धेन दसहायतनधातूहि विप्पयुत्ता, एकेनायतनेन एकाय धातुया केहिचि विप्पयुत्ता ।

इत्थिन्द्रियेन ये धम्मा खन्धादीहि तीहिपि सङ्गहिता, ते धम्मा न केहिचि सम्पयुत्ता, चतूहि खन्धेहि एकेनायतनेन सत्तहि धातूहि विष्पयुत्ता, एकेन...पे०... केहिचि विष्पयुत्ताति ।

तत्थ एकेनाति मनायतनेन । एकेन खन्धेनाति सङ्कारखन्धेन । केहिचीति सङ्कारखन्धे तण्हाय धम्मायतनधम्मधातूसु तण्हावेदनासञ्जाहि । सेसं सुविज्जेय्यमेव । अयं सङ्गहितेनसम्पयुत्तविष्पयुत्तपदे नयो ।

### सम्पयुत्तेनसङ्गहितासङ्गहितपदत्थवण्णना

सम्पयुत्तेनसङ्गहितासङ्गहितपदे पन सम्पयुत्तेनसम्पयुत्तपदे निदिद्धानि वेदनाखन्धादिपदानेव निदिसीयन्ति । इदं हेत्थ लक्खणं — ये धम्मा पठमं उद्धटपदेन सम्पयुत्ता, तेसं खन्धादीहि सङ्गहो, असङ्गहो च वुच्चति ।

तत्रायं नयो — वेदनाखन्धेन ये धम्मा सम्पयुत्ता, ते धम्मा तीहि खन्धेहि द्वीहि आयतनेहि अट्ठहि धातूहि सङ्गहिता, सेसेहि असङ्गहिता । विज्जाणखन्धेन ये धम्मा सम्पयुत्ता, ते धम्मा तीहि खन्धेहि एकेनायतनेन एकाय धातुया सङ्गहिता, सेसेहि असङ्गहिताति ।

तत्थ तीहीति सञ्जाखन्धादीहि तीहि । तेहि वेदनाय सम्पयुत्ता । द्वीहीति धम्मायतनमनायतनेहि । सेसं सुविज्जेय्यमेव । अयं सम्पयुत्तेनसङ्गहितासङ्गहितपदे नयो ।

### असङ्गहितेनसम्पयुत्तविष्पयुत्तपदत्थवण्णना

असङ्गहितेनसम्पयुत्तविष्पयुत्तपदे पन यानि पदानि सुखुमरूपं अविज्जाणं, अरूपं सविज्जाणं वा, केवलं अरूपं वा थूलरूपस्सपि केवलं वा, सुखुमरूपं दीपेन्ति, तेसमेव निद्देसो । इदं हेत्थ लक्खणं — ये धम्मा पठमं उद्धटधम्मोहि खन्धादीहि तीहिपि असङ्गहिता, तेसं खन्धादीहि सम्पयोगो, विष्पयोगो च वुच्चति ।

तत्रायं नयो — रूपखन्धेन ये धम्मा खन्धादीहि असङ्गहिता, ते धम्मा तीहि खन्धेहि सम्पयुत्ता, एकेनायतनेन एकाय धातुया केहिचि सम्पयुत्ता, एकेन खन्धेन दसहि आयतनधातूहि विष्पयुत्ता, एकेनायतनेन एकाय धातुया केहिचि विष्पयुत्ता । एवं धम्मायतनइत्थिन्द्रियादीसुपि योजना ।

अरूपभवेन ये धम्मा खन्धादीहि असङ्गहिता, ते सम्पयुत्ताति नत्थि । ते चतूहि खन्धेहि एकेनायतनेन सत्तहि धातूहि विष्पयुत्ता, एकेनायतनेन एकाय धातुया केहिचि विष्पयुत्ता । एवं इन्द्रिपादकुसलादिपदेसुपि योजना ।

तत्थ रूपखन्धेन विज्जाणस्सेव तीहिपि असङ्गहितत्ता तस्स तीहि वेदनादीहि सम्पयोगो, इतरेहि च विष्पयोगो जातब्बो । सेसं सुविज्जेय्यमेव । अयं असङ्गहितेनसम्पयुत्तविष्पयुत्तपदे नयो ।

### विष्पयुत्तेनसङ्गहितासङ्गहितपदत्थवण्णना

विष्पयुत्तेनसङ्गहितासङ्गहितपदे पन यानि पदानि केवलानं सारम्मणानं, अनारम्मणानं वा धम्मानं पकासकानि च सभावजातिभूमिकालसन्तानवसेन भिन्नताय केहिचि अरूपखन्धेहि विष्पयुत्तानं अनारम्मणधम्ममिस्सारूपखन्धानं पकासकानि दुक्खसच्चअब्बाकतपरित्तअतीतअज्झत्तादिपदानि, तेसमेव निद्देसो इतरेसं धम्मायतनजीवित्तिन्द्रियनामरूपसळायतनजातिजरामरणअज्झत्तबहिद्वाअनिदस्सनअप्पटिघनहेतुआदीनं तेसं केनचि विष्पयोगासम्भवा । इदं हेत्थ लक्खणं — ये धम्मा पठमं उद्धटपदेन विष्पयुत्ता, तेसं खन्धादीहि सङ्गहो, असङ्गहो च वुच्चति ।

तत्रायं नयो — रूपखन्धेन ये धम्मा विष्पयुत्ता, ते धम्मा चतूहि खन्धेहि द्वीहायतनेहि अट्ठहि धातूहि सङ्गहिता, एकेन खन्धेन दसहि आयतनधातूहि असङ्गहिता । दुक्खसच्चेन ये धम्मा विष्पयुत्ता, ते धम्मा चतूहि खन्धेहि द्वीहायतनेहि द्वीहि धातूहि सङ्गहिता । तत्थ दुक्खसच्चेन विष्पयुत्ता नाम लोकुत्तरचित्तचेतसिकानि, ते च धम्मा वेदनाखन्धादिचतुक्खन्धेहि मनोविज्जाणधम्मधातुवसेन द्वीहि धातूहि सङ्गहिताति । सेसं सुविज्जेय्यमेव । अयं विष्पयुत्तेनसङ्गहितासङ्गहितपदे नयो । अयमेत्थ सङ्केपतो विभङ्गनयेन सद्धिं अत्थनिच्छयो, वित्थारो पन धातुकथापाळिअट्ठकथासु (धातु० १२; धातु० अट्ठ० १-२) गहेतब्बोति ।

मोहविच्छेदनिया अभिधम्ममातिकत्थवण्णनाय

धातुकथामातिकत्थवण्णना निड्डिता ।

## ४. पुगलपञ्जत्तिमातिका

### एककमातिकथवण्णना

इदानीं पुगलपञ्जत्तिमातिकासंवण्णनानयो होति । तत्थ अनुत्तानत्थतो ताव **छ पञ्जत्तियो**ति एत्थ “आचिक्खति देसेति पञ्जपेति पट्टपेती”ति (सं० नि० २.२०) आगतद्वाने सन्दस्सना पकासना पञ्जत्ति नाम । “सुपञ्जत्तं मञ्चपीठ”न्ति (पारा० २६९) आगतद्वाने ठपना निक्खिपना पञ्जत्ति नाम, इध उभयम्पि वट्ठति । छ पञ्जत्तियोति हि छ पञ्जापना छ सन्दस्सना पकासनातिपि, छ ठपना निक्खिपनातिपि वुत्तं होति । नामपञ्जत्तियेव हि ते ते विज्जमानाविज्जमाने धम्मे सन्दस्सेतीतिपि । तेन तेन कोट्टासेन ठपेतीतिपि । **खन्धपञ्जत्ती**तिआदि पन सङ्खेपतो तासं पञ्जत्तीनं सरूपदस्सनं । तत्थ खन्धानं “खन्धा”ति पञ्जापना सन्दस्सना पकासना च ठपना निक्खिपना च **खन्धपञ्जत्ति** नाम...पे०... पुगलानं “पुगला”ति पञ्जापना सन्दस्सना पकासना च ठपना निक्खिपना च **पुगलपञ्जत्ति** नाम । इमा एव छ पञ्जत्तियो विज्जन्ति । अज्जासम्पि सम्मुतिपरमत्थकथानं पञ्जत्तीनं अनन्तत्ता, उपलक्खणवसेन पन पधानभावतो च एताव वुत्ता । पाळिमुत्तकनयेन पन सब्बसङ्गाहिका विज्जमानपञ्जत्तिआदयो छ नामपञ्जत्तियो **अट्ठकथासु** (पु० प० अट्ठ० मातिकावण्णना १) आगता, ता च हेट्ठा वुत्ताति इध न वुत्ता । तासु इध पुगलपञ्जत्तिपदेन अविज्जमानपञ्जत्ति, सेसेहि विज्जमानपञ्जत्ति चाति द्वे एव लब्भन्ति ।

अट्ठकथामुत्तकेन पन आचरियनयेन अपरापि **छ पञ्जत्तियो** — उपादापञ्जत्ति उपनिधापञ्जत्ति समोधानपञ्जत्ति उपनिक्खित्तपञ्जत्ति तज्जापञ्जत्ति सन्ततिपञ्जत्तीति, या “अत्थपञ्जत्ती”ति वुच्चति । तत्थ या खन्धपञ्चकं उपादाय निस्साय सम्मता सत्तादिका, अङ्गानि उपादाय रथादिका, चन्दादिपरिवत्तादयो उपादाय कालदिसादिका, तंतंभूतनिमित्तं, भावनाविसेसञ्च उपादाय कसिणादिउग्गहपटिभागनिमित्तादिकाति अयं एवरूपा सभावधम्मेहि एकत्तेन वा सच्छिकट्टपरमत्थेन अनुपलब्धसभावा **उपादापञ्जत्ति** नाम । पञ्जापेतब्बट्टेन चेसा पञ्जत्ति वुत्ता, न पन पञ्जापनट्टेन । या तस्स तस्सत्थस्स पञ्जापना, सा अविज्जमानपञ्जत्तियेव ।

या पन अज्जं पठमादिं उपनिधाय अपेक्खित्वा दुतियं रस्सं दीघं दूरं सन्तिकन्तिआदिका तदज्जापेक्खूपनिधा, छत्तपाणीतिआदिका हत्थगतूपनिधा, कुण्डलीतिआदिका सम्पयुत्तूपनिधा, धज्जसकटन्ति आदिका समारोपितूपनिधा, इन्दसालगुहातिआदिका अविदूरगतूपनिधा, सुवण्णवण्णोतिआदिका पटिभागूपनिधा, ब्राह्मणगामोतिआदिका तब्बहुलूपनिधा, मणिकटकन्तिआदिका तब्बिसिट्टूपनिधाति एवमादि अनेकप्पकारा पञ्जापना, अयं **उपनिधापञ्जत्ति** नाम ।

धज्जरासीतिआदिका पन **समोधानपञ्जत्ति** नाम । पुरिमस्स पुरिमस्स उपनिक्खिपित्वा द्वे तीणीतिआदिका **उपनिक्खित्तपञ्जत्ति** नाम । तंतंसभावनिस्सिता पथवीआदिका **तज्जापञ्जत्ति** नाम । आसीतिकोतिआदिका पन **सन्ततिपञ्जत्ति** नाम ।

अट्ठकथामुत्तकेनेव आचरियनयेन अपरापि धम्मकथिकादिका **किच्चपञ्जत्ति**, किसथूलादिका **सण्ठानपञ्जत्ति**, इत्थिपुरिसादिका **लिङ्गपञ्जत्ति**, कामावचरादिका, कोसलकादिका च **भूमिपञ्जत्ति**, तिस्सो नागोतिआदिका **पच्चत्तपञ्जत्ति**, निरोधादिका **असङ्खतपञ्जत्ति** चाति छ पञ्जत्तियो ।

एतासु पन द्वादससु तज्जापञ्जत्ति, एकच्चा भूमिपञ्जत्ति, असङ्खतपञ्जत्ति च विज्जमानपञ्जत्तिसङ्घाता नामपञ्जत्ति, तदज्जा परमत्थावसेसा, पन अत्थपञ्जत्तीति दीपिता अविज्जमानादिपञ्जत्तियो चाति । अयं तावेत्थ अनुत्तानत्थतो संवण्णना ।

अत्थनिच्छयो पनेत्थापि पाळिनयेनेव सद्धिं होति, न विना पाळिं तस्स वत्तुमसक्कुण्येत्ता । पाळियञ्च यस्मा आदितो पञ्च पञ्जत्तियो, तदत्थभूता खन्धादयो च हेट्ठा विभङ्गप्पकरणे निष्पदेसतो कथिताति ता इध “कित्तावता खन्धानं खन्धपञ्जत्ति, यावता पञ्चक्खन्धा रूपक्खन्धो”तिआदिना सङ्खेपेनेव निद्धिद्धा, ता चेत्यापि वुत्तत्था । पुगलपञ्जत्ति पन हेट्ठा न वुत्ताति “कित्तावता पुगलानं पुगलपञ्जत्ति? समयविमुत्तो, असमयविमुत्तो”तिआदिना एककादिभेदेन याव दसका दसधा मातिकं ठपेत्वा वित्थारेनेव विभत्ता, सा च जातब्बपभेदतो अवुच्चमाना दुब्बिज्जेय्या, तस्मा पुगलपञ्जत्तिया एव चेत्य पाळिनयानुसारेन सङ्खेपतो अत्थनिच्छयो होति, सो चेत्य मातिकायं वुत्ते सब्बपुगले अनुद्धरित्वा जातब्बानं दुब्बिज्जेय्यानं पुगलानं एककादिभेदतोव मातिकं उद्धरित्वा विभजनवसेन सङ्खेपतोव होति । कथं? “समयविमुत्तो असमयविमुत्तो, कुप्पधम्मो अकुप्पधम्मो, चेतनाभब्बो अनुरक्खणाभब्बो, भयूपरतो अभयूपरतो, भब्बागमनो अभब्बागमनो, नियतो अनियतो, पटिपन्नको फले ठितो, समसीसी ठितकप्पी, सोतापन्नो सत्तक्खत्तुपरमो कोलंकोलो एकबीजी, सकदागामी, अनागामी अन्तरापरिनिब्बायी उपहच्चपरिनिब्बायी असङ्खारपरिनिब्बायी ससङ्खारपरिनिब्बायी उद्धंसोतो अकनिट्टगामी, अरहा”ति एककमातिका ।

तत्थ यो अप्पनं निब्बत्तेतुं युत्तपत्तकाले रूपारूपसमापत्तिसङ्घातेहि अट्ठहि विमोक्खेहि पच्चनीकधम्मतो विमुच्चित्वा तीसु मग्गेसु येन केनचि यथासकं आसवे खेपेत्वा वुट्ठितो, अयं **समयविमुत्तो** नाम । “एकच्चे आसवा परिक्खीणा”तिआदिवचनतो (पु० प० १) हि अट्ठसमापत्तिलाभी पुथुज्जनो वा खीणासवो वा इध न गहितो, समापत्तिलाभिनी पन फलट्ठसेखाव गहिताति वेदितब्बा । सुक्खविपस्सकखीणासवो, सब्बेपि च अरिया मग्गविमोक्खं सन्धाय **असमयविमुत्ता** नाम । बाहिरानज्झि अट्ठन्नं समापत्तीनं समापज्जन्तस्स पविवेकट्टानलाभादिसमयोपि अत्थि, वत्तकरणकालादिसमयोपि अत्थि ।

मग्गविमोक्खेन विमुच्चनस्स पन तादिसो समयो वा असमयो वा नत्थि, यस्स सद्धा बलवती, विपस्सना च आरद्धा, तस्स गच्छन्तस्स वा भुञ्जन्तस्स वा मग्गफलपटिवेधो नाम न होतीति नत्थि, तस्मा सब्बे अरिया अरियविमोक्खे **असमयविमुत्ता**ति वेदितब्बा। पुरिमपदेपि लोकियसमापत्तिञ्जेव सन्धाय सेखा समयविमुत्ता नाम जाता।

अवसिभावा अट्टसमापत्तिलाभी पन पुथुज्जनो, सोतापन्नसकदागामिनो द्वे सेखा अट्टसमापत्तिं सन्धाय **कुप्पधम्मो** नाम। परिहानधम्मोतिपि दुविधा एव। अनागामिआदयो सुप्पहीनसमाधिपरिपन्थिकत्ता वसिभावा समापत्तिलाभी पुथुज्जनो, अरिया च लोकुत्तरधम्मोपि सन्धाय **अकुप्पधम्मो** नाम। अपरिहानधम्मोति ते एव। **चेतनाभब्बो**ति चेतनासङ्घातेन ज्ञानसमापत्तिवळञ्जनेन अपरिहानिं आपज्जितुं भब्बो। यो हि रूपारूपज्ज्ञानेसु आचिण्णवसिताय चेतनासङ्घाताय ज्ञानसमापत्तिया निरन्तरं वळञ्जमानो तेहि न परिहायति, अवळञ्जमानो च परिहायति, अयं वळञ्जमानो **चेतनाभब्बो** नाम। **अनुरक्खणाभब्बो**ति ज्ञानस्स उपकारानुपकारधम्मे जानित्वा अनुरक्खणाय अवळञ्जमानोपि अपरिहानिं आपज्जितुं भब्बो, एसो च पुरिमतो बलवतरो, आचिण्णवसिनो पञ्जासम्पदाय उपकारानुपकारधम्मे जानित्वा तदनुरूपं पटिपज्जनतोति वेदितब्बो।

**भयूरतो**ति भयेन पापतो उपरतो विरतो सेखो, कल्याणपुथुज्जनो च। तेसु पच्छिमो दुग्गतिवट्टकिलेसउपवादसङ्घातेहि चतूहि भयेहि पापतो ओरमति, सेखो दुग्गतिवज्जेहि, अपायेहि मुत्तत्ता। खीणासवो पन **अभयूरतो** नाम समुच्छिन्नभयत्ता, उपवादतो पन ओरमितब्बो।

**अभब्बागमनो**ति सम्मत्तनियामागमनस्स अभब्बो, ये आनन्तरियसङ्घातेन कम्मावरणेन, नियतमिच्छादिट्टिसङ्घातेन किलेसावरणेन, अहेतुकदुहेतुकपटिसन्धिसङ्घातेन विपाकावरणेन च समन्नागता, बुद्धादीसु च सद्धारहिता, मग्गभावनाय च उत्तरकुरुकादयो विय अच्छन्दिका, पुब्बूपनिस्सरहिता च, सब्बेते **अभब्बागमना** नाम। विपरीता **भब्बागमना** नाम। पञ्चानन्तरियनियतमिच्छादिट्टिका निरयगमने, अट्ट अरियपुग्गला अनुपादापरिनिब्बानादीसु **नियता** नाम। अवसेसपुग्गला अनिबद्धगतिकताय **अनियता** नाम, उत्तरकुरुका पन सुगतिनियतापि मिच्छत्तसम्मत्तनियामस्सेव इधाधिपेतत्ता “नियता”ति न वुत्ता। मग्गसमङ्गी पुग्गलो मग्गक्खणे फलत्थाय **पटिपन्नको** नाम, फलसमङ्गी फलानुप्पत्तियम्पि **फले ठितो** नाम।

यस्स पन अपुब्बाचरिमं आसवपरियादानञ्च होति जीवितपरियादानञ्च, अयं **समसीसी** नाम। सो च तिविधो होति इरियापथसमसीसी रोगसमसीसी जीवितसमसीसीति। तत्थ यो चतूसु इरियापथेसु एकस्मिं विपस्सनं पट्टपेत्वा अरहत्तं पत्वा तस्मिञ्जेव इरियापथे परिनिब्बाति, अयं **इरियापथसमसीसी** नाम। यो पन एकं रोगं पत्वा अन्तोरोगे एव विपस्सनं पट्टपेत्वा अरहत्तं पत्वा तेनेव रोगेन परिनिब्बाति, अयं **रोगसमसीसी** नाम। यस्स पन किलेससीससङ्घाता अविज्जा, अरहत्तमग्गेन पवत्तसीससङ्घातं जीवितिन्द्रियञ्च चुतिचित्तेन समं परियादानं गच्छति, अयं **जीवितसमसीसी** नाम। कथमिदं समं होतीति? वारसमताय। यस्मिं हि वारे मग्गेन किलेसे खेपिते पच्चवेक्खणजाणानि पवत्तन्ति, तस्सानन्तरमेव परिनिब्बायतो इमाय वारसमताय इदं उभयसीसपरियादानम्पि समं होति नाम, अयमेव जीवितसमसीसी इधाधिपेतो।

**ठितकप्पी**ति ठितो कप्पो ठितकप्पो, स्वास्स अत्थीति **ठितकप्पी**, कप्पमिह विनस्समानमिह कप्पं ठपेतुं समत्थोति अत्थो।

सचे हि येसं मग्गसमङ्गिक्खणे कप्पविनासो भवेय्य, नेव ताव कप्पो विनस्सेय्य, यावायं यथासकं फलं न सच्छिकरोतीति ते विनस्समानम्पि कप्पं ठपेतीति **ठितकप्पिनो** नाम जाताति। किञ्चापि कप्पविनासनकाले सासनं नत्थि, गतकोटिके हि काले कप्पविनासो होति, एवं सन्तेपि मग्गानन्तरफलस्स अनन्तरायं दीपेतुं इदं अभूतम्पि कारणं आहतं।

**सोतापन्नो**ति निब्बानसमुद्दिनिन्ताय सोतसङ्घातस्स मग्गस्स पठमसमङ्गी वुच्चति, इध पन फलट्टो अधिपेतो। तस्सेव च पभेददस्सनत्थं “सत्तक्खत्तुपरमो”तिआदि वुत्तं। सत्तवारा परमा अस्स भवूपपतीति सत्तक्खत्तुपरमो, ततो परं अट्टमं भवं नादियतीति अत्थो। सोतापन्नो हि यो सत्तक्खत्तुं देवेसु, मनुस्सेसु च पटिसन्धिं गहेत्वा सत्तमे भवे दुक्खस्सन्तं करोति, अयं **सत्तक्खत्तुपरमो** नाम। कुलतो कुलं भवतो भवं गच्छतीति कोलंकोलो। सो हि देवमनुस्सवसेन द्वे गतियो भवे संसरित्वा दुक्खस्सन्तं करोति, अयं **कोलंकोलो** नाम। कम्मपटिसन्धिया एकं कम्मं किलेसबीजं अस्साति **एकबीजी**। सो हि एकस्मिञ्जेव भवे खीणासवो होति। किं पनस्स भेदस्स नियामकन्ति? विपस्सनाभिज्जाभेदा। सोतापन्नेसु हि यो विपस्सनाय पमत्तो, सो सत्तक्खत्तुपरमो होति। यो किञ्चि अप्पमत्तो, सो कोलंकोलो। यो पन विपस्सनाय अतिविय अप्पमत्तो, सो एकबीजी होति। ये पन अभिविय पमत्ता वट्टञ्जासया अनाथपिण्डकविसाखासक्कादयो, ते पुनप्पुनं वट्टस्मियेव विचरन्ता आदितो पट्टाय छ देवलोके ओसापेत्वा ब्रह्मलोकेसुपि यथाक्कमं निब्बत्तित्वा अकनिट्ठे ठत्वा परिनिब्बन्ति, न ते इध गहिता। ते हि मनुस्सगतिं पुनप्पुनं आदियन्ति। ये पन मनुस्सगतिं यम्पि भवं आदियन्ति, तेसं वसेन सत्तक्खत्तुपरमो कोलंकोलो मानुसिकभवनिब्बत्तको एव एकबीजी गहितो। ते पन सद्धाधुरेन आगता तयो, पञ्चाधुरेन आगता तयोति सोतापन्नो छब्बिधो होतीति वेदितब्बो।

पटिसन्धिवसेन पन सकिं इमं मनुस्सगतिं आगच्छतीति **सकदागामी**, दुतियमग्गफलसमङ्गी। इमिना पञ्चसु सकदागामीसु चत्तारो वज्जेत्वा एकोव गहितो। एकच्चो हि सकदागामिफले ठत्वा पुन दुतियभवे इधेव परिनिब्बाति, एकच्चो इध पत्वा देवलोके परिनिब्बाति, एकच्चो देवलोके पत्वा दुतियभवे तत्थेव परिनिब्बाति, एकच्चो देवलोके पत्वा इधूपपज्जित्वा परिनिब्बाति, इमे चत्तारोपि इध न गहिता। यो पन इध पत्वा देवलोके निब्बत्तित्वा पुन इधूपपज्जित्वा परिनिब्बाति, अयमेकोव इध गहितो। इमस्स च द्वे पटिसन्धियो, एकबीजिस्स पन एकावाति इदं तेसं नानाकरणन्ति वेदितब्बं।

पटिसन्धिवसेन कामभवं नागच्छतीति **अनागामी**, ततियमगगफलसमङ्गी। तस्सेव पन पभेददस्सनत्थं “**अन्तरापरिनिब्बायी**”तिआदि वुत्तं। तत्थ **अन्तरापरिनिब्बायी**ति आयुवेमज्झस्स अन्तरा एव अरहत्तमगं उप्पादेत्वा किलेसपरिनिब्बानेन परिनिब्बायनसीलो एको अनागामी। सो च उप्पन्नसमनन्तरं परिनिब्बायी, आयुवेमज्झं अप्पत्वा परिनिब्बायी, आयुवेमज्झं पत्वा परिनिब्बायीति तिविधो होति। **उपहच्चपरिनिब्बायी**ति आयुवेमज्झं उपहच्च अतिक्कमित्वा, मरणसमयं वा उपहच्च उपगन्त्वा परिनिब्बायी, आयुवेमज्झं अतिक्कमित्वा याव मरणसमया परिनिब्बायीति अत्थो। **असङ्खारपरिनिब्बायी**ति असङ्खारेण अप्पदुक्खेन अधिमत्तप्पयोगं अकत्वा परिनिब्बायनसीलो। **ससङ्खारपरिनिब्बायी**ति ससङ्खारेण दुक्खेन कसिरेण अधिमत्तप्पयोगेन परिनिब्बायनसीलो। **उद्धंसोतो**ति उद्धंवाहिभावेन उद्धमस्स तण्हासोतं वट्टसोतञ्च, उद्धं वा गन्त्वा पटिलभित्तब्बतो उद्धं मगगसोतमस्सातिपि **उद्धंसोतो**। अकनिट्ठं गच्छतीति **अकनिट्ठगामी**। इमेसं पन अनागामीनं पभेददस्सनत्थम्पेत्य उद्धंसोतो अकनिट्ठगामीतिआदि चतुक्कं वेदितब्बं।

तत्थ यो अविहतो पट्टाय चतूसु यथाक्कमं उप्पज्जित्वा यावतायुक्कं ठत्वा चुतो अकनिट्ठे उप्पज्जित्वा परिनिब्बाति, अयं **उद्धंसोतो अकनिट्ठगामी** नाम। यो पन अकनिट्ठं अप्पत्वा अन्तरा परिनिब्बाति, अयं **उद्धंसोतो न अकनिट्ठगामी** नाम। यो मनुस्सलोको अकनिट्ठमेव गन्त्वा परिनिब्बाति, अयं **न उद्धंसोतो अकनिट्ठगामी** नाम। यो पन हेट्ठा चतूसु सुद्धावासेसु अज्जतरस्मिं उप्पज्जित्वा तत्थेव परिनिब्बाति, अयं **न उद्धंसोतो न अकनिट्ठगामी** नाम। एवमेते अनागामिनो अट्टचत्तालीसविधा होन्ति। कथं? अविहेसु ताव तयो अन्तरापरिनिब्बायिनो, एको उपहच्चपरिनिब्बायी, एको उद्धंसोतोति पञ्च, ते असङ्खारपरिनिब्बायिससङ्खारपरिनिब्बायिवसेन दस होन्ति, एवं अतप्पसुदस्ससुदस्सीसूति चत्तालीसं, अकनिट्ठे पन उद्धंसोतो नत्थि, तस्मा तत्थ तं ससङ्खारासङ्खारवसेन दुविधं उद्धंसोतं वज्जेत्वा अट्ट चाति अट्टचत्तालीस होन्ति।

**अरहा**ति किलेसारीनं हतत्तादिना खीणासवो अरहा नाम। सो सुज्जतादिविमोक्खत्तयवसेन तिविधो हुत्वा पुन पच्चेकं पटिपदाचतुक्कवसेन द्वादसविधा होन्ति। यथा च अरहा द्वादसविधो, एवं द्वादसेव सकदागामिनो, चतुवीसति सोतापन्ना अट्टचत्तालीस अनागामिनोव पच्चेकन्ति वेदितब्बं। इमे च सब्बे अरिया इमस्मिं सासने एव उप्पज्जन्ति, नो बहिद्वाति। एककनयो।

### दुकादिमातिकथवण्णना

दुकादीसु “द्वे पुगला — कोधनो च उपनाही च मक्खी च पळासी चा”तिआदिना दुक्कञ्च, “तयो पुगला — निरासो आसंसो विगतासो”तिआदिना तिकञ्च, “चत्तारो पुगला — असप्पुरिसो, असप्पुरिसेन असप्पुरिसतरो, सप्पुरिसो, सप्पुरिसेन सप्पुरिसतरो”तिआदिना चतुक्कञ्च, “पञ्च पुगला — अत्थेक्कचो पुगलो आरभति च विप्पटिसारी च होति, तञ्च चेतोविमुत्तिं पज्जाविमुत्तिं यथाभूतं नप्पजानाति। यत्थस्स ते उप्पन्ना पापका अकुसला धम्मा अपरिसेसा निरुज्झन्ति, अत्थेक्कचो पुगलो आरभति न विप्पटिसारी च होति... पे०... अपरिसेसा निरुज्झन्ति, अत्थेक्कचो पुगलो नारभति विप्पटिसारी च होति... पे०... अपरिसेसा निरुज्झन्ति। अत्थेक्कचो पुगलो नारभति न विप्पटिसारी होति... पे०... अपरिसेसा निरुज्झन्ती”तिआदिना पञ्चकञ्च वित्थारतो मातिकं निक्खिपित्वा सब्बेपि ते पुगला निट्ठिद्वा, इध पन ते गन्थवित्थारभयेन सब्बे न उट्ठिद्वा, पाळिया एव जातब्बाति।

तत्थ तिके **निरासो**ति अरहत्तासाय विरहितो दुस्सीलो। तस्स हि अत्तनो अभब्बताय भब्बसहायकस्स सीलवतो अरहत्तप्पत्तिं सुत्वा, चण्डालपुत्तस्स विय कस्सचि राजपुत्तस्स रज्जाभिसेकं सुत्वा अभिसेकप्पत्तियं, “कुदास्सु नामाहमि अरहत्तं पापुणेय्य”न्ति अरहत्तप्पत्तियं पत्थनापि न उप्पज्जति। **आसंसो**ति अरहत्तं आसीसमानो पत्थयमानो सीलवा। तस्स हि अरहत्तपत्थनाय सीलसम्पत्तिया ठितत्ता कस्सचि अरहत्तप्पत्तिं सुत्वा, उभतोसुजातस्स राजकुमारस्स विय तादिसस्स कस्सचि रज्जाभिसेकं सुत्वा अभिसेकप्पत्तियं, अरहत्तप्पत्तियं पत्थना उप्पज्जति। **विगतासो**ति अरहा। सो हि पत्तअरहत्तताय तत्थ विगतासो होति पत्ताभिसेको विय खत्तियो अभिसेकप्पत्तियन्ति वेदितब्बं।

चतुक्के पन पाणातिपातादिअकुसलकम्मपथसमन्नागतो **असप्पुरिसो** नाम। यो पन सयम्पि पाणातिपातादीनि कत्वा परञ्च तत्थ समादपेति, अयं **असप्पुरिसेन असप्पुरिसतरो**, असप्पुरिसतोपि असप्पुरिसतरोति अत्थो। वुत्तपटिपक्खकुसलवसेन **सप्पुरिसो**, **सप्पुरिसेन सप्पुरिसतरो** च वेदितब्बो।

पञ्चके **आरभति च विप्पटिसारी च होती**ति एत्थ **आरम्भ**-सद्वो आपत्तिवीतिकमे वत्तति, तस्मा आपत्तिवीतिकमवसेन आरभति चेव तप्पच्चया च विप्पटिसारी होतीति अत्थो। **चेतोविमुत्ति**ति फलसम्पयुत्तसमाधिं। **पज्जाविमुत्ति**ति फलसम्पयुत्तजाणं। **यथाभूतं नप्पजानाती**ति अनधिगतत्ता यथासभावतो नप्पजानाति। **यत्थस्सा**ति यस्मिं अरहत्तफलसङ्घाते ज्ञाने अधिगते अस्स पुगलस्स सब्बे पापका अकुसला धम्मा निरवसेसा निरुज्झन्ति, ते नप्पजानातीति सम्बन्धो। किञ्चापि ते मग्गक्खणे एव निरुज्झन्ति नाम, फलक्खणे पन निरुद्धा नाम होन्ति, इध पन मग्गकिच्चवसेन “फलक्खणे निरुज्झन्ती”ति वुत्ताति वेदितब्बा।

**आरभति न विप्पटिसारी च होती**ति आपत्तिं आपज्जति, तं पन देसेत्तुं सभागपुगलं परियेसति, वुट्ठापेति वा, तस्मा न विप्पटिसारी होति। **नारभति विप्पटिसारी च होती**ति आपत्तिं नापज्जति, विनयपज्जत्तियं पन अकोविदत्ता अनापत्तिया आपत्तिसज्जिताय वुट्ठितायपि तं आपत्तिया विप्पटिसारं विनोदेत्तुं असक्कुण्येय्यताय विप्पटिसारी होति। **नारभति न विप्पटिसारी होती**ति नारभति नेव आपत्तिं आपज्जति, न विप्पटिसारी होति। अरहत्तञ्च न पापुणाति।

कतरो पनेस पुगलोति? सीलवा ओस्सद्वीरियो पुगलो। सो हि “किं मे इमस्मिं बुद्धकाले परिनिब्बानेन, अनागते मेत्तेय्यसम्मासम्बुद्धकाले परिनिब्बायिस्सामी”ति विसुद्धसीलोपि पटिपत्तिं न पूरेति। इमे चत्तारोपि पुगला तथा तथा ओवदित्वा आसवक्खये पतिट्ठापेतब्बा। एवं हि तेपि ख्यायं पञ्चमो पुगलो नारभति न विण्णटिसारी आरद्धवीरियो अरहत्तं पापुणाति, तेन समसमाव भविस्सन्तीति।

छक्कादीसु —

“छ पुगला — अत्थेकच्चो पुगलो पुब्बे अननुस्सुतेसु धम्मेषु सामं सच्चानि अभिसम्बुज्झति, तत्थ च सब्बञ्जुतं पापुणाति बलेसु च वसीभावं। अत्थेकच्चो पुगलो...पे०... अभिसम्बुज्झति, न च तत्थ सब्बञ्जुतं पापुणाति, न च बलेसु वसीभावं। अत्थेकच्चो पुगलो...पे०... अनभिसम्बुज्झति, दिट्ठेव धम्मे दुक्खस्सन्तकरो होति, सावकपारमिञ्च पापुणाति। अत्थेकच्चो पुगलो...पे०... दुक्खस्सन्तकरो होति, न च सावकपारमिं पापुणाति। अत्थेकच्चो पुगलो...पे०... अनभिसम्बुज्झति, न च दिट्ठेव धम्मे दुक्खस्सन्तकरो होति, अनागामी होति अनागन्ता इत्थत्तं। अत्थेकच्चो पुगलो...पे०... अनभिसम्बुज्झति, न च दिट्ठेव धम्मे दुक्खस्सन्तकरो होति, आगामी होति आगन्ता इत्थत्तं”न्ति —

छक्कं, “सत्त पुगला — सत्त उदकूपमा पुगला सकिं निमुग्गो निमुग्गोव होति, उम्मुज्जित्वा निमुज्जति, उम्मुज्जित्वा ठितो होति, उम्मुज्जित्वा विपस्सति विलोकेति, उम्मुज्जित्वा पतरति, उम्मुज्जित्वा पटिगाधप्पत्तो होति, उम्मुज्जित्वा तिण्णो होति पारङ्गतो, थले तिट्ठति ब्राह्मणो”ति आदिना सत्तकं, “अट्ठ पुगला — चत्तारो मग्गसमङ्गिनो, चत्तारो फलसमङ्गिनो पुगला”ति अट्ठकं, “नव पुगला — सम्मासम्बुद्धो पच्चेकसम्बुद्धो उभतोभागविमुत्तो पञ्जाविमुत्तो कायसक्खी दिट्ठिप्पत्तो सद्भावमुत्तो धम्मामुत्तारो सद्धानुसारी”ति नवकं, “दस पुगला — पञ्चन्नं इध निट्ठा, पञ्चन्नं इध विहाय निट्ठा”ति दसकञ्च मातिकं निक्खिपित्वा पाळियं निद्वेसो कतो। तत्थ छक्के पठमेन पदेन सम्मासम्बुद्धो दट्ठब्बो। सो हि अनाचरियको अत्तना उप्पादितेन सब्बञ्जुतञ्जाणपदद्धानेन अरहत्तमग्गाजणेन सब्बाकारतो सच्चानि अभिसम्बुज्झित्वा सब्बञ्जुतं पापुणि, दसजाणबलेसु च वसीभावन्ति। दुतियेन पन पच्चेकसम्बुद्धो दट्ठब्बो। ततियेन अग्गासावको, चतुत्थेन अवसेसा अरहन्तो, पञ्चमेन अनागामी, छट्ठेन सोतापन्नसकदागामिनो दट्ठब्बा। ते हि “आगन्ता इत्थत्तं”न्ति वुत्ताति।

सत्तके पठमेन पदेन सासने अनिविदुसद्धो नियतमिच्छादिट्ठिधम्मेहि एकन्तकाळकेहि समन्नागतो गहितो। सो हि समुद्वे उदकभीरुकपुरिसो विय संसारे अपाये निमुग्गो निमुग्गोव होति, न पुन भवतो वुट्ठाति, अनन्तम्पि कालं भवे एव विचरति सासनसमायोगाभावा। दुतियेन पदेन सासने पटिलद्धसद्धोपि देवदत्तादयो विय सद्धादिपरिहानियं ठितो दुस्सीलो गहितो। सो हि समुद्वे केनच कारणेन उम्मुज्जित्वा पुन निमुग्गो विय सासनसद्धाय उम्मुज्जित्वापि अपाये निमुज्जति एव, अयं पन चिरकालातिक्कमेन बुद्धादीहि, अत्तना एव वा पच्चेकबोधिजाणेन भवतो उद्धरणीयो होति सासने सकिं उप्पन्नार्यापि सद्धाय मोक्खभावेन नियमेन निब्बानावहत्ता। अयमेव हिस्स पुरिमपुगलतो विसेसो, इतरथा तस्स विसुं गहणे पयोजनमेव न सियाति गहेतब्बं। ततियेन सासने उप्पन्नसद्धो ठितिभागियेहि सीलादिगुणेहि समन्नागतो गहितो। सो हि उम्मुज्जित्वा तीरं अदिस्वाव समुद्वमज्जे नावादिआगमनं ओलोकेन्तो पुन अनिमुज्जित्वा उण्णतप्पदेसे ठितो विय सासनसद्धाय उम्मुज्जित्वा निब्बानं अदिस्वाव बुद्धादि ओलोकयमानो सग्गे, सीलादिमिहि ठितो होति। चतुत्थेन पन सोतापन्नो गहितो। सो हि उम्मुज्जित्वा ठितो तीरं दिस्वा उत्तरणूपायं विलोकयमानो विय लोकुत्तरसद्धाय उम्मुज्जित्वा निब्बानतीरं दिस्वा उत्तरणोपायं विलोकेति। पञ्चमेन सकदागामी गहितो। सो हि समुद्वे तीरं दिस्वा तदभिमुखं पतरमानो विय पठममग्गेन निब्बानतीरं दिस्वा तदभिमुखं दुतियमग्गेन पतरति नाम। छट्ठेन अनागामी गहितो। सो हि पतरित्वा तीरं उपगमम कटिप्पमाणे उदके ठितो विय अरहत्तसमीपे सतिकवाटपतित्थे अनावर्तितधम्मताय ततियमग्गेन तिट्ठति। सत्तमेन पन अरहा गहितो, सो हि तरित्वा पारं पत्वा ठितपुरिसो विय चत्तारो ओघे तरित्वा निब्बानत्थले ठितो खीणासवब्राह्मणो नाम होतीति।

नवके उभतोभागविमुत्तोति रूपारूपसमापत्तिया विक्खम्भनविमोक्खेन, अरियमग्गेन समुच्छेदविमोक्खेन किलेसतो विमुत्तो, अरूपसमापत्तिया वा रूपकायतो, मग्गेन च नामकायतोति इमेहि उभतोभागोहि विमुत्तोतिपि उभतोभागविमुत्तो, सो चतुन्नं अरूपसमापत्तीं एकेकतो वुट्ठाय सङ्गारे सम्मसित्वा अरहत्तप्पत्तानं चतुन्नं, निरोधा वुट्ठाय अरहत्तप्पत्तानागामिनो च वसेन पञ्चविधो, तेसु पच्छिमोव निष्परियायतो उभतोभागविमुत्तो नाम, सेसा परियायेन। एत्थ च रूपावचरचतुत्थज्झानं किलेसकायतो विमुत्तम्पि रूपकायतो अविमुत्तं, अरूपावचरं पन तदभयतोपि विमुत्तं, तस्मा तदेव पादकं कत्वा अरहत्तप्पत्तोव उभतोभागविमुत्तो होति, न रूपावचरन्ति वेदितब्बं। पञ्जाविमुत्तोति अरहत्तमग्गपञ्जाय आसवेहि विमुत्तो। सो हि सुक्खविपस्सको, चतूहि रूपावचरज्झानेहि वुट्ठाय अरहत्तप्पत्ता चत्तारो चाति पञ्चविधो। अरूपावचरज्झानेसु हि एकस्मिन्पि सति उभतोभागविमुत्तोव नाम होती।

कायसक्खीति रूपारूपज्झानलाभी अरियो। सो हि सोतापत्तिमग्गद्वज्जितानं छन्नं सेखानं वसेन छब्बिधो। तेनेव हिस्स “एकच्चे आसवा परिकखीणा”ति निद्वेसे वुत्तं। सोतापत्तिमग्गद्वस्स च न केचपि आसवा परिकखीणाति वत्तब्बा, परिकखीयिस्सन्तीति पन वत्तब्बा, अरहतो पन सब्बेपि आसवा परिकखीणा, न एकच्चेति। सो हि फुट्ठन्तं सच्छिकरोतीति कायसक्खी, फुट्ठानं पटिलद्धानं ज्ञानानं अनन्तरं नामकायेन निरोधं सच्छिकरोतीतिपि कायसक्खी, कायेनाति चेत्थ “नामकायेन चैव परमत्थसच्चं सच्छिकरोति, पञ्जाय च अतिविज्झ पस्सती”ति वचनतो अरहत्तफलं ठपेत्वा सेसमग्गफलानमेतं अधिवचनं, तेन कायेन पठमज्झानानन्तरं निब्बानस्स सच्छिकरणतोपि कायसक्खीति केचि। दिट्ठिप्पत्तोति सुक्खविपस्सको,



रूपज्ज्ञानलाभी च यथावुत्तो छब्बिधो सेखो च, अयं दिट्ठन्तप्पत्तोति दिट्ठिप्पत्तो। दस्सनं दिट्ठि, पठममग्गो, तस्स अनन्तरं निरोधप्पत्तोति अत्थो। दिट्ठप्पत्तोतिपि पाठो, तस्स पठममग्गेन दिट्ठं निब्बानं पुन पत्तोति अत्थो।

**सद्भावमुत्तोति** सुखविपस्सको, रूपज्ज्ञानलाभी च यथावुत्तो छब्बिधो सेखो च। अयं हि सद्वहन्तो विमुत्तोति सद्भावमुत्तो। कथं पनेतस्स दिट्ठिप्पत्ततो नानत्तन्ति? आगमनीयपटिपदाय। दिट्ठिप्पत्तो हि पज्जासम्पदाय पुब्बभागे विपस्सनाय किलेसे अप्पदुक्खेन विक्खम्भेन्तो आगतो, सद्भावमुत्तो पन सद्भावहुलताय किलेसे दुक्खेन विक्खम्भेन्तो आगतो। एतमेव हि भेदं सन्धाय निद्देसे “एकच्चे आसवा परिक्खीणा होन्ति, नो च खो यथादिट्ठिप्पत्तस्सा”ति वुत्तं।

**धम्मानुसारीति** यस्स सोतापत्तिमग्गक्खणे पज्जिन्द्रियं अधिमत्तं होति, अयं पज्जासङ्घातेन धम्मेन सरति अनुस्सरतीति धम्मानुसारी, सोतापत्तिमग्गद्वस्सेतं नामं। फले पन पत्ते दिट्ठिप्पत्तो नाम होति। **सद्धानुसारीति** यस्स सोतापत्तिमग्गक्खणे सद्भिन्द्रियं अधिमत्तं होति, अयं सद्भावेन सरति अनुस्सरतीति सद्धानुसारी, सोतापत्तिमग्गद्वस्सेतं नामं। फले पन पत्ते सद्भावमुत्तो नाम होति।

लोकुत्तरधम्मं हि निब्बत्तेन्तानं द्वे धुरानि नाम, द्वे अभिनिवेसा नाम, द्वे सीसानि नाम। तत्थ सद्भावधुरं पज्जाधुरन्ति द्वे धुरानि नाम। एको पन समथाभिनिवेसो, एको विपस्सनाभिनिवेसोति द्वे अभिनिवेसा। एको च अरहत्तं मत्थकं पापुणन्तो उभतोभागविमुत्तो होति, एको पज्जाविमुत्तोति इमानि द्वे सीसानि नाम। ये हि केचि लोकुत्तरं धम्मं निब्बत्तेन्ति, सब्बे ते द्वे इमे धम्मे धुरं कत्वा इमेसु द्वीसु ठानेसु अभिनिविसित्वा इमेहि द्वीहि ठानेहि विमुच्चन्ति। तेसु यो भिक्खु अट्ठसमापत्तिलाभी पज्जं धुरं कत्वा समथवसेन अभिनिविट्ठो अज्जतरं अरूपसमापत्तिं पदट्ठानं कत्वा विपस्सनं पट्ठपेत्वा अरहत्तं पापुणाति, अयं सोतापत्तिमग्गक्खणे धम्मानुसारी नाम। परतो पन छसु ठानेसु कायसक्खी नाम। अरहत्तफलं पत्ते उभतोभागविमुत्तो नाम।

अपरो पज्जमेव धुरं कत्वा विपस्सनावसेन अभिनिविट्ठो सुद्धसङ्गारे वा रूपावचरज्ज्ञानेसु वा अज्जतरं सम्मसित्वा अरहत्तं पापुणाति, अयम्पि सोतापत्तिमग्गक्खणे धम्मानुसारी नाम। परतो पन छसु ठानेसु दिट्ठिप्पत्तो नाम, अरहत्तं पत्ते पज्जाविमुत्तो नाम।

अपरो पन अट्ठसमापत्तिलाभी सद्दं धुरं कत्वा समाधिवसेन अभिनिविट्ठो अज्जतरं अरूपसमापत्तिं पदट्ठानं कत्वा विपस्सनं पट्ठपेत्वा अरहत्तं पापुणाति, अयं सोतापत्तिमग्गक्खणे सद्धानुसारी नाम, परतो छसु ठानेसु कायसक्खीयेव नाम। अरहत्तं पत्ते उभतोभागविमुत्तोयेव नाम। अपरो सद्दमेव धुरं कत्वा विपस्सनावसेन अभिनिविट्ठो सुद्धसङ्गारे वा रूपावचरज्ज्ञानेसु वा अज्जतरं सम्मसित्वा अरहत्तं पापुणाति, अयम्पि सोतापत्तिमग्गक्खणे सद्धानुसारी नाम, परतो छसु ठानेसु सद्भावमुत्तो नाम। अरहत्तपत्ते पज्जाविमुत्तो नाम। इमे सत्त पुग्गला सम्मासम्बुद्धपच्चेकसम्बुद्धेहि सद्भि नव लोके अग्गदक्खिण्येय्या नामाति।

दसके **पञ्चन्नं इध निट्ठाति** सत्तक्खत्तुपरमो, कोलंकोलो, एकबीजी, सकदागामी कामावचरपटिसन्धिको, अरहा चाति इमेसं पञ्चन्नं इध कामावचरभूमियज्जेव अनुपादिसेसनिब्बानसङ्घाता निट्ठाति अत्थो। कामावचरत्तभावे एव हि एते परिनिब्बायन्ति, नाज्जस्मिं। **पञ्चन्नं इध विहाय निट्ठाति** अन्तरापरिनिब्बायी उपहच्चपरिनिब्बायी असङ्गारपरिनिब्बायी ससङ्गारपरिनिब्बायी उद्धंसोतो अकनिट्ठगामी चाति इमेसं पञ्चन्नं इध कामावचरे अत्तभावं विहाय विजहित्वा ब्रह्मत्तभावे ठितानज्जेव निट्ठाति अत्थो। सेसमेत्थ उत्तानत्थमेवाति। अयमेत्थ सङ्केपतो पाळिनयेन सद्भि अत्थनिच्छयो, वित्थारो पन **पुग्गलपञ्जत्तिपाळिअट्ठकथासु** (पु० प० मातिका १ आदयो; पु० प० अट्ठ० मातिकावण्णना १) गहेतब्बोति।

मोहविच्छेदनिया अभिधम्ममातिकथवण्णनाय

पुग्गलपञ्जत्तिमातिकथवण्णना निट्ठिता।

## ५. कथावत्थुमातिका

### पुग्गलकथावण्णना

इदानीं कथावत्थुमातिकाय अत्थसंवण्णनानयो होति। तत्थ अनुत्तानत्थतो ताव “पुग्गलो उपलब्धति सच्चिकट्टपरमत्थेना”ति अयं पुच्छा, “आमन्ता”ति अयं पटिजानना। कस्स पनायं पुच्छा, कस्स पटिजाननाति? “असुकस्सा”ति न वत्तब्बा। न हि भगवा परवादीहि सद्भि विग्गाहिककथं कथेन्तो इमं मातिकं ठपेसि, पुग्गलपञ्जत्तिदेसनादिं पन निस्साय “परमत्थतो अत्ता नाम अत्थी”तिआदिना अनागते विपल्लासगाहिभिक्षुनं, परवादीनज्च नानप्पकारदिट्ठिद्वानविसोधनत्थं मोग्गलिपुत्ततिस्सत्थेरस्स वादनयदस्सनवसेन पुग्गलवादमेतं आरब्ध तन्तिवसेन मातिकं ठपेन्तो सकवादिपरवादीनं पुच्छाविसज्जनदोसारोपनिग्गहपापनादिवचनपटिवचनवसेनेव ठपेसि, तस्मा तदत्थस्स सुखावधारणत्थं सकवादीपुच्छा परवादीपुच्छा सकवादीपटिज्जा परवादीपटिज्जाति एवं विभागं दस्सेत्वा अत्थवण्णनं करिस्साम।

“पुगलो उपलब्धति सच्चिकट्टपरमत्थेना”ति अयं सकवादीपुच्छा, ताय च “ये ‘अत्थि पुगलो’ति एवंलद्धिका पुगलवादिनो, ते एवं पुच्छितब्बा”ति दीपेति । के पन ते पुगलवादिनोति? सासने वज्जिपुत्तका चेव सम्मितया च बहिद्धा बहू अज्जतिथिया च । कदा पनेते सासने उप्पन्नाति? परिनिब्बानतो दुतिये वस्ससते । भगवति किर परिनिब्बुते महाकस्सपत्थेरेन समुस्साहितेहि तप्पमुखेहि वसिगणेहि सुभद्वुड्डपब्बजितादीनं पापभिक्षून् पवेसोकासनिसेधनत्थं अजातसत्तुराजानं सहायं लभित्वा धम्मविनयसरीरं सङ्गहं आरोपेत्वा सासने अचले पवत्तापिते ततो वस्ससतस्स अच्चयेन वेसालियं वज्जिपुत्तकेहि दीपितानि दस वत्थूनि महित्वा ते च भिक्षू निग्गहेत्वा यसत्थेरसमुस्साहितेहि वसिगणेहि पुन धम्मविनयसङ्गहे कते तेहि निग्गहिता दससहस्सा वज्जिपुत्तका कज्जि दुब्बलराजानं बलं लभित्वा मूलसङ्गहं भिन्दित्वा अत्तनो अनाचारानुकूलवचनं पक्खिपित्वा बुद्धवचनञ्च छडुत्वा महासङ्गीतीहि विसुं धम्मविनयसङ्गहं कत्वा महासङ्घिकाचरियकुलं नाम अकंसु । परिसुद्धसासनं पन थेरेहि परिपालितत्ता “थेरवादो”ति पज्जायि, इमेसु पन द्वीसु वादेसु महासङ्घिकतो भिज्जित्वा एकव्योहारिका, गोकुलिका च, ततो पण्णत्तिवादा, बहुलिया, चेतियवादा चाति पञ्च वादा, महासङ्घिकेहि पन सद्धिं छ आचरियकुलानि नाम जातानि । तथा थेरवादतो भिज्जित्वा महिसासका, वज्जिपुत्तका च, ततो धम्मत्तरिया, भद्रयानिका, छन्नागारिका, सम्मितिया च, महिसासकतो धम्मगुत्तिका, सब्बत्थिका च, ततो कस्सपिका, ततो सङ्कन्तिका, ततो सुत्तवादा चाति इमे एकादस वादा जाता । ते पुरिमेहि छहि सद्धिं सत्तरस भिन्नवादा दुतिये वस्ससते उप्पन्ना, थेरवादो पन एकोव असम्भिन्नको, तेन सद्धिं सासने अट्टारस निकाया जाताति वेदितब्बा, ये “अट्टारसाचरियकुलानी”ति पवुच्चन्ति । इमेसं पन अट्टारसन्नं आचरियवादानं वसेन आर्यतिं सासनस्स आलुळनं जत्वा सम्मासम्बुद्धो द्विन्नं वस्ससतानं अच्चयेन सासने पटिलद्धसद्धेन असोकेन धम्मरज्जा बाहिरके अनोलोकेत्वा सासने एव लाभसक्कारे पवत्तन्ते लाभसक्कारत्थाय सासनवेसं गहेत्वा सकानि सकानि दिट्ठिगतानि तथतो दीपेन्तेसु द्वासद्धिदिट्ठिगतिकेसु यथावुत्तसत्तरसाचरियकुलेसु च समयकुसलताय विचिन्तिवा सेतकानि दत्वा उप्पब्बाजितेसु परिसुद्धे महाभिक्षुसङ्घे निसीदित्वा मोग्गलिपुत्ततिस्सत्थेरस्स यानि तदा उप्पन्नानि वत्थूनि, यानि च आर्यतिं उप्पज्जिस्सन्ति, सब्बानिपि तानि अत्तनो सत्थारा दिन्नमातिकामुखमत्तेन पटिबाहित्वा सुत्तसहस्सपटिमण्डितं परप्पवादमथनं आर्यतिलक्खणं कथावत्थुप्पकरणं मातिकविभजनवसेन भासित्वा तं ततियसङ्गीतियं सङ्गहं आरोपेत्वा आलुळितं सासनं पग्गहेतुं समत्थभावं भिक्षुसङ्घे पकासनत्थं आयतिवादप्पटिबाहननयदस्सनवसेन इमं कथावत्थुमातिकं वत्वा थेरस्स ओकासं ठपेन्तो तस्सा विभङ्गं न अवोचाति वेदितब्बं ।

तत्थ पुगलोति अत्ता जीवो सत्तो । उपलब्धतीति पज्जाय उपगन्त्वा लब्धति, जायतीति अत्थो । सच्चिकट्टपरमत्थेनाति एत्थ सच्चिकट्टोति मायामरीचिआदयो विय अभूताकारेन अग्गहेतब्बो भूतट्ठो । परमत्थोति अनुस्सवादिवसेन अग्गहेतब्बो उत्तमत्थो । उभयेनापि यथा रूपवेदनादयो धम्मा भूतेन सभावेन उपलब्धन्ति, एवं ताव “पुगलो उपलब्धती”ति पुच्छति । परवादी “आमन्ता”ति पटिजानाति । पटिजाननञ्चि कत्थचि “आम भन्ते”ति आगच्छति, कत्थचि “आमो”ति आगच्छति, इध पन “आमन्ता”ति आगतं । तत्रायं अधिप्पायो — परवादी हि यस्मा भगवता “अत्थि पुगलो अत्तहिताय पटिप्पन्नो”तिआदिना (अ० नि० ४.९५-९६) पुगलो पकासितो, भगवा च अवितथवादी, तस्मा सो “सच्चिकट्टपरमत्थेनेव अत्थो”ति लद्धिं गहेत्वा “आमन्ता”ति पटिजानाति ।

अथस्स तादिसस्स लेसवचनस्स छलवादस्स ओकासं अददमानो सकवादी “यो सच्चिकट्टो”तिआदिमाह । तत्रायं अधिप्पायो — व्यायं हेट्ठा रूपवेदनादिको धम्मपभेदो आगतो, न सम्पुत्तिसच्चवसेन, नापि अनुस्सवादिवसेन गहेतब्बो, अत्तनो पन भूतताय एव सच्चिकट्टो, अत्तपच्चक्खताय च परमत्थो, सो तथापटिज्जातो पुगलो ततो तेन सच्चिकट्टपरमत्थेन आकारेन उपलब्धति, यथा रुपपानाभुवनादिना सकियेनाकारेन पुन सच्चिकट्टपरमत्थो उपलब्धति, किं तव पुगलोपि एवं उपलब्धतीति वुत्तं होति । न हेवं वत्तब्बेति अवजानना परवादिसस । सो हि तथारूपं पुगलं अनिच्छन्तो अवजानाति । न हि अत्ता नाम खन्धादिविमुत्तो कोचि दिस्सति अज्जत्र ब्यामोहमत्ता । तत्रायं पदच्छेदो — न हि एवं वत्तब्बेति । “न ह एव”न्तिपि पठन्ति, द्विन्मि एवं न वत्तब्बोति अत्थो ।

आजानाहि निग्गहन्ति सकवादिवचनं । यस्मा ते पुरिमाय वत्तब्बपटिज्जाय पच्छिमा नवत्तब्बपटिज्जा, पच्छिमाय च पुरिमा न सन्धीयति, तस्मा निग्गहं पत्तो, तं निग्गहं दोसं अपराधं आजानाहि, सम्पटिच्छाहीति अत्थो । एवं निग्गहं आजानापेत्वा इदानि तं ठपनाय चेव अनुलोमपटिलोमतो पापनारोपनानञ्च वसेन पाकटं करोन्तो “हज्जि पुगलो”तिआदिमाह । तत्थ हज्जीति यदि, सचे पुगलो उपलब्धतीति अत्थो । अयं ताव परवादीपक्खस्स अनुवदनेन ठपनतो निग्गहपतिट्ठापनतो निग्गहपापनारोपनानं लक्खणभूता अनुलोमट्टपना नाम । तेन वत रेतिआदि अनुलोमपक्खे निग्गहस्स पापिकत्ता अनुलोमपापना नाम । तत्थ तेनाति कारणवचनं । वताति ओकप्पनवचनं नियमवचनं । रेति आमन्तनवचनं । इदं वुत्तं होति — तेन वत रे वत्तब्बे वत रे हम्मो भद्रमुख तेन कारणेन वत्तब्बो एवाति अत्थो । यं तत्थ वदेसीतिआदि अनुलोमपक्खे निग्गहस्स आरोपितत्ता अनुलोमरोपना नाम । यज्जस्स परियोसाने “मिच्छा”ति पदं, तस्स पुरतो “इदं ते”ति आहरितब्बं । इदं ते मिच्छाति अयज्जेत्थ अत्थो । एवं उपरिपि । परतो पाळियमि एतं आगतमेव । नो चे पन वत्तब्बेतिआदि “न हेवं वत्तब्बे”ति पटिक्खित्तपक्खस्स अनुवदनेन ठपितत्ता पटिलोमतो निग्गहपापनारोपनानं लक्खणभूता पटिलोमट्टपना नाम । नो च वत रेतिआदि पटिलोमपक्खे निग्गहस्स पापितत्ता पटिलोमपापना नाम । पुन यं तत्थ वदेसीतिआदि पटिलोमपक्खे निग्गहस्स आरोपितत्ता पटिलोमरोपना नाम ।

तत्रायं आदितो पट्टाय सङ्खेपत्थो — यदि पुगलो उपलब्धति सच्चिकट्टपरमत्थेन, तेन वत भो सो उपलब्धतीति वत्तब्बो । यं पन तत्थ वदेसि “वत्तब्बो खो पुरिमपज्हे ‘सच्चिकट्टपरमत्थेन उपलब्धती’ति नो च वत्तब्बो दुतियपज्हे ‘ततो सो पुगलो उपलब्धती’”ति, इदं ते मिच्छाति एवं ताव अनुलोमतो

ठपनापापनारोपना होन्ति ।

अथ न वत्तब्बो दुतियपज्जे “ततो सो पुग्गलो उपलब्धती”ति, पुरिमपज्जेपि न वत्तब्बो । यं पन तत्थ वदेसि “वत्तब्बो खो पुरिमपज्जे  
‘सच्चिकट्टपरमत्थेन उपलब्धती’ति, नो च वत्तब्बो दुतियपज्जे ‘ततो सो पुग्गलो उपलब्धती’”ति, इदं ते मिच्छाति एवं पटिलोमतो ठपनापापनारोपना होन्ति ।  
एवमेतं निग्गहस्स च अनुलोमतो द्विन्नं, पटिलोमतो द्विन्नन्ति चतुन्नं पापनारोपनानञ्च वुत्तत्ता उपलब्धतीतिआदिकं **अनुलोमपञ्चकं** नाम । एत्थ च  
किञ्चापि अनुलोमतो पापनारोपनाहि एको, पटिलोमतो पापनारोपनाहि एकोति द्वे निग्गहा कता, आजानाहि निग्गहन्ति एतस्सेव पन पठमस्स निग्गहस्स  
द्वीहाकारेहि आरोपितत्ता एकोवायं निग्गहोति गहेतब्बो । पठमो निग्गहो ।

इदानीं पच्चनीकनयो होति । तत्थ **पुग्गलो नुपलब्धती**ति पुच्छा परवादस्स । सकवादी यथा रूपवेदनादयो धम्मा उपलब्धन्ति, एवं अनुपलब्धनीयतो  
“**आमन्ता**”ति पटिजानाति । पुन इतरो अत्तना अधिप्पेतं सच्चिकट्टयेव सन्धाय “**यो सच्चिकट्टो**”तिआदिमाह । सम्मुतिसच्चपरमत्थसच्चाणि वा एकतो  
कत्वापि परवादी एवमाह । सकवादी पुग्गलो हि उपादायपञ्जत्तिसम्भावतोपि द्विन्नं सच्चानं एकतो कत्वा पुच्छितत्तापि “**न हेव**”न्ति पटिक्खपति । इदानीं  
किञ्चापि तेन पठमं परमत्थसच्चवसेन नुपलब्धनीयता सम्पटिच्छिता, पच्छा पन सम्मुतिसच्चवसेन वा वोमिस्सकवसेन वा पटिक्खित्ता । परवादी पन  
“नुपलब्धती”ति वचनसामञ्जसत्तं छलवादं निस्साय “यं तथा पठमं पटिज्जातं, तं पच्छा पटिक्खित्तं”न्ति भण्डनस्स पटिभण्डनं विय अत्तनो कतस्स  
निग्गहकम्मस्स पटिकम्मं करोन्तो “**आजानाहि पटिकम्म**”न्ति आह । इदानीं यथास्स अनुलोमपञ्चके सकवादिना वादट्टपनं कत्वा अनुलोमपटिलोमतो  
पापनारोपनाहि परवादिनिग्गहो पाकटो कतो, एवं पटिकम्मं पाकटं करोन्तो “**हज्जि पुग्गलो**”तिआदिमाह । तं हेट्ठा वुत्तनयेनेव अत्थतो वेदितब्बं । यस्मा  
पनेत्थ ठपना नाम परवादपक्खस्स ठपनतो “अयं तव दोसो”ति दस्सेतुं ठपनमतमेव होति, न निग्गहस्स वा पटिकम्मस्स वा पाकटीभावकरणं,  
पापनारोपनाहि पनस्स पाकटीकरणं होति, तस्मा इदं अनुलोमपटिलोमतो पापनारोपनानं वसेन चतूहाकारेहि पटिकम्मस्स कतत्ता **पटिकम्मचतुक्कं** नामाति  
एकं चतुक्कं वेदितब्बं ।

एवं पटिकम्मं कत्वा इदानीं ख्यास्स अनुलोमपञ्चके सकवादिना निग्गहो कतो, तस्स तमेव छलवादं निस्साय दुक्कटभावं दस्सेन्तो “**त्वं चे पन  
मज्जसी**”तिआदिमाह । तत्थ **त्वं चे पन मज्जसी**ति यदि त्वं मज्जसि । “**वत्तब्बे खो**”ति इदं पच्चनीके “आमन्ता”ति पटिजाननं सन्धाय वुत्तं, “**नो च  
वत्तब्बे**”ति इदं पन “न हेवा”ति अवजाननं सन्धाय वुत्तं । **तेन तव तत्था**ति तेन कारणेन त्वंयेव तस्मिं “यो नुपलब्धती”ति पक्खे **हेवं पटिजानन्ति**  
“आमन्ता”ति एवं पटिजानन्तो । **हेवं निग्गहेतब्बे**ति पुन “न हेवा”ति अवजानन्तो एवं निग्गहेतब्बो । **अथ तं निग्गण्हामाति** अथेवं निग्गण्हनारहं तं  
निग्गण्हाम, **सुनिग्गहितो च होसी**ति सकेन मतेन निग्गहितत्ता सुनिग्गहितो च भवसि । एवमस्स निग्गहेतब्बभावं दस्सेत्वा इदानीं तं निग्गण्हन्तो  
“**हज्जी**”तिआदिमाह । तत्थ ठपनापापनारोपना हेट्ठा वुत्तनयेनेव वेदितब्बा । परियोसाने पन **इदं ते मिच्छाति** इदं तव वचनं मिच्छा होतीति अत्थो । इदं  
छलवादेन चतूहि आकारेहि निग्गहस्स कतत्ता **निग्गहचतुक्कं** नाम ।

एवं निग्गहं कत्वापि इदानीं “यदि अयं मया तव मतेन कतो निग्गहो दुन्निग्गहो, योपि मम तथा हेट्ठा अनुलोमपञ्चके कतो निग्गहो, सोपि  
दुन्निग्गहो”ति दस्सेन्तो “**एसे चे दुन्निग्गहिते**”तिआदिमाह । तत्थ **एसे चे दुन्निग्गहिते**ति एसो चे तव वादो मया दुन्निग्गहितो, अथ वा एसो चे तव मया  
कतो निग्गहो दुन्निग्गहो । **हेवमेवं तत्थ दक्ख**ति तत्थापि तथा मम हेट्ठा कते निग्गहे एवमेवं पस्स । इदानीं ख्यास्स हेट्ठा सकवादिना निग्गहो कतो, तं  
“**वत्तब्बे खो**”तिआदिवचनेन दस्सेत्वा पुन तं निग्गहं अनिग्गहभावं उपनेन्तो “**नो च मयं तथा**”तिआदिमाह । तत्थ **नो च मयं तथा तत्थ हेताय  
पटिज्जायाति**आदीसु अयमत्थो — यस्मा सो तथा मम कतो निग्गहो दुन्निग्गहो, तस्मा मयं तथा तत्थ अनुलोमपञ्चके “आमन्ता”ति एताय पटिज्जाय एवं  
पटिजानन्ता पुन “न हेवा”ति पटिक्खेपे कतेपि “आजानाहि निग्गह”न्ति एवं निग्गहेतब्बायेव, एवं अनिग्गहेतब्बम्पि मं निग्गण्हसि, ईदिसेन पन निग्गहेन  
दुन्निग्गहिता मयं होम । इदानीं यं निग्गहं सन्धाय दुन्निग्गहिता च होमाति अवोच, तं दस्सेतुं “**हज्जि पुग्गलो...पे०... इदं ते मिच्छा**”ति आह । एवमिदं  
अनुलोमपटिलोमतो चतूहि पापनारोपनाहि निग्गहस्स उपनीतत्ता **उपनयनचतुक्कं** नाम होति ।

इदानीं न हेवं निग्गहेतब्बेतिआदिकं **निग्गमनचतुक्कं** नाम होति । तत्थ **न हेवं निग्गहेतब्बे**ति यथाहं तथा निग्गहितो, न हि एवं निग्गहेतब्बो, एतस्स हि  
निग्गहस्स दुन्निग्गहभावो मया साधितो । **तेन** हीति तेन कारणेन । यस्मा एस निग्गहो दुन्निग्गहो, तस्मा यं मं निग्गण्हसि । **हज्जि पुग्गलो...पे०... इदं ते  
मिच्छाति** इदं निग्गण्हनं तव मिच्छाति अत्थो । **तेन हि ये कते निग्गहेति** येन कारणेन इदं मिच्छा, तेन कारणेन यो तथा निग्गहो कतो, सो दुक्कटो । यं मया  
पटिकम्मं कतं, तदेव सुकतं । यापि चेसा पटिकम्मचतुक्कादिवसेन कथामगसम्पटिपादना कता, सापि सुकताति । तदेव पुग्गलो उपलब्धतीतिआदिकस्स  
अनुलोमपञ्चकस्स नुपलब्धतीतिआदिकानं पटिकम्मनिग्गहोपनयननिग्गमनचतुक्कानञ्च वसेन **अनुलोमपच्चनीकं** नाम निदिद्वन्ति वेदितब्बं । एतावता  
सकवादिनो पुब्बपक्खे सति परवादिनो वचनसामञ्जसत्तेन छलवादेन जयो होति ।

इदानीं यथा परवादिनो पुब्बपक्खे सति सकवादिनो धम्मेनेव तथेन जयो होति, तथा वादुप्पत्तिं दस्सेतुं “**पुग्गलो नुपलब्धती**”ति  
पच्चनीकानुलोमपञ्चकं आरब्धं । तत्थ पच्चनीके पुच्छा परवादस्स, रूपादिभेदं सच्चिकट्टपरमत्थं सन्धाय पटिज्जा सकवादस्स, सुद्धसम्मुतिसच्चं वा  
परमत्थमिस्सकं वा सम्मुतिसच्चं सन्धाय “यो सच्चिकट्टो”ति पुन अनुयोगो परवादस्स, सम्मुतिवसेन “**पुग्गलो नुपलब्धती**”ति नवत्तब्बत्ता मिस्सकवसेन

वा अनुयोगस्स संकिण्णत्ता “न हेव”न्ति पटिक्खेपो सकवादस्स, पटिज्जातं पटिक्खिपतीति वचनसामञ्जमत्तेन “आजानाहि निग्गह”न्तिआदिवचनं परवादस्स । एवमयं पुग्गलो नुपलब्धतीति दुतियवादं निस्साय दुतियो निग्गहो होतीति वेदितब्बो । एवं तेन छलेन निग्गहो आरोपितो ।

इदानीं धम्मेन समेन परवादपटिज्जाय अत्तनो वादे जयं दस्सेतुं अनुलोमनये पुच्छा सकवादस्स, अत्तनो लद्धिं निस्साय पटिज्जा परवादस्स, लद्धिया ओकासं अदत्त्वा परमत्थवसेन पुन अनुयोगो सकवादस्स, परमत्थवसेन पुग्गलस्स अनुपलब्धनतो पटिक्खेपो परवादस्स, ततो परं धम्मेन समेन अत्तनो जयदस्सनत्थं “आजानाहि पटिकम्म”न्तिआदि सब्बं सकवादिवचनमेव होति । तत्थ सब्बेसं पटिकम्मनिग्गहोपनयननिग्गमनचतुक्कानं हेट्ठा वुत्तनयेनेव अत्थो वेदितब्बो । एवमिदं “पुग्गलो नुपलब्धती”तिआदिकस्स पच्चनीकपच्चकस्स “उपलब्धती”तिआदीनं पटिकम्मनिग्गहोपनयननिग्गमनचतुक्कानञ्च वसेन पच्चनीकानुलोमपच्चकं नाम निद्धिद्वं होति । एवमेतानि पठमसच्चिकट्टे द्वे पच्चकानि निद्धिद्वानि, तत्थेतं वुच्चति —

“निग्गहो परवादस्स, सुद्धो पठमपच्चके ।

असुद्धो पन तस्सेव, पटिकम्मजयो तहिं ॥

“निग्गहो सकवादस्स, असुद्धो दुतियपच्चके ।

विसुद्धो पन तस्सेव, पटिकम्मजयो तहिं ॥

“तस्मा द्वीसुपि ठानेसु, जयोव सकवादिनो ।

धम्मेन हि जयो नाम, अधम्मेन कुतो जयो ॥

“सच्चिकट्टे यथा चेत्थ, पच्चकद्वयमण्डिते ।

धम्माधम्मवसेनेव, वुत्तो जयपराजयो ॥

“इतो परेसु सब्बेसु, सच्चिकट्टेसु पण्डितो ।

एवमेव विभावेय्य, उभो जयपराजये”ति ॥ (कथा० अट्ठ० ७-१०) ।

पठमो सुद्धिकसच्चिकट्टो निद्धितो ।

एवं सुद्धिकसच्चिकट्टं वित्थारेत्वा इदानीं तमेव अपरेहिपि ओकासादीहि नयेहि वित्थारेतुं पुन “पुग्गलो उपलब्धती”तिआदि आरब्धं । तत्थ पुच्छा सकवादस्स, पटिज्जा परवादस्स । पुन सब्बत्थाति सरीरं सन्धाय अनुयोगो सकवादस्स, रूपस्मिं अत्तानं समनुपस्सनादोसञ्च “अज्जं जीवं अज्जं सरीरं”न्ति आपज्जनदोसञ्च दिस्वा पटिक्खेपो परवादस्स । सेसमेत्थ अनुलोमपच्चनीकपच्चके हेट्ठा वुत्तनयेनेव वेदितब्बं । पाठो पन संखित्तो । तत्थ यस्मा सरीरं सन्धाय “सब्बत्थ नुपलब्धती”ति वुत्ते सरीरतो बहि उपलब्धतीति आपज्जति, तस्मा पच्चनीके पटिक्खेपो सकवादस्स, पठमं अनुजानित्वा पच्छा अवजानातीति छलवादस्स वसेन पटिकम्मं परवादस्स, सेसं पाकटमेव ।

दुतियनये सब्बेदाति पुरिमपच्छिमजातिकालञ्च धरमानपरिनिब्बुतकालञ्च सन्धाय अनुयोगो सकवादस्स, स्वेव खत्तियो सो ब्राह्मणोतिआदीनं आपत्तिदोसञ्च धरमानपरिनिब्बुतानं विसेसाभावदोसञ्च दिस्वा पटिक्खेपो परवादस्स । सेसं पठमनये वुत्तसदिसमेव ।

ततियनये सब्बेसूति खन्धायतनादीनि सन्धाय पुच्छा सकवादस्स, रूपस्मिं अत्ता, चक्खुस्मिं अत्तातिआदिदोसभयेन पटिक्खेपो परवादस्स । सेसं तादिसमेवाति ।

एवमिमानि तीणि मुखानि अनुलोमपच्चनीकपच्चके अनुलोममत्तवसेनेव ताव पटिपाटिया भाजेत्वा पुन पच्चनीकानुलोमपच्चके पच्चनीकमत्तवसेनेव भाजेतुं “पुग्गलो नुपलब्धती”तिआदि आरब्धं । तत्थ हेट्ठा वुत्तनयेन अत्थो वेदितब्बो । एतावता सुद्धिकस्स चेव इमेसञ्च तिण्णन्ति चतुन्नं सच्चिकट्टानं एकेकस्मिं सच्चिकट्टे अनुलोमपच्चनीकस्स, पच्चनीकानुलोमस्स चाति द्विन्नं द्विन्नं पच्चनीकानं वसेन अयं अट्ठमुखा नाम वादयुत्ति निद्धिद्वो होतीति वेदितब्बा । या एकेकस्मिं मुखे एकेकस्स निग्गहस्स वसेन वुच्चति । तत्थेतं वुच्चति —

“एवं चतुब्बिधे पज्हे, पच्चकद्वयभेदतो ।

एसा अट्ठमुखा नाम, वादयुत्ति पकासिता ॥

“अट्ठेव निग्गहा तत्थ, चत्तारो तेसु धम्मिका ।

अधम्मिका च चत्तारो, सब्बत्थ सकवादिनो ।  
जयो पराजयो चेव, सब्बत्थ परवादिनो”ति ॥ (कथा० अट्ठ० १४) ।

अयं तावेत्थ अनुत्तानत्थतो संवण्णना ।

अत्थविनिच्छयो पनेत्थापि मोग्गलिपुत्ततिस्सत्थेरेन कतनिद्देसस्स नयमुखमत्तदस्सनवसेनेव होति । थेरेन हि भगवता ठपिताय एतिस्सा मातिकाय पदुद्धारवसेन निद्देसं अकत्वा भगवता दिन्मअट्ठमुखवादयुत्तिनये ठत्वा अपरेहि परियायेहि पुग्गलवादं, तदञ्जं नानप्पकारं मिच्छागाहञ्च निराकरोन्तेनेव पुग्गलकथं आदिं कत्वा साधिकद्विसत्तकथाहि निद्देसो कतो ।

तत्थ पुग्गलवादिनिराकरणत्थं ताव खन्धायतनधातुइन्द्रियवसेन सत्तपज्जासाय धम्मेषु एकेकेन सद्धिं “पुग्गलो उपलब्धति सच्चिकट्टपरमत्थेन, रूपञ्च उपलब्धति सच्चिकट्टपरमत्थेन...पे०... पुग्गलो उपलब्धति सच्चिकट्टपरमत्थेन, वेदनापि उपलब्धति सच्चिकट्टपरमत्थेना”ति आदिना नयेन पुग्गलसंसन्दनवसप्पवत्तं **सुद्धिकसंसन्दनं**, यथा रूपवेदनादयो सत्तपज्जास धम्मा अञ्जमञ्जा विसदिसा उपलब्धन्ति, एवं रूपादीहि विसदिसो पुग्गलो उपलब्धतीति पुच्छनवसप्पवत्तं **ओपम्मसंसन्दनं**, “रूपं पुग्गलो, रूपस्मिं पुग्गलो, अञ्जत्र रूपा पुग्गलो, पुग्गलस्मिं रूपं”न्ति एवं चतुक्कनयेन सत्तपज्जासाय धम्मेषु पुच्छनवसप्पवत्तं चतुक्कनयसंसन्दनन्ति तिविधा संसन्दननया वुत्ता । तत्थ पुग्गलस्स रूपादिसभावत्ते निच्चसस्सतुच्छेदादिप्पसङ्गतो यथानुरूपं निराकरणं वेदितव्वं, अतिवित्थारभयेनेत्थ उपरि चेतं न वित्थारीयति ।

ततो “यथा रूपादयो सप्पच्चया, अप्पच्चयादयो वा होन्ति, एवं तव पुग्गलोपि सप्पच्चयादिलक्खणयुत्तो”ति पुच्छनवसप्पवत्ता **लक्खणयुत्तिकथा**, “पुग्गलो”ति, “उपलब्धती”ति च पदद्वयादिसोधनत्थं “यो पुग्गलो, सो उपलब्धति । यो वा उपलब्धति, सो पुग्गलो”ति आदिपुच्छनवसप्पवत्तं **वचनसोधनं**, “रूपधातुया रूपी”ति आदि नामपज्जत्तिसोधनवसप्पवत्तो **पज्जत्तानुयोगो** च, “सोव पुग्गलो सन्धावति अस्मा लोका परं लोकं, अञ्जो वा, न अञ्जो वा, नेव अञ्जो नानञ्जो वा”ति आदिना गतिपरिवत्तनमुखेन **चुत्तिपटिसन्धानुयोगो**, “रुक्खं उपादाय छायादीनं विय खन्धादिं उपादाय परमत्थतो पुग्गलपज्जती”ति वादे तस्स अनिच्चसङ्गततादिप्पसङ्गदीपको **उपादापज्जत्तानुयोगो**, “कल्याणपापकानं कम्मानं कारको पुग्गलो”ति वादे तस्स वट्टदुक्खानुपच्छेदादिप्पसङ्गदीपको **पुरिसकारानुयोगो** च, “यो इद्धिविकुब्बको, सो पुग्गलो”ति आदिवादभेदको **अभिज्जानुयोगो**, “मातापितादयो नाम अत्थि, तेन पुग्गलो अत्थी”ति वादभेदको **जातकानुयोगो**, “एवं खत्तियो”ति आदि **जात्यानुयोगो**, “गहट्ठो पब्बजितो”ति आदि **पटिपत्तानुयोगो**, “देवो मनुस्सो”ति आदि **उपपत्तानुयोगो**, “सोतापन्नो”ति आदि **पटिवेधानुयोगो**, “अट्ठ पुरिसपुग्गला”ति आदि **सङ्गानुयोगो**, “पुग्गलो सङ्गतो”ति आदि वसप्पवत्तो **सच्चिकट्टसभागानुयोगो**, “सुखं वेदनं वेदियमानो”ति आदि **वेदकानुयोगो**, “काये कायानुपस्सी”ति आदि **किच्चाणुयोगो**, “अत्थि पुग्गलो अत्तहिताय पटिपन्नो”ति आदिना पुग्गलसभावसाधकसुत्तेसु सन्निस्सितेषु —

सब्बे धम्मा अनत्ता (म० नि० १.३५३, ३५६; ध० प० २७९), दुक्खमेव उप्पज्जमानं उप्पज्जति (सं० नि० २.१५) ।

किन्नु सत्तोति पच्चेसि, मार दिट्ठिगतं नु ते ।  
सुद्धसङ्खारपुज्जोयं, नयिध सत्तूपलब्धति ॥

दुक्खमेव हि सम्भोति, दुक्खं तिट्ठति वेति च ।  
नाञ्जत्र दुक्खा सम्भोति, नाञ्जं दुक्खा निरुज्झति ॥ (सं० नि० १.१७९) ।

यस्मा च खो, आनन्द, सुञ्जं अत्तेन वा अत्तनियेन वा...पे०... तस्मा सुञ्जो लोकोति वुच्चति (सं० नि० ४.८५) ।

“अत्तनि वा, भिक्खवे, सति अत्तनियं मेति अस्साति...पे०... अत्तनि च भिक्खवे अत्तनिये च सच्चतो थेततो अनुपलब्धनियमाने यम्पि तं दिट्ठिद्धानं, सो लोको, सो अत्ता, सो पेच्च भविस्सामि, निच्चो धुवो सस्सतो अविपरिणामधम्मो, सस्सतिसमं तथेव ठस्सामीति, ननायं, भिक्खवे, केवलो परिपूरो बालधम्मो”ति (म० नि० १.२४४), “तत्र, सेनिय, ख्यायं सत्था दिट्ठे चेव धम्मे अत्तानं सच्चतो थेततो न पज्जापेति, अभिसम्पराये च...पे०... अयं वुच्चति, सेनिय, सत्था सम्मासम्बुद्धो”ति आदिना पुग्गलाभावदीपकसुत्तसन्दस्सनवसप्पवत्तो **सुत्तसन्दस्सनानुयोगो** चाति एत्तकेन कथामग्गेन वित्थारतो पठमा पुग्गलकथा विभत्ता । तत्थ “अत्थि पुग्गलो अत्तहिताय पटिपन्नो”ति आदीसु यथा रूपादयो धम्मा पच्चत्तलक्खणसामञ्जलक्खणवसेन लब्धन्ति, न एवं पुग्गलो, रूपादीसु पन सति लोकवोहारमत्तेन “अत्थि पुग्गलो”ति वुच्चतीति । वुत्तम्पि चेतं भगवता — “इमा खो, चित्त...पे०... लोकवोहारा लोकपज्जत्तियो”ति (दी० नि० १.४४०) । द्विधापि बुद्धानं कथा सम्मुतिकथा, परमत्थकथा च । तत्थ “सत्तो पुग्गलो गामो पब्बतो”ति आदिका **सम्मुतिकथा** नाम, “अनिच्चं दुक्खं अनत्ता खन्धा आयतनानी”ति आदिका **परमत्थकथा** नाम । बुद्धा हि ये ये सत्ता यथा यथा बुज्झित्वा चतुसच्चपटिवेधं कातुं सकवोन्ति, तेसं तेसं तथा तथा सम्मुतिवसेन वा परमत्थवसेन वा वोमिस्सकवसेन वा देसेत्वा नामरूपपरिच्छेददस्सनवसेनेव अमत्तं मग्गं पकासेन्ति । अयञ्चि —

दुवे सच्चानि अक्खासि, सम्बुद्धो वदतं वरो ।  
सम्मतिं परमत्थञ्च, ततियं नुपलब्धति ॥

तत्थ —

सङ्केतवचनं सच्चं, लोकसम्मतिकारणं ।  
परमत्थवचनं सच्चं, धम्मानं तथलक्खणं ॥

तस्मा विज्जू अकत्त्वान, व्यञ्जनेभिनिवेसनं ।  
परमत्थे पतिट्ठाया, पुग्गलादिं विवज्जये ॥

पज्जत्तिं अनतिकम्म, परमत्थो पकासितो ।  
विनायकेन सो यस्मा, तस्मा अज्जोपि पण्डितो ।  
परमत्थं पकासेन्तो, समज्जं नातिधावयेति ॥ (कथा० अट्ठ० २३७) ।

अयं पुग्गलकथानयो ।

### परिहानिकथादिवण्णना

पुग्गलकथातो परं “परिहायति अरहा अरहत्ता”तिआदिना असेखा, सोतापन्नवज्जितसेखा च अगमगगफलतो परिहायन्तीति पवत्ता **परिहानिकथा** । पब्बज्जा विय पटिवेधसङ्घातो ब्रह्मचरियवासोपि मनुस्सेसु एव भवति, नत्थि देवेसु ब्रह्मचरियवासोति पवत्ता **ब्रह्मचरियकथा** । दुक्खदस्सनेन एकदेसतो किलेसा पहीयन्ति, तथा समुदयदस्सनादीहीति एवं नानाभिसमयवसेन ओधिसो किलेसा पहीयन्तीति पवत्ता **ओधिसोकथा** । ज्ञानलाभी पुथुज्जनो कामरागव्यापादे समुच्छेदवसेन जहत, सो चतुसच्चाभिसमया पठममेव अनागामी होतीति पवत्ता **जहतिकथा** । अतीतादिभेदं सब्बं खन्धादिकं कालत्तयेपि खन्धादिसभावेन अत्थीति पवत्ता **सब्बमत्थीतिकथा** । अतीतं, अनागतञ्च खन्धादिकं अत्थीति पवत्ता **अतीतखन्धादिकथा** । अतीतेसु विपाकधम्मधम्मेसु एकच्चं अविपक्कविपाकमेव अत्थि, न इतरन्ति पवत्ता **एकच्चमत्थीतिकथा** । सब्बे धम्मा सतिपट्टानाति पवत्ता **सतिपट्टानकथा** । अतीतानागतादिवसेन नत्थि, सकभावेन वा अत्थि, परभावेन नत्थीति पवत्ता **हेवत्थिकथा** । तत्थ **हेवत्थीति** एवं इमिना पकारेन अत्थीति अत्थो ।

अधिमानिकानं, कुहकानं वा अरहत्तपटिज्जानं सुक्कविस्सट्ठिं दिस्वा मारकायिका देवता उपसंहरन्तीति पवत्ता **परूपहारकथा** । अरहतो परेसं नामगोत्तादीसु अत्थि अज्जाणं, अत्थि कङ्का, परेहि आपनीयतो अत्थि परवितरणाति **तिस्सो कथा** । सोतापत्तिमगगक्खणे दुक्खन्ति वाचा भिज्जतीति पवत्ता **वचीभेदकथा** । दुक्खन्ति वाचं भासन्तो दुक्खे जाणं आहरति, तञ्च लोकुत्तरन्ति पवत्ता **दुक्खाहारकथा** । समापत्तियं, भवङ्गे च चित्तं चिरं तिड्ढतीति पवत्ता **चित्तट्ठितिकथा** । सब्बे सङ्खारा निप्परियायेन आदित्ता कुक्कुळनिरयसदिसाति पवत्ता **कुक्कुळकथा** । पच्चेकं चतुसच्चदस्सनवसेन एकेकस्स मगगस्स चतुक्खत्तुं उपपत्तिवसेन सोळसहि कोट्टासेहि अरहत्तप्पतीति पवत्ता **अनुपुब्बाभिसमयकथा** । बुद्धानं वोहारवचनं लोकुत्तरन्ति पवत्ता **वोहारकथा** । सुद्धसत्तानं अप्पटिसङ्खाय मग्गेन विना किलेसनिरोधसङ्घातो अप्पटिसङ्खानिरोधो, पटिसङ्खाय तेन मग्गेन किलेसनिरोधोति द्वे निरोधाति पवत्ता **निरोधकथा** ।

तथागतबलं सावकसाधारणन्ति पवत्ता **बलकथा** । आसवक्खयजाणविरहितं नवबलं लोकुत्तरन्ति पवत्ता **अरियन्तिकथा** । सरागं चित्तं निब्बानं आरब्ध रागतो विमुच्चतीति पवत्ता **विमुत्तिकथा** । ज्ञानेन विक्खम्भनविमुत्तिया पठमं विमुत्तं चित्तं मगगक्खणे समुच्छेदविमुत्तिया विमुच्चमानं नाम होतीति पवत्ता **विमुच्चमानकथा** । अट्ठमकसङ्घातस्स सोतापत्तिमगगट्ठस्स अनुलोमगोत्रभुक्खणे दिट्ठिविचिकिच्छा पहीयन्ति नाम, मगगक्खणे पहीना नामाति पवत्ता **अट्ठमककथा** । अट्ठमकस्स मगगक्खणे सट्ठिन्द्रियादीनि पटिलभन्ति, न पटिलद्धानीति पवत्ता **अट्ठमकस्स इन्द्रियकथा** । चतुत्थज्ज्ञानधम्मपत्थद्धं मंसचक्खुमेव दिब्बचक्खु नामाति पवत्ता **दिब्बचक्खुकथा** । तथा मंससोते **दिब्बसोतकथा** । यथाकम्मपूगतजाणमेव दिब्बचक्खूति पवत्ता **यथाकम्मपूगतजाणकथा** । देवब्रह्मानं पाणातिपातादिअसंवराभावमत्तेन सम्पत्तविरतिया अभावेपि संवरो अत्थीति पवत्ता **संवरोकथा** । असज्जीनम्पि चुतिपटिसन्धिकक्खणे सज्जा अत्थीति पवत्ता **असज्जकथा** । नेवसज्जानासज्जायतनभूमियं सज्जा नप्पवत्ततीति पवत्ता **नेवसज्जानासज्जायतनकथा** ।

अरहा गिही अस्साति पवत्ता **गिहिस्स अरहातिकथा** । अनागामिनो सुद्धावासेसु पटिसन्धिकचित्तेन उपपत्तिकक्खणे अरहन्तो होन्तीति पवत्ता **उपपत्तिकथा** । अरहतो लोकियधम्मापि अनासवाति पवत्ता **अनासवकथा** । पच्चुप्पन्नक्खणे समङ्गिभावसमन्नागमो च रूपावचरादिभूमन्तरपटिलाभसमन्नागमो चाति द्वे समन्नागमा, येसं पन इमे द्वे समन्नागमे ठपेत्वा अज्जोपि हेत्थ उपपत्तिधम्मवसेन एको समन्नागमो नाम अत्थि, तेन अरहा चतूहि फलेहि समन्नागतोति पवत्ता **समन्नागतकथा** । इमिनाव नयेन अरहा छहि उपेक्खाहि समन्नागतोति पवत्ता **उपेक्खासमन्नागतकथा** । मगगजाणसब्बज्जुतज्जाणसङ्घातबोधिया सदा सन्निहितभावेन बुद्धोति पवत्ता **बोधिया बुद्धोतिकथा** । महापुरिसलक्खणयुत्ताव बोधिसत्ताति पवत्ता **लक्खणकथा** । बोधिसत्तानम्पि मगगनियामो अत्थीति पवत्ता **नियामोक्कन्तिकथा** । चतुत्थमगगट्ठो तीहि फलेहि समन्नागतोतिआदिना

पवत्ता **अपरापि समन्नागतकथा** । पठममग्गादीहि पहीनेहि सद्धि निप्परियायतो अरहत्तं सब्बसंयोजनप्पहानन्ति पवत्ता **सब्बसंयोजनपहानकथा** ।

निप्परियायतो फलं विमुत्ति नाम, विपस्सनामग्गपच्चवेक्खणजाणानि पन परियायतो । एवं पन अग्गहेत्वा यं किञ्चि किलेसविप्पयुत्तं जाणं विमुत्तीति पवत्ता **विमुत्तिकथा** । बुद्धादिअसेखारम्मणं असेखजाणन्ति पवत्ता **असेखजाणकथा** । पथवीकसिणादिसमापत्तियो परमत्थतो अविज्जमाने पञ्चतारम्मणे पवत्तत्ता विपरीतजाणन्ति पवत्ता **विपरीतकथा** । तत्थ अनिच्चे निच्चन्तिआदिना चतुब्बिधो विपल्लासो वेदितब्बो । सब्बेसं पुथुज्जनानं नियामगमनाय जाणं अत्थीति पवत्ता **नियामकथा** । सब्बं जाणं पटिसम्भिदाति पवत्ता **पटिसम्भिदाकथा** । सम्मुतिविसयम्पि जाणं भूतारम्मणमेवाति पवत्ता **सम्मुतिजाणकथा** । चेतोपरियजाणं चित्तारम्मणमेव, न तंसम्पयुत्तरागादिचेतसिकारम्मणन्ति पवत्ता **चित्तारम्मणकथा** । सब्बस्मिं अनागतधम्मे सब्बेसं जाणं अत्थीति पवत्ता **अनागतजाणकथा** । पच्चुप्पन्ने अत्तनो जाणेपि जाणं पवत्ततीति पवत्ता **पटुप्पन्नजाणकथा** । बुद्धा विय सावकापि तेन तेन वेनेय्यजनेन पत्तब्बफलं जत्वाव तदत्थाय धम्मं देसेन्तीति पवत्ता **फलजाणकथा** ।

सम्मत्तनियामो नियमतो निच्चट्टेन असङ्कतोति पवत्ता **नियामकथा** । “धम्मट्ठिता धम्मनियामता”तिआदिवचनतो पटिच्चसमुप्पादो असङ्कतोति पवत्ता **पटिच्चसमुप्पादकथा** । “सच्चानि तथानि अवितथानी”तिआदिवचनतो चतुसच्चानि असङ्कतानीति पवत्ता **सच्चकथा** । “चत्तारो आरुप्पा आनेज्जा”ति वचनतो असङ्कताति पवत्ता **आरुप्पकथा** । निरोधसमापत्ति असङ्कताति पवत्ता **निरोधसमापत्तिकथा** । असङ्कतो आकासोति **आकासकथा** । **आकासो सनिदस्सनोतिकथा** । पथवीधातु सनिदस्सनातिआदिं कत्वा **कायकम्मं सनिदस्सनन्ति** परियोसानकथा ।

नत्थि केचि धम्मा केहिचि धम्मेहि सङ्गहिता, तेन एकविधेन रूपसङ्गहोतिआदि निरत्थकन्ति पवत्ता **सङ्गहितकथा** । वेदनादयो अरूपधम्मा अज्जमज्जं न सम्पयुत्ताति पवत्ता **सम्पयुत्तकथा** । चेतसिकं नत्थीति पवत्ता **चेतसिककथा** । चेतनाधम्मोव दानं, न देय्यधम्मोति पवत्ता **दानकथा** । पटिग्गाहकानं परिभोगमयं पुज्जं अत्थीति पवत्ता **परिभोगकथा** । पेता इतो दिन्नचीवरादीहेव यापेन्तीति पवत्ता **इतोदिन्नकथा** । पथवीकम्मविपाकोतिकथा । **जरामरणं विपाकोतिकथा** । किलेसप्पहानमत्तमेव सामज्जफलं, न चित्तचेतसिका धम्माति पवत्ता **अरियधम्मविपाककथा** । अज्जमज्जादिपच्चयताय **विपाको विपाकधम्मधम्मोतिकथा** ।

असुरकायेन सद्धिं छ गतियोति पवत्ता **गतिकथा** । मतसत्तो मातुउतुसमयज्ज मातापितुसंयोगज्ज ओलोकयमानो सत्ताहं, अतिरेकसत्ताहं वा यस्मिं भवे तिट्ठति, सो अन्तराभवो नाम अत्थीति पवत्ता **अन्तराभवकथा** । रूपादिपञ्चकामगुणाव कामधातु नाम, न तु वत्थुकामकिलेसकामाति पवत्ता **कामगुणकथा** । पञ्चेवायतनानि कामातिकथा । रूपधम्माव रूपधातूतिकथा । अरूपधम्माव अरूपधातूतिकथा । रूपधातुया सत्ता घानादीहि सद्धिं सळायतनिकाति पवत्ता **रूपधातुयाआयतनकथा** । आरुप्णेपि अत्थि सुखुरूपन्तिकथा । कायवचीविज्जत्तिवसेन रूपं कम्मन्तिकथा । चित्तविप्पयुत्तो अरूपधम्मोव जीवितिन्द्रियं, रूपजीवितिन्द्रियं नत्थीति पवत्ता **जीवितिन्द्रियकथा** । अरियुपवादकम्मेन अरहत्ता परिहायतीति पवत्ता **कम्महेतुकथा** ।

अनिच्चादिवसेन सङ्खारे आदीनवतो अपस्सित्वा निब्बानं आनिसंसतो पस्सन्तस्स संयोजनप्पहानं होतीति पवत्ता **आनिसंसदस्साविकथा** । निब्बानारम्मणम्पि संयोजनं अत्थीति पवत्ता **अमत्तारम्मणकथा** । रूपं सारम्मणन्तिकथा । अनुसया अनारम्मणातिकथा । जाणं अनारम्मणन्तिकथा । अतीतारम्मणज्ज अनागतारम्मणज्ज चित्तं अनारम्मणन्तिकथाद्वयं । सब्बं चित्तं वितक्कानुपतितन्तिकथा । वितक्कविप्फारोव सद्दो, सो च न सोतविज्जेय्योति पवत्ता **वितक्कविप्फारसद्दकथा** । विनापि चित्तेन वाचा पवत्ततीति पवत्ता **नयथाचित्तस्सवाचातिकथा** । विनापि चित्तेन कायकम्मं पवत्ततीति पवत्ता **नयथाचित्तस्सकायकम्मन्तिकथा** । अतीतेहिपि ज्ञानेहि, अनागतेहिपि योगिनो समन्नागताति पवत्ता **अतीतानागतसमन्नागतकथा** ।

भवङ्गचित्ते अनिरुद्धे एव कुसलाकुसलचित्तानि उप्पज्जन्ति, तदभावे च सन्ततिनिरोधो सियाति पवत्ता **निरोधकथा** । सह वाचाहि विज्जत्तिरूपं मग्गोतिकथा । पञ्चविज्जाणसमङ्गिस्सापि मग्गभावना अत्थीति पवत्ता **पञ्चविज्जाणसमङ्गिस्समग्गकथा** । पञ्चविज्जाणा कुसलापि अकुसलापीतिकथा । पञ्चविज्जाणा साभोगातिकथा । मग्गक्खणे लोकियेन, लोकुत्तरेन चाति द्वीहि सीलेहि युत्तातिकथा । सीलं अचेतसिकन्तिकथा । सीलं न चित्तानुपरिवर्ततीतिकथा । समादानहेतुचित्तविप्पयुत्तो पुज्जोपचयो होतीति पवत्ता **समादानहेतुकथा** । विज्जत्ति सीलन्तिकथा । पाणातिपातादयो विनापि विज्जत्तिं होन्तीति पवत्ता **अविज्जत्तिदुस्सील्यकथा** ।

अनुसया अब्याकता, अहेतुका, चित्तविप्पयुत्ताति **तिस्सोपि अनुसयकथा** । असेखस्स जाणविप्पयुत्तप्पवत्तिया सो जाणीति नवत्तब्बोति पवत्ता **जाणकथा** । जाणं चित्तविप्पयुत्तन्तिकथा । मग्गक्खणे इदं दुक्खन्ति जाणं पवत्तन्ति पवत्ता **इदं दुक्खन्तिकथा** । बुद्धा इद्धिबलेन आयुकम्पं विनापि महाकम्पं तिट्ठन्तीति पवत्ता **इद्धिबलकथा** । चित्तसन्तति समाधि, न एकचित्तक्खणिकोति पवत्ता **समाधिकथा** । अविज्जादिपटिच्चसमुप्पादङ्गेहि अज्जा धम्मट्ठिताति पवत्ता **धम्मट्ठिताकथा** । रूपादीहि अज्जा अनिच्चताति पवत्ता **अनिच्चताकथा** ।

विज्जत्तियो विनापि इन्द्रियसंवरो कायवचीकम्मन्ति पवत्ता कथा । सब्बं कम्मं विपाकजनकन्ति पवत्ता कम्मकथा । सद्दो विपाकोति पवत्ता कथा । सळायतनं विपाकोति पवत्ता कथा । मग्गं विनापि सत्तक्खत्तुपरमोतिकथा । तथा कोलंकोलएकबीजकथासुपि । दिट्ठिसम्पन्नो जीविता वारोपेतीतिकथा । दिट्ठिसम्पन्नस्स अपायदुग्गतिया सद्धिं रूपादितण्हासङ्कातदुग्गतिपहीनाति पवत्ता **दुग्गतिकथा** । सत्तमभविकस्स तण्हासम्भवतो दुग्गति अप्पहीनाति पवत्ता

## सत्तमभविककथा ।

सङ्खभेदादिकपट्टं कम्मं कत्वा तेन महाकप्पं असीतिभागं कत्वा ततो एकभागमत्तं कालं आयुकप्पं निरये पच्चन्तीति अगगहेत्वा सकलं महाकप्पं पच्चन्ति, विनस्समानेपि कप्पे चक्कवाळन्तरेसु पच्चन्तीति पवत्ता **कप्पट्टकथा** । सङ्खभेदको अप्पनाकुसलानि विय कामावचरकुसलम्पि न पटिलभतीति पवत्ता **कुसलपटिलाभकथा** । अङ्गसम्पन्नाय आणत्तिया अभावेपि मातुधातादिआनन्तरियकम्मपयोजको मिच्छन्तनियतो एवाति पवत्ता **अनन्तरापयुत्तकथा** । अनियतधम्मेषुपि केचि कुसलसम्पयुत्तानियता अत्थीति पवत्ता **नियतस्स नियामकथा** । नीवरणेहि निवुत्तेन पटिच्छन्नेनेव चित्तेन नीवरणं पजहन्तीति पवत्ता **निवुत्तकथा** । सम्मुखीभूतं संयोजनमेव जहतीति पवत्ता **सम्मुखीभूतकथा** । समापन्नो च झानारम्मणनिकन्तिया झानं अस्सादेतीति पवत्ता **समापन्नो अस्सादेतीतिकथा** । दुक्खवेदनायपि रागस्सादवेदना होतीति पवत्ता **अस्सातरागकथा** । धम्मतण्हा अब्बाकतातिकथा । धम्मतण्हा न दुक्खसमुदयोतिकथा ।

कुसलं वा अकुसलस्स, अकुसलं वा कुसलस्स अनन्तरा उप्पज्जन्तीति पवत्ता **कुसलाकुसलपटिसन्दहनकथा** । गब्भसेय्यकानम्पि बीजमत्तं सळायतनं पटिसन्धिकखणे उप्पज्जन्तीति पवत्ता **सळायतनुप्पत्तिकथा** । पच्चविज्जाणानि अज्जमज्जस्स अनन्तरा उप्पज्जन्तीति पवत्ता **अनन्तरपच्चयकथा** । सम्मावाचाकम्मन्तविज्जत्तियो अरियरूपन्तिकथा । कामरागादितो अज्जो अनुसयोतिकथा । किलेसपरियुद्धानं चित्तविप्पयुत्तन्तिकथा । यथा कामरागो कामधातुयं परियापन्नो, एवं रूपरागअरूपरागा रूपारूपभूमियं परियापन्नाति पवत्ता **परियापन्नकथा** । द्वयं दिट्ठिगतं अब्बाकतन्तिकथा । दिट्ठिगतं अपरियापन्नन्तिकथा । यो येसं हेतुपच्चयो, सो पुन तेसं सहजातादिपच्चयो न होति, एकधाव एकस्स पच्चयो होतीति पवत्ता **पच्चयताकथा** । अविज्जाव सङ्कारानं पच्चयो, न पन सङ्कारा अविज्जायाति पवत्ता **अज्जमज्जपच्चयकथा** । कालद्धाना इमे परिनिप्फन्नेन पज्जत्तिमत्ताति पवत्ता **अद्धाकथा** । एवं **खणलयमुहत्तकथा** । अज्जस्स आसवस्स अभावा आसवा अनासवाति पवत्ता **आसवकथा** । लोकुत्तरानं धम्मानं जरामरणं लोकुत्तरन्ति पवत्ता **जरामरणकथा** । निरोधसमापत्ति लोकुत्तराति पवत्ता **सज्जावेदयितकथा** । सा लोकियाति पवत्ता **दुतियसज्जावेदयितकथा** । निरोधसमापन्नोपि कालं करेय्याति पवत्ता **ततियसज्जावेदयितकथा** । निरोधसमापत्ति असज्जसत्तुपिकातिकथा । कम्मतो अज्जो चित्तविप्पयुत्तो कम्मपचयोतिकथा ।

बलप्पत्ता बुद्धादयो इद्धिबलेन सत्तानं चित्तं रागादिअनुप्पत्तिया निग्गहन्तीति पवत्ता **निग्गहकथा** । एवं कुसलुप्पत्तिया परचित्तपग्गहनकथा । बुद्धा इद्धिया परेसं सुखं देन्तीति पवत्ता **सुखानुप्पदानकथा** । “सङ्कारा अनिच्चा”ति मनसिकरोतो अतीतादिभेदभिन्ने सब्बे सङ्कारे आरम्मणवसेन एकतो अधिगणहातीति पवत्ता **अधिगहमनसिकारकथा** । रूपं हेतुकन्तिकथा । एवं रूपं सहेतुकन्तिकथा । रूपं कुसलाकुसलन्तिकथा । रूपं विपाकोतिकथा, यथा कामावचरकम्मेन जातं रूपं कामावचरं, एवं रूपावचरारूपावचरकम्मेहि जातं रूपं रूपावचरारूपावचरन्तिकथा । रूपरागो रूपधातुया, अरूपरागो च अरूपधातुया परियापन्नोतिकथा ।

अत्थि अरहतो पुज्जपचयोतिकथा । नत्थि अरहतो अकालमच्चूतिकथा । यं किञ्चि उप्पज्जति, सब्बमिदं कम्मतोतिकथा । इन्द्रियबद्धमेव दुक्खं, न सब्बे सङ्काराति पवत्ता **इन्द्रियबद्धकथा** । सब्बे सङ्कारा दुक्खा ठपेत्वा अरियमग्गन्तिकथा । मग्गफलानेव सङ्गो नाम, न च तानि दक्खिणं पटिग्गहन्ति, तस्मा न वत्तब्बं सङ्गो दक्खिणं पटिग्गणहातीतिकथा । तथा न वत्तब्बं सङ्गो दक्खिणं विसोधेतीतिकथा । न वत्तब्बं सङ्गो भुज्जतीतिकथा । न वत्तब्बं सङ्गस्स दिन्नं महप्फलन्तिकथा । बुद्धा न किञ्चि भुज्जन्ति, तस्मा न वत्तब्बं बुद्धस्स दिन्नं महप्फलन्तिकथा । दायकतो दानं विसुज्झति, न पटिग्गाहकतोति पवत्ता **दक्खिणाविसुद्धिकथा** ।

बुद्धा तुसितलोके एव निब्बत्तन्ति, न मनुस्सलोके । एत्थ हि निम्मितरूपमत्तं दस्सेन्तीति पवत्ता **मनुस्सलोककथा** । निम्मितरूपं धम्मं देसेति, न बुद्धोति पवत्ता **धम्मदेसनाकथा** । रागोव करुणा नाम, ततो नत्थि बुद्धानं करुणातिकथा । बुद्धानं उच्चारपस्सावो अज्जे गन्धजाते अतिविय अधिगणहातीति पवत्ता **गन्धजातकथा** । बुद्धा एकेन मग्गेन चत्तारि सामज्जफलानि सच्छिकरोन्तीति पवत्ता **एकमग्गकथा** । परिकम्मादिं विनाव पठमादिज्झाना दुतियादिज्झानं सङ्कमतीति पवत्ता **झानसङ्कन्तिकथा** । पच्चकनये अवितक्कविचारमत्तं झानं विसुं झानं नाम न होति, झानन्तरिकं नाम होतीति पवत्ता **झानन्तरिककथा** । समापन्नो सद्दं सुणातीतिकथा । विज्जाणं विना पसादचक्खुना रूपं पस्सतीतिकथा ।

तेकालिके किलेसे पजहतीति पवत्ता **किलेसप्पजहनकथा** । निब्बानसङ्गातापि सुज्जता सङ्कारक्खन्धपरियापन्नाति पवत्ता **सुज्जतकथा** । असङ्गतमेव सामज्जफलन्तिकथा । येसं केसज्जि धम्मानं पटिलाभा असङ्गताति पवत्ता **पत्तिकथा** । सब्बधम्मानं सभावसङ्गाता तथता असङ्गताति पवत्ता **तथताकथा** । अनवज्जट्टेन निब्बानम्पि कुसलन्तिकथा । आनन्तरियादिं विनापि अत्थि पुथुज्जनस्स अच्चन्तनियामतातिकथा । लोकियसद्दादयो न इन्द्रियानीति पवत्ता **इन्द्रियकथा** ।

असज्जिच्चापि आनन्तरिको होतीति पवत्ता **असज्जिच्चकथा** । नत्थि पुथुज्जनस्स जाणन्ति पवत्ता **जाणकथा** । नेरयिकानं कम्मानेव निरयपालरूपेन वधेन्ति, न निरयपालाति पवत्ता **निरयपालकथा** । अत्थि देवेसु तिरच्छानातिकथा । विरतित्तयं चित्तविप्पयुत्तं, पच्चङ्गिकोव मग्गोति पवत्ता **मग्गकथा** । पटिच्चसमुप्पादेसु जाणं लोकुत्तरन्ति पवत्ता **जाणकथा** ।



तिस्सो सङ्गीतियो आरब्ध सासनं नवं कतन्ति पवत्ता **सासनकथा** । पृथुज्जनो एकखणे तेधातुकेहि धम्महि अविवित्तोति पवत्ता **अविवित्तकथा** । जेय्यावरणहेतुं किञ्चि संयोजनं अप्पहायपि अरहा होतीति पवत्ता **संयोजनकथा** । “सङ्घाारा निच्चा होन्तु, रुक्खा निच्चपुप्फफलादियुत्ता खेमिनो होन्तु”तिआदिना यथाधिप्पायं इद्धि पवत्ततीति पवत्ता **इद्धिकथा** । बुद्धानं सररीरआयुपभावेमत्ततो अज्जापि वेमत्तता अत्थीति पवत्ता **बुद्धकथा** । एकस्मिं खणे सब्बलोकधातूसु अनेके बुद्धा सन्तीति पवत्ता **सब्बदिसाकथा** । सब्बे धम्मा नियताति पवत्ता **धम्मकथा** । सब्बकम्मनि फलदाने नियतानीति पवत्ता **कम्मकथा** ।

अरहा असब्बज्जुभावेन सब्बज्जुविसये किञ्चि संयोजनं अप्पहाय परिनिब्बातीति पवत्ता **परिनिब्बानकथा** । अरहा कुसलचित्तो परिनिब्बायतीति पवत्ता **कुसलचित्तकथा** । अरहा आनेज्जे सण्ठितो परिनिब्बायतीति पवत्ता **आनेज्जकथा** । अत्थि गम्भसेय्याय धम्माभिसमयो, अत्थि गम्भसेय्याय अरहत्तप्पत्ति, सुपिनन्ते धम्माभिसमयो, अरहत्तप्पत्ति चाति पवत्ता **तिस्सोपि कथा** । सब्बं सुपिनचित्तं अब्बाकतन्तिकथा । खणिकताय चित्तानं नत्थि आसेवनपच्चयतातिकथा । सब्बे सङ्घता एकचित्तखणिकाति पवत्ता **खणिककथा** ।

इत्थिया सद्धिं एकतो सम्पत्तिं अनुभवस्सामाति पूजादिं कत्वा एकाधिप्पायप्पत्तस्स भिक्खुनो मेथुनो धम्मो पटिसेवितब्बोति पवत्ता **एकाधिप्पायकथा** । पापभिक्खूसु मेथुनं पटिसेवन्तेसु अरहन्तानं वण्णेन अमनुस्सा मेथुनं पटिसेवन्तीति पवत्ता **अरहन्तवण्णकथा** । केचि सत्ता अत्तनो इस्सरियेन कामकारिकावसेन विनिपातं गच्छन्ति, न कम्मवसेनाति पवत्ता **इस्सरियकामकारिकाकथा** । न रागो रागपतिरूपकोतिआदि **पतिरूपकथा** । खन्धायतनादयो अपरिनिष्फन्नाति पवत्ता **अपरिनिष्फन्नकथा**ति साधिकद्विसत्तकथा । पाळियं अट्टमुखवादयुत्तिवसेनेव सम्मितिआदीनं भिन्नलद्धिकानं लद्धिभेदवसेन नानापकारतो विभत्ता, ता पन सब्बकथा पुगलकथाव । ता तंतलद्धिभेदवसेन सङ्घेपतोपि वुच्चमाना अतिभारियं गत्थं करोन्ति, तस्मा न वित्थारिता । तं पन नयं इच्छन्तेहि **पाळिअट्टकथासु** (कथा० १ आदयो; कथा० अट्ट० निदानकथा) एव वित्थारतो गहेतब्बोति अयमेत्थ पाळिनयेन सद्धिं अत्थविनिच्छयो ।

मोहविच्छेदनिया अभिधम्ममातिकत्थवण्णनाय

कथावत्थुमातिकत्थवण्णना निद्धिता ।

## ६. यमकमातिका

### मूलयमकमातिकत्थवण्णना

इदानीं यमकमातिकाय संवण्णनानयो होति । सा पनेसा मूलयमकमातिका खन्धआयतनधातुसच्चसङ्घारअनुसयचित्तधम्मइन्द्रिययमकमातिकाति दसविधा होति । केनट्टेन चेत्थ यमकन्ति? युगळट्टेन । युगळं हि “यमकपाटिहारियं”, “यमकसाला”तिआदीसु “यमक”न्ति वुच्चति, इति युगळसङ्घातानं यमकानं वसेन देसितत्ता इमेसु दससु एकेकम्पि, एतेसं विभजनत्ता निद्देसोपि, सब्बेसं समूहत्ता पकरणम्पि **यमकं** नाम । इध पनेता निद्देसयमकं उपादाय “यमकमातिका”त्वेव वुत्ता, तासं पन दसन्नं यमकमातिकानं मूलयमकमातिका आदि । तत्थापि “ये केचि कुसला धम्मा, सब्बे ते कुसलमूला । ये वा पन कुसलमूला, सब्बे ते धम्मा कुसला”ति इदं यमकं आदि । तस्स कुसलमूलसङ्घातानं द्विन्नं अत्थानं वसेन अत्थयमकन्ति वा, तेसज्जेव अत्थानं अनुलोमतो पटिलोमतो पवत्तपाळिधम्मवसेन धम्मयमकन्ति वा, अनुलोमपटिलोमतो पवत्तपुच्छावसेन पुच्छायमकन्ति वा तिधा यमकभावो वेदितब्बो । सेसेसुपि एसेव नयो ।

इदानीं इमेसं यमकानं वसेन देसिताय इमिस्सा मूलयमकमातिकाय ताव नययमकपुच्छाअत्थवारप्पभेदवसेन पाळिववत्थानं एवं वेदितब्बं — कुसलत्तिकमातिकाय हि “कुसला धम्मा”ति इदं आदिपदं निस्साय मूलनयो मूलमूलनयो मूलकनयो मूलमूलकनयोति इमे चत्तारो नया होन्ति । तेसु एकेकस्मिं नये मूलयमकं एकमूलयमकं अज्जमज्जमूलयमकन्ति तीणि तीणि यमकानीति द्वादस यमकानि । एकेकस्मिं यमके अनुलोमपटिलोमवसेन द्वे द्वे पुच्छाति चतुर्वीसति पुच्छा, एकेकपुच्छाय सन्निधानसंसयवसेन द्वे द्वे अत्थाति अट्टचत्तालीस अत्था ।

तत्थ ये केचि कुसलाति कुसलेसु “कुसला नु खो, न कुसला नु खो”ति सन्देहाभावतो इमस्मिं पदे सन्निधानत्थो वेदितब्बो । **सब्बे ते कुसलमूला**ति “सब्बे ते कुसला धम्मा कुसलमूला नु खो, न नु खो”ति एवं विमत्तिवसेन पुच्छितत्ता इमस्मिं पदे संसयत्थो वेदितब्बो । सो च खो वेनेय्यानं संसयट्टाने संसयं दीपेत्ता तंविनोदनत्थं भगवता वुत्तो, तथागतस्स पन संसयट्टानं नाम नत्थि । इतो परेसुपि पुच्छापदेसु एसेव नयो । यथा च कुसलपदं निस्साय इमे चतुनयादयो होन्ति, अकुसलपदं निस्सायपि तथेव, अब्बाकतपदं निस्सायपि तथेव, कुसलादीनि तीणिपि पदानि एकतो कत्वा निद्धिद्वं नामपदं निस्साय तथेवाति कुसलत्तिकमातिकाय चतूसु पदेसु सब्बेपि सोळस नया, अट्टचत्तालीस यमकानि, छन्नवुत्ति पुच्छा, द्धानवुत्तिसतं अत्था च उद्देसवसेन वुत्ताति वेदितब्बा । एत्तावता मूलवारो हेतुवारो निदानवारो सम्भववारो पभववारो समुद्धानवारो आहारवारो आरम्भणवारो पच्चयवारो समुदयवारोति सब्बेपि दस वारा होन्ति । तत्थ मूलवारे आगतपरिच्छेदेनेव अवसेसेसुपि नयादयो वेदितब्बा । पाळि पनेत्थ अतिसंखित्ता । इति सब्बेसुपि दससु वारेसु सट्ठिसतं नया,

असीतिअधिकानि चत्तारि यमकसतानि, सट्ठिअधिकानि नव पुच्छासतानि, वीसाधिकानि एकूनवीसति अत्थसतानि च उट्ठिद्वानीति वेदितव्वानि ।

एवमेत्थ नययमकपुच्छा अत्थवारप्पभेदवसेन पाळिववत्थानं विदित्वा इदानीं तस्सा अनुत्तानपदत्थानुसारेणैव विभङ्गनयसहितो सङ्खेपत्थवण्णनानयो एवं वेदितव्वो — तत्थ ये केचीति अनवसेसवचनं । **कुसला धम्मा**ति अनवज्जसुखविपाका निस्सत्तसभावा । **सब्बे ते कुसलमूला**ति किं ते सब्बेयेव कुसलमूला होन्तीति पुच्छा । इमानि पन विस्सज्जनमातिकाय नत्थि । यमकमातिकाय हि सब्बत्थ पुच्छापदानेव उट्ठिद्वानि, न विस्सज्जनानीति । विस्सज्जनानि पन निहेसेयेव वुत्तानि, तस्मा सब्बत्थ निहेसनयेनेव विस्सज्जनमुखं दस्सयिस्साम । इमिस्साव “ये केचि कुसला धम्मा, सब्बे ते कुसलमूला”ति पुच्छाय विभङ्गनयेन इदं विस्सज्जनमुखं । “तीणेव कुसलमूलानि, अवसेसा कुसला धम्मा न कुसलमूला”ति तस्सा चायमत्थो — न ते सब्बे कुसला धम्मा कुसलमूलानि होन्ति, अलोभादीनि पन तीणेव कुसलमूलानीति । ये वा पन कुसलमूला तयो अलोभादयो कुसलानं मूलाति वुत्ता, **सब्बे ते कुसला धम्मा**ति किं ते सब्बे तयोपि धम्मा कुसलाति पुच्छा । तस्सा निहेसे “आमन्ता”ति विस्सज्जनं । तस्स तेसं तिण्णं मूलानं कुसलभावम्पि सम्पटिच्छामीति अत्थो । अयं ताव मूलनये मूलयमकनयो ।

एकमूलयमके पन **सब्बे ते कुसलमूलेन एकमूला**ति गणनट्ठेन एकमूलकं अगगहेत्वा समानत्थेन गहेतव्वो, अयं हेत्थ अत्थो — “सब्बे ते कुसलमूलेन एकं समानं मूलं एतेसन्ति एकमूला”ति । यं फस्सस्स मूलं, किं तदेव वेदनादीनन्ति अयं पुच्छा । अथ नेसं तथाभावं सम्पटिच्छनवसेन “आमन्ता”ति विभङ्गे विस्सज्जनं । **ये वा पन कुसलमूलेन एकमूला, सब्बे ते धम्मा कुसला**ति पुच्छा । तस्सा पन कुसलचित्तसमुद्धानं रूपं कुसलमूलेन एकमूलमेव, न कुसलं, फस्सादिधम्मजातं पन कुसलमूलेन एकमूलञ्चेव कुसलञ्चाति इदं विस्सज्जनं । यथेव हि फस्सादीनं अलोभादयो सुप्पतिट्ठितभावसाधनेन हेतुपच्चयत्ता मूलं, तथा तंसमुद्धानरूपस्सापीति तंरूपम्पि अरूपधम्महि सट्ठि समानमूलन्ति वुच्चति, न पन कुसलं अनवज्जसुखविपाकत्ताभावा । एकमूलयमकनयो ।

अज्जमज्जमूलयमके पन “ये केचि कुसला”ति अपुच्छित्वा “**ये केचि कुसलमूलेन एकमूला**”ति पुच्छा कता । कस्मा? इमिनापि ब्यज्जनेन तस्सेवत्थस्स सम्भवदस्सनत्थं, कुसलसमुद्धानरूपस्सापि सम्पिण्डनत्थञ्च । **अज्जमज्जमूला**ति सब्बेव ते किं अज्जमज्जस्स हेतुपच्चयट्ठेन मूलानि होन्तीति पुच्छा । तस्सा यानि द्वे तीणि मूलानि एकतो उप्पज्जन्ति, तानेव एकमूलानि चेव अज्जमज्जमूलानि च, अवसेसा कुसलमूलसहजाता रूपारूपधम्मा कुसलमूलेन एकमूलाव, न च अज्जमज्जमूलाति विस्सज्जनं । तस्सेव पटिलोमनये सब्बे ते अज्जमज्जमूला अलोभादयो कुसलाति पुच्छा । आमन्ताति विस्सज्जनं । मूलनयो ।

यथा च मूलनये मूलयमकएकमूलयमकअज्जमज्जमूलयमकवसेन छब्बिधा पुच्छाविस्सज्जननया वुत्ता, एवं मूलमूलनयादीसुपि वेदितव्वो । अयं पनेत्थ विसेसो — **सब्बे ते कुसलमूलमूला**ति सब्बे ते कुसलमूलसङ्घाता मूला, कुसलमूलमूलात्वेव अत्थो । **एकमूलमूला**ति समानट्ठेन एकमेव मूलमूलं एतेसन्ति एकमूलमूला, समानमूलमूलात्वेव अत्थो । **अज्जमज्जमूलमूला**ति अज्जमज्जस्स मूलं अज्जमज्जमूलं, तं हेतुपच्चयट्ठेन मूलं एतेसन्ति अज्जमज्जमूलमूला, अज्जमज्जमूलमूलात्वेव अत्थो । सेसं तादिसमेवाति । मूलमूलनयो ।

मूलकनये पन **सब्बे ते कुसलमूलका**ति सब्बे ते कुसला हेतुपच्चयट्ठेन कुसलभूतं मूलं एतेसन्ति कुसलमूलकाति पुच्छा । आमन्ताति विस्सज्जनं । “ये वा पन कुसलमूलका, सब्बे ते धम्मा कुसला”ति पुच्छा । यं रूपं, तं ठपेत्वा सेसं कुसलन्ति विस्सज्जनं, सेसं तादिसमेवाति । मूलकनयो ।

मूलमूलकनये पन **कुसलमूलमूलका**ति कुसलमूलसङ्घातं मूलं एतेसन्ति कुसलमूलमूलका । सेसं तादिसमेवाति ।

अयं ताव कुसलपदेसु पुच्छाविस्सज्जननयो । अकुसलपदादीसुपि एसेव नयो । अयं पन विसेसो — अकुसलपदमूलेसु एकमूलयमके “ये केचि अकुसला धम्मा, सब्बे ते अकुसलमूलेन एकमूला”ति पठमपुच्छाय “अहेतुकं अकुसलं अकुसलमूलेन एकमूल”न्ति निहेसे विस्सज्जनं कतं । तत्थ **अहेतुकं अकुसलन्ति** द्वीसु मोहमूलचित्तेसु मोहं सन्थाय वुत्तं, अब्याकतपदमूलेसु एकमूलयमके “ये केचि अब्याकता धम्मा, सब्बे ते अब्याकतमूलेन एकमूला”ति पुच्छाय “अहेतुकं अब्याकतं ठपेत्वा सेसा अब्याकतमूलेन एकमूलका”ति विस्सज्जनं । तत्थ **अहेतुकं अब्याकतन्ति** अट्ठारसाहेतुकचित्तुप्पादा, रूपं, निब्बानञ्च । एत्थ च किञ्चापि सहेतुकअब्याकतचित्तसमुद्धानरूपम्पि अब्याकतमूलेन एकमूलमेव, तं पन अब्बोहारिकं कत्वा निहेसे एकतो लब्भमानकवसेनपेतं विस्सज्जनं कतन्ति वेदितव्वं ।

नामपदमूलेसु च “ये केचि नामा धम्मा, सब्बे ते नाममूला”ति पुच्छाय “नवेव नाममूलानि, अवसेसा नामा धम्मा, न नाममूला”ति विस्सज्जनं । एकमूलनये पनेत्थ “ये केचि नामा धम्मा, सब्बे ते नाममूलेन एकमूला”ति पुच्छा । “अहेतुकं नामं ठपेत्वा सेसं नाममूलेन एकमूल”न्ति विस्सज्जनं । तत्थ अहेतुकचित्तुप्पादाविचिकिच्छुद्धच्चसम्पयुत्तमोहनिब्बानवसेन अहेतुकं नामं वेदितव्वं । सेसं सब्बत्थ कुसलपदे वुत्तानुसारेण सुविज्जेय्यमेवाति । अयं मूलवारे नयो ।

इतो परेसु हेतुवारादीसु नवसु वारेसु मूलवारसदिसोव सब्बत्थ संवण्णनानयो । हेतुआदिपदमत्तमेव हेत्थ विसेसो, तानि च मूल-सद्वपरियायतो अलोभादिहेतुकानेव । अलोभादयो हि सहजातधम्मसङ्घातस्स अत्तनो फलस्स पतिट्ठानट्ठेन **मूलं** । तस्स निष्फादनत्थं हिनोति पवत्ततीति हेतु, “हन्दं नं

गणहथा”ति दस्सेन्तं विय अत्तनो फलं निदेतीति **निदानं** । एतस्मा फलं सम्भवतीति **सम्भवो** । पभवतीति **पभवो** । समुद्गाति तं एत्थ, एतेनाति वा **समुद्गानं** । तं आहरतीति **आहारो** । अपटिक्खिपितब्बडेन तेन आलम्बीयतीति **आलम्बणं** । एतं पटिच्च तं एतीति **पच्चयो** । एतस्मा तं समुदेतीति **समुदयो** । सब्बं कारणपरियायेन वुत्ता “मूलं हेतु निदानञ्चा”ति गाथा दसन्नम्मि वारानं उद्धानगाथा नाम । अयं मूलयमकमातिकथवण्णनानयो ।

### खन्धयमकमातिकथवण्णना

खन्धयमकपाळिया पन पाळिववत्थानं ताव एवं वेदितब्बं — “पञ्चक्खन्धो”ति पदं आदिं कत्वा याव “न खन्धा न सङ्खारा”ति पदं, ताव पवत्ता अयं खन्धयमकमातिका नाम । सा पण्णत्तिवारस्स “उद्देसवारो”तिपि “पुच्छावारो”तिपि वुच्चति । सो च पदसोधनवारो पदसोधनमूलचक्कवारो सुद्धखन्धवारो सुद्धखन्धमूलचक्कवारोति चतुहि नयवारेहि पटिमण्डितो । तत्थ “रूपं रूपक्खन्धो, रूपक्खन्धो रूप”न्तिआदिना नयेन पदमेव सोधेत्वा गतो **पदसोधनवारो** नाम । सो अनुलोमपटिलोमवसेन दुविधो होति । तस्स अनुलोमवारे “रूपं रूपक्खन्धो, रूपक्खन्धो रूप”न्तिआदीनि पञ्च यमकानि । पटिलोमवारेपि “न रूपं न रूपक्खन्धो, न रूपक्खन्धो न रूप”न्तिआदिना पञ्च वारा ।

ततो परं तेसज्जेव पदसोधनवारे सोधितानं खन्धानं “रूपं रूपक्खन्धो, खन्धा वेदनाक्खन्धो”तिआदिना नयेन एकेकखन्धमूलकानि चत्तारि चत्तारि चक्कानि बन्धित्वा गतो पदसोधनमूलकानं चक्कानं अत्थिताय **पदसोधनमूलचक्कवारो** नाम । सोपि अनुलोमपटिलोमवसेन दुविधो होति । तस्स अनुलोमवारे “रूपं रूपक्खन्धो, खन्धा वेदनाक्खन्धो”तिआदीनि एकेकखन्धमूलकानि चत्तारि चत्तारि कत्वा वीसति यमकानि । पटिलोमवारेपि “न रूपं न रूपक्खन्धो, न खन्धा न वेदनाक्खन्धो”तिआदीनि वीसतिमेव ।

ततो परं “रूपं खन्धो, खन्धा रूप”न्तिआदिना नयेन सुद्धखन्धवसेनेव गतो **सुद्धखन्धवारो** नाम । सोपि अनुलोमपटिलोमवसेन दुविधो होति । तस्स अनुलोमवारे “रूपं खन्धो, खन्धा रूप”न्तिआदीनि पञ्च यमकानि । पटिलोमवारेपि “न रूपं न खन्धो, न खन्धा न रूप”न्तिआदीनि पञ्चेव ।

ततो परं तेसज्जेव सुद्धखन्धानं “रूपं खन्धो, खन्धा वेदना”तिआदिना नयेन एकेकखन्धमूलकानि चत्तारि चत्तारि चक्कानि बन्धित्वा गतो सुद्धखन्धमूलकानं चक्कानं अत्थिताय **सुद्धखन्धमूलचक्कवारो** नाम । सोपि अनुलोमपटिलोमवसेन दुविधो होति । तस्स अनुलोमवारे “रूपं खन्धो, खन्धा वेदना”तिआदीनि एकेकखन्धमूलकानि चत्तारि चत्तारि कत्वा वीसति यमकानि । पटिलोमवारेपि “न रूपं न खन्धो, न खन्धा न वेदना”तिआदीनि वीसतिमेव । एवमेत्थ चतूसु नयवारेसु एकं यमकसतं, द्वे पुच्छासतानि, एकेकपुच्छाय सन्निद्धानसंसयवसेन द्वे द्वे अत्थे कत्वा चत्तारि च अत्थसतानि उद्दिष्टानीति वेदितब्बानि ।

एवमेतस्सा पाळिववत्थानं विदित्वा इदानि अनुत्तानपदत्थानुसारेण विभङ्गनयसहितसङ्केपत्थवण्णनानयो एवं वेदितब्बो । **पञ्चक्खन्धा**ति अयं यमकवसेन पुच्छितब्बानं खन्धानं उद्देसो । **रूपक्खन्धो...पे०... विज्जाणक्खन्धो**ति तेसज्जेव पभेदतो नामववत्थानं । ततो परं पदसोधनवारादयो चत्तारो नयवारा । तत्थ **रूपं रूपक्खन्धो**ति यं किञ्चि “रूप”न्ति वुच्चति, सब्बं तं “रूपक्खन्धो”ति पुच्छतीति वचनसोधनत्थं पुच्छा । तस्सा च “पियरूपं सातरूपं रूपं न रूपक्खन्धो, रूपक्खन्धो रूपज्जेव रूपक्खन्धो चा”ति इदं निद्देसनयेन विस्सज्जनं । तत्थ **पियरूपं सातरूपं**न्तिआदीसु यं “रूप”न्ति वुत्तं, तं रूपमेव न रूपक्खन्धो । यो पन “रूपक्खन्धो”ति वुत्तो, सो “रूप”न्तिपि “रूपक्खन्धो”तिपि वत्तुं वट्टतीति अत्थो । **रूपक्खन्धो रूपन्ति** एत्थ पन “आमन्ता”ति विस्सज्जनं रूपक्खन्धस्स नियमेन रूपन्ति वत्तब्बत्ता । **वेदना वेदनाक्खन्धो**ति पुच्छाय, **वेदनाक्खन्धो वेदना**ति पुच्छाय च “आमन्ता”ति विस्सज्जनं । **सज्जासज्जाक्खन्धो**ति पुच्छाय “पपञ्चसज्जा”तिआदीसु आगता दिट्ठिसज्जा सज्जा न सज्जाक्खन्धो, सज्जाक्खन्धो सज्जा चेव सज्जाक्खन्धो चाति विस्सज्जनं । **सज्जाक्खन्धो सज्जा**ति पुच्छाय च “आमन्ता”ति विस्सज्जनं । **सङ्खारा सङ्खारक्खन्धो**ति पुच्छाय “अनिच्चा वत सङ्खारा”तिआदीसु आगतो सङ्खारक्खन्धो, ततो अवसेसा सङ्खतधम्मा सङ्खारा न सङ्खारक्खन्धोति विस्सज्जनं । **सङ्खारक्खन्धो सङ्खारा**ति पुच्छाय “आमन्ता”ति विस्सज्जनं । **विज्जाणं विज्जाणक्खन्धो**ति पुच्छाय, **विज्जाणक्खन्धो विज्जाणन्ति** पुच्छाय च “आमन्ता”ति विस्सज्जनं ।

पटिलोमवारे **न रूपं न रूपक्खन्धो**ति पुच्छाय “आमन्ता”ति विस्सज्जनं । तस्स रूप-सद्वचनीया धम्मा रूपक्खन्धो न होन्तीति अत्थो । **न रूपक्खन्धो न रूपन्ति** पुच्छाय रूपक्खन्धविरहिता “पियरूपं सातरूप”न्ति वुत्ता धम्मा न रूपक्खन्धो, रूपं, पियरूपसातरूपरूपक्खन्धविरहिता पन धम्मा न रूपक्खन्धो चेव न रूपज्जाति विस्सज्जनं । **न वेदना न वेदनाक्खन्धो**ति पुच्छाय, **न वेदनाक्खन्धो न वेदना**ति पुच्छाय, **न सज्जा न सज्जाक्खन्धो**ति पुच्छाय च “आमन्ता”ति विस्सज्जनं । **न सङ्खारा न सङ्खारक्खन्धो**ति पुच्छाय “आमन्ता”ति विस्सज्जनं । **न सज्जाक्खन्धो न सज्जा**ति पुच्छाय पन दिट्ठिसज्जा न सज्जाक्खन्धो, सज्जा, तं दिट्ठिसज्जं, सज्जाक्खन्धज्ज ठपेत्वा अवसेसा न चेव सज्जा न च सज्जाक्खन्धोति विस्सज्जनं । **न सङ्खारा न सङ्खारक्खन्धो**ति पुच्छाय “आमन्ता”ति विस्सज्जनं । **न सङ्खारक्खन्धो न सङ्खारा**ति पुच्छाय सङ्खारक्खन्धं ठपेत्वा अवसेससङ्खतधम्मा न सङ्खारक्खन्धो, सङ्खारा, असङ्खता पन धातु न चेव सङ्खारा न च सङ्खारक्खन्धोति विस्सज्जनं । **न विज्जाणं न विज्जाणक्खन्धो**ति पुच्छाय, **न विज्जाणक्खन्धो न विज्जाणन्ति** पुच्छाय च “आमन्ता”ति विस्सज्जनं । इमिनाव नयेन इतो परेसुपि सब्बत्थ विस्सज्जननयो वेदितब्बो, विसेसमत्तमेव पन वक्खाम ।

पदसोधनमूलचक्रवारे पन अयं विसेसो — **खन्धा वेदनाकखन्धो**ति ये केचि खन्धा, सब्बे ते वेदनाकखन्धोति पुच्छा । तस्सा “वेदनाकखन्धो खन्धो चेव वेदनाकखन्धो च, अवसेसा पन खन्धा, न वेदनाकखन्धो”ति विस्सज्जनं । सेसेसुपि एसेव नयो । पटिलोमे पन **न खन्धा न वेदनाकखन्धो**ति पुच्छाय “आमन्ता”ति विस्सज्जनं । एत्थ च ये पज्जत्तिनिब्बानसङ्घाता धम्मा खन्धापि न होन्ति, ते यस्मा वेदनाकखन्धोपि न होति, तस्मा “आमन्ता”ति विस्सज्जनं, सेसं सुविज्जेय्यमेव । पदसोधनमूलचक्रवारे ।

सुद्धखन्धवारे पन “रूपं खन्धो”ति पुच्छाय “आमन्ता”ति विस्सज्जनं पियरूपादीनञ्च पञ्चसु खन्धेसु सङ्गहितत्ता । “खन्धा रूप”न्तिआदीसु ये केचि खन्धा, सब्बे ते रूपकखन्धोतिआदिना अत्थो गहेतब्बो । तेनेव हिस्स निद्देसे “खन्धा रूप”न्तिआदिना पदं अनुद्धरित्वा “खन्धा रूपकखन्धो”तिआदिना अत्थवसेनेव पदं उद्धरित्वा “रूपकखन्धो खन्धो चेव रूपकखन्धो च, अवसेसा खन्धा, न रूपकखन्धो”ति विस्सज्जनं कतं । तेनेव च कारणेन सुद्धखन्धवारोति वुत्तो । वचनसोधने विय हि एत्थ न वचनं पमाणं, यथा पन सुद्धखन्धा लब्धन्ति, तथा तथा अत्थोव पमाणं । परतो आयतनयमकमातिकादीसुपि एसेव नयो । पटिलोमे “न रूपं न खन्धो”ति यं धम्मजातं रूपं न होति, तं खन्धोपि न होतीति पुच्छा, तस्सा “रूपकखन्धविरहिता खन्धा, न रूपं, तथा निब्बानं न पन रूपञ्चेव न खन्धो चा”ति विस्सज्जनं । सेसं सुविज्जेय्यमेव । सुद्धखन्धवारो ।

सुद्धखन्धमूलचक्रवारेपि “खन्धा वेदनाकखन्धो”तिआदिना हेट्ठा वुत्तनयेन अत्थो वेदितब्बोति अयं पण्णत्तिवारे नयो ।

यस्मा पन निद्देसे इमिस्सा पन मातिकाय पण्णत्तिवारसङ्घातं निद्देसं वत्त्वा ततो इमं मातिकाककमं मुञ्चित्वा अपरेन परियायेन अज्जेपि उद्देसवारविरहिता “पवत्तिवारो परिज्जावारो”ति द्वे महावारा पुच्छाविस्सज्जनवसेन वुत्ता, तस्मा तेसं द्विन्नम्पि वारानं नयो दस्सेतब्बो । ततो पवत्तिवारे ताव पाळिववत्थानपुब्बिका मुखमत्तप्पकासना — इमस्मिं हि उप्पादवारो निरोधवारो उप्पादनरोधवारोति तयो अन्तरवारा होन्ति । तत्थ उप्पादवारे ताव तिण्णं अद्धानं वसेन छ कालभेदा होन्ति पच्चुप्पन्नो, अतीतो, अनागतो, पच्चुप्पन्नेनातीतो, पच्चुप्पन्नेनानागतो, अतीतेनानागतोति । एवमेतेसु छसु कालभेदेसु ख्वायं पठमो पच्चुप्पन्नो, तत्थ पुगलतो ओकासतो पुगलोकासतोति तयो वारा होन्ति ।

तत्थ “यस्स रूपकखन्धो उप्पज्जति, तस्स वेदनाकखन्धो उप्पज्जतीति? असज्जसत्तं उपपज्जन्तानं तेसं रूपकखन्धो उप्पज्जति, नो च तेसं वेदनाकखन्धो उप्पज्जति । पञ्चवोकारं उपपज्जन्तानं तेसं रूपकखन्धो च उप्पज्जति, वेदनाकखन्धो च उप्पज्जति । यस्स वा पन वेदनाकखन्धो उप्पज्जति, तस्स रूपकखन्धो उप्पज्जतीति? अरूपं उपपज्जन्तानं तेसं वेदनाकखन्धो उप्पज्जति, नो च तेसं रूपकखन्धो उप्पज्जति । पञ्चवोकारं उपपज्जन्तानं तेसं वेदनाकखन्धो च उप्पज्जति, रूपकखन्धो च उप्पज्जति । यस्स रूपकखन्धो उप्पज्जति...पे०... तस्स विज्जाणकखन्धो उप्पज्जति...पे०... यस्स वा पन विज्जाणकखन्धो उप्पज्जति, तस्स रूपकखन्धो उप्पज्जतीति...पे०... पञ्चवोकारं ...पे०... उप्पज्जती”ति एवं रूपकखन्धमूलकानि चत्तारि, “यस्स वेदनाकखन्धो उप्पज्जति, तस्स सज्जाकखन्धो उप्पज्जती”तिआदिना च वेदनाकखन्धमूलकानि तीणि, सज्जाकखन्धमूलकानि द्वे, सङ्खारकखन्धमूलकं एकन्ति एवमेतानि पच्चुप्पन्नकाले पुगलवारे अनुलोमनये दस यमकानि होन्ति । तत्थ रूपकखन्धमूलकेसु चतूसु आदितो एकमेव पाळियं विस्सज्जितं, सेसानि तेन सदिसविस्सज्जनानीति तन्तिया लहुभावत्थं संखित्तानि ।

वेदनाकखन्धमूलके पन सब्बत्थ “आमन्ता”ति एकसदिसमेव विस्सज्जनं । वेदनादीसु उप्पन्नेसु नियमेन सज्जादीनं उप्पज्जनतो तत्थ सब्बानि संखित्तानि । यथा च पुगलवारे दस यमकानि, एवं ओकासवारेपि “यत्थ रूपकखन्धो उप्पज्जति, तत्थ वेदनाकखन्धो उप्पज्जतीति? असज्जसत्ते तत्थ...पे०... पञ्चवोकारे तत्थ...पे०... उप्पज्जती”तिआदिना, पुगलोकासवारेपि “यस्स यत्थ रूपकखन्धो उप्पज्जति, तस्स तत्थ वेदनाकखन्धो उप्पज्जतीति? असज्जसत्तं...पे०... पञ्चवोकारं...पे०... उप्पज्जती”तिआदिना । पच्चुप्पन्नकाले तीसु वारेसु अनुलोमनये तिस यमका होन्ति । यथा अनुलोमनये तिस, एवं पटिलोमनयेपि “यस्स रूपकखन्धो नुप्पज्जति, तस्स वेदनाकखन्धो नुप्पज्जतीति? अरूपं उपपज्जन्तानं तेसं रूपकखन्धो नुप्पज्जति, नो च तेसं वेदनाकखन्धो नुप्पज्जति । सब्बेसं चवन्तानं तेसं रूपकखन्धो च नुप्पज्जति वेदनाकखन्धो च नुप्पज्जति । यस्स वा पन वेदनाकखन्धो नुप्पज्जति, तस्स रूपकखन्धो नुप्पज्जतीति? असज्जसत्तं उपपज्जन्तानं तेसं वेदनाकखन्धो नुप्पज्जति, नो च तेसं रूपकखन्धो नुप्पज्जति । सब्बेसं चवन्तानं तेसं वेदनाकखन्धो च नुप्पज्जति रूपकखन्धो च नुप्पज्जती”तिआदिना, “यत्थ रूपकखन्धो नुप्पज्जति, तत्थ वेदनाकखन्धो नुप्पज्जतीति? उप्पज्जति । यत्थ वा पन...पे०... नुप्पज्जतीति? उप्पज्जती”तिआदिना च, “यस्स यत्थ रूपकखन्धो नुप्पज्जति, तस्स तत्थ वेदनाकखन्धो नुप्पज्जतीति...पे०... सब्बेसं चवन्तानं तदुभयं नुप्पज्जती”तिआदिना चाति तिस यमका । एवं पच्चुप्पन्नकाले सट्ठि यमकानि, तद्दिगुणा पुच्छा, तद्दिगुणा च अत्था वेदितब्बा ।

तत्थ **यस्स रूपकखन्धो उप्पज्जतीति** यस्स पुगलस्स पटिसन्धिकखणे रूपकखन्धो उप्पज्जति । **तस्स वेदनाकखन्धो**ति वेदनाकखन्धोपि तस्स तस्मिंयेव खणे उप्पज्जतीति अत्थो इमिनाव नयेन । तत्थ **असज्जसत्तन्ति** असज्जत्तभवं पटिसन्धिकवसेन उपपज्जन्तानं तेसं उप्पज्जनकखणे रूपकखन्धो उप्पज्जति, नो च तेसं अचित्तकत्ता वेदनाकखन्धो उप्पज्जतीति अत्थो । इमिनाव नयेन “यस्स वा पन वेदनाकखन्धो”तिआदिकेसु पुच्छाविस्सज्जनेसु, ततो परेसुपि सब्बत्थ अत्थो वेदितब्बो ।

इदं पनेत्थ उप्पादनरोधेसु नियमलकखणं — सकलेपि हि इमस्मिं खन्धयमके तत्थ तत्थ उप्पन्नानं सत्तानं पवत्ते याव मरणा वा खन्धानं अपरियन्तेसु उप्पादनरोधेसु विज्जमानेसुपि लहुपरिवत्तानं धम्मानं विनिब्भोगं कत्वा उप्पादनरोधे दस्सेतुं न सुकरन्ति पवत्तियं उप्पादनरोधे अनामसित्वा

पटिसन्धिउप्पादवसेनेव उप्पादवारो, निरोधमरणकाले निरोधवसेनेव च निरोधवारो कथितो। एवमेत्थ उप्पादनरोधेसु नियमलक्खणं विदित्वा पटिसन्धिउप्पादमेव च चुतिनिरोधमेव च गहेत्वा तेसु तेसु ठानेसु आगतानं पुच्छाविस्सज्जनानं अत्थविनिच्छयो वेदितब्बो।

पटिलोमनये पन **सब्बेसं चवन्तानन्ति** मरणचित्तस्स भङ्गक्खणसमन्नागतानं। तेसं हि तत्थ रूपक्खन्धो नुप्पज्जति, वेदनाक्खन्धो च चुतिचित्तस्स उपपत्तिक्खणे एव उपपन्नता। “यत्थ रूपक्खन्धो नुप्पज्जति, तत्थ वेदनाक्खन्धो नुप्पज्जती”ति पुच्छाय अरूपभवं सन्धाय “उप्पज्जती”ति इदं विस्सज्जनं कतं, अनन्तरपुच्छाय असज्जिभवं सन्धाय “उप्पज्जती”ति इदं विस्सज्जनन्ति वेदितब्बं। सेसं सुविज्जेय्यमेवाति अयं पच्चुप्पन्नकाले नयो।

यथा च पच्चुप्पन्नकाले सट्ठि यमकादीनि, एवं सेसेसुपि पच्चसु कालभेदेसु पच्चेकन्ति गहेतब्बं। पुच्छाविस्सज्जनेसु पनेत्थ किञ्चापि “यस्स रूपक्खन्धो उप्पज्जित्थ, तस्स वेदनाक्खन्धो उप्पज्जित्थाति? आमन्ता”तिआदिना, “यत्थ रूपक्खन्धो उप्पज्जित्थ, तत्थ वेदनाक्खन्धो उप्पज्जित्थाति? पञ्चवोकारे उप्पज्जित्थ, नाज्जत्था”तिआदिना च, “यस्स यत्थ रूपक्खन्धो उप्पज्जित्थ, तस्स तत्थ वेदनाक्खन्धो उप्पज्जित्थाति? पञ्चवोकारानं तेसं तत्थ उप्पज्जित्थ, नाज्जत्था”तिआदिना च अतीतकाले अनुलोमनये, “यस्स रूपक्खन्धो नुप्पज्जित्थ, तस्स वेदनाक्खन्धो नुप्पज्जित्थाति? नत्थी”तिआदिना, “यत्थ रूपक्खन्धो नुप्पज्जित्थ, तत्थ वेदनाक्खन्धो नुप्पज्जित्थाति? उप्पज्जित्था”तिआदिना, “यस्स यत्थ रूपक्खन्धो नुप्पज्जित्थ, तस्स तत्थ वेदनाक्खन्धो नुप्पज्जित्थाति? अरूपानं तेसं तत्थ रूपक्खन्धो नुप्पज्जित्थ, नो च तेसं...पे०... सुद्धावासानं तेसं तत्थ तदुभयं नुप्पज्जित्था”तिआदिना तीसु वारेसु पटिलोमनये च,

“यस्स रूपक्खन्धो उप्पज्जिस्सति, तस्स वेदनाक्खन्धो उप्पज्जिस्सतीति? आमन्ता”तिआदिना, “यत्थ रूपक्खन्धो उप्पज्जिस्सति, तत्थ वेदनाक्खन्धो उप्पज्जिस्सतीति...पे०... पञ्चवोकारे उप्पज्जिस्सती”तिआदिना, “यस्स यत्थ रूपक्खन्धो उप्पज्जिस्सति, तस्स तत्थ वेदनाक्खन्धो उप्पज्जिस्सति...पे०... पञ्चवोकारानं तेसं तत्थ उप्पज्जिस्सती”तिआदिना च अनागतकाले अनुलोमनये, “यस्स रूपक्खन्धो नुप्पज्जिस्सति, तस्स वेदनाक्खन्धो नुप्पज्जिस्सतीति? ये अरूपं उपपज्जित्वा परिनिब्बायिस्सन्ति, तेसं रूपक्खन्धो नुप्पज्जिस्सति, नेतरो, पच्छिमभविकानं तदुभयं नुप्पज्जिस्सती”तिआदिना, “यत्थ रूपक्खन्धो नुप्पज्जिस्सति, तत्थ वेदनाक्खन्धो नुप्पज्जिस्सती”तिआदिना, “यस्स यत्थ रूपक्खन्धो नुप्पज्जिस्सति, तस्स तत्थ वेदनाक्खन्धो नुप्पज्जिस्सतीति? अरूपानं तेसं तत्थ रूपक्खन्धो नुप्पज्जिस्सति, नेतरो, पच्छिमभविकानं तदुभयं नुप्पज्जिस्सती”तिआदिना पटिलोमनये च,

“यस्स रूपक्खन्धो उप्पज्जति, तस्स वेदनाक्खन्धो उप्पज्जित्था”तिआदिना, “यत्थ रूपक्खन्धो उप्पज्जति, तत्थ वेदनाक्खन्धो उप्पज्जित्थाति...पे०... पञ्चवोकारे उप्पज्जती”तिआदिना, “यस्स यत्थ रूपक्खन्धो उप्पज्जति, तस्स तत्थ वेदनाक्खन्धो उप्पज्जित्थाति? सुद्धावासं असज्जसत्तं उपपज्जन्तानं तेसं तत्थ रूपक्खन्धो उप्पज्जति, नो च तेसं तत्थ वेदनाक्खन्धो उप्पज्जित्थ, पञ्चवोकारे पन उप्पज्जित्था”तिआदिना पच्चुप्पन्नेन अतीतकाले अनुलोमनये, “यस्स रूपक्खन्धो नुप्पज्जति, तस्स वेदनाक्खन्धो नुप्पज्जित्था”तिआदिना, “यत्थ रूपक्खन्धो नुप्पज्जति, तत्थ वेदनाक्खन्धो नुप्पज्जित्थाति? उप्पज्जित्था”तिआदिना, “यस्स यत्थ रूपक्खन्धो नुप्पज्जति, तस्स तत्थ वेदनाक्खन्धो नुप्पज्जित्थाति? पञ्चवोकारा चवन्तानं अरूपानञ्च तेसं तत्थ रूपक्खन्धो नुप्पज्जति, नो च तेसं तत्थ वेदनाक्खन्धो नुप्पज्जित्थ, सुद्धावासे परिनिब्बन्तानं असज्जसत्ता चवन्तानं तेसं तत्थ रूपक्खन्धो च नुप्पज्जति वेदनाक्खन्धो च नुप्पज्जित्था”तिआदिना पटिलोमनये च,

“यस्स रूपक्खन्धो उप्पज्जति, तस्स वेदनाक्खन्धो उप्पज्जिस्सतीति? पच्छिमभविकानं पञ्चवोकारं उपपज्जन्तानं तेसं रूपक्खन्धो उप्पज्जती”तिआदिना, “यत्थ रूपक्खन्धो उप्पज्जति, तत्थ वेदनाक्खन्धो उप्पज्जिस्सतीति? पञ्चवोकारे...पे०... उप्पज्जिस्सती”तिआदिना च, “यस्स यत्थ रूपक्खन्धो उप्पज्जति, तस्स तत्थ वेदनाक्खन्धो उप्पज्जिस्सतीति? पच्छिमभविकानं पञ्चवोकारे...पे०... उप्पज्जिस्सती”तिआदिना च पच्चुप्पन्नेन अनागतकाले अनुलोमनये, “यस्स रूपक्खन्धो नुप्पज्जति, तस्स वेदनाक्खन्धो नुप्पज्जिस्सतीति पञ्चवोकारे परिनिब्बन्तानं अरूपे पच्छिमभविकानं...पे०... नुप्पज्जिस्सती”तिआदिना, “यत्थ रूपक्खन्धो नुप्पज्जति, तत्थ वेदनाक्खन्धो नुप्पज्जिस्सतीति? उप्पज्जिस्सती”तिआदिना, “यस्स यत्थ रूपक्खन्धो नुप्पज्जति, तस्स तत्थ वेदनाक्खन्धो नुप्पज्जिस्सतीति...पे०... पञ्चवोकारे परिनिब्बन्तानं अरूपे पच्छिमभविकानं असज्जसत्ता चवन्तानं तेसं तत्थ...पे०... नुप्पज्जिस्सती”तिआदिना पटिलोमनये च,

“यस्स रूपक्खन्धो उप्पज्जित्थ, तस्स वेदनाक्खन्धो उप्पज्जिस्सतीति? पच्छिमभविकानं उप्पज्जिस्सती”तिआदिना, “यत्थ रूपक्खन्धो उप्पज्जित्थ, तत्थ वेदनाक्खन्धो उप्पज्जिस्सतीति...पे०... पञ्चवोकारे उप्पज्जिस्सती”तिआदिना, “यस्स यत्थ रूपक्खन्धो उप्पज्जित्थ, तस्स तत्थ वेदनाक्खन्धो उप्पज्जिस्सतीति? पञ्चवोकारे पच्छिमभविकानं असज्जसत्तानं...पे०... उप्पज्जिस्सती”तिआदिना अतीतेन अनागतकाले अनुलोमनये, “यस्स रूपक्खन्धो उप्पज्जित्थ, तस्स वेदनाक्खन्धो उप्पज्जिस्सतीति? नत्थी”तिआदिना, “यत्थ रूपक्खन्धो नुप्पज्जित्थ, तत्थ वेदनाक्खन्धो नुप्पज्जिस्सतीति? उप्पज्जिस्सती”तिआदिना, “यस्स यत्थ रूपक्खन्धो नुप्पज्जित्थ, तस्स तत्थ वेदनाक्खन्धो नुप्पज्जिस्सतीति...पे०... सुद्धावासानं अरूपे पच्छिमभविकानं तेसं तत्थ रूपक्खन्धो च नुप्पज्जित्थ वेदनाक्खन्धो च नुप्पज्जिस्सती”तिआदिना पटिलोमनये च सुद्धा अत्थविसेसा उपलब्धन्ति। तथापि गन्थवित्थारभयेन अनवसेसतो न दस्सयिस्साम, दस्सितनयेनेव सब्बत्थ पुच्छाविस्सज्जनं सकका पण्डितेन जातुन्ति अयं उप्पादवारे नयो।

यथा च उप्पादवारे छसु कालभेदेसु पच्चेकं पुग्गलादिभेदतो अनुलोमपटिलोमनयुभयेन छ छ वारा, एकेकस्मिं वारे दस दस कत्वा सट्ठि सट्ठि यमकानि,

सब्बानिपि सट्ठिअधिकानि तीणि यमकसतानि, ततो द्विगुणा पुच्छा, द्विगुणा अत्था च होन्ति, एवं निरोधवारे उप्पादनरोधवारेपि वेदितब्बा। तत्थ च “यस्स रूपक्खन्धो निरुज्झति, तस्स वेदनाक्खन्धो निरुज्झतीति...पे०... पञ्चवोकारा चवन्तान्...पे०... निरुज्झती”तिआदिना, “यस्स रूपक्खन्धो न निरुज्झति, तस्स वेदनाक्खन्धो न निरुज्झतीति...पे०... सब्बेसं उपपज्जनन्तान्...पे०... न निरुज्झती”तिआदिना निरोधवारे, “यस्स रूपक्खन्धो उपपज्जति, तस्स वेदनाक्खन्धो निरुज्झतीति? नो। यस्स रूपक्खन्धो नुपपज्जति, तस्स वेदनाक्खन्धो न निरुज्झतीति...पे०... अरूपं उपपज्जनन्तान् असज्जसत्ता चवन्तान् तेसं रूपक्खन्धो च नुपपज्जति, वेदनाक्खन्धो च न निरुज्झती”तिआदिना उप्पादनरोधवारे च हेट्ठा वुत्तानुसारेण सब्बत्थ पुच्छाविस्सज्जननयो जातब्बोति अयं पवत्तिवारे नयो।

परिज्जावारे पन पुग्गलवारादीसु तीसु पुग्गलवारो एकोव लब्भति, न ओकासपुग्गलोकासवारा सदिसविस्सज्जनता। यो हि कोचि पुग्गलो रूपादिं परिजानन्तोव, यत्थ कत्थचि निरुद्धोपि तादिसोव होति, तस्मा छसु कालभेदेसु अनुलोमतो पुग्गलवसेन द्वे द्वे वारा, एकेकस्मिं वारे दस दस कत्वा वीसति वीसति यमकानीति वीसं यमकसत्तं, तद्विगुणा पुच्छा, तद्विगुणा च अत्था वेदितब्बा। तत्थ च “यो रूपक्खन्धं परिजानाति, सो वेदनाक्खन्धं परिजानातीति? आमन्ता”तिआदिना च, “यो रूपक्खन्धं न परिजानाति, सो वेदनाक्खन्धं न परिजानातीति? आमन्ता”ति आदिना च अनुलोमपटिलोमतो आदितो तीसु कालेसु सब्बपुच्छानं “आमन्ता आमन्ता”त्वेव विस्सज्जनं। इतरेसु पन तीसु मिस्सककालेसु “यो रूपक्खन्धं परिजानाति, सो वेदनाक्खन्धं परिजानित्थाति? नो। यो वा पन...पे०... नो”ति एवं इतरकालद्वयेपि अनुलोमनये “नो नो”त्वेव विस्सज्जनं।

पटिलोमनये पन “यो रूपक्खन्धं न परिजानाति, सो वेदनाक्खन्धं न परिजानित्थाति? अरहा रूपक्खन्धं न परिजानाति, नो च सो वेदनाक्खन्धं न परिजानित्थ। अगममगसमङ्गिञ्च अरहन्तञ्च ठपेत्वा अवसेसा पुग्गला रूपक्खन्धञ्च न परिजानन्ति, वेदनाक्खन्धञ्च न परिजानिंसू”तिआदिना, “यो रूपक्खन्धं न परिजानाति, सो वेदनाक्खन्धं न परिजानिस्सतीति? ये मग्गं पटिलभिस्सन्ति, ते रूपक्खन्धं न परिजानन्ति, नो च वेदनाक्खन्धं न परिजानिस्सन्ति। अरहा ये च पुथुज्जना मग्गं न पटिलभिस्सन्ति, ते रूपक्खन्धञ्च न परिजानन्ति, वेदनाक्खन्धञ्च न परिजानिस्सन्ती”तिआदिना च, “यो रूपक्खन्धं न परिजानित्थ, सो वेदनाक्खन्धं न परिजानिस्सन्तीति? ये मग्गं पटिलभिस्सन्ति, ते रूपक्खन्धं न परिजानिंसु, नो च वेदनाक्खन्धं न परिजानिस्सन्ति। अगममगसमङ्गी ये च पुथुज्जना मग्गं न पटिलभिस्सन्ति, ते रूपक्खन्धञ्च न परिजानिंसु, वेदनाक्खन्धञ्च न परिजानिस्सन्ती”तिआदिना च पुच्छाविस्सज्जननयो वेदितब्बो।

एत्थ च अतीतानागतपच्चुप्पन्नसङ्घाता तयो अद्धा पवत्तिवारे चुतिपटिसन्धिवसेन न लब्भन्ति, पवत्ते चित्तक्खणवसेनेव लब्भन्ति। लोकुत्तरमग्गक्खणस्मिं हि निब्बानारम्मणेन चित्तेन पञ्चसु खन्धेसु परिज्जाकिच्चनिष्फत्तिया यं कज्जि एकं खन्धं परिजानन्तो इतरमि “परिजानाती”ति अनुलोमपञ्हेसु परिज्जाकिच्चस्स मत्थकप्पत्तं अगममगसमङ्गि सन्धाय “आमन्ता”ति विस्सज्जनं वुत्तं। “न परिजानाती”ति पटिलोमपञ्हेसु पुथुज्जनादयो सन्धाय “आमन्ता”ति विस्सज्जनं वुत्तन्ति वेदितब्बं। “परिजानित्था”ति इमस्मिं पन अतीतकालवारे मग्गानन्तरे अगमफले ठितोपि परिज्जाकिच्चस्स निड्डितत्ता परिजानित्थयेव नाम। “परिजानाती”ति च अगममगसमङ्गी वुच्चति, “परिजानिस्सन्ती”ति पुथुज्जनादयो, तस्मा यो न परिजानाति, सो परिजानित्थाति वा, परिजानिस्सतीतिआदिना वा वत्तुं असक्कुण्येयताय “आमन्ता”ति विस्सज्जनं कत्तं।

पटिलोमनये पन “अगममगसमङ्गिञ्च अरहन्तञ्च ठपेत्वा”ति इदं अगममगसमङ्गिनो “न परिजानाती”ति वचनं, अरहतो च “न परिजानित्था”ति वत्तुं असक्कुण्येयताय वुत्तं, “ये च पुथुज्जना मग्गं न पटिलभिस्सन्ती”ति इमिना अतीते विय अनागतेपि अनन्तकालं अमुच्चनका सत्ता नाम अत्थीति दस्सेति, ते च अरहता निड्डितपरिज्जाकिच्चेन, “न परिजानिस्सन्ती”ति वत्तब्बत्तं वा आपन्नेन समका जाता, सब्बत्थ च एकं खन्धं परिजानन्तो सब्बं परिजानाति, अपरिजानन्तोपि च सब्बं न परिजानातीति वेदितब्बन्ति अयं खन्धयमकमातिकत्थसंवण्णनानयो।

### आयतनयमकमातिकत्थवण्णना

आयतनयमकमातिकाय पन पाळिववत्थानादिकं सब्बं खन्धयमकमातिकाय वुत्तनयेनेव वेदितब्बं अज्जत्र विसेसा, तत्रायं विसेसो — “द्वादसायतनानी”ति पदं आदिं कत्वा याव “नायतना न मनो”ति, ताव पवत्ता अयं आयतनमातिका नाम। तत्थ द्वादसायतनानि उद्दिसित्वा यमकवसेन पुच्छासु खन्धपदं ठपेत्वा चक्खवादीनि पञ्च अज्झत्तिकायतनानि पठमं वुत्तानि, पच्छा रूपादिपञ्चबाहिरायतनानि, परियोसाने मनायतनधम्मायतनानीति एवं पाळिववत्थाने पञ्हे। विस्सज्जने पन “चक्खु चक्खायतनन्ति? दिब्बचक्खु पज्जाचक्खु चक्खुमेव, न चक्खायतनं, चक्खायतनं चक्खु चेव चक्खायतनञ्च। सोतं सोतायतनन्ति? दिब्बसोतं तण्हासोतं सोतमेव, न सोतायतनं। धानं धानायतनन्ति? आमन्ता...पे०... कायो कायायतनन्ति? नामकायो चित्तकायोतिआदि कायो, न कायायतनं। रूपं रूपायतनन्ति? भूतादि, पियरूपादि च रूपं, न रूपायतनं। सद्दो सद्दायतनन्ति? आमन्ता। गन्धो गन्धायतनन्ति? सीलगन्धादयो गन्धोव, न गन्धायतनं। रसो रसायतनन्ति? अत्थरसादयो रसोव, न रसायतनं। धम्मो धम्मायतनन्ति? परियत्तिधम्मादयो धम्मोव, न धम्मायतनं। धम्मायतनं धम्माति? आमन्ता”ति अयं पण्णत्तिवारे विसेसो।

पवत्तिवारे पन “यस्स चक्खायतनं उपपज्जति, तस्स सोतायतनं उपपज्जतीति? सचक्खुकानं असोतकानं उपपज्जनान् तेसं चक्खायतनं उपपज्जति, नो च तेसं सोतायतनं उपपज्जति। सचक्खुकानं ससोतकानं उपपज्जनान् तेसं चक्खायतनञ्च उपपज्जति, सोतायतनञ्च उपपज्जति...पे०... यस्स रूपायतनं

उपपज्जति, तस्स मनायतनं उपपज्जतीति? अचित्तकानं रूपायतनं उपपज्जति, नो च तेसं मनायतनं उपपज्जति । पञ्चवोकारे उपादक्खणे तदुभयं उपपज्जति । यस्स वा पन मनायतनं उपपज्जति, तस्स रूपायतनं उपपज्जतीति? अरूपभववज्जिते सञ्जाभवे उपपज्जन्तानं...पे०... उपपज्जति । यस्स रूपायतनं उपपज्जति, तस्स धम्मायतनं उपपज्जतीति? आमन्ता । यस्स वा पन...पे०... उपपज्जतीति? अरूपभववज्जिते सब्बत्थ उपपज्जति । यस्स मनायतनं उपपज्जति, तस्स धम्मायतनं उपपज्जतीति? आमन्ता, यस्स वा पन...पे०... उपपज्जतीति? असञ्जभववज्जिते सब्बत्थ उपपज्जतीति? एतं एवं सद्वायतनवज्जिता सेसायतनमातिकायमकयोजना यथानुरूपं वेदितव्वा । सद्वायतनं हि पटिसन्धिक्खणे न लब्धमिति, अयं उपादवारे विसेसो, इमिना नयेन निरोधवारादीसु, परिञ्जावारे च योजनाविसेसो वेदितव्वो, सब्बत्थ च खन्धतो आयतनानं बहुता च यमकवारबहुता च वेदितव्वा । सेसं तादिसमेवाति अयं आयतनयमकमातिकथसंवण्णनानयो ।

### धातुयमकमातिकथवण्णना

धातुयमकमातिकाय पन पाळिववत्थानं सब्बं आयतनयमकमातिकाय वुत्तनयेनेव वेदितव्वन्ति अयं धातुयमकमातिकथसंवण्णनानयो ।

### सच्चयमकमातिकथवण्णना

सच्चयमकमातिकाय पन खन्धयमके वुत्तनयेन वारभेदा, कालादिभेदा च वेदितव्वा, पाळिववत्थाने पनेत्थ चतुन्नं सच्चानं वसेन पदसोधनवारा पदसोधनमूलचक्कवारो सुद्धसच्चवारो सुद्धसच्चमूलचक्कवारो इमेसु चतूसु वारेसु यमकगणना वेदितव्वा । पुच्छाविस्सज्जनेसु पन “दुक्खं दुक्खसच्चन्ति? आमन्ता । दुक्खसच्चं दुक्खन्ति? कायिकचेतसिकं दुक्खं ठपेत्वा अवसेसं दुक्खसच्चं, न दुक्खं । कायिकचेतसिकं दुक्खं पन दुक्खज्जेव दुक्खसच्चज्ज । समुदयो समुदयसच्चन्ति? तण्हं ठपेत्वा अवसेसा सच्चविभङ्गे निहिट्ठा कुसलादिधम्मा समुदयो, न समुदयसच्चं । तण्हा पन समुदयो चेव समुदयसच्चज्ज । समुदयसच्चं समुदयोति? आमन्ता । निरोधो निरोधसच्चन्ति? तदङ्गनिरोधादयो, खणिकनिरोधो च निरोधोव, न निरोधसच्चं । निब्बानं पन निरोधो चेव निरोधसच्चज्ज । निरोधसच्चं निरोधोति? आमन्ता । मग्गो मग्गसच्चन्ति? मिच्छामग्गङ्गादयो मग्गो, न मग्गसच्चं । अरियमग्गो पन मग्गो चेव मग्गसच्चज्ज । मग्गसच्चं मग्गोति? आमन्ता”तिआदिना पण्णत्तिवारे नयो वेदितव्वो ।

पवत्तिवारे पन “यस्स दुक्खसच्चं उपपज्जति, तस्स समुदयसच्चं उपपज्जतीति? सब्बेसं उपपज्जन्तानं पवत्ते तण्हाविप्पयुत्तचित्तस्स उपादक्खणे तेसं दुक्खसच्चं उपपज्जति, नो च तेसं समुदयसच्चं उपपज्जति । तण्हाय उपादक्खणे तदुभयं उपपज्जति । यस्स दुक्खसच्चं उपपज्जति, तस्स मग्गसच्चं उपपज्जतीति...पे०... पञ्चवोकारे मग्गस्स उपादक्खणे तदुभयं उपपज्जति । यस्स वा पन...पे०... उपपज्जतीति? अरूपे मग्गस्स उपादक्खणे तेसं मग्गसच्चं उपपज्जति, नो च तेसं दुक्खसच्चं उपपज्जति । पञ्चवोकारे तदुभयं उपपज्जति । यस्स समुदयसच्चं उपपज्जति, तस्स मग्गसच्चं उपपज्जतीति? नो, यस्स वा पन...पे०... नो”तिआदिना पुग्गलवारे, “यत्थ दुक्खसच्चं उपपज्जति, तत्थ समुदयसच्चं उपपज्जतीति? असञ्जसत्ते तत्थ दुक्खसच्चं उपपज्जति, नो च तत्थ तदञ्जं, अञ्जत्थ तदुभयम्पि । यत्थ दुक्खसच्चं उपपज्जति, तत्थ मग्गसच्चं उपपज्जतीति? अपाये, असञ्जसत्ते च दुक्खमेव, नो च तत्थ तदञ्जं, अञ्जत्थ तदुभयम्पी”तिआदिना ओकासवारे, पुग्गलोकासवारेपीति एवं अनुलोमनये,

“यस्स दुक्खसच्चं नुपपज्जति, तस्स समुदयसच्चं नुपपज्जतीति? आमन्ता । यस्स वा पन...पे०... नुपपज्जतीति? सब्बेसं उपपज्जन्तानं पवत्ते तण्हाविप्पयुत्तचित्तस्स उपादक्खणे समुदयसच्चं नुपपज्जति, नो च तेसं दुक्खसच्चं नुपपज्जति । सब्बेसं चवन्तानं पवत्ते चित्तस्स भङ्गक्खणे अरूपे मग्गस्स च फलस्स च उपादक्खणे तेसं समुदयसच्चं नुपपज्जति, दुक्खसच्चं नुपपज्जतीति”तिआदिना, “यत्थ दुक्खसच्चं नुपपज्जति, तत्थ समुदयसच्चं नुपपज्जतीति? नत्थि । यत्थ वा पन समुदयसच्चं नुपपज्जति, तत्थ दुक्खसच्चं नुपपज्जतीति? उपपज्जतीति”तिआदिना च, “यस्स यत्थ दुक्खसच्चं नुपपज्जति, तस्स तत्थ समुदयसच्चं नुपपज्जतीति? आमन्ता । यस्स वा पन यत्थ समुदयसच्चं नुपपज्जति, तस्स तत्थ दुक्खसच्चं नुपपज्जतीति? सब्बेसं उपपज्जन्तानं पवत्ते तण्हाविप्पयुत्तचित्तस्स उपादक्खणे तेसं तत्थ समुदयसच्चं एव नुपपज्जति, नेतरं, सब्बेसं पन चवन्तानं पवत्ते चित्तस्स भङ्गक्खणे अरूपे मग्गस्स च फलस्स च उपादक्खणे तेसं तत्थ तदुभयम्पि नुपपज्जतीति”तिआदिना च सब्बत्थ पटिलोमनये च,

“यस्स दुक्खसच्चं उपपज्जित्थ, तस्स समुदयसच्चं उपपज्जित्थाति? आमन्ता । यस्स दुक्खसच्चं उपपज्जित्थ, तस्स मग्गसच्चं उपपज्जित्थाति? अभिसमेतावीनं उपपज्जित्थ, न इतरेसं”तिआदिना, “यस्स यत्थ दुक्खसच्चं उपपज्जित्थ, तस्स तत्थ समुदयसच्चं उपपज्जित्थाति? सुद्धावासानं दुतिये चित्ते वत्तमाने असञ्जसत्तानं तत्थ दुक्खसच्चं उपपज्जित्थ, नेतरं, इतरेसं तदुभयं उपपज्जित्थाति”तिआदिना, “यस्स दुक्खसच्चं उपपज्जित्थ, तस्स समुदयसच्चं उपपज्जित्थतीति? अग्गमग्गसमङ्गीनं अरहन्तानं यस्स चित्तस्स अनन्तरा अग्गमग्गं पटिलभित्तन्ति, तेसं दुक्खसच्चं उपपज्जित्थ, नेतरं, इतरेसं तदुभयं उपपज्जित्थतीति”तिआदिना च, “यस्स दुक्खसच्चं उपपज्जति, तस्स समुदयसच्चं उपपज्जित्थाति? आमन्ता, यस्स वा पन...पे०... उपपज्जतीति? सब्बेसं चवन्तानं पवत्ते चित्तस्स भङ्गक्खणे अरूपे मग्गफलुपत्तिकवणे तेसं समुदयसच्चं उपपज्जित्थ, नो च तेसं दुक्खसच्चं उपपज्जति । सब्बेसं उपपज्जन्तानं पवत्ते चित्तस्स उपादक्खणे समुदयसच्चं उपपज्जित्थ, दुक्खसच्चं उपपज्जतीति”तिआदिना च सेसकालभेदेसु च अनुलोमपटिलोमादीसु च वुत्तानुसारेण उपादवारे सब्बत्थ विस्सज्जननयो यथानुरूपं जातव्वो । “यस्स दुक्खसच्चं निरुज्झति, तस्स समुदयसच्चं निरुज्झतीति...पे०... तण्हाय भङ्गक्खणे तेसं तदुभयं निरुज्झतीति”तिआदिना निरोधवारे, उपादनरोधवारेपीति एवं पवत्तिवारे सब्बत्थ यथानुरूपतो योजना वेदितव्वा ।

तथा “यो दुक्खसच्चं परिजानाति, सो समुदयसच्चं पजहतीति? आमन्ता”तिआदिना परिज्जावारेपीति एवमेत्थ पाळिनयो जातब्बो।

अत्थविनिच्छये पनेत्थ इदं लक्खणं — पवत्ति वारे तावेत्थ निरोधसच्चं न लब्भतेव, सेसेसु पन तीसु सच्चेषु समुदयमग्गसच्चानि एकन्तेन पवत्तियं एव लब्भन्ति। दुक्खसच्चं चुतिपटिसन्धीसुपि पवत्तेपीति एवमेत्थ यं यं सब्बत्थ लब्भति, तस्स तस्स वसेन अत्थविनिच्छयो वेदितब्बो। तत्रिदं नयमुखं — **सब्बेसं उपपज्जन्तानन्ति** अन्तमसो सुद्धावासानम्पि। तेपि हि दुक्खसच्चेनेव उपपज्जन्ति। **तण्हाविप्पयुत्तचित्तस्साति** इदं दुक्खसच्चसमुदयसच्चेषु एककोट्टासस्स उपत्तिदस्सनत्थं वुत्तं, तस्मा पञ्चवोकारवसेनेव गहेतब्बं। चतुवोकारे पन तण्हाविप्पयुत्तफलसमापत्तिया उप्पादक्खणे एकम्पि सच्चं नुपपज्जति। **तदुभयन्ति** दुक्खसमुदयसच्चद्वयं। तस्मिं हि खणे तण्हं ठपेत्वा सेसं दुक्खसच्चं नाम होतीति तं सन्धायेतं वुत्तं। मग्गस्स उप्पादक्खणे पन रूपमेव दुक्खसच्चं नाम, सेसा मग्गसहजाता धम्मा सच्चविनिमुत्ताव। तेनेव कारणेन “अरूपे मग्गस्स उप्पादक्खणे तेसं मग्गसच्चं उपपज्जति, नो च तेसं दुक्खसच्चं उपपज्जती”ति वुत्तं। सब्बेसं उपपज्जन्तानं पवत्ते तण्हाविप्पयुत्तचित्तस्स उप्पादक्खणे। **तेसं तत्थाति** तेसं तस्मिं उपपत्तिकखणे तण्हाविप्पयुत्तचित्तुपत्तिकखणे चाति एवमेत्थ खणवसेन ओकासो वेदितब्बो। अज्जेसुपि एवरूपेषु एसेव नयो। **अनभिसमेतावीनन्ति** अनभिसमितसच्चानन्ति इमिना नयमुखेन सब्बत्थ अत्थविनिच्छयो वेदितब्बो।

परिज्जावारे पन जाततीरणपहानवसेन तिस्सोपि परिज्जायो लब्भन्ति। यस्मा पन लोकुत्तरधम्मेसु परिज्जानाम नत्थि, तस्मा इध द्वे एव सच्चानि गहितानि। तत्थ “दुक्खसच्चं परिजानाती”ति जाततीरणपरिज्जावसेन वुत्तं, “समुदयसच्चं पजहती”ति जातपहानपरिज्जावसेन, इति इमासं परिज्जानं वसेन सब्बत्थ अत्थो वेदितब्बो। अयं सच्चयमकमातिकथसंवण्णनानयो।

### सङ्खारयमकमातिकथवण्णना

सङ्खारयमकमातिकाय पन हेट्ठा वुत्तनयेनेव महावारन्तरादिभेदा वेदितब्बा। अयं पनेत्थ विसेसो — मातिकाय ताव यथा हेट्ठा खन्धादयो धम्मे उद्दिसित्वा “रूपं रूपक्खन्धो”तिआदिना पदसोधनवारो आरब्धो, तथा अनारभित्वा “अस्सासपस्सासा कायसङ्खारो”तिआदिना पठमं तयोपि सङ्खारा विभजित्वा दस्सिता। तत्थ कायस्स सङ्खारो **कायसङ्खारो**, अस्सासपस्सासा। “कायिका एते धम्मा कायपटिबद्धा”ति (म० नि० १.४६३; सं० नि० ४.३४८) वचनतो कारणभूतस्स करजकायस्स फलभूतो एस सङ्खारोति कायसङ्खारो। अपरो नयो — सङ्खारीयतीति सङ्खारो। केन सङ्खारीयति? कायेन। अयं हि वातो विय भस्ताय करजकायेन सङ्खारीयति, एवम्पि कायस्स सङ्खारोति कायसङ्खारो, कायेन कतो अस्सासपस्सासवातोति अत्थो। चेतसा वितक्केत्वा विचारेत्वा पच्छा वाचं भिन्दति, तस्मा “वितक्कविचारा वचीसङ्खारो”ति (म० नि० १.४६३) वचनतो पन सङ्खारोतीति सङ्खारो, किं सङ्खारोति? वचिं। वचिया सङ्खारोति **वचीसङ्खारो**, वचीभेदसमुट्ठापकस्स वितक्कविचारद्वयस्सेतं नामं। “सज्जा च वेदना च चेतसिका एते धम्मा चित्तपटिबद्धा”ति (म० नि० १.४६३; सं० नि० ४.३४८) वचनतोयेव पन ततियपदे सङ्खारीयतीति सङ्खारो, केन सङ्खारीयति? चित्तेन, इति चित्तस्स सङ्खारोति **चित्तसङ्खारो**, सब्बेसम्पि चित्तसमुट्ठानानं चेतसिकानं धम्मानं एतं अधिवचनं। वितक्कविचारानं पन वचीसङ्खारभावेन विसुं गहितत्ता “ठपेत्वा वितक्कविचारे”ति वुत्तं।

इदानीं “**कायो कायसङ्खारो**”ति पदसोधनवारो आरब्धो, तस्स अनुलोमनये तीणि, पटिलोमनये तीणीति छ यमकानि। पदसोधनमूलचक्कवारो एकेकसङ्खारमूलकानि द्वे द्वे कत्वा अनुलोमनये छ, पटिलोमनये छाति द्वादस यमकानि। सुद्धसङ्खारवारे पन यथा सुद्धखन्धवारादीसु “रूपं खन्धो, खन्धा रूपं”न्तिआदिना नयेन यमकानिवुत्तानि, एवं “कायो सङ्खारो, सङ्खारा कायो”ति अवत्वा “कायसङ्खारो वचीसङ्खारो”तिआदिना नयेन कायसङ्खारमूलकानि द्वे, वचीसङ्खारमूलकं एकन्ति अनुलोमे तीणि, पटिलोमे तीणीति छ यमकानि वुत्तानि। किं कारणा? सुद्धिकएकेकपदवसेन अत्थभेदाभावतो, कायसङ्खारोति पन द्वीहिपि पदेहि एकोव अत्थो लब्भतीति अयं विसेसोव, तस्मा एकेकपदवसेन न वुत्तं, “कायो कायसङ्खारो”तिआदि पन वत्तब्बं सिया, सोपि नयो पदसोधनवारे विनापि अत्थेन वचनं युज्जतीति तत्थेव वुत्तो, इध पन कायसङ्खारादीनं वचीसङ्खारादीहि अज्जत्ता “कायसङ्खारो वचीसङ्खारो”तिआदिनापि यमकानि वुत्तानि। सुद्धसङ्खारमूलचक्कवारो पनेत्थ न गहितोति अयं तावेत्थ पाळिववत्थाने विसेसो।

पज्जविस्सज्जनेसु पन “कायो कायसङ्खारोति? नो, कायसङ्खारो कायोति? नो”ति वा एवं सब्बत्थ पटिसेधो। विस्सज्जनानं कायादीनं एव कायसङ्खारादिनामत्ता। न हि कायादयो विय कायसङ्खारादीनं नामं होति, पटिलोमे पन न कायो न कायसङ्खारोति यो कायो न होति, सो कायसङ्खारोपि न होतीति पुच्छाय अत्थो, तस्सा कायसङ्खारो न कायो कायसङ्खारोति कायसङ्खारो कायो न होति, कायसङ्खारोयेव पनेसो होति, कायज्च कायसङ्खारज्च ठपेत्वा अवसेसं सङ्खतासङ्खतादिभेदं सब्बं न च कायो, न च कायसङ्खारोति विस्सज्जनं। सेसेसुपि एसेव नयो, इतरेसु च अनुलोमपटिलोमेसु “कायो कायसङ्खारोति? नो, सङ्खारा वचीसङ्खारोति? वचीसङ्खारो सङ्खारो चेव वचीसङ्खारो च, अवसेसा सङ्खारा, न वचीसङ्खारो, न सङ्खारा न वचीसङ्खारोति? आमन्ता”तिआदिना सब्बत्थ पुच्छाविस्सज्जननयो वेदितब्बो।

पवत्तिवारे पन “यस्स कायसङ्खारो उपपज्जति, तस्स वचीसङ्खारो उपपज्जतीति? विना वितक्कविचारेहि अस्सासपस्सासानं उप्पादक्खणे तेसं कायसङ्खारो उपपज्जति, नेतरो, सवितक्कसविचारचित्तसमङ्गीनं पन कामावचरसत्तानं तदुभयम्पि उपपज्जति। यस्स वा पन...पे०... उपपज्जतीति? रूपावरूपभविकानं वितक्कविचारुप्पादक्खणे वचीसङ्खारोव उपपज्जति, नेतरो...पे०... यथावुत्तकामावचरानं पन तदुभयं उपपज्जति। यस्स कायसङ्खारो उपपज्जति, तस्स चित्तसङ्खारो उपपज्जतीति? आमन्ता...पे०... यस्स वा पन...पे०... उपपज्जतीति...पे०... अस्सासपस्सासानं उप्पादक्खणे तदुभयं उपपज्जति।



यस्स वचीसङ्खारो उप्पज्जति, तस्स चित्तसङ्खारो उप्पज्जतीति? आमन्ता...पे०... यत्थ कायसङ्खारो उप्पज्जति, तत्थ वचीसङ्खारो उप्पज्जतीति? कामावचरसत्तानं दुतियज्झाने ततियज्झाने तत्थ कायसङ्खारो उप्पज्जति, नेतरो, पठमज्झानादीसु पन तदुभयं उप्पज्जति । यत्थ वा पन ...पे०... उप्पज्जतीति? कामावचरे उप्पज्जति, न रूपारूपभवेसु । यत्थ कायसङ्खारो उप्पज्जति, तत्थ चित्तसङ्खारो उप्पज्जतीति? आमन्ता । यत्थ वा पन...पे०... उप्पज्जतीति? कामावचरसत्तानं चतुत्थज्झाने रूपारूपभवे च तत्थ चित्तसङ्खारो उप्पज्जति, नेतरो, इतरज्झानादीसु पन तदुभयं उप्पज्जतीति? आदिना,

“यस्स कायसङ्खारो उप्पज्जति, तस्स वचीसङ्खारो उप्पज्जतीति? विना अस्सासपस्सासेहि वितक्कविचारानं उप्पादक्खणे तेसं कायसङ्खारो उप्पज्जति, नेतरो, सब्बेसं चित्तस्स भङ्गक्खणे विना अस्सासपस्सासेहि अवितक्कअविचारचित्तस्स उप्पादक्खणे निरोधसमापन्नानं असज्जसत्तानञ्च तदुभयमि उप्पज्जति...पे०... यस्स कायसङ्खारो उप्पज्जति, तस्स चित्तसङ्खारो उप्पज्जतीति...पे०... सब्बचित्तानं भङ्गक्खणे निरोधसमापन्नानं असज्जसत्तानञ्च उप्पज्जतीति” आदिना च, “यत्थ कायसङ्खारो उप्पज्जति, तत्थ वचीसङ्खारो उप्पज्जतीति...पे०... चतुत्थज्झानक्खणे रूपभवादीसु उप्पज्जतीति” आदिना च, “यस्स कायसङ्खारो उप्पज्जित्थ, तस्स वचीसङ्खारो उप्पज्जित्थाति? आमन्ता” आदिना, “यस्स कायसङ्खारो उप्पज्जित्थ, तस्स चित्तसङ्खारो उप्पज्जित्थाति? नत्थी” आदिना, “यस्स यत्थ कायसङ्खारो उप्पज्जित्थ, तस्स तत्थ वचीसङ्खारो उप्पज्जित्थाति...पे०... चतुत्थज्झानं समापन्नानं सुद्धावासानं दुतिये चित्ते वत्तमाने असज्जसत्तानं तेसं तत्थ कायसङ्खारो च उप्पज्जित्थ वचीसङ्खारो चा” आदिना च,

“यस्स कायसङ्खारो उप्पज्जिस्सति, तस्स वचीसङ्खारो उप्पज्जिस्सतीति? आमन्ता । यस्स वा पन...पे०... उप्पज्जिस्सतीति? यस्स चित्तस्स अनन्तरा कामावचरानं पच्छिमचित्तं उप्पज्जिस्सति, रूपारूपभवे पच्छिमभविकानं वचीसङ्खारो उप्पज्जिस्सति, न कायसङ्खारो, अज्जेसं पन तदुभयं उप्पज्जिस्सतीति” आदिना च, “यस्स कायसङ्खारो उप्पज्जिस्सति, तस्स वचीसङ्खारो उप्पज्जिस्सतीति...पे०... पच्छिमचित्तसमङ्गीनं यस्स चित्तस्स अनन्तरा अवितक्कअविचारं पच्छिमचित्तं उप्पज्जिस्सति, तेसं तदुभयं उप्पज्जिस्सतीति” आदिना सब्बकालभेदेसु यथानुरूपतो उप्पादवारे योजनानयो वेदितब्बो । “यस्स कायसङ्खारो निरुज्झति, तस्स वचीसङ्खारो निरुज्झतीति...पे०... पठमज्झानं समापन्नानं कामावचरानं अस्सासपस्सासानं भङ्गक्खणे तदुभयं निरुज्झति । यस्स कायसङ्खारो निरुज्झति, तस्स चित्तसङ्खारो निरुज्झतीति? आमन्ता” आदिना निरोधवारे, “यस्स कायसङ्खारो उप्पज्जति, तस्स वचीसङ्खारो निरुज्झतीति? नो” आदिना उप्पादनरोधवारे च,

“यो कायसङ्खारं परिजानाति, सो वचीसङ्खारं परिजानातीति? आमन्ता” आदिना परिज्जावारे च हेट्ठा वुत्तानुसारेन सब्बत्थ पाळिनयो वेदितब्बो ।

पवत्तिवारे पनेत्थ पच्चुप्पन्नकाले पुग्गलवारस्स अनुलोमनये कायसङ्खारमूलकानि द्वे, वचीसङ्खारमूलकं एकन्ति तीणेव यमकानि लब्भन्ति । तस्स पटिलोमनयेपि ओकासवारादीसुपि एसेव नयो । एवमेत्थ सब्बवारेसु तिण्णं तिण्णं यमकानं वसेन यमकगणना वेदितब्बा । अत्थविनिच्छये पनेत्थ इदं लक्खणं — इमस्मिं हि सङ्खारयमके “अस्सासपस्सासानं उप्पादक्खणे, वितक्कविचारानं उप्पादक्खणे” आदिवचनतो (यम० २.सङ्खारयमक.१९) पच्चुप्पन्नादिकालभेदो पवत्तिवसेनापि गहेतब्बो, न चुतिपटिसन्धिवसेनेव । “दुतियज्झाने ततियज्झाने तत्थ कायसङ्खारो उप्पज्जतीति” आदिवचनतो (यम० २.सङ्खारयमक.२१) च ज्ञानमि ओकासवसेन गहितन्ति वेदितब्बं । एवमेत्थ यं यं लब्भति, तस्स तस्स वसेन अत्थविनिच्छयो वेदितब्बो । तत्रिदं नयमुखं — “विना वितक्कविचारेही” ति दुतियततियज्झानवसेन वुत्तं, न चतुत्थज्झानवसेन तत्थ अस्सासपस्सासानं अभावतो । “चित्तस्स भङ्गक्खणे” ति इदं कायसङ्खारस्स एकन्तचित्तसमुद्धानत्ता वुत्तं, उप्पज्जमानमेव हि चित्तं रूपं, अरूपं वा समुद्धारोति, न भिज्जमानं, ठितं वा । “पच्छिमचित्तसमङ्गीनं” ति सब्बपच्छिमेन अप्पटिसन्धिकचित्तेन समङ्गीनं खीणासवानं । “अवितक्कअविचारं पच्छिमचित्तं” ति एत्थ रूपावचरानं दुतियज्झानिकादिचुतिचित्तवसेन, अरूपावचरानञ्च चतुत्थज्झानिकचुतिचित्तवसेन अत्थो गहेतब्बो ।

“यस्स कायसङ्खारो निरुज्झति, तस्स चित्तसङ्खारो निरुज्झतीति” ति एत्थ नियमतो कायसङ्खारस्स चित्तसङ्खारेन सद्धिं एकक्खणे निरुज्झनतो “आमन्ता” ति पटिवचनं दिन्नं न एकचित्तक्खणिकत्ता । चित्तसङ्खारो हि कायसङ्खारेन विनापि उप्पज्जति च निरुज्झति च । कायसङ्खारो पन चित्तसमुद्धानत्ता येन चित्तेन सद्धिं उप्पज्जति, ततो पट्टाय सत्तरसमेन सद्धिं निरुज्झति, एसा चित्तसमुद्धानरूपस्स धम्मता । यं पन विभङ्गप्पकरणस्स सीहळडुकथाय “चित्तसमुद्धानरूपं सत्तरसमचित्तस्स उप्पादक्खणे निरुज्झतीति” ति वुत्तं, तं इमाय पाळिया विरुज्झति । “यस्स कायसङ्खारो उप्पज्जति, तस्स वचीसङ्खारो निरुज्झतीति” ति एत्थ यस्मा कायसङ्खारो चित्तस्स उप्पादक्खणे उप्पज्जति, न च तस्मिं खणे वितक्कविचारा निरुज्झन्ति, तस्मा “नो” ति पटिसेधो कतो । इमिना नयमुखेन सब्बत्थ विनिच्छयो वेदितब्बो । अयं सङ्खारयमकमातिकथसंवण्णनानयो ।

### अनुसययमकमातिकथवण्णना

अनुसययमकमातिकाय पन पाळिववत्थानं ताव एवं वेदितब्बं । अनुसययमकेपि खन्थयमकमातिकादीसु विय देसनं अकत्वा अज्जेन नयेन पाळिदेसना कता । कथं? पठमं ताव परिच्छेदवारो परिच्छिन्नुद्देसवारोति द्वे वारा उद्देसवसेन देसिता, ततो उप्पत्तिट्ठानवारोति एको खुट्टकवारो । ततो अनुसयवारो सानुसयवारो पजहनवारो परिज्जावारो पहीनवारो उप्पज्जनवारो धातुवारोति अनुसये योजेत्वा यमकवसेन पपञ्चतो निद्धिद्धा सत्त महावारोति अट्टकनिद्देसवसेन देसिता, एवं दसहि वारोहि अनुसययमकदेसना कता । तेसु ये इमे हि परिच्छेदवारोति आदिना द्वे वारा उद्देसवसेन वुत्ता, ते इध अनुसययमकमातिकाति गहेतब्बा ।

तत्थ हि सत्त अनुसयाति अयं गणनाय परिच्छिन्दित्वा अनुसयानं देसितत्ता परिच्छेदवारो नाम । कामरागानुसयो...पे०... अविज्जानुसयोति अयं परिच्छेदवसेन परिच्छिन्नानं नाममत्तं उद्दिशित्वा “इमे नाम ते”ति देसितत्ता परिच्छिन्नुद्देसवारो नाम । तत्थ अनुत्तानत्थतो ताव अनुसयाति केनद्देन अनुसया? अनुसयनद्देन । को एस अनुसयनद्दो नामाति? अप्पहीनद्दो । कामरागानुसयादयो हि अप्पहीनद्देन तस्स तस्स सन्ताने अनुसेन्ति नाम, तस्मा “अनुसया”ति वुच्चन्ति, अनुसेन्तीति च तं तं अनुरूपं कारणं लभित्वा उपपज्जन्तीति अत्थो । अथापि सिया — अनुसयनद्दो नाम अप्पहीनाकारो, अप्पहीनाकारो च न उपपज्जति, तस्मा अनुसया न उपपज्जन्तीति । तत्रिदं पटिवचनं — अप्पहीनाकारो अनुसयो, अनुसयोति पन अप्पहीनद्देन थामगतकिलेसो वुच्चति, सो चित्तसम्पयुत्तो सारम्मणो सप्पच्चयद्देन सहेतुको एकन्ताकुसलोव होति कथावत्थुस्मिं (कथा० ५५४ आदयो) अनुसयानं चित्तविषयुत्तभावस्स पटिसेधितत्ता, सो च अतीतोपि होति, अनागतोपि पच्चुप्पन्नोपि, तस्मा उपपज्जतीति वत्तुं युत्तं । तथा हि धम्मसङ्गहे मोहस्स पदभाजने ३१७ “अविज्जानुसयो अविज्जापरियुद्धानं...पे०... अयं तस्मिं समये मोहो होती”ति (ध० स० ३९०) । इमस्मिञ्च यमके उपपज्जनवारे “यस्स कामरागानुसयो उपपज्जति, तस्स पटिधानुसयो उपपज्जती”ति आदि वुत्तं, तस्मा “अनुसेन्तीति तं तं अनुरूपं कारणं लभित्वा उपपज्जन्ती”ति यं वुत्तं, तं सुवुत्तन्ति वेदितब्बं । कामरागानुसयोति कामरागो च सो अप्पहीनद्देन अनुसयो चाति कामरागानुसयो । सेसपदेसुपि एसेव नयो । अयं तावेत्थ अनुत्तानत्थो । अत्थविनिच्छयो पनेत्थापि निद्देसनयमुखदस्सनवसेनेव होति, निद्देसो चेत्थ हेद्वा वुत्तो ।

उपपत्तिद्वानवारादयो अद्द वारा च, तत्रायं पाळिववत्थानानुपुब्बिकामुखमत्तप्पकासना । तेसं हि पठमो अनुसयानं उपपत्तिद्वानवारो नाम । तत्थ वारभेदो यमकयोजनवारे नत्थि, इतरेसु पन सत्तसु महावारेसु अत्थि । तेसु हि पठमो अनुसयवारो अनुलोमपटिलोमनयवसेन दुविधो होति । तत्थ अनुलोमनये “यस्स यत्थ...पे०... अनुसेती”ति पुगलोकासतदुभयनामवसेन तयो अन्तरवारा होन्ति, तेसु एकेकस्मिं एकमूलकद्विमूलकमित्तमूलकचतुमूलकपञ्चमूलकछमूलकानं वसेन यमकभेदा होन्ति । यथा च अनुलोमनये, एवं पटिलोमनयेपि वेदितब्बा । यथा चेत्थ अनुसयवारे, एवं सानुसयवारपजहनवारपरिज्जावारपहीनवारउपपज्जनवारेसु पञ्चसुपि । अयं पनेत्थ पुरिमेसु तीसु वारेसु विसेसो । ओकासवारे “यत्थ तत्था”ति अवत्त्वा “यतो ततो”ति निस्सक्कवचनेन देसना कता । सेसं तादिसमेव । यो पनायं सब्बपच्छिमो धातुवारो नाम, सो पुच्छावारो विस्सज्जनवारोति द्विधा ठितो । तत्थ पुच्छावारो अनुलोमपटिलोमवसेन दुविधो । तस्सावसाने पुच्छानुक्कमेन विस्सज्जनं कतन्ति । एवं तावेत्थ पाळिववत्थानं वेदितब्बं ।

तत्रिदं अद्दन्नं वारानं आदितो पढाय मुखमत्तदस्सनं । “कत्थ कामरागानुसयो अनुसेति? कामधातुया द्वीसु वेदनासु एत्थ कामरागानुसयो अनुसेति । कत्थ पटिधानुसयो अनुसेति? दुक्खाय वेदनाय...पे०... मानानुसयो कामधातुया द्वीसु वेदनासु रूपधातुया अरूपधातुया च अनुसेति । दिट्ठानुसयो, विचिकिच्छानुसयो च सब्बसक्कायपरियापन्नेसु धम्मेषु, भवरागानुसयो रूपारूपधातूसु, अविज्जानुसयो सब्बसक्कायपरियापन्नेसु धम्मेषु अनुसेती”ति अयं ताव पठमवारे पाळिनयो ।

तत्थ कामधातुया द्वीसु वेदनासूति कामावचरभूमियं सुखाय चैव उपेक्खाय चाति द्वीसु वेदनासु, कामरागानुसयो पन सहजातवसेन, आरम्मणवसेन चाति द्वीहाकारेहि अनुसेति उपपज्जति, तत्थ अकुसलाहि सुखउपेक्खाहि सहजातोपि हुत्वा ता आरम्मणं कत्वापि उपपज्जति । अवसेसा पन कामावचरकुसलविपाककिरियवेदना आरम्मणमेव कत्वा उपपज्जति, इमासु वेदनासु अनुसयमानो चेस ताहि वेदनाहि सम्पयुत्तेसु सज्जासङ्खारविज्जाणेषुपि अनुसेतियेव । इमासं पन वेदनानं अस्सादद्देन कामरागानुसयुत्तिया सेससम्पयुत्तेहि पधानत्ता, ओळारिकत्तेन वेनेय्यानं सुबोधत्ता च द्वीसु वेदनासुयेव अनुसेतीति वुत्तं, एवं उपरिपि । न केवलञ्चेस अनुसयमानो इमासु द्वीसु वेदनासुयेव, वेदनासम्पयुत्तेसु धम्मेषु च अनुसेति, इद्देसु पन रूपादीसुपि अनुसेति एव । वुत्तम्पि चेतं विभङ्गप्पकरणे “यं लोके पियरूपं सातरूपं, एत्थ सत्तानं कामरागानुसयो अनुसेती”ति (विभ० ८१६), एत्थानुसययमकेपि वुत्तं “दुक्खाय वेदनाय रूपधातुया एत्थ कामरागानुसयो नानुसेती”ति आदि । एतेन वुत्तावसेसरूपादीसु छसुपि आरम्मणेषु अनुसेतीति वुत्तं होति । इध पन तं सब्बं अवत्त्वा किञ्चिदेव पधानत्तादिना कारणेन वुत्तन्ति गहेतब्बं ।

दुक्खायाति एत्थ पटिघचित्तसम्पयुत्ता द्वे दोमनस्सवेदना, कायविज्जाणसम्पयुत्ता दुक्खवेदना चाति तिस्सो वेदना, तं सम्पयुत्ता च धम्मा, अनिद्वा छ रूपादयो धम्मा पटिधानुसयसहजातवसेन, आरम्मणवसेन च यथारहं अनुसयनद्धानं । किं पन इतरा द्वे वेदना इद्धारम्मणं वा पटिघस्स आरम्मणं न होन्तीति? नो न होन्ति । परिहीनज्झानस्स हि नद्दं इद्दं ससम्पयुत्तधम्मं ज्ञानमारब्ध दोमनस्सं उपपज्जति, तं पन आरम्मणमत्तमेव, नानुसयनद्धानं इद्दत्ता । अनिद्दमेव हि इद्दतो पटिहनननिमित्तं, यं पन तत्थुप्पन्नं, तस्स पटिघमत्तमेव होति, न पटिधानुसयोति । पटिधानुसयो हि अनिद्धारम्मणे पटिहननवसेन उपपन्नो थामगतो किलेसो, इतरो दोमनस्सेन सद्दि उपपन्नोपि अत्तनो पटिहननकिच्चस्स अकरणतो पटिधानुसयो न होति, अब्बोहारिकत्तं गच्छति । यथा हि पाणातिपातचेतनाय सद्दि उपपन्नोपि ब्यापादो मनोकम्मं नाम न होति, अब्बोहारिकत्तं गच्छति, एवन्ति गहेतब्बं । तेनेव नेक्खम्मस्सितं दोमनस्सं सेवितब्बं वुत्तं । मानानुसयस्स पन दुक्खदोमनस्सवज्जिता सब्बे लोकिया धम्मा अनुसयनद्धानं । “दुक्खाय वेदनाय अपरियापन्ने एत्थ...पे०... मानानुसयो च नानुसेती”ति हि वुत्तं । दिट्ठानुसयविचिकिच्छानुसयानं पन लोकोत्तरवज्जिता सब्बेपि धम्मा अनुसयनद्धानं । तेन वुत्तं “सब्बसक्कायपरियापन्नेसु धम्मेषु”ति । तत्थ संसारवट्टनिस्सितद्देन सक्कायपरियापन्नेसु सब्बधम्मेषूति अत्थो । एवं अविज्जानुसयोपि वेदितब्बो । सब्बत्थ च सहजातारम्मणभेदो हेद्वा वुत्तनयेनेव वेदितब्बो ।

भवरागानुसयो पन किञ्चापि दिट्ठिविषयुत्तेसु चतूसु चित्तेसु उपपज्जनतो सहजातवसेन कामधातुया द्वीसु वेदनासु अनुसेतीति वत्तब्बो भवेय्य, सो पन

यस्मा रूपारूपावचरमेवारम्भणं लभति, न कामावचरारम्भणमेव, अनुसयानं पन तं न अनुसयनद्वानं, तस्मा आरम्भणवसेन नियमं अकत्वा  
“रूपधातुया अरूपधातुया एत्थ भवरागानुसयो अनुसेती”ति वुत्तं। तं रागवसेन सो च सब्बोपि रागो कामरागानुसयो गहेतब्बोति अयं उप्पत्तिद्वानवारे नयो।

इतरेसु पन सत्तसु महावारेसु ताव “यस्स कामरागानुसयो अनुसेति, तस्स पटिधानुसयो अनुसेतीति? आमन्ता। यस्स वा पन पटिधानुसयो अनुसेति, तस्स कामरागानुसयो अनुसेतीति? आमन्ता। यस्स कामरागानुसयो अनुसेति, तस्स मानानुसयो अनुसेतीति? आमन्ता। यस्स वा पन मानानुसयो अनुसेति, तस्स कामरागानुसयो अनुसेतीति? अनागामिस्स मानानुसयो अनुसेति, नो च तस्स कामरागानुसयो अनुसेति, तिण्णं पुगलानं मानानुसयो च अनुसेति, कामरागानुसयो च अनुसेति। यस्स कामरागानुसयो अनुसेति, तस्स दिट्ठानुसयो अनुसेतीति? द्विन्नं पुगलानं कामरागानुसयो अनुसेति, नो च...पे०... दिट्ठानुसयो च अनुसेति, यस्स वा पन...पे०... आमन्ता। यस्स कामरागानुसयो अनुसेति, तस्स विचिकिच्छानुसयो अनुसेती”ति पुच्छायपि दिट्ठानुसयसदिसमेव विस्सज्जनं। यस्स कामरागानुसयो अनुसेति, तस्स भवरागानुसयो अनुसेतीति? आमन्ता। यस्स वा पन...पे०... अनुसेतीति...पे०... तिण्णं पुगलानं भवरागानुसयो च अनुसेति, कामरागानुसयो च अनुसेति। अविज्जानुसयोपि एसेव नयो। इमिना नयेन पटिधानुसयादिमूलिकासु पुच्छासु विस्सज्जननयो वेदितब्बो। अयं एकमूलके नयो।

यस्स कामरागानुसयो च पटिधानुसयो च अनुसेति, तस्स मानानुसयो अनुसेतीति? आमन्ता। द्विन्नं द्विमूलिका...पे०... पञ्चमूलिकानं पन एकमूले वुत्तानुसारेन विस्सज्जननयो जातब्बो। तत्रायं पच्छिमानुसये योजना — “यस्स कामरागानुसयो च पटिधानुसयो च मानानुसयो च दिट्ठानुसयो च विचिकिच्छानुसयो च भवरागानुसयो च अनुसेति, तस्स अविज्जानुसयो अनुसेतीति? आमन्ता। यस्स वा पन अविज्जानुसयो अनुसेति, तस्स कामरागानुसयो च...पे०... भवरागानुसयो च अनुसेतीति? अनागामिस्स अविज्जानुसयो च मानानुसयो च भवरागानुसयो च अनुसेति, न इतरे, द्विन्नं पुगलानं अविज्जानुसयो च कामरागपटिघमानभवरागानुसया च अनुसेन्ति, न दिट्ठिविचिकिच्छानुसया, पुथुज्जनस्स पन सब्बेपि अनुसेन्ती”ति अयं पुगलवारे नयो।

ओकासवारे पन “यत्थ कामरागानुसयो अनुसेति, तत्थ पटिधानुसयो अनुसेतीति? नो। यत्थ वा पन...पे०... अनुसेतीति? नो। यत्थ कामरागानुसयो अनुसेति, तत्थ मानानुसयो अनुसेतीति? आमन्ता। यत्थ वा पन मानानुसयो अनुसेति, तत्थ कामरागानुसयो अनुसेतीति? रूपधातुया अरूपधातुया एत्थ मानानुसयो अनुसेति, न कामरागानुसयो, कामधातुया द्वीसु वेदनासु तदुभयं अनुसेति। यत्थ कामरागानुसयो...पे०... अनुसेतीति? आमन्ता। यत्थ वा पन...पे०... अनुसेतीति? दुक्खाय वेदनाय रूपधातुया अरूपधातुया एत्थ विचिकिच्छानुसयो अनुसेति, न कामरागानुसयो, कामधातुया द्वीसु वेदनासु तदुभयं अनुसेति। यत्थ कामरागानुसयो...पे०... अनुसेति, तत्थ भवरागानुसयो अनुसेतीति? नो। यत्थ वा पन...पे०... नो। यत्थ कामरागानुसयो अनुसेति, तत्थ अविज्जानुसयो अनुसेतीति? आमन्ता। यत्थ वा पन...पे०... अनुसेतीति? दुक्खाय वेदनाय रूपारूपधातुया एत्थ अविज्जानुसयो अनुसेति, न कामरागानुसयो, कामधातुया द्वीसु वेदनासु तदुभयं अनुसेति।

यत्थ पटिधानुसयो अनुसेति, तत्थ मानानुसयो अनुसेतीति? नो। यत्थ वा पन...पे०... नो। यत्थ पटिधानुसयो अनुसेति, तत्थ दिट्ठानुसयो विचिकिच्छानुसयो अनुसेतीति? आमन्ता। यत्थ वा पन...पे०... अनुसेतीति? कामधातुया द्वीसु वेदनासु रूपारूपधातुया एत्थ विचिकिच्छानुसयो अनुसेति, न पटिधानुसयो, दुक्खाय पन वेदनाय तदुभयं अनुसेति। यत्थ पटिधानुसयो अनुसेति, तत्थ भवरागानुसयो अनुसेतीति? नो। यत्थ वा पन...पे०... नो। यत्थ पटिधानुसयो अनुसेति, तत्थ अविज्जानुसयो अनुसेतीति? आमन्ता। यत्थ वा पन...पे०... अनुसेतीति...पे०... दुक्खाय वेदनाय तदुभयं अनुसेति, अज्जत्थ अविज्जानुसयो च।

यत्थ मानानुसयो अनुसेति, तत्थ दिट्ठानुसयो विचिकिच्छानुसयो अनुसेतीति? आमन्ता। यत्थ वा पन...पे०... अनुसेतीति? दुक्खाय वेदनाय दिट्ठानुसयोव, नेतरो, तदज्जेसु सब्बत्थ अनुसेति। यत्थ मानानुसयो अनुसेति, तत्थ भवरागानुसयो अनुसेतीति? कामधातुया द्वीसु वेदनासु मानानुसयो, नेतरो, रूपारूपधातुया पन तदुभयं अनुसेति। यत्थ वा पन...पे०... आमन्ता। यत्थ मानानुसयो अनुसेति, तत्थ अविज्जानुसयो...पे०... आमन्ता। यत्थ वा पन...पे०... अनुसेतीति? दुक्खवेदनं ठपेत्वा तदज्जासु सब्बत्थ तदुभयं अनुसेति। यत्थ दिट्ठानुसयो, तत्थ विचिकिच्छानुसयो...पे०... आमन्ता। यत्थ दिट्ठानुसयो, तत्थ भवरागानुसयो अनुसेतीति? कामधातुया तीसु वेदनासु दिट्ठानुसयोव, रूपारूपभवेसु तदुभयं अनुसेति। यत्थ वा पन...पे०... आमन्ता। यत्थ दिट्ठानुसयो अनुसेति, तत्थ अविज्जानुसयो...पे०... आमन्ता। यत्थ वा पन...पे०... आमन्ता। एस नयो विचिकिच्छामूलकेसुपि। यत्थ भवरागानुसयो, तत्थ अविज्जानुसयो अनुसेतीति? आमन्ता। यत्थ वा पन...पे०... अनुसेति, तत्थ कामधातुया तीसु वेदनासु अविज्जानुसयोव, रूपारूपभवेसु पन तदुभयं अनुसेती”ति अयमेत्थ एकमूलनयो।

“यस्स...पे०... नानुसेति। यस्स...पे०... नानुसेति मानानुसयो, अरहतो पन तदुभयम्पि नानुसेति। यस्स वा पन...पे०... आमन्ता। यस्स कामरागानुसयो नानुसेति, तस्स दिट्ठानुसयो विचिकिच्छानुसयो नानुसेतीति? आमन्ता। यस्स वा पन...पे०... नानुसेतीति? द्विन्नं पुगलानं विचिकिच्छानुसयोव नानुसेति, नेतरो, अनागामिअरहन्तानं तदुभयम्पि नानुसेती”तिआदिना नयेन पुगलवारे,

“यत्थ कामरागानुसयो नानुसेति, तत्थ पटिधानुसयो नानुसेतीति? दुक्खाय वेदनाय कामरागानुसयोव नानुसेति, नेतरो, रूपारूपधातुपरियापन्नेसु

तदुभयं नानुसेति । यत्थ वा पन...पे०... नानुसेतीति? कामधातुया द्वीसु वेदनासु पटिधानुसयोव, रूपारूपपरियापन्नेसु पन तदुभयं नानुसेति । यत्थ कामरागानुसयो नानुसेति, तत्थ मानानुसयो नानुसेतीति? रूपारूपधातूसु कामरागानुसयोव, दुक्खाय पन वेदनाय, अपरियापन्नेसु च तदुभयं नानुसेति । यत्थ वा पन...पे०... आमन्ता । यत्थ कामरागानुसयो नानुसेति, तत्थ दिट्ठानुसयो, विचिकिच्छानुसयो नानुसेतीति? दुक्खाय वेदनाय रूपारूपधातूसु कामरागानुसयोव, अपरियापन्ने पन तदुभयं नानुसेतीति”तिआदिना नयेन ओकासवारे च,

“यस्स यत्थ कामरागानुसयो नानुसेति, तस्स तत्थ पटिधानुसयो नानुसेतीति? तिण्णं पुग्गलानं दुक्खाय वेदनाय कामरागानुसयोव, रूपारूपपरियापन्नेसु तदुभयं नानुसेति, द्विन्नं पुग्गलानं सब्बत्थ तदुभयं नानुसेति । यस्स वा पन यत्थ...पे०... नानुसेतीति? तिण्णं पुग्गलानं कामधातुया द्वीसु वेदनासु पटिधानुसयोव, रूपारूपपरियापन्नेसु तदुभयं नानुसेति, द्विन्नं पुग्गलानं सब्बत्थ तदुभयं नानुसेति । यस्स यत्थ कामरागानुसयो नानुसेति, तस्स तत्थ मानानुसयो नानुसेतीति? तिण्णं पुग्गलानं रूपारूपधातुया कामरागानुसयोव, नेतरो, दुक्खाय वेदनाय, अपरियापन्ने च तदुभयं नानुसेति, अनागामिस्स कामधातुया द्वीसु वेदनासु रूपारूपधातुया कामरागानुसयोव, अरहतो पन सब्बत्थ तदुभयं नानुसेतीति”तिआदिना पुग्गलोकासवारे च वुत्तानुसारेन नयो जातब्बोति अयं पाळिनयो ।

तत्थ “यस्स कामरागानुसयो अनुसेति, तस्स पटिधानुसयो अनुसेतीति”ति एत्थ यदेतं “आमन्ता”ति पटिवचनं दिन्नं, तं दुद्धिन्नं विय खायति । कस्मा? कामरागपटिधानं एकक्खणे अनुपत्तितो । यथा हि “यस्स मनायतनं उप्पज्जति, तस्स धम्मायतनं उप्पज्जती”तिआदीसु मनायतनधम्मायतनादीनि एकक्खणे उप्पज्जन्ति, न तथा कामरागपटिधा, विसुज्जेव उप्पज्जनतो, तस्मा एत्थ “नो”ति पटिसेधो कत्तब्बो सिया, तं पन अक्त्वा “आमन्ता”ति पटिवचनस्स दिन्नत्ता हेट्ठा यमकेसु विय एत्थ खणपच्चुप्पन्नवसेन वत्तमानवोहारं अग्गहेत्वा अज्जथा गहेतब्बो । कथं गहेतब्बो? अप्पहीनवसेन । अप्पहीनत्तं हि सन्धाय अयं अनुसेतीति वत्तमानवोहारो वुत्तो, न खणपच्चुप्पन्नत्तं, तस्मा इमिस्सा पुच्छाय यस्स कामरागानुसयो अप्पहीनो, न अनुपत्तिधम्मत्तं आपादितो, तस्स पटिधानुसयो अप्पहीनो, न अनुपत्तिधम्मत्तं आपादितो, तस्स पटिधानुसयो अप्पहीनोति एवमत्थो गहेतब्बो । यस्मा च तेसु कामरागपटिधेसु यस्सेको अप्पहीनो, तस्स इतरोपि अप्पहीनोव होति, तस्मा “आमन्ता”ति वुत्तं । इतो परेसुपि एवरूपेसु उप्पज्जतिवारादिविस्सज्जनेसु एसेव नयो । **तिण्णं पुग्गलानं**ति पृथुज्जनसोतापन्नसकदागामीनं । द्विन्नंति सोतापन्नसकदागामीनं । एवं उप्पज्जनं दीपितं । ओकासवारस्स पठमदुतियपुच्छासु यस्मा कामरागपटिधा एकचित्ते न उप्पज्जन्ति, तस्मा “नो”ति पटिसेधो कतो । दुक्कमूलादीसु च यस्मा कामरागपटिधादयो एकस्मिं ठानसङ्घाते चित्ते, आरम्भणे वा न उप्पज्जन्ति, तस्मा “नत्थी”ति तत्थ पटिक्खेपो कतो, अयं पुच्छा अपुब्बा एवाति अधिप्पायो । पुग्गलोकासवारे **चतुन्नंति** पृथुज्जनसोतापन्नसकदागामिअनागामीनं । पटिलोमे **द्विन्नंति** अनागामिअरहन्ते सन्धाय वुत्तन्ति अयं अनुसयवारे नयो ।

सानुसयवारे पन “यो कामरागानुसयेन सानुसयो, सो पटिधानुसयेन सानुसयोति? आमन्ता...पे०... मानानुसयेन सानुसयोति? आमन्ता । यो वा पन मानानुसयेन सानुसयो, सो कामरागानुसयेन सानुसयोति? अनागामी मानानुसयेनेव, न कामरागानुसयेन, तयो पन पुग्गला तदुभयेनापि अनुसयेना”ति इमिना नयेन सेसेसु दुक्कमूलादीसु पुच्छाविस्सज्जननयो जातब्बो, अयं पुग्गलवारे नयो ।

“यतो कामरागानुसयेन सानुसयो, ततो पटिधानुसयेन सानुसयोति? नो...पे०... मानानुसयेन सानुसयोति? आमन्ता । यतो वा पन मानानुसयेन सानुसयो, ततो कामरागानुसयेन सानुसयोति? रूपारूपधातुया मानानुसयेनेव, नेतरेन, कामधातुया द्वीसु वेदनासु तदुभयेनापी”तिआदिना ओकासवारे च,

“यो यतो कामरागानुसयेन सानुसयो, सो ततो पटिधानुसयेन सानुसयोति? नो”तिआदिना पुग्गलोकासवारे चाति एवं अनुलोमनये च, “यो कामरागानुसयेन निरनुसयो, सो पटिधानुसयेन निरनुसयोति? आमन्ता”तिआदिना पटिलोमनयेपि सब्बत्थ अनुसयवारे वुत्तानुसारतो पुच्छाविस्सज्जननयो जातब्बो ।

तत्थ **यतो कामरागानुसयेन सानुसयोति** यतो कारणतो उप्पन्नेन कामरागानुसयेन सानुसयो, किं सो ततो कारणतो उप्पन्नपटिधानुसयेनपि सानुसयोति वुच्चति । यस्मा पनेते द्वे एकस्मा ठाना न उप्पज्जन्ति, तस्मा “नो”ति पटिसेधो कतो सेसं तादिसमेवाति अयं सानुसयवारे नयो ।

पजहनवारे पन “यो कामरागानुसयं पजहति, सो पटिधानुसयं पजहतीति? आमन्ता...पे०... मानानुसयं पजहतीति? तदेकद्वं पजहति । यो वा पन मानानुसयं पजहति, सो कामरागानुसयं पजहतीति? नो...पे०... सो दिट्ठानुसयं विचिकिच्छानुसयं पजहतीति? नो । यो वा पन विचिकिच्छानुसयं पजहति, सो कामरागानुसयं पजहतीति? तदेकद्वं पजहति । यो...पे०... भवरागानुसयं अविज्जानुसयं पजहतीति? तदेकद्वं पजहति...पे०... यो कामरागानुसयञ्च पटिधानुसयञ्च मानानुसयञ्च...पे०... पजहतीति? नत्थी”तिआदिना पुग्गलवारे,

“यतो कामरागानुसयं पजहति, ततो पटिधानुसयं पजहतीति? नो...पे०... यतो कामरागानुसयं पजहति, ततो मानानुसयं पजहतीति? आमन्ता । यतो वा पन मानानुसयं पजहति, ततो कामरागानुसयं पजहतीति? रूपारूपधातुया ततो मानानुसयमेव, कामधातुया पन द्वीसु वेदनासु ततो मानानुसयं पजहतीति”तिआदिना ओकासवारे च,

“यो यतो कामरागानुसयं पजहति, सो ततो पटिधानुसयं पजहतीति? नो...पे०... मानानुसयं पजहतीति? तदेकद्वं पजहति...पे०... विचिकिच्छानुसयं पजहतीति? नो। यो वा पन यतो विचिकिच्छानुसयं पजहति, सो ततो कामरागानुसयं पजहतीति? अट्टमको दुक्खाय वेदनाय रूपारूपधातुया सो ततो विचिकिच्छानुसयं पजहति, नो च सो ततो कामरागानुसयं पजहति, स्वेव पुगलो कामधातुया द्वीसु वेदनासु सो ततो विचिकिच्छानुसयं पजहति, कामरागानुसयं तदेकद्वं पजहती”तिआदिना पुगलोकासवारे चाति एवं अनुलोमनये च, “यो कामरागानुसयं न पजहति, सो पटिधानुसयं न पजहतीति? आमन्ता...पे०... विचिकिच्छानुसयं न पजहतीति? अट्टमको कामरागानुसयं न पजहति, नेतरं, अनागामिमग्गसमङ्गि, अट्टमकञ्च ठपेत्वा अवसेसा पुगला तदुभयं न पजहन्ती”तिआदिना पटिलोमनये च सब्बत्थ पुच्छाविस्सज्जननयो जातब्बो।

तत्थ पजहतीति तेन तेन मग्गेन पहानपरिज्जावसेन पजहति। तदेकद्वन्ति पहानेकद्वतं सन्धाय वुत्तं। पठममग्गादिना हि न केवलं दिट्ठादिका एव धम्मा पहीयन्ति, अथ खो अपायगमनिया तेन कामरागपटिघमानादयोपि पहीयन्ति एव। पठममग्गवज्झा हि कामरागा, अपायगमनिया च मानाविज्जादयोपि, ततियमग्गवज्झाति पहानेकद्व हत्वा पहीयन्ति एवाति “नो”ति अरहत्तमग्गद्वं सन्धाय वुत्तं। सो हि कामरागानुसयंयेव पहीनत्ता न पजहतीति। **यतो कामरागानुसयं पजहतीति** यतो उप्पज्जनकं कामरागानुसयं पजहतीति अत्थो, **अट्टमको**ति सोतापत्तिमग्गद्वो। सो हि दक्खिण्येय्यक्कमेन अरहत्तफलद्वतो पट्ठाय गणियमानो अट्टमको नाम। पटिलोमनये **अनागामिमग्गसमङ्गिञ्च अट्टमकञ्च ठपेत्वा अवसेसा**ति पुथुज्जनसेससेखासेखा। तेसु हि पुथुज्जना पहानपरिज्जाय अभावेन न पजहन्ति, सेसा तेसं पहीनत्ताति इमिना नयेन सब्बत्थ विनिच्छयो वेदितब्बोति अयं पजहनवारे नयो।

परिज्जावारो पन “यो कामरागानुसयं परिजानाति, सो पटिधानुसयं परिजानाती”तिआदिना पजहनवारसदिसोव। अयम्पि हि पजहनवारो विय मग्गट्ठानञ्जेव वसेन विस्सज्जितो। तत्थ **परिजानातीति** तीहि परिज्जाहि परिजानातीति अत्थो। अयं परिज्जावारे नयो।

पहीनवारे पन “यस्स कामरागानुसयो पहीनो, तस्स पटिधानुसयो पहीनोति? आमन्ता...पे०... मानानुसयो पहीनोति? अनागामिस्स कामरागानुसयोव, अरहतो पन मानानुसयोपि पहीनो”तिआदिना पुगलवारे, “यत्थ कामरागानुसयो पहीनो, तत्थ पटिधानुसयो पहीनोति? न वत्तब्बो पहीनोति वा अप्पहीनोति वा। यत्थ वा पन...पे०... न वत्तब्बो...पे०... तत्थ मानानुसयो पहीनोति? आमन्ता। यत्थ वा पन...पे०... पहीनोति? रूपारूपधातुया एत्थ मानानुसयो पहीनो, कामरागानुसयो न वत्तब्बो, कामधातुया द्वीसु वेदनासु एत्थ तदुभयं पहीन”न्तिआदिना ओकासवारे, पुगलोकासवारेति एवं अनुलोमनये, “यस्स कामरागानुसयो अप्पहीनो, तस्स पटिधानुसयो अप्पहीनोति? आमन्ता। यस्स वा पन...पे०... आमन्ता...पे०... यस्स वा पन मानानुसयो अप्पहीनो, तस्स कामरागानुसयो अप्पहीनोति? अनागामिस्स मानानुसयोव, तिण्णं पुगलानं तदुभयं अप्पहीन”न्तिआदिना पटिलोमनये च वुत्तनयेनेव पुच्छाविस्सज्जननयो जातब्बो।

एत्थ च फलद्ववसेनेव अत्थो गहेतब्बो मग्गट्ठानं पहीनकिलेसत्ताभावा। तेसं हि अनुसया पहीयन्ति एव, न पन पहीनाति अनागामिआदयो फलद्वव गहेतब्बा, ओकासवारे पन “न वत्तब्बो”ति इदं उभिन्नं उप्पत्तिट्ठानस्स असाधारणत्ता वुत्तं। अज्जं हि कामरागानुसयस्स उप्पत्तिट्ठानं, अज्जं पटिधानुसयस्स। अभावितमग्गस्स च यत्थ अनुसयो उप्पज्जति, मग्गे भाविते तत्थेव सो पहीनो नाम होति, तस्मा सो तत्थ पहीनोति वा, अप्पहीनोति वा न वत्तब्बो, सब्बत्थापि पन सयं अभावेन तत्थ अप्पहीनोति न वत्तब्बो। उभिन्नं पन साधारणट्ठानं सन्धाय “आमन्ता”ति वुत्तं। मानानुसयो हि कामधातुया वेदनाद्वयसङ्काते साधारणट्ठाने कामरागेन सङ्खिं पहीनो नाम होति। **यस्स कामरागानुसयो अप्पहीनोति** पुथुज्जनस्स, सोतापत्तिसकदागामिफलट्ठानञ्च वसेन अत्थो गहेतब्बो। “तिण्णं पुगलान”न्ति हि वुत्तं। सेसं सुविज्जेय्यमेवाति अयं पहीनवारे नयो।

उप्पज्जनवारे पन “यस्स कामरागानुसयो उप्पज्जति, तस्स पटिधानुसयो उप्पज्जती”तिआदिना सब्बत्थ अनुसयवारसदिसोवाति अयं उप्पज्जनवारे नयो।

धातुवारे पन “कामधातुया चुतस्स कामधातुं उपपज्जन्तस्स कति अनुसया अनुसेन्ति, कति अनुसया नानुसेन्ति, कति अनुसया भङ्गा? कामधातुया चुतस्स रूपधातुं उपपज्जन्तस्स...पे०... कति भङ्गा? कामधातुया चुतस्स अरूपधातुं उपपज्जन्तस्स...पे०... रूपधातुं उपपज्जन्तस्स न अरूपधातुं उपपज्जन्तस्स...पे०... कति भङ्गं? कामधातुया चुतस्स न कामधातुं, न अरूपधातुं उपपज्जन्तस्स...पे०... न रूपधातुं न अरूपधातुं उपपज्जन्तस्स। न कामधातुं न रूपधातुं उपपज्जन्तस्स कति भङ्गा”ति एवं कामधातुमूलका नव पुच्छा, तथा “रूपधातुया चुतस्सा”तिआदिना रूपधातुमूलका नव, अरूपधातुया नव चाति सत्तवीसति अनुलोमपुच्छा, तथा “न कामधातुया चुतस्सा”तिआदिना सत्तवीसति पटिलोमपुच्छा च, तथा “न कामधातुया न अरूपधातुया चुतस्स कामधातुं उपपज्जन्तस्सा”तिआदिना सत्तवीसति दुक्कमूलका पुच्छा चाति एवं पुच्छावारे एकासीति पुच्छा वेदितब्बा।

तत्थ **अनुसेन्तीति** चित्तसन्ताने अनुगता हत्वा कति अनुसेन्ति, **भङ्गाति** अनुसेन्ति च नानुसेन्ति चाति एवं कति विभजितब्बाति अत्थो। **न कामधातुं उपपज्जन्तस्साति** कामधातुविरहिता द्वे रूपारूपधातुयो उपपज्जन्तस्स। **न कामधातुं न रूपधातुन्ति** अरूपधातुं उपपज्जन्तस्स। **न कामधातुयाति** रूपारूपधातूहि चुतस्स, एवं सेसेसुपि सब्बत्थ पटिसन्धिवसेन, धातुवसेन च अत्थो वेदितब्बोति अयं उद्देसवारे नयो।

निद्देसवारे पनस्स “कामधातुया चुतस्स कामधातुं उपपज्जन्तस्स कस्सचि सत्त अनुसया अनुसेन्ति, कस्सचि पञ्च अनुसया अनुसेन्ति, अनुसया भङ्गा

नत्थि, कामधातुया चतुस्स रूपधातुं उपपज्जन्तस्स कस्सचि सत्त अनुसया अनुसेन्ति, कस्सचि पञ्च, कस्सचि तयो ... पे० ... भङ्गा नत्थी”ति इमिना नयेन सब्बत्थ विस्सज्जनं वेदितब्बं, अयं पनेत्थ विसेसो — रूपधातुया चतुस्स कामधातुं उपपज्जन्तस्स सत्तेव अनुसया अनुसेन्ति, तथा “अरूपधातुया चतुस्स कामधातुं उपपज्जन्तस्सा”तिआदीसुपि, अरूपधातुया पन चतुस्स रूपधातुया उपपत्ति नत्थि, हेट्ठा उपपज्जमानो कामधातुं एव उपपज्जति, सत्तेव अनुसया अनुसेन्तीति एवं अज्जेसुपि एवरूपेसु विस्सज्जननयो वेदितब्बोति अयं विसेसो, सेसं वुत्तनयमेवाति अयमेत्थ पाळिनयो।

तत्थ **कस्सचि सत्ताति** पुथुज्जनवसेन वुत्तं, **पञ्चाति** सोतापन्नसकदागामीनं वसेन। तेसं हि दिट्ठिविचिकिच्छानुसया पहीनाति, कामधातुया पन अनागामीनं उपपत्तिअभावतो पठमवारे “कस्सचि तयो”ति न वुत्तं, रूपारूपधातूसु उपपज्जनवारेसु एव वुत्तं...पे०... अनागामीनं हि कामरागपटिधानम्पि पहीनत्ता तयोव अनुसया अनुसेन्ति, इध च अनुसयानं उपपत्तिवसेन नयो, अनुसयानं अनुसयनं अगहेत्वा अप्पहीनभावेन पटिसन्धिक्खणे अपि अनुसयनं गहेतब्बं। **सत्तेवाति** अरियसावकस्स रूपारूपधातुया चतुस्स हेट्ठा कामभवादीसु उपपत्ति नाम नत्थि, पुथुज्जनस्सेव होति, तस्मा “सत्तेवा”ति नियमेत्वा वुत्तं, अरूपधातुया चतुस्स रूपधातुया उपपत्ति नत्थीति। कस्मा नत्थि? अरूपीनं रूपज्ज्ञानस्स अभावा। ते हि सब्बसो रूपसज्ज्ञानं समतिक्कमनरूपधातुं उपपन्नाति। सेसं नयतो सुविज्जेय्यमेवाति अयं धातुवारे नयो। अयं अनुसययमकमातिकत्थसंवण्णनानयो।

### चित्तयमकमातिकत्थवण्णना

चित्तयमकमातिकायं पन पाळिववत्थानं ताव एवं वेदितब्बं। इमिस्सं हि मातिकायं पुग्गलवारो धम्मवारो पुग्गलधम्मवारोति आदितोव तयो सुद्धिकमहावारा होन्ति, तत्थ “यस्स चित्तं उपपज्जति न निरुज्झती”ति एवं पुग्गलवसेन चित्तस्स उपपज्जननिरुज्झनादिभेदं दीपेन्तो गतो **पुग्गलवारो** नाम। “यं चित्तं उपपज्जति न निरुज्झती”ति एवं धम्मवसेनेव चित्तस्स उपपज्जननिरुज्झनादिभेदं दीपेन्तो गतो **धम्मवारो** नाम। “यस्स यं चित्तं उपपज्जति न निरुज्झती”ति एवं उभयवसेनेव चित्तस्स उपपज्जननिरुज्झनादिभेदं दीपेन्तो गतो **पुग्गलधम्मवारो** नाम।

ततो “यस्स सरागं चित्तं”न्तिआदीनं सोळसन्नं पदानं वसेन अपरे सरागादिपदविसेसिता सोळस पुग्गलवारा, सोळस धम्मवारा, सोळस पुग्गलधम्मवाराति अट्टचत्तालीस मिस्सकवारा होन्ति, ते सरागादिपदमत्तं दस्सेत्वा संखित्ता। ततो “यस्स कुसलं चित्तं”न्तिआदिना नयेन छसट्ठिद्विसत्तसङ्घातानं अभिधम्ममातिकापदानं वसेन अपरे कुसलादिपदविसेसिता छसट्ठिद्विसत्तपुग्गलवारा, छसट्ठिद्विसत्तधम्मवारा, छसट्ठिद्विसत्तपुग्गलधम्मवाराति अट्टनवुतिसत्तसत्ता मिस्सकवारा होन्ति, तेषि कुसलादिपदमत्तं दस्सेत्वा संखित्तायेव, यानिपेत्थ सनिदस्सनादीनि पदानि चित्तेन सद्धि न युज्जन्ति, तानि मोघपुच्छावसेन गहितानीति।

तेसु पन तीसु वारेसु सब्बपठमे सुद्धिकपुग्गलमहावारे ताव उप्पादनिरोधकालसम्भेदवारो उप्पादुप्पन्नवारो निरोधुप्पन्नवारो उप्पादवारो निरोधवारो उप्पादनिरोधवारो उप्पज्जमाननिरोधवारो उप्पज्जमानुप्पन्नवारो निरुज्झमानुप्पन्नवारो उप्पन्नुप्पादवारो अतीतानागतवारो उप्पन्नुप्पज्जमानवारो निरुद्धनिरुज्झमानवारो अतिक्कन्तकालवारो चाति चुदस अन्तरवारा, तेसु उप्पादवारो निरोधवारो उप्पादनिरोधवारोति इमेसु तीसु वारेसु पच्चेकं वत्तमानातीतस्स, वत्तमानानागतस्स, अतीतानागतस्स चाति तिण्णं कालभेदानं वसेन अनुलोमपटिलोमतो छ छ कत्वा अट्ठारस यमकानि, उप्पन्नुप्पादवारो अतीतानागतकालवसेन अनुलोमतो द्वे, पटिलोमतो द्वेति चत्तारि यमकानि, सेसेसु आदितो निद्धिट्ठेसु तीसु, अन्तरे निद्धिट्ठेसु तीसु, अवसाने निद्धिट्ठेसु चतूसूति दससु वारेसु अनुलोमतो एकं, पटिलोमतो एकन्ति द्वे द्वे कत्वा वीसति यमकानि, एवं सब्बेसुपि चुदससु अन्तरवारेसु द्वाचत्तालीस यमकानि, चतुरासीति पुच्छा, अट्ठसट्ठिअत्थसत्तं होति। यथा च एकस्मिं सुद्धिकपुग्गलमहावारे, तथा सुद्धिकधम्ममहावारे, सुद्धिकपुग्गलधम्ममहावारेपीति तीसु महावारेसु छब्बीसति यमकसत्तं, ततो दिग्गुणा पुच्छा, दिग्गुणा अत्था च वेदितब्बा, इदं पन वारत्तयं सरागादिवसेन सोळसगुणं, कुसलादिवसेन छसट्ठिद्विसत्तगुणं कत्वा इमिस्सा चित्तयमकमातिकाय अनेकानि यमकसहस्सानि, तद्दिग्गुणा पुच्छा, तद्दिग्गुणा अत्था च होन्ति, पाठो पन संखित्तो। एवमेत्थ पाळिववत्थानं विदित्वा इदानि अनुत्तानपदत्थानुसारेण विभङ्गनयसहितो सङ्केपत्थवण्णनानयो एवं वेदितब्बो।

**यस्स चित्तं उपपज्जतीति** यस्स पुग्गलस्स चित्तं उप्पादक्खणसमङ्गिताय उपपज्जति। **न निरुज्झतीति** निरोधक्खणं अप्पत्तताय न निरुज्झति। **तस्स चित्तन्ति** किं तस्स पुग्गलस्स ततो पट्टाय चित्तं निरुज्झिस्सतीति पुच्छा, तस्सा च, “पच्छिमचित्तस्स उप्पादक्खणे तेसं चित्तं उपपज्जति न निरुज्झति, निरुज्झिस्सति नुप्पज्जिस्सति, इतरेसं चित्तस्स उप्पादक्खणे तेसं चित्तं उपपज्जति न निरुज्झति, निरुज्झिस्सति चेव उपपज्जिस्सति चा”ति विस्सज्जनं। तत्थ **तेसं चित्तन्ति** येसं खीणासवानं पच्छिमचित्तसङ्घातस्स चुतिचित्तस्स उप्पादक्खणे वत्तति, तेसं तदेव चुतिचित्तं उप्पादप्पत्तताय उपपज्जति नाम, भङ्गं अप्पत्तताय न निरुज्झति नाम, इदानि पन भङ्गं पत्त्वा तं तेसं चित्तं निरुज्झिस्सति, ततो अप्पटिसन्धिकत्ता अज्जं नुप्पज्जिस्सति। **इतरेसन्ति** पच्छिमचित्तसमङ्गिं खीणासवं ठपेत्वा अवसेसानं सेखासेखपुथुज्जनानं निरुज्झिस्सति चेव अज्जं पन तस्मिं वा अत्तभावे उपपज्जिस्सति चाति अत्थो।

“यस्स वा पन चित्तं निरुज्झिस्सति नुप्पज्जिस्सति, तस्स चित्तं उपपज्जति न निरुज्झती”ति इमिस्सा दुतियपुच्छाय पच्छिमचित्तसमङ्गिनो खीणासवस्स चित्तं सन्धाय “आमन्ता”ति विस्सज्जनं। “यस्स चित्तं नुप्पज्जति निरुज्झति, तस्स चित्तं न निरुज्झिस्सति उपपज्जिस्सती”ति पुच्छाय “नो”ति पटिसेधोव विस्सज्जनं। न उपपज्जति निरुज्झतीति हि भङ्गक्खणे अरहतो पच्छिमचित्तम्पि सेसानं भिज्जमानचित्तम्पि पुच्छति, ततो पट्टाय पन अरहतो ताव चित्तं न निरुज्झिस्सतीति सक्का वत्तुं, उपपज्जिस्सतीति पन न सक्का, तस्मा “नो”ति एत्थ पटिसेधो कतो, “यस्स वा पन चित्तं न निरुज्झिस्सति उपपज्जिस्सति,



यस्स चित्तं उप्पज्जित्थ नो च तस्स चित्तं उप्पन्नं, तस्स चित्तं उप्पज्जिस्सतीति? आमन्ता । यस्स वा पन चित्तं उप्पज्जिस्सति नो च तस्स चित्तं उप्पन्नं, तस्स चित्तं उप्पज्जित्थाति? आमन्ता । एत्थ “नो च तस्स चित्तं नुप्पन्नं”न्ति इदं असज्जादिअचित्तके सन्धाय वुत्तं । तेसं नियमेन चित्तुप्पत्तिया अभावतो “आमन्ता”ति उभयत्थ विस्सज्जनं वुत्तं । अयञ्च वारो कालत्तये गहेत्वा समत्थितोति गहेतब्बो ।

“यस्स चित्तं नुप्पज्जित्थ नो च तस्स चित्तं नुप्पन्नं, तस्स चित्तं नुप्पज्जिस्सतीति? नत्थि । यस्स वा पन चित्तं नुप्पज्जिस्सति नो च तस्स चित्तं नुप्पन्नं, तस्स चित्तं नुप्पज्जित्थाति? उप्पज्जित्थ ।

उप्पन्नं उप्पज्जमानन्ति? उप्पादक्खणे चित्तं तथा । उप्पज्जमानं उप्पन्नन्ति? आमन्ता । नुप्पन्नं नुप्पज्जमानन्ति? आमन्ता । नुप्पज्जमानं नुप्पन्नन्ति? अतीतानागतचित्तं तथा ।

निरुद्धं निरुज्जमानन्ति? नो, निरुज्जमानं निरुद्धन्ति? नो, ननिरुद्धं ननिरुज्जमानन्ति? उप्पादक्खणे अनागतञ्च चित्तं तथा । ननिरुज्जमानं ननिरुद्धन्तिपि तथेव ।

यस्स चित्तं उप्पज्जमानं खणं खणं वीतिक्कन्तं अतिक्कन्तकालं, निरुज्जमानं खणं खणं वीतिक्कन्तं अतिक्कन्तकालं, तस्स चित्तन्ति? नो च भङ्गक्खणं वीतिक्कन्तं, अतीतं चित्तं तदुभयं वीतिक्कन्तं, यस्स वा पन चित्तं निरुज्जमानं खणं खणं वीतिक्कन्तं अतिक्कन्तकालं, उप्पज्जमानं खणं खणं वीतिक्कन्तं अतिक्कन्तकालं, तस्स चित्तन्ति? अतीतं चित्तं”न्ति इमिना नयेन पुग्गलवारे सब्बत्थ विस्सज्जननयो वेदितब्बो ।

तत्थ **उप्पज्जमानं खणन्ति** उप्पज्जमानस्स खणं, उप्पादक्खणन्ति अत्थो । **खणं वीतिक्कन्तं अतिक्कन्तकालन्ति** न चिरं वीतिक्कन्तं, तमेव पन उप्पादक्खणं वीतिक्कन्तं हुत्वा अतिक्कन्तकालन्ति सङ्गं गच्छति, **निरुज्जमानं खणन्ति** निरुज्जमानस्स खणं, भङ्गक्खणन्ति अत्थो । **खणं वीतिक्कन्तं अतिक्कन्तकालन्ति** किं तस्स चित्तं एवं निरोधक्खणम्पि वीतिक्कन्तं हुत्वा अतिक्कन्तकालं नाम होतीति पुच्छति । यस्स भङ्गक्खणे चित्तं उप्पादक्खणं खणं वीतिक्कन्तं हुत्वा अतिक्कन्तकालं नाम होती, निरोधक्खणं वीतिक्कन्तं हुत्वा अतिक्कन्तकालं नाम होती, अतीतं पन चित्तं उभोपि खणे खणं वीतिक्कन्तं हुत्वा अतिक्कन्तकालं नाम होतीति अतीतचित्तवसेन विस्सज्जनं कतं । इमिनाव उपायेन उपरिमेसु अत्थधम्मवारादीसु च सब्बविस्सज्जनेसु अत्थो वेदितब्बो । अयं अतिक्कन्तकालवारे नयो ।

यं चित्तं उप्पज्जति ननिरुज्जति, तं चित्तं निरुज्जिस्सति नुप्पज्जिस्सतीति? आमन्ता । यं वा पन...पे०... आमन्ता । यं चित्तं नुप्पज्जति निरुज्जति, तं चित्तं ननिरुज्जिस्सति उप्पज्जिस्सतीति? नो । यं वा पन चित्तं ननिरुज्जिस्सति उप्पज्जिस्सति, तं चित्तं नुप्पज्जति निरुज्जतीति? नत्थि ।

यं चित्तं उप्पज्जति, तं चित्तं उप्पन्नन्ति? आमन्ता । यं वा पन...पे०... उप्पज्जतीति? उप्पादक्खणे चित्तं तथा, एवं पटिलोमपुच्छासुपि ततो सेसासुपि । “यं चित्तं नुप्पज्जति, तं चित्तं नुप्पन्नन्ति? अतीतानागतं चित्तं तथा । यं वा पन...पे०... आमन्ता...पे०... भङ्गक्खणे चित्तं”न्तिआदिना, “यं चित्तं उप्पज्जति, तं चित्तं उप्पज्जित्थाति? नो । यं चित्तं नुप्पज्जति, तं चित्तं नुप्पज्जित्थाति? भङ्गक्खणे चित्तं अनागतञ्चा”तिआदिना, “यं चित्तं उप्पज्जति, तं चित्तं उप्पज्जिस्सतीति? नो । यं वा पन...पे०... नो, यं चित्तं नुप्पज्जति, तं चित्तं नुप्पज्जिस्सतीति? अनागतं चित्तं नुप्पज्जति, नो च तं चित्तं नुप्पज्जिस्सति, भङ्गक्खणे चित्तं अतीतं चित्तं”न्तिआदिना च, “यं चित्तं उप्पज्जित्थ, तं चित्तं उप्पज्जिस्सतीति? नो । यं वा पन...पे०... नो, यं चित्तं नुप्पज्जित्थ, तं चित्तं नुप्पज्जिस्सतीति? अनागतं चित्तं”न्तिआदिना च,

“यं चित्तं निरुज्जति, तं चित्तं निरुज्जित्थाति? नो”तिआदिना च, “यं चित्तं उप्पज्जति, तं चित्तं निरुज्जित्थाति? नो”तिआदिना च, “यं चित्तं उप्पज्जति, तं चित्तं निरुज्जिस्सतीति? आमन्ता”तिआदिना च, “यं चित्तं उप्पज्जित्थ, तं चित्तं निरुज्जिस्सतीति? नो”तिआदिना च,

“यं चित्तं उप्पज्जमानं, तं चित्तं उप्पन्नन्ति? आमन्ता । यं वा पन...पे०... उप्पज्जमानन्ति...पे०... उप्पादक्खणे चित्तं”न्तिआदिना च, “यं चित्तं निरुज्जमानं, तं चित्तं उप्पन्नन्ति? आमन्ता”तिआदिना च, “यं चित्तं उप्पन्नं, तं चित्तं उप्पज्जित्थाति? नो । यं वा पन...पे०... नो”तिआदिना च,

“यं चित्तं उप्पज्जित्थ नो च तं चित्तं उप्पन्नं, तं चित्तं उप्पज्जिस्सतीति? नो । यं वा पन...पे०... नो । यं चित्तं नुप्पज्जित्थ नो च तं चित्तं नुप्पन्नं, तं चित्तं नुप्पज्जिस्सतीति? आमन्ता”तिआदिना च, “उप्पन्नं उप्पज्जमानन्ति...पे०... उप्पादक्खणे उप्पन्नञ्चेव उप्पज्जमानञ्च । उप्पज्जमानं उप्पन्नन्ति? आमन्ता”तिआदिना च, “निरुद्धं निरुज्जमानन्ति? नो”तिआदिना च,

“यं चित्तं उप्पज्जमानं खणं खणं वीतिक्कन्तं अतिक्कन्तकालं, निरुज्जमानं खणं खणं वीतिक्कन्तं अतिक्कन्तकालं, तं चित्तन्ति...पे०... अतीतं चित्तं”न्तिआदिना च धम्मवारे,

“यस्स यं चित्तं उप्पज्जति न निरुज्जति, तस्स तं चित्तं निरुज्जिस्सति नुप्पज्जिस्सतीति? आमन्ता”तिआदिना च पुग्गलधम्मवारे च, सरागादिपदेहि,



कुसलादिपदेहि च मिस्सेसु सब्बवारेसु च पुच्छासु हेट्ठा वुत्तानुसारेन विस्सज्जननयो वेदितब्बो । अयं चित्तयमकमातिकथसंवण्णनानयो ।

### धम्मयमकमातिकथवण्णना

धम्मयमकमातिकाय पन खन्धयमके वुत्तनयेनेव पाळिववत्थानं वेदितब्बं । “यो कुसलं धम्मं भावेति, सो अकुसलं धम्मं पजहती”ति आगतत्ता पनेत्थ परिज्जावारो भावनावारो नाम । तत्थ यस्मा अब्बाकतो धम्मो नेव भावेतब्बो न पहातब्बो, तस्मा पदमेव न उद्धटन्ति वेदितब्बं । पुच्छाविस्सज्जने पनेत्थ “कुसलाकुसला धम्माति? आमन्ता”तिआदिना, “धम्मा अकुसला धम्माति? अकुसला धम्मा धम्मा चेव अकुसला धम्मा च, अवसेसा धम्मा न अकुसला धम्मा”तिआदिना च पण्णत्तिवारे विस्सज्जननयो जातब्बो ।

“यस्स कुसला धम्मा उप्पज्जन्ति, तस्स अकुसला धम्मा उप्पज्जन्तीति? नो । यस्स वा पन...पे०... यस्स कुसला धम्मा उप्पज्जन्ति, तस्स अब्बाकता धम्मा उप्पज्जन्तीति? पच्चवोकारे कुसलानं उप्पादक्खणे...पे०... उप्पज्जन्ती”तिआदिना च, “यत्थ कुसला धम्मा उप्पज्जन्ति, तत्थ अकुसला धम्मा उप्पज्जन्तीति? आमन्ता...पे०... तत्थ अब्बाकता धम्मा उप्पज्जन्तीति? आमन्ता । यत्थ वा पन अब्बाकता धम्मा उप्पज्जन्ति, तत्थ कुसला धम्मा उप्पज्जन्तीति ...पे०... चतुवोकारे...पे०... उप्पज्जन्ती”तिआदिना च, “यस्स यत्थ कुसला धम्मा...पे०... उप्पज्जन्तीति? नो”तिआदिना च,

“यस्स कुसला धम्मा नुप्पज्जन्ति, तस्स अकुसला धम्मा नुप्पज्जन्तीति...पे०... सब्बेसं चित्तस्स भङ्गक्खणे अब्बाकतचित्तस्स उप्पादक्खणे निरोधसमापन्नानं असज्जसत्तानं तेसं कुसला च धम्मा नुप्पज्जन्ति, अकुसला च धम्मा नुप्पज्जन्ती”तिआदिना च, “यस्स कुसला धम्मा नुप्पज्जन्ति, तस्स अब्बाकता धम्मा नुप्पज्जन्तीति...पे०... सब्बेसं चवन्तानं पवत्ते चित्तस्स भङ्गक्खणे आरुप्पे अकुसलानं उप्पादक्खणे च नुप्पज्जन्ती”तिआदिना च, “यत्थ कुसला धम्मा नुप्पज्जन्ति, तत्थ अकुसला धम्मा नुप्पज्जन्तीति? आमन्ता...पे०... तत्थ अब्बाकता धम्मा नुप्पज्जन्तीति? उप्पज्जन्ति । यत्थ वा पन अब्बाकता धम्मा नुप्पज्जन्ति, तत्थ अकुसला धम्मा नुप्पज्जन्तीति? नत्थी”तिआदिना च उप्पादवारे,

“यस्स कुसला धम्मा निरुज्झन्ति, तस्स अकुसला धम्मा निरुज्झन्तीति? नो”तिआदिना निरोधवारे च,

“यस्स कुसला धम्मा उप्पज्जन्ति, तस्स अकुसला धम्मा निरुज्झन्तीति? नो”तिआदिना उप्पादनरोधवारे च,

“यो कुसलं धम्मं भावेति, सो अकुसलं धम्मं पजहित्थाति? नो...पे०... यो कुसलं धम्मं न भावेति, सो अकुसलं धम्मं नपजहित्थाति? अग्गमग्गसमङ्गिच्च अरहन्तच्च ठपेट्वा अवसेसा पुग्गला”तिआदिना भावनावारे च पुच्छाविस्सज्जननयो हेट्ठा वुत्तानुसारेन जातब्बो ।

अत्थविनिच्छये पनेत्थ इदं लक्खणं । इमस्स हि धम्मयमकस्स पवत्तिमहावारे उप्पज्जन्ति निरुज्झन्तीति इमेसु उप्पादनरोधेसु कुसलाकुसलधम्मा ताव एकन्तेन पवत्तियंयेव लब्धन्ति, न चुत्तिपटिसन्धीसु, अब्बाकतधम्मा पन पवत्ते च चुत्तिपटिसन्धीसु चाति तीसुपि कालेसु लब्धन्ति, एवमेत्थ यं यत्थ यत्थ लब्धति, तस्स वसेन तत्थ तत्थ विनिच्छयो वेदितब्बो ।

तत्रिदं नयमुखं — कुसलाकुसलानं ताव एकक्खणे अनुप्पज्जनतो “नो”ति पटिसेधो कतो । अब्बाकता चाति इदं चित्तसमुद्धानरूपं सन्धाय वुत्तं । यत्थ कुसला धम्मा नुप्पज्जन्तीति असज्जभवं सन्धाय वुत्तं, अब्बाकतानं धम्मानं अनुप्पत्तिट्ठानस्साभावा “नत्थी”ति पटिक्खेपो कतो, निरोधवारे कुसलाकुसलानं एकतो अनिरुज्जनतो “नो”ति वुत्तन्ति इमिनाव नयमुखेन सब्बत्थ विनिच्छयो वेदितब्बो । अयं धम्मयमकमातिकथसंवण्णनानयो ।

### इन्द्रिययमकमातिकथवण्णना

इन्द्रिययमकमातिकायं पन खन्धयमकमातिकादीसु वुत्तनयेनेव पाळिववत्थानादिको सब्बो अत्थसंवण्णनानयो वेदितब्बो । मनिन्द्रियं पनेत्थ यथा चक्खुन्द्रियादिमूलकेहि, तथेव इत्थिन्द्रियादिमूलकेहि सङ्घि सम्पयोगं गच्छति, तस्मा निक्खित्तपटिपाटिया अयोजेत्वा सब्बेहिपि चक्खुन्द्रियमूलादीहि सङ्घि परियोसाने योजितं, चक्खुन्द्रियेन च सङ्घि सुखिन्द्रियदुक्खिन्द्रियदोमनस्सिन्द्रियानि, लोकोत्तरिन्द्रियानि च पटिसन्धियं नत्थीति न गहितानि । यथा चेत्थ, एवं सेसिन्द्रियमूलकेसुपि यथानुरूपं जातब्बं । इन्द्रियानं पन बहुकताय धातुयमकतोपि बहुतरानि यमकानि होन्ति अयं विसेसो, सेसं हेट्ठा वुत्तानुसारेन जातब्बन्ति । अयं इन्द्रिययमकमातिकथसंवण्णनानयो ।

मोहविच्छेदनिया अभिधम्ममातिकथवण्णनाय

यमकमातिकथवण्णना निट्ठिता ।

## ७. पट्टानमातिकथवण्णना

इदानीं पट्टानमाति काय अत्थसंवण्णनानयो होति । केनट्टेन पट्टानन्ति? नानपकारपच्चयट्टेन । प-सद्वो हि नानपकारत्थं दीपेति, ठान-सद्वो पच्चयत्थं । अथ वा विभजनट्टेन पट्टानं । यथा हि पञ्जापना पट्टपना विवरणा विभजना उत्तानीकम्मन्ति आगतट्टाने विभजनट्टो पट्टानसद्वसमानत्थो पट्टपना-सद्वो दिस्सति, एवमिधापि कुसलादीनं धम्मानं हेतुपच्चयादीहि विभजनतो विभजनट्टेन पट्टानं नाम । अथ वा पट्टितट्टेन पट्टानं, गमनट्टेनाति अत्थो । सब्बधम्मेषु हि असङ्गगमनस्स सब्बञ्जुतञ्जाणस्स हेतुपच्चयादिभेदभिन्नेसु कुसलादीसु वित्थारितनयलाभतो निस्सङ्गवसेन पवत्तगमनत्ता गमनट्टेन पट्टानं नाम, इति नानपकारपच्चयट्टेन, विभजनट्टेन, गमनट्टेन च तिकपट्टानादीसु चतुर्वीसतिया पट्टानेसु एकेकम्पि पट्टानं नाम, तेसं पन समूहतो पकरणं पट्टानं नाम, तेसं पट्टानानं मातिका । सयम्पि वा पट्टानभूता मातिका, सब्बम्पेतं पट्टानमातिका । या सा ‘‘हेतुपच्चयो, आरम्भणपच्चयो...पे०... अविगतपच्चयो’’ति एवं तिकपट्टानादिचतुर्वीसतिपण्णभेदसमन्तपट्टानदेसनाय मूलभूतपच्चयभेदस्स वसेन भगवता पकरणस्स आदिहि ठपिता, अयं इध पट्टानमातिका नाम ।

तत्थ अनुत्तानत्थादिसहितो सङ्खेपत्थविनिच्छयो ताव एवं वेदितब्बो – हेतुपच्चयोतिआदीसु हि हेतु च सो पच्चयो चाति हेतुपच्चयो, हेतु हुत्वा पच्चयो हेतुपच्चयो, हेतुभावेन पच्चयोति वुत्तं होति । तत्थ हेतूति वचनावयवकारणमूलानमेतं अधिवचनं । ‘‘पटिञ्जाहेतू’’तिआदीसु हि लोके वचनावयवो ‘‘हेतू’’ति वुच्चति, सासने पन ‘‘ये धम्मा हेतुपभवा’’तिआदीसु (महाव० ६०; अप० थेर १.१.२८६) कारणं, ‘‘तयो कुसला हेतू, तयो अकुसला हेतू’’तिआदीसु (ध० स० १०५९) मूलं, इदं इध अधिपेतं, तं पटिच्च एतस्मा एतीति पच्चयो, अपच्चक्खाय नं वत्ततीति अत्थो । यो हि धम्मो यं धम्मं पटिच्च अपच्चक्खाय तिट्ठति वा उपपज्जति वा, सो तस्स उपकारकलक्खणेन पच्चयो नाम । इति मूलट्टेन हेतु, उपकारकट्टेन पच्चयोति सङ्खेपतो मूलट्टेन उपकारको धम्मो हेतुपच्चयो, कुसलादीनं कुसलादिभावसाधकोति केचि, एवं सन्ते पन तंसमुट्टानरूपेसु हेतुपच्चयता न सम्पज्जति, अहेतुकचित्तानञ्च विना एतेहि अब्याकतभावो सिद्धो, सहेतुकानम्पि च योनिसोमनसिकारादिपटिबद्धो कुसलादिभावो, न सम्पयुत्तहेतुपटिबद्धो । यदि च सिया, हेतूसुपि कुसलादिभावसाधकेन अञ्जेन भवितब्बं, कुसलादिभावसाधनवसेन पन हेतूनं मूलट्टं अगगहेत्वा सुप्पतिट्ठितभावसाधनवसेन गद्यमाने न किञ्चि विरुज्झति । लद्धहेतुपच्चया हि धम्मा विरुद्धमूला विय पादपा थिरा होन्ति सुप्पतिट्ठिता, इतरे पन तिलबीजकादिसेवाला विय न सुप्पतिट्ठिता, इति मूलट्टेन उपकारकोति सुप्पतिट्ठितभावसाधनेन उपकारको धम्मो हेतुपच्चयोति वेदितब्बो ।

निद्देसे ‘‘हेतू हेतुसम्पयुत्तकानं धम्मानं तंसमुट्टानानञ्च रूपानं हेतुपच्चयेन पच्चयो’’ति वुत्तं, तत्थ ‘‘चित्तसमुट्टानान’’न्ति अवत्वा ‘‘तंसमुट्टानान’’न्ति इदं अचित्तसमुट्टानानम्पि सङ्गणहनत्थं । पञ्हावारस्मिं हि ‘‘पटिसन्धिकखणे विपाकाब्याकता हेतू सम्पयुत्तकानं खन्धानं कटत्ता च रूपानं हेतुपच्चयेन पच्चयो’’ति आगतं, कस्मा पनायं हेतु पटिसन्धियमेव कटत्तारूपानं हेतुपच्चयेन पच्चयो होति, न पवत्तेति? पटिसन्धिकं कम्मजरूपानं चित्तपटिबद्धवृत्तिताय, भवपठमनिपाततो चित्तजाति । इतरूपसन्ततिउपपत्थम्भाभावेन एव दुब्बलवत्थुं चित्तमेव निस्साय उपपज्जति चेव तिट्ठति च । तं चित्तम्पि हि पटिसन्धिकखणे कम्मवेगकिञ्चित्ताय चेव अपुरेजातवत्थुकताय च अप्पतिट्ठितं, पपाते पतितमत्तको पुरिसो न किञ्चि सिपं कातुं विय चित्तजरूपं जनेतुं न सक्कोति, तमेव कटत्तारूपं निस्साय पतिट्ठाति । पटिसन्धिकित्तानि हि रूपं न जनेन्ति, कम्मजरूपमेव पन तेसं चित्तसमुट्टानरूपट्टाने तिट्ठति, पवत्तिं पन पटिलद्धुपत्थम्भताय तं रूपं विनापि कम्मपटिबद्धाव पवत्ति, हेतुपच्चयस्स पनेत्थ कुसलादिभेदतो, भूमिभेदतो च विभागो हेट्टा वुत्तनयेनेव वेदितब्बोति अयं हेतुपच्चये नयो ।

ततो परेसु आरम्भणभावेन उपकारको धम्मो आरम्भणपच्चयो, सो निद्देसे ‘‘रूपायतनं चक्खुविञ्जाणधातुया...पे०... फोट्टब्बायतनं कायविञ्जाणधातुया तंसम्पयुत्तकानञ्च धम्मानं...पे०... रूपायतनं सहगन्धरसफोट्टब्बायतनं मनोधातुया...पे०... सब्बे धम्मा मनोविञ्जाणधातुया...पे०... यं यं धम्मं आरम्भ ये ये धम्मा उपपज्जन्ति चित्तचेतसिका धम्मा, ते ते धम्मा तेसं तेसं धम्मानं आरम्भणपच्चयेन पच्चयो’’ति एवं निद्दिट्ठता न कोचि धम्मो न होति । यथा हि दुब्बलपुरिसो दण्डं वा रज्जुं वा आलम्बित्वा उट्ठहति चेव तिट्ठति च, एवं चित्तचेतसिका धम्मा रूपादीसु छसु यं किञ्चि आलम्बित्वा उपपज्जन्ति चेव तिट्ठन्ति च, तस्मा लोकियलोकुत्तरादिभेदा सब्बेपि धम्मा यथायोगं चित्तचेतसिकानं आरम्भणपच्चयोति वेदितब्बोति अयं आरम्भणपच्चये नयो ।

जेट्टकट्टेन उपकारको धम्मो अधिपतिपच्चयो, सो निद्देसे ‘‘छन्दाधिपति छन्दसम्पयुत्तकानं धम्मानं तंसमुट्टानानञ्च रूपानं...पे०... वीरियचित्तवीमंसाधिपति...पे०... अधिपतिपच्चयेन पच्चयो, यं यं धम्मं गरुं कत्वा ये ये धम्मा उपपज्जन्ति चित्तचेतसिका धम्मा, ते ते धम्मा तेसं तेसं धम्मानं अधिपतिपच्चयेन पच्चयो’’ति एवं द्विधा निद्दिट्ठो । तत्थ छन्दादयो सहजाताधिपतिभावेन वुत्ता, गरुकातब्बं आरम्भणाधिपतिभावेन । तत्थ च लोकियकुसलभूतो आरम्भणाधिपति लोकियकुसलानञ्चेव लोभसहगतचित्तानञ्च आरम्भणाधिपति होति, नाञ्जस्स, अकुसलभूतो पन लोभसहगतचित्तुप्पादोति वुच्चति इतरेसु गरुकातब्बताय अभावतो, सो द्विहेतुकाहेतुकादिलोकियविपाकरूपक्खन्धभूतो च लोभसहगतस्सेव, नाञ्जस्स, तथा किरियभूतोपीति अट्टकथायं आगतं, तं जाणसम्पयुत्तिकिरियानं सब्बञ्जुतञ्जाणाभिञ्जादिपुब्बवसप्पवत्तानं कामावचरकुसलेहि गरुकातब्बभावस्साविरोधभावस्स दस्सनतो वीमंसितब्बं । लोकुत्तरकुसलानि पन कामावचरजाणसम्पयुत्तजवनानमेव आरम्भणाधिपतिपच्चया होन्ति, निब्बानं पन तेसञ्जेव लोकुत्तरकुसलविपाकानञ्चाति वेदितब्बन्ति अयं अधिपतिपच्चये नयो ।

अनन्तरभावेन उपकारको धम्मो अनन्तरपच्चयो, सोव समनन्तरपच्चयो, ब्यञ्जनमत्तमेव नानं ‘‘उपचयसन्तती’’तिआदीसु विय । यम्पि ‘‘अत्थानन्तरताय अनन्तरपच्चयो, कालानन्तरताय समनन्तरपच्चयो’’ति आचरियानं मतं, तं ‘‘निरोधा वुट्ठहन्तस्स नेवसञ्जानासञ्जायतनकुसलं फलसमापत्तिया समनन्तरपच्चयेन पच्चयो’’तिआदीहि विरुज्झति, तंनिद्देसे ‘‘चक्खुविञ्जाणधातु तंसम्पयुत्तका च धम्मा मनोधातुया...पे०...

कायविज्जाणधातु...पे०... मनोधातु...पे०... मनोविज्जाणधातुया...पे०... पुरिमा पुरिमा कुसला धम्मा पच्छिमानं पच्छिमानं कुसलानं धम्मानं...पे०... अब्याकतानं धम्मानं...पे०... पुरिमा पुरिमा अकुसला धम्मा पच्छिमानं पच्छिमानं अकुसलानं...पे०... अब्याकतानं...पे०... येसं येसं धम्मानं अनन्तरा ये ये धम्मा उपपज्जन्ति चित्तचेतसिका धम्मा, ते ते धम्मा तेसं तेसं धम्मानं अनन्तरपच्चयेन पच्चयो”ति इमिना अनन्तरपच्चयनिद्देशसमको एव समनन्तरपच्चयो निद्दिट्ठो अज्जत्र नामनानात्ताति अयं अनन्तरसमनन्तरपच्चयद्वये नयो।

उपपज्जमानोव सह उपपज्जमानभावेन उपकारको धम्मो **सहजातपच्चयो**, सो निद्देशे “चत्तारो खन्धा अरूपिनो अज्जमज्जं सहजातपच्चयेन पच्चयो, चत्तारो महाभूता अज्जमज्जं...पे०... ओक्कन्तिकखणे नामरूपं अज्जमज्जं...पे०... चित्तचेतसिका धम्मा चित्तसमुद्धानानं रूपानं...पे०... महाभूता उपादारूपानं... पे०... रूपिनो धम्मा अरूपीनं धम्मानं किञ्चिकाले सहजातपच्चयेन पच्चयो, किञ्चिकाले नसहजातपच्चयेन पच्चयो”ति एवं छब्बिधो निद्दिट्ठो। तत्थ **अज्जमज्जन्ति** इमिना तेसं धम्मानं एकखणे पच्चयभावज्जेव पच्चयुप्पन्नभावज्ज दीपेति, पटिसन्धिकखणे वत्थुरूपं **रूपं** नाम। **चित्तचेतसिका**ति पवत्तियं चत्तारो खन्धा, पटिसन्धियम्पीति केचि तत्थ कटत्तारूपानम्पि चित्तसमुद्धाने पविट्ठत्ता। तेसं हि पटिसन्धिकचित्तचेतसिका सहजातपच्चया होन्ति येव, तानि पन वत्थुविरहितानि रूपानि पवत्तियं चित्तसमुद्धानानं विय चित्तचेतसिकानं पच्चयत्थं न फरन्ति, तस्मा “अज्जमज्ज”न्ति न वुत्तं, तथा भूतानं उपादारूपं। एवं हि अगग्गमाने पटिसन्धियं कटत्तारूपानं सहजाता नाम निस्सयता न वुत्ताति सहजातपच्चयनिद्देशो अपरिपुण्णो एव सिया। **किञ्चिकाले**ति इदम्पि ओक्कन्तिकखणे हृदयवत्थुमेव सन्धाय वुत्तता ततियकोट्टासमेव भजतीति अत्थतो अयं पच्चयो पच्चविधोति अयं सहजातपच्चये नयो।

अज्जमज्जं उप्पादनुपत्थम्भनभावेन उपकारको धम्मो **अज्जमज्जपच्चयो** तिदण्डकं विय। सो निद्देशे “चत्तारो खन्धा अरूपिनो अज्जमज्जपच्चयेन पच्चयो, चत्तारो महाभूता...पे०... ओक्कन्तिकखणे नामरूपं अज्जमज्जपच्चयेन पच्चयो”ति एवं तिधा निद्दिट्ठोति अयं अज्जमज्जपच्चये नयो।

अधिद्धानाकारेन, निस्सयाकारेन च उपकारको धम्मो **निस्सयपच्चयो** तरुचित्तकम्मादीनं पथवीपटादयो विय, सो निद्देशे सहजातपच्चये विय छधाव निद्दिट्ठो। छट्ठो पनेत्थ कोट्टासो “चक्खायतनं चक्खुविज्जाणधातुया, सोतधानजिक्काकायायतनं कायविज्जाणधातुया...पे०... यं रूपं निस्साय मनोधातु च मनोविज्जाणधातु च वत्तन्ति, तं रूपं मनोधातुया च मनोविज्जाणधातुया च तं सम्पयुत्तकानञ्च धम्मानं निस्सयपच्चयेन पच्चयो”ति एवं पुरेजातनिस्सयदस्सनवसेन विभत्तो, सेसं तादिसमेव। तत्थ **रूपन्ति** हृदयवत्थु।

उपनिस्सयपच्चयोति एत्थ पनायं वचनत्थो — तदधीनवुत्तिताय अत्तनो फलेन निस्सितो, नप्पटिक्खित्तोति निस्सयो, यथा पन भुसो आयासो उपायासो, एवं भुसो निस्सयो उपनिस्सयो, बलवकारणस्सेतं अधिवचनं, तस्मा बलवकारणभावेन उपकारको धम्मो **उपनिस्सयपच्चयो**ति वेदितब्बो। सो आरम्मणूपनिस्सयो अनन्तरूपनिस्सयो पकतूपनिस्सयोति तिविधो होति। तत्थ **आरम्मणूपनिस्सयो** ताव आरम्मणाधिपतिना सिद्धिं नानत्तं अकत्वा विभत्तो। तत्थ यं आरम्मणं गरुं कत्वा चित्तचेतसिका उपपज्जन्ति, तं नियमतो तेसं आरम्मणेषु बलवारम्मणं होति, इति गरुकातब्बमत्तट्टेन आरम्मणाधिपति, बलवकारणट्टेन आरम्मणूपनिस्सयोति एवमेतेसं नानत्तं वेदितब्बं।

**अनन्तरूपनिस्सयोपि** अनन्तरपच्चयेन नानत्तं अकत्वाव विभत्तो, एवं सन्तोपि अत्तनो अत्तनो अनन्तरं अनुरूपस्स चित्तुप्पादस्स पवत्तनसमत्थताय अनन्तरता, पुरिमचित्तस्स पच्छिमचित्तुप्पादने बलवताय अनन्तरूपनिस्सयता च वेदितब्बा। यथा हि हेतुपच्चयादीसु कञ्चि धम्मं विनापि चित्तं उपपज्जति, न एवं अनन्तरचित्तं विना चित्तस्स उप्पत्ति नाम अत्थि, तस्मा बलवपच्चयो होति, इति बलवकारणट्टेन अनन्तरोव अनन्तरूपनिस्सयोति एवमेतेसं नानत्तं वेदितब्बं।

पकतो उपनिस्सयो **पकतूपनिस्सयो**, पकतो नाम अत्तनो सन्ताने उप्पादितो वा सद्भासीलादिउपसेवितो वा उतुभोजनदिपकतियायेव वा उपनिस्सयो पकतूपनिस्सयो, इति परूपनिस्सयेन अमिस्सोति अत्थो। सो च पकतूपनिस्सयो “सद्धं उपनिस्साय दानं देति, सीलं समादियति, उपोसथकम्मं करोति, ज्ञानं उप्पादेति; विपस्सनं, मग्गं, अभिज्जं, समापत्तिं उप्पादेति; सीलं, सुतं, चागं, पज्जं उपनिस्साय दानं देति...पे०... समापत्तिं उप्पादेती”तिआदिना इमेसं सद्भादीनं वसेन बहुधा विभत्तो, एवं उपनिस्सयपच्चयो तिविधो। निद्देशे पनायं “पुरिमा पुरिमा कुसला धम्मा पच्छिमानं पच्छिमानं कुसलानं धम्मानं ...पे०... अकुसलानं केसज्जि...पे०... अब्याकतानं धम्मानं...पे०... पुरिमा पुरिमा अकुसला धम्मा पच्छिमानं पच्छिमानं अकुसलानं...पे०... कुसलानं केसज्जि...पे०... अब्याकतानं धम्मानं...पे०... पुरिमा पुरिमा अब्याकता धम्मा...पे०... अब्याकतानं, कुसलानं, अकुसलानं उपनिस्सयपच्चयेन पच्चयो, पुग्गलोपि उपनिस्सयपच्चयेन पच्चयो, सेनासनम्पी”ति एवं निद्दिट्ठो। तत्थ **पुरिमा**ति अनन्तरूपनिस्सये समनन्तरातीताव लब्धन्ति।

आरम्मणूपनिस्सयपकतूपनिस्सयेसु पन नानाविधिवसेन पुरिमतरावाति तयोपि रासी कुसलेन कुसलपदे लब्धन्ति। कुसलेन पनाकुसले समनन्तरातीता न लब्धन्ति, तेनाह “केसज्जी”ति। इदं हि “कुसलो धम्मो अकुसलस्स धम्मस्स आरम्मणूपनिस्सयो पकतूपनिस्सयो, आरम्मणूपनिस्सयो पन दानं दत्त्वा...पे०... तं गरुं कत्वा रागो उपपज्जति...पे०... पकतूपनिस्सयो सद्धं उपनिस्साय मानं जप्पेती”तिआदिना **पच्चावारे** आगतं इमं नयं सन्धाय वुत्तं।

अकुसलेन कुसलपदे हि समनन्तरातीता न लब्धन्ति, तेनाह “केसज्जी”ति। इदं पन “अकुसलो धम्मो कुसलस्स धम्मस्स पकतूपनिस्सयो। रागं

उपनिस्साय दानं देति...पे०... पाणं हन्त्वा तस्स पटिघातत्थाय दानं देती'तिआदिना नयेन **पञ्हावारे** आगतं पकतूपनिस्सयमेव सन्धाय वुत्तं। यथा हि अकुसलं कुसलस्स अनन्तरूपनिस्सयो न होति, तथा आरम्मणूपनिस्सयोपि न होति। न हि तं गरुं कत्वा कुसलं पवत्तति।

अकुसलेन अब्याकतपदे पन आरम्मणूपनिस्सयोव न लब्धति। न हि तं अब्याकता गरुं करोन्ति, अनन्तरा पनस्स होन्ति। तेनेवेत्थ “केसज्जी”ति न वुत्तं। सेसपदेसु तयोपि उपनिस्सया लब्धन्तेव। “पुग्गलोपि, सेनासनम्पी”ति इदम्पि द्वयं पकतूपनिस्सयवसेनेवेत्थ वुत्तं, उतुभोजनादयो चेत्थ सङ्गहेतव्वा। इमस्मिञ्च पच्चये एकच्चाय पञ्जत्तिया सद्धि सब्बेपि चतुभूमका धम्मा सङ्गहिताति वेदितव्वाति अयं उपनिस्सयपच्चये नयो।

पठमतरं उप्पज्जित्वा वत्तमानभावेन उपकारका रूपधम्मा **पुरेजातपच्चयो**, सो पसादतब्बिसयहदयवत्थुवसेन एकादसविधो। निद्देसे च “चक्खायतनं चक्खुविज्जाणधातुया तंसम्पयुत्तकानञ्च धम्मानं पुरेजातपच्चयेन पच्चयो...पे०... कायायतनं कायविज्जाणधातुया ...पे०... रूपायतनं चक्खुविज्जाणधातुया... पे०... फोडुब्बायतनं कायविज्जाणधातुया...पे०... रूपायतनं सद्दगन्धरसफोडुब्बायतनं मनोधातुया...पे०... यं रूपं निस्साय...पे०... तं रूपं मनोधातुया च मनोविज्जाणधातुया च किञ्चिकाले पुरेजातपच्चयेन पच्चयो, किञ्चिकाले न पुरेजातपच्चयेन पच्चयो”ति एवं सब्बथापि पच्चद्वारे वत्थारम्मणवसेन, मनोद्वारे वत्थुवसेनेव चायं निद्दिट्ठो। **पञ्हावारे** पन आरम्मणपुरेजातं “अरहा चक्खुं अनिच्चतो दुक्खतो अनत्ततो विपस्सती”ति आगतत्ता मनोद्वारेपि अट्टारसन्नं रूपानं वसेन आरम्मणपुरेजातम्पि लब्धतेवाति अयं पुरेजातपच्चये नयो।

पुरेजातानं रूपधम्मानं उपत्थम्भकट्टेन उपकारको अरूपधम्मो **पच्छाजातपच्चयो** गिज्झपोतकसरीरानं आहारासा चेतना विय। निद्देसेपि चस्स “पच्छाजाता चित्तचेतसिका धम्मा पुरेजातस्स इमस्स कायस्स पच्छाजातपच्चयेन पच्चयो”ति एवं वुत्तं। तत्थ **इमस्स कायस्साति** चतुसमुद्धानिकतिसमुद्धानिकभूतुपादायरूपकायस्स। धम्मतो चायं ठपेत्वा पटिसन्धि विपाके आरुप्पविपाके अवसेसा सब्बे चतुभूमका अरूपधम्माति वेदितव्वाति अयं पच्छाजातपच्चये नयो।

आसेवनट्टेन अनन्तरानं पगुणबलवभावेन उपकारको धम्मो **आसेवनपच्चयो** गन्थादिपुरिमाभियोगो विय। सो कुसलाकुसलकिरियजवनवसेन तिविधो। निद्देसे पनस्स “पुरिमा पुरिमा कुसला धम्मा पच्छिमानं पच्छिमानं कुसलानं धम्मानं...पे०... अकुसलानं धम्मानं...पे०... किरियाब्बाकतानं धम्मानं आसेवनपच्चयेन पच्चयो”ति निद्दिट्ठो। तत्थ **पुरिमा पुरिमाति** सब्बत्थ समनन्तरातीताव दडुब्बा, तत्थापि कुसलादयो अब्याकतादीनं भिन्नजातिकानं समनन्तरानम्पि वासनासङ्घातेन आसेवनेन पगुणतरबलवभावविसिद्धं अत्तनो कुसलादिभावसङ्घातगतिं गाहापेतुं असमत्थताय आसेवनपच्चया न होन्ति, भूमितो, पन आरम्मणतो च भिन्नापि कामावचरतिहेतुककुसलकिरिया अत्तना सदिसवेदनानमेव महग्गतलोकुत्तरकुसलकिरियानम्पि, सङ्खारारम्मणञ्च अनुलोमकुसलं निब्बानारम्मणस्स गोत्रभुकुसलस्स आसेवनपच्चया होन्तियेव। लोकुत्तरो पन आसेवनपच्चयो नत्थि, तथा विपाको कम्मपरिणामितत्ताति अयं आसेवनपच्चये नयो।

चित्तप्पयोगसङ्घातेन किरियभावेन उपकारको धम्मो **कम्मपच्चयो**। सो नानक्खणिकाय कुसलाकुसलचेतनाय चैव सहजाताय च सब्बायपि चेतनाय वसेन दुविधो होति। निद्देसेपि चस्स “कुसलाकुसलं कम्मं विपाकानं खन्धानं कटत्ता च रूपानं...पे०... चेतना सम्पयुत्तकानं धम्मानं तंसमुद्धानानञ्च रूपानं कम्मपच्चयेन पच्चयो”ति द्विधाव वुत्तो। तत्थ **कम्मन्ति** चेतनाकम्ममेव। **कटत्ता च रूपानन्ति** कम्मस्स कटत्ता उपचितत्ता निष्पादितत्ता उप्पन्नानं कम्मजानं रूपानं कटत्ता एव, कम्मम्पि कालन्तरेयेव अवसेसपच्चयसमायोगे सति अत्तनो फलं उप्पादेति, न तु विनट्टत्ता ठितत्ता तं वा ठितं पन कम्मं न जनेति। **एवं तंसमुद्धानन्ति** इमिना पटिसन्धियं कटत्तारूपगहणं दडुब्बन्ति अयं कम्मपच्चये नयो।

निरुस्साहसन्तभावेन निरुस्साहसन्तभावाय उपकारको विपाकधम्मो **विपाकपच्चयो**। सो पवत्ते चित्तसमुद्धानानं, पटिसन्धिकखणे कटत्तारूपानं, सब्बत्थ च सम्पयुत्तधम्मानं पच्चयो होति। यथाह **सब्बपञ्हावारे** — “विपाकाब्बाकतो एको खन्धो तिण्णन्नं खन्धानं चित्तसमुद्धानानञ्च रूपानं पटिसन्धिकखणे...पे०... कटत्ता च रूपानं विपाकपच्चयेन पच्चयो”तिआदि। निद्देसे पनस्स “विपाका चत्तारो खन्धा अरूपिनो अज्जमज्जं विपाकपच्चयेन पच्चयो”ति एतकमेव वुत्तं। तं **पञ्हावारे** वुत्तविधानं सन्धाय सावसेसं वुत्तन्ति अयं विपाकपच्चये नयो।

रूपारूपानं उपत्थम्भकट्टेन उपकारका चत्तारो आहारा **आहारपच्चयो**। निद्देसे पन “कबळीकारो आहारो इमस्स कायस्स...पे०... अरूपिनो आहारा सम्पयुत्तकानं धम्मानं तंसमुद्धानानञ्च रूपानं आहारपच्चयेन पच्चयो”ति एवं निद्दिट्ठो। तत्थ चतुसमुद्धानमुपगता ओजा कबळीकारो आहारो नाम। सो यस्मा आहारूपसेवीनञ्जेव अज्झोहटाहारउतुजाहारूपत्थद्वो एव च कम्मजादिआहारो इमस्स कायस्स ठितिया पवत्तति, न अज्जथा, तस्मा कबळीकातब्बउतुजवत्थुसन्निस्सिततादस्सनत्थं कबळीकारो आहारोति वुत्तो। किञ्चापि चायं “इमस्स कायस्सा”ति अविसेसेन वुत्तो, विसेसतो पन आहारजरूपस्स जनको चैव अनुपालको च हुत्वा सेसतिसन्ततिसमुद्धानरूपस्स अनुपालको एव हुत्वा आहारपच्चयो होति। **तंसमुद्धानानन्ति** इमिना पटिसन्धियं कम्मसमुद्धानानि गहितानेव। **पञ्हावारे** हि “पटिसन्धिकखणे विपाकाब्बाकता आहारा सम्पयुत्तकानं खन्धानं कटत्ता च रूपानं आहारपच्चयेन पच्चयो”ति वुत्तन्ति अयं आहारपच्चये नयो।

अधिपतियट्टेन उपकारका इत्थिन्द्रियपुरिसिन्द्रियवज्जा वीसति इन्द्रिया **इन्द्रियपच्चयो**। इत्थिन्द्रियपुरिसिन्द्रियानि हि किञ्चापि

इत्थिपुरिसलिङ्गाकप्पादीनं बीजभूतानि, नेव पन तेसं, न अज्जेसं इन्द्रियादिपच्चयतं फरन्ति । सुत्तन्तिकपरियायेन पन तेसं पकतूपनिस्सयभावं फरन्तीति बावीसतेव इन्द्रियानि । तत्थ चक्खुन्द्रियादयो पच्च अरूपधम्मानमेव इन्द्रियपच्चयो, रूपजीवितिन्द्रियं कटत्तारूपानमेव, सेसा रूपारूपानं । निद्देसे “चक्खुन्द्रियं चक्खुविज्जाणधातुया तंसम्पयुत्तकानञ्च धम्मानं...पे०... कायविज्जाणधातुया...पे०... रूपजीवितिन्द्रियं कटत्तारूपानं, अरूपिनो इन्द्रिया सम्पयुत्तकानं धम्मानं तंसमुद्धानानञ्च रूपानं इन्द्रियपच्चयेन पच्चयो”ति एवं निद्दिट्ठो । **तंसमुद्धानानन्ति** एत्थापि कटत्तारूपमि सङ्गहितं । **पञ्हावारे** हि “पटिसन्धिकखणे विपाकाब्बाकता इन्द्रिया सम्पयुत्तकानं खन्धानं कटत्ता च रूपान”न्ति वुत्तन्ति अयं इन्द्रियपच्चये नयो ।

उपनिज्झायनट्टेन उपकारकानि ठपेत्वा द्विपञ्चविज्जाणेसु वेदनात्तयं, एकगगतञ्च सेसानि कुसलादिभेदानि सत्त ज्ञानङ्गानि **ज्ञानपच्चयो** । द्विपञ्चविज्जाणानं हि अभिनिपातमत्तता तेसु वेदनेकगता उपनिज्झायनाकारस्स अभावेन ज्ञानङ्गेषु न उद्धटा, निद्देसे पनस्स “ज्ञानङ्गानि ज्ञानसम्पयुत्तकानं धम्मानं तंसमुद्धानानञ्च रूपानं ज्ञानपच्चयेन पच्चयो”ति निद्दिट्ठो । इथापि **तंसमुद्धानानन्ति** इमिना च कटत्तारूपमि गहितं । **पञ्हावारे** हि “पटिसन्धिकखणे विपाकाब्बाकतानि ज्ञानङ्गानि सम्पयुत्तकानं खन्धानं कटत्ता च रूपान”न्ति वुत्तन्ति अयं ज्ञानपच्चये नयो ।

यतो ततो वा निव्यायनट्टेन उपकारकानि कुसलादिभेदानि द्वादस मग्गङ्गानि **मग्गपच्चयो** । निद्देसे पन “मग्गङ्गानि मग्गसम्पयुत्तकानं धम्मानं तंसमुद्धानानञ्च रूपानं मग्गपच्चयेन पच्चयो”ति निद्दिट्ठो । एत्थापि **तंसमुद्धानानन्ति** इमिना कटत्तारूपगहणं । **पञ्हावारे** हि “पटिसन्धिकखणे विपाकाब्बाकतानि मग्गङ्गानि सम्पयुत्तकानं खन्धानं कटत्ता च रूपान”न्ति वुत्तं, अहेतुकचित्तेसु चेत्य विज्जमानानि मग्गङ्गानि मग्गपच्चया न होन्ति । अयं मग्गपच्चये नयो ।

एकवत्थुकएकारम्मणएकुप्पादएकनिरोधसङ्घातेन सम्पयुत्तभावेन उपकारका अरूपिनो धम्मा **सम्पयुत्तपच्चयो** । निद्देसे पन “चत्तारो खन्धा अरूपिनो धम्मा अज्जमज्जं सम्पयुत्तपच्चयेन पच्चयो”ति निद्दिट्ठोति अयं सम्पयुत्तपच्चये नयो ।

एकवत्थुकादिभावानुपगमेन उपकारका रूपिनो धम्मा अरूपीनं, अरूपिनो धम्मा रूपीनं **विष्ययुत्तपच्चयो**, सो सहजातपुरेजातपच्छाजातवसेन तिविधो होति । वुत्तं हेतं “सहजाता कुसला खन्धा चित्तसमुद्धानानं रूपानं...पे०... पच्छाजाता कुसला खन्धा पुरेजातस्स इमस्स कायस्स विष्ययुत्तपच्चयेन पच्चयो”ति आदि । पुरेजातं पन छवत्थुवसेनेव वेदितब्बं । निद्देसे पनस्स “रूपिनो धम्मा अरूपीनं...पे०... अरूपिनो धम्मा रूपीनं धम्मानं विष्ययुत्तपच्चयेन पच्चयो”ति एवं सामञ्जसो निद्दिट्ठो । तत्थ **रूपिनो**ति इदं छवत्थूनं वसेन वुत्तं, रूपादयो पन आरम्मणधम्मा सम्पयोगासङ्कायाभावेन विष्ययुत्तपच्चया न वुत्ता । चक्खादीनं हि वत्थूनं अब्भन्तरतो अरूपधम्मा निक्खमन्ता विय उप्पज्जन्ति, तत्थ सम्पयोगासङ्का होति । **पञ्हावारे**पि हि “वत्थु कुसलानं खन्धानं...पे०... चक्खायतनं चक्खुविज्जाणधातुया”ति आदिना छ वत्थूनेव उद्धटानि, **अरूपिनो धम्मा रूपीनन्ति** एत्थापि निब्बानं अरूपमि समानं रूपस्स विष्ययुत्तपच्चयो न होति सब्बथा सम्पयोगासङ्काभावतो, “चतूहि सम्पयोगो चतूहि विष्ययोगो”ति (धातु० ३) हि वुत्तन्ति अयं विष्ययुत्तपच्चये नयो ।

पच्चुप्पन्नलक्खणेन अत्थिभावेन तादिसस्सेव धम्मस्स उपत्थम्भकट्टेन उपकारको धम्मो **अत्थिपच्चयो**, सो निद्देसे “चत्तारो खन्धा अरूपिनो अज्जमज्जं...पे०... चत्तारो महाभूता अज्जमज्जं, ओक्कन्तिकखणे नामरूपं अज्जमज्जं, चित्तचेतसिका धम्मा चित्तसमुद्धानानं रूपानं, महाभूता उपादारूपानं, चक्खायतनं चक्खुविज्जाणधातुया...पे०... रूपायतनं चक्खुविज्जाणधातुया तंसम्पयुत्तकानञ्च धम्मानं...पे०... रूपायतनं...पे०... फोड्डब्बायतनं मनोधातुया...पे०... मनोधातुया च मनोविज्जाणधातुया च तंसम्पयुत्तकानञ्च धम्मानं अत्थिपच्चयेन पच्चयो”ति एवं सहजातपुरेजातवसेन च बहुधा निद्दिट्ठो, **पञ्हावारे** पन “सहजातं पुरेजातं पच्छाजातं आहारं इन्द्रियं”न्ति इमेसं पञ्चन्नमि वसेन आगतत्ता पच्छाजातकबळीकारआहाररूपजीवितिन्द्रियानं वसेनापि अत्थिपच्चयो गहेतब्बोवाति अयं अत्थिपच्चये नयो ।

अत्तनो अनन्तरं उप्पज्जमानानं अरूपधम्मानं पवत्तिओकासदानवसेन उपकारका समनन्तरनिरुद्धा अरूपधम्मा **नत्थिपच्चयो**, निद्देसे पन “समनन्तरनिरुद्धा चित्तचेतसिका धम्मा पटुप्पन्नानं चित्तचेतसिकानं धम्मानं नत्थिपच्चयेन पच्चयो”ति एवं सामञ्जसो निद्दिट्ठो । सब्बथा अनन्तरपच्चयसदिसताय तत्थ निद्दिट्ठनयेनेवेत्थ विसेसो जातब्बोति अयं नत्थिपच्चये नयो ।

नत्थिपच्चयधम्माव विगतभावेन उपकारकत्ता **विगतपच्चयो**ति सह निद्देसेन नत्थिपच्चयसदिसोवाति ।

**अविगतपच्चयो**पि सब्बथा अत्थिपच्चयसदिसोव, देसनाविलासेन, वेनेय्यवसेन वा अयं दुको वुत्तोति अयं अविगतपच्चये नयो ।

### पकिण्णकविनिच्छयो

इमेसु पन चतुर्वीसतिया पच्चयेसु जाणचारस्स विसदभावत्थं —

धम्मतो कालतो चेव, एकस्सानेकपच्चया ।

अनेकेसञ्च धम्मानं, एकपच्चयभावतो ॥

सभागा विसभागा च, युगळा जनकादितो ।  
सब्बद्वानादिभेदा च, रूपारूपविकप्पतो ।  
भवतो सङ्गहा जेय्यो, पक्किण्णकविनिच्छयो ॥

तत्थ धम्मतोति इमेसु हि पच्चयेसु हेतुपच्चयो ताव नामरूपधम्मेषु नामधम्मकेदसो, तथा सहजाताधिपतिकम्मज्ञानमग्गपच्चया, तथा आसेवनविपाकपच्चया, चतुक्खन्धसङ्गहितापि विपाकधम्मा अनन्तरसमनन्तरपच्छाजातसम्पयुत्तनत्थिविगतपच्चया । निब्बानस्स असङ्गहतो नामकेदसोतिपि वत्तुं वट्टति । पुरेजातपच्चयो रूपधम्मोव, सेसा यथालाभवसेन नामरूपधम्मा । तत्थ च आरम्मणाधिपतिआरम्मणूपनिस्सयपकतूपनिस्सयेसु पञ्जत्तिपि सङ्गहिताति अयं धम्मतो विनिच्छयो ।

**कालतो** पन हेतुसहजातअञ्जमञ्जनिस्सयपुरेजातपच्छाजातविपाकआहारइन्द्रियज्ञानमग्गसम्पयुत्तविष्पयुत्तअत्थिअविगतपच्चया पन्नरस पच्चुप्पन्नाव हुत्वा अत्तनो फलस्स पच्चया होन्ति, अनन्तरसमनन्तरआसेवननत्थिविगतपच्चया पञ्च अतीता एव हुत्वा, कम्मपच्चयो पनेको पच्चुप्पन्नोपि अतीतोपि हुत्वा, सेसा आरम्मणअधिपतिउपनिस्सयपच्चया तयोपि तेकालिकापि, निब्बानपञ्जत्तिवसेन कालविमुत्तापि हुत्वा अत्तनो फलस्स पच्चया होन्तीति अयं कालतो विनिच्छयो ।

**एकस्सानेकपच्चयाति** एकधम्मस्स, एकपच्चयस्स च अनेकपच्चयभावतो । कथं? हेतुपच्चये ताव अमोहो एको धम्मो, सो पुरेजातकम्मआहारज्ञानवज्जानं वीसतिया पच्चयानं वसेन अनेकपच्चयो होति, हेतुपच्चयत्तं अविजहन्तोव अधिपतिसहजातअञ्जमञ्जनिस्सयविपाकिन्द्रियमग्गसम्पयुत्तविष्पयुत्तअत्थिअविगतानं अञ्जेसं एकादसन्नं वसेन वा अनेकपच्चयो होति, तथा अलोभादयो, तेसु पन अलोभादोसा इन्द्रियमग्गपच्चया न होन्ति, ते तयो अविपाकभूता लोभदोसमोहा विपाकपच्चयापि न होन्ति, ते पन अमोहवज्जिता पञ्च अधिपतिपच्चया न होन्ति, तथा सेसापि अविपाकभूता ।

आरम्मणपच्चये रूपायतनं चक्खुविज्जाणधातुया आरम्मणपुरेजातअत्थिअविगतानं चतुन्नं वसेन अनेकपच्चयो होति, तथा मनोधातुया, अहेतुकमनोविज्जाणधातुया च । सहेतुकाय पन आरम्मणाधिपतिआरम्मणूपनिस्सयानम्मि वसेन, सद्वादीसुपि एसेव नयो । धम्मायतनं पन निस्सयविष्पयुत्तानं वसेनापि अनेकपच्चयो होति, तथा आरम्मणपच्चयत्तं अविजहन्तोव आरम्मणाधिपतिनिस्सयउपनिस्सयपुरेजातविष्पयुत्तअत्थिअविगतानं वसेन अपरेसम्पि सत्तन्नं वसेन अनेकपच्चयो होतीति अयमेत्थ उक्कट्टुपरिच्छेदो । तत्थ अरूपानं पन रूपानं वा अतीतानागतानं आरम्मणपच्चयभावे सति आरम्मणाधिपतिउपनिस्सयमत्तमेव उत्तरि लब्धति ।

**अधिपतिपच्चये** आरम्मणाधिपति वुत्तनयोव । सहजाताधिपतीसु चित्तं हेतुपुरेजातकम्मज्ञानमग्गवज्जानं एकूनवीसतिया पच्चयानं वसेन अनेकपच्चयो होति, अधिपतिपच्चयत्तं अविजहन्तो अपरेसं सहजातअञ्जमञ्जनिस्सयविपाकाहारिन्द्रियसम्पयुत्तविष्पयुत्तअत्थिअविगतानं दसन्नं वसेनेव, तथा वीरियं आहारपच्चयवज्जानं मग्गपच्चयसहितानं वसेन, छन्दो आहारिन्द्रियवज्जानं वसेन अनेकपच्चयो होति, वीमंसा हेतुपच्चये वुत्तनयाव ।

**अनन्तरपच्चये** चतूसु खन्धेषु वेदनाखन्धो ताव हेतुपुरेजातकम्माहारमग्गपच्चयवज्जानं एकूनवीसतिया वसेन, सञ्जाक्खन्धो तेसु इन्द्रियज्ञानवज्जानं सत्तरसन्नं वसेन, सङ्खारक्खन्धो हेतुपुरेजातकम्मिन्द्रियज्ञानमग्गवज्जानं अट्टारसन्नं वसेन, तथा चेतना कम्मसहितानं, वितक्को हेतुपुरेजातकम्मआहारिन्द्रियवज्जानं ज्ञानमग्गसहितानं, विचारो, पीति च आनन्तरियानं मग्गवज्जानं, एकग्गता हेतुपुरेजातकम्माहारवज्जानं वीसतिया पच्चयानं वसेन, सद्वा, जीवितिन्द्रियञ्च अनन्तरानं हेतुपुरेजातकम्माहारज्ञानमग्गवज्जानं अट्टारसन्नं, सति मग्गसहितानं एकूनवीसतिया, हिरिओत्तप्पकायपस्सद्वादिछयुगा, येवापनकेसु अधिमोक्खमनसिकारतत्रमज्झत्तता, करुणामुदिता च हेतुपुरेजातकम्माहारज्ञानमग्गिन्द्रियवज्जानं सत्तरसन्नं, विरतियो पन मग्गसहितानं अट्टारसन्नं, मिच्छादिट्ठि ततो विपाकवज्जानं सत्तरसन्नं वसेन, मिच्छावाचाकम्मन्ताजीवा तेहि चेव कम्माहारपच्चयेहि चाति एकूनवीसतिया पच्चयानं वसेन, अहिरिकं अनोत्तप्पं मानो थिनं मिद्धं उद्धच्चन्ति इमे हेतुपुरेजातकम्मविपाकाहारिन्द्रियज्ञानमग्गवज्जानं सोळसन्नं, विचिकिच्छा इस्सामच्छरियकुक्कुच्वानि ततो अधिपतिवज्जानं पन्नरसन्नं वसेन अनेकपच्चया होन्ति । अनन्तरपच्चयत्तं अविजहन्तानं पनेतेसं समनन्तरउपनिस्सयकम्मनत्थिविगतानं अपरेसं छन्नं वसेन च । विज्जाणक्खन्धस्स अधिपतिपच्चयेनेव अनेकपच्चयभावो वेदितब्बो ।

**सहजातपच्चये** महाभूतानि आरम्मणआरम्मणाधिपतिसहजातअञ्जमञ्जनिस्सयउपनिस्सयपुरेजातअत्थिअविगतानं नवन्नं, हृदयवत्थु तेसञ्जेव विष्पयुत्तसहितानं वसेन । **निस्सयपच्चये** चक्खायतनादीनि आरम्मणआरम्मणाधिपतिनिस्सयउपनिस्सयपुरेजातइन्द्रियविष्पयुत्तअत्थिअविगतानं नवन्नं वसेन । **पुरेजातपच्चये** रूपसद्गन्धरसायतनादीनि आरम्मणआरम्मणाधिपतिउपनिस्सयपुरेजातअत्थिअविगतानं छन्नं वसेन । **आहारपच्चये** ओजा आरम्मणआरम्मणाधिपतिउपनिस्सयाहारअत्थिअविगतानं छन्नं पच्चयानं वसेन अनेकधा पच्चयो होति । तंतपच्चयत्तं अविजहन्तानं तेसं तेसं सब्बत्थ आरम्मणाधिपतिअनन्तरसमनन्तरूपनिस्सयादिपच्चयता वुत्तनयेन वेदितब्बा । सेसं सुविज्जेय्यमेवाति अयं एकस्सानेकपच्चयतो विनिच्छयो ।

**अनेकेसञ्च धम्मानं, एकपच्चयभावतोति** एतेसु हि ठपेत्वा कम्मपच्चयं सेसेसु तेवीसतिया पच्चयेसु अनेके अनेकेसं धम्मानं एकतो एकेकं पच्चया होन्ति । कम्मपच्चयो पन चेतना एकधम्मोवाति अयं अनेकधम्मानं एकपच्चयभावतो विनिच्छयो ।

**सभागा विसभागा चाति** एतेसु हि अनन्तरसमनन्तरानन्तररूपनिस्सयासेवननत्थिविगतपच्चया सभागा, तथा आरम्मणआरम्मणाधिपतिआरम्मणूपनिस्सया । पुरेजातपच्चयो पनेत्थ पच्छाजातेन विसभागो, तथा सम्पयुत्तो विष्पयुत्तेन, अत्थि नत्थिना, विगतो अविगतेनाति अयं सभागविसभागतो विनिच्छयो ।

**युगळाति** एत्थ अत्थसरिक्खताय सदसरिक्खताय कालपटिपक्खताय हेतुफलताय अञ्जमञ्जपटिपक्खतायाति इमेहि कारणेहि युगळं वेदितब्बं । अनन्तरसमनन्तरा हि अत्थसरिक्खताय एकं युगळं नाम । निस्सयूपनिस्सया सदसरिक्खताय, पुरेजातपच्छाजाता कालपटिपक्खताय, कम्मविपाका हेतुफलताय, सम्पयुत्तविष्पयुत्ता अञ्जमञ्जपटिपक्खताय एकं युगळं, तथा अत्थिनत्थिपच्चया, विगतअविगतपच्चयाति अयं युगळतो विनिच्छयो ।

**जनकादितोति** जनकोपत्थम्भकतो । एतेसु हि अनन्तरसमनन्तररूपनिस्सयपकतूपनिस्सयासेवनपच्चया, नानक्खणिको कम्मपच्चयो, नत्थिविगतपच्चया चाति इमे जनका एव, न उपत्थम्भका । पच्छाजातपच्चयो उपत्थम्भको एव, न जनको । सेसा जनका चेव उपत्थम्भका चाति अयं जनकादितो विनिच्छयो ।

**सब्बट्टानादिभेदाति** सब्बट्टानिकअसब्बट्टानिकभेदतो । एतेसु हि सहजातनिस्सयअत्थिअविगतपच्चया सब्बट्टानिका । सब्बेसु पच्चयुप्पन्नेसु इच्छितब्बा । एतेहि विना उप्पज्जमानो एकधम्मोपि नत्थि । सेसा असब्बट्टानिका । तत्थ च आरम्मणआरम्मणाधिपतिअनन्तरसमनन्तरानन्तररूपनिस्सयपकतूपनिस्सयपुरेजातासेवनसम्पयुत्त अत्थिनत्थिविगतपच्चया अरूपधम्मानञ्जेव कारणतो असब्बट्टानिका । तथा पच्छाजातपच्चयो रूपानञ्जेव कारणतो, सेसा एकच्चानं रूपारूपधम्मानं कारणतो असब्बट्टानिका । अयं सब्बट्टानादिभेदतो विनिच्छयो ।

**रूपारूपविकप्पतोति** रूपं रूपस्स, रूपं अरूपस्सातिआदि विकप्पतो । एतेसु हि एकोपि पच्चयो रूपमेव हुत्वा रूपस्सेव पच्चयो भवन्तो नाम नत्थि, रूपमेव पन अरूपस्सेव अत्थि, सो पुरेजातपच्चयो एको एव । रूपमेव हुत्वा रूपारूपस्सेव पच्चयो नामातिपि नत्थि, अरूपमेव हुत्वा अरूपस्सेव पच्चयोपि अत्थि, सो अनन्तरसमनन्तरआसेवनसम्पयुत्तनत्थिविगतवसेन छब्बिधो । अरूपमेव पन रूपस्सेव पच्चयोपि अत्थि, सो पच्छाजातपच्चयो एको एव । अरूपमेव हुत्वा रूपारूपानम्पि अत्थि, सो हेतुकम्मविपाकज्ञानमग्गवसेन पञ्चविधो । रूपारूपपञ्जति हुत्वा अरूपस्सेव पच्चयोपि अत्थि, सो आरम्मणउपनिस्सयवसेन दुविधो । रूपारूपं पन रूपारूपस्सापि अत्थि, सो अधिपतिसहजातअञ्जमञ्जनिस्सयाहारिन्द्रियविष्पयुत्तअत्थिअविगतवसेन नवविधोति अयं रूपारूपविकप्पतो विनिच्छयो ।

**भवतोति** इमेसु हि पच्चयेसु पञ्चवोकारभवे ताव न कोचि पच्चयो न लब्भति नाम, सब्बेपि लब्भन्ति । चतुवोकारभवे पन पुरेजातपच्छाजातविष्पयुत्तपच्चये अपनेत्वा सेसा एकवीसतिमेव । एकवोकारभवे सहजातअञ्जमञ्जनिस्सयकम्मिन्द्रियअत्थिअविगतवसेन सत्तेव । बाहिरे पन अनिन्द्रियबद्धरूपे तेसु कम्मिन्द्रियवज्जा पञ्चेव लब्भन्तीति अयं भवतो विनिच्छयो ।

**सङ्गहाति** सब्बेपि हि इमे चतुवीसति पच्चया आरम्मणसहजातउपनिस्सयपुरेजातपच्छाजातकम्माहारिन्दियेसु अट्ठसु च पच्चयेसु सङ्गहं गच्छन्ति । कथं? तेसु हि हेतुअञ्जमञ्जविपाकज्ञानमग्गसम्पयुत्तपच्चया छ सहजातपच्चये सङ्गहं गच्छन्ति । अनन्तरसमनन्तरासेवननत्थिविगतपच्चया पञ्च अनन्तररूपनिस्सये उपनिस्सयपच्चये । निस्सयपच्चयो सहजातपुरेजातभेदतो दुविधो । तत्थ सहजातो सहजातपच्चये, पुरेजातो पुरेजातपच्चये । अधिपतिपच्चयोपि आरम्मणभूतो आरम्मणूपनिस्सये, सहजातभूतो सहजातपच्चये । विष्पयुत्तपच्चयोपि सहजातपुरेजातपच्छाजातभूतताय तत्थ तत्थ सङ्गहं गच्छति । अत्थिअविगतपच्चयापि सहजातपुरेजातपच्छाजाताहारिन्द्रियभूतताय तत्थ तत्थ पच्चयेसु सङ्गहं गच्छन्ति । एवं इमेसु पच्चयेसु सब्बपच्चयानं सङ्गहो वेदितब्बो । तेनेव तिकपट्टानपाळियं पच्चनीयनये इमेसं अट्ठन्नं पच्चयानं वसेनेव कतिपयपज्हा विस्सज्जिता । इमेसं पन अट्ठन्नम्पि अञ्जमञ्जसङ्गहोपि अत्थियेव । तेसु हि आरम्मणपच्चयो अधिपतिभूतो उपनिस्सये, अनधिपतिभूतो न कत्थचीति आरम्मणपच्चयो हुत्वा विसुञ्जेव तिट्ठति । कम्मपच्चयोपि सहजातो सहजाते । नानक्खणिककम्मपच्चयो हुत्वा विसुञ्जेव तिट्ठति । आहारपच्चयोपि अरूपभूतो सहजाते, रूपभूतो न कत्थचीति विसुञ्जेव तिट्ठति, इन्द्रियपच्चयोपि अरूपभूतो सहजाते, पसादिन्द्रिया पुरेजाते, रूपजीवितिन्द्रियं न कत्थचि सङ्गहं गच्छतीति इन्द्रियपच्चयो हुत्वा विसुञ्जेव तिट्ठतीति एवमेवं अञ्जमञ्जसङ्गहोपि अत्थियेव । सब्बेपि पनेते चतुवीसति पच्चया आरम्मणउपनिस्सयकम्मअत्थिपच्चयेसु चतूसुपि सङ्गहं गच्छन्तीति अयं सङ्गहतो विनिच्छयो । अयं अनुत्तानपदत्थसहितो सङ्घेपत्थविनिच्छयो ।

पकिण्णकविनिच्छयो निट्ठितो ।

विभङ्गनये पनेत्थ पाळिववत्थानं ताव सङ्खेपतो एवं वेदितब्बं। **पट्टानपाळियं** हि “हेतुपच्चयो...पे०... अविगतपच्चयो”ति पच्चयपदानि मातिकावसेन निक्खिपित्वा तेसं पच्चयानं — “हेतु हेतुसम्पयुत्तकानं धम्मानं तंसमुद्धानानञ्च रूपानं हेतुपच्चयेन पच्चयो”तिआदिना नयेन पच्चयभाजनीयसङ्घातो निद्देसवारो पठमं वुत्तो। सोपि च अनन्तरसङ्खेपत्थविनिच्छयो तत्थ तत्थ दस्सितो एव। तदनन्तरं तेसं चतुवीसतिया पच्चयानं कुसलत्तिकादयो द्वावीसतितिके, हेतुदुकादयो सतं दुके च निस्साय नानानयतो विभजनवसेन चतुवीसतिसमन्तपट्टानसमोधानं अनन्तनयसमन्तपट्टानं विभत्तं। कथं? चतुब्बिधं हि पट्टानं — अनुलोमपट्टानं, पच्चनीकपट्टानं, अनुलोमपच्चनीकपट्टानं, पच्चनीकानुलोमपट्टानन्ति। तत्थ “कुसलं धम्मं पटिच्च कुसलो धम्मो उप्पज्जति हेतुपच्चया”तिआदिना, “हेतुं धम्मं पटिच्च हेतुधम्मो उप्पज्जति हेतुपच्चया”तिआदिना कुसलादीनं, हेतुआदीनञ्च धम्मानं अनुलोमवसेन पवत्तं **अनुलोमपट्टानं** नाम। “नकुसलं धम्मं पटिच्च नकुसलो धम्मो उप्पज्जति हेतुपच्चया...पे०... नहेतुं धम्मं पटिच्च नहेतुधम्मो उप्पज्जति हेतुपच्चया”तिआदिना कुसलादीनं, हेतुआदीनञ्च धम्मानं पच्चनीकवसेन पवत्तं **पच्चनीकपट्टानं** नाम। “कुसलं धम्मं पटिच्च नकुसलो धम्मो उप्पज्जति हेतुपच्चया...पे०... हेतुं धम्मं पटिच्च नहेतुधम्मो उप्पज्जति हेतुपच्चया”तिआदिना पवत्तं **अनुलोमपच्चनीकपट्टानं** नाम। “नकुसलं धम्मं पटिच्च कुसलो धम्मो...पे०... नहेतुं धम्मं पटिच्च हेतुधम्मो उप्पज्जति हेतुपच्चया”तिआदिना पवत्तं **पच्चनीकानुलोमपट्टानं** नाम।

एवमेतेसु चतूसु पट्टानेसु यं धम्मं अनुलोमपट्टानं नाम, तं ताव छब्बिधं होति — तिकपट्टानं दुकपट्टानं दुकतिकपट्टानं तिकदुकपट्टानं तिकतिकपट्टानं दुकदुकपट्टानन्ति। यथा चेत्तं, एवं पच्चनीकपट्टानादीनिपि तीणि तीणि पच्चेकन्ति चतुवीसतिसमन्तपट्टानसमोधानं पट्टानप्पकरणं वेदितब्बं। सम्मासम्बुद्धेन हि अनुलोमपट्टाने द्वावीसतितिके निस्साय **तिकपट्टानं** नाम निद्दिट्ठं। सतं दुके निस्साय **दुकपट्टानं** नाम। ततो तिके दुकेसु पक्खिपित्वा **दुकतिकपट्टानं** नाम। ततो दुके तिकेसु पक्खिपित्वा **तिकदुकपट्टानं** नाम। तिके पन तिकेसुयेव पक्खिपित्वा **तिकतिकपट्टानं** नाम। दुके च दुकेसु एव पक्खिपित्वा **दुकदुकपट्टानं** नाम निद्दिट्ठं। पठमं तावेत्थ अनुलोमपट्टाने तिकपट्टाननयो निद्दिट्ठो। एवं पच्चनीकपट्टाने, अनुलोमपच्चनीकपट्टाने, पच्चनीकानुलोमपट्टानेति चतुवीसतिसमन्तपट्टानं देसितं।

एत्थ च दुविधं अनुलोमं, पच्चनीकञ्च धम्मानुलोमं धम्मपच्चनीकं, पच्चयानुलोमं पच्चयपच्चनीकन्ति। तत्थ “कुसलं धम्मं पटिच्च कुसलो धम्मो”तिआदिना कुसलादीनं तिकधम्मानं, हेतुआदीनं दुकधम्मानञ्च अनुलोमदेसनावसेन **धम्मानुलोमं** वेदितब्बं। “नकुसलं धम्मं पटिच्च नकुसलो धम्मो”तिआदिना तिकदुकधम्मानं पच्चनीकवसेन **धम्मपच्चनीकं** वेदितब्बं। “हेतुपच्चया आरम्भणपच्चया”ति एवं चतुवीसतिया पच्चयानं अनुलोमदेसनावसेन **पच्चयानुलोमं** वेदितब्बं। “नहेतुपच्चया आरम्भणपच्चया”ति एवं पच्चयानं पच्चनीकवसेन **पच्चयपच्चनीकञ्च** वेदितब्बं। तत्र यदिदं धम्मानुलोमं धम्मपच्चनीकञ्च, तस्स वसेन चतुवीसतिसमन्तपट्टानं वेदितब्बं। पच्चयानुलोमं पच्चयपच्चनीकञ्च अनुलोमतिकपट्टानादीसु चतुवीसतिया पट्टानेसु एकेकतिकदुकेसु एवं लभ्भति। तज्ज उपरि पाळिनयदस्सने एव पाकटं भविस्सति। तत्रिमानि चतुवीसति पट्टानानि इमेसं तिकदुकानं वसेन निद्दिट्ठता तिकपट्टानं...पे०... दुकदुकपट्टानन्ति वुच्चति।

तेसु तिकदुकेसु एकेकं तिकदुकं इमेसं हेतुपच्चयादीनं चतुवीसतिया पच्चयानं अनुलोमादिनयचतुक्कवसेन सत्तहि सत्तहि महावारेहि वित्थारतो विभत्तं। कतमेहि सत्तहि? पटिच्चवारो सहजातवारो पच्चयवारो निस्सयवारो संसट्ठवारो सम्पयुत्तवारो पञ्चावारोति इमेहि। तत्थ “कुसलं धम्मं पटिच्च कुसलो धम्मो”तिआदिना पटिच्चाभिधानेन वुत्तो **पटिच्चवारो** नाम। “कुसलं धम्मं सहजातो, कुसलं धम्मं पच्चया, कुसलं धम्मं निस्साय, कुसलं धम्मं संसट्ठो, कुसलं धम्मं सम्पयुत्तो”ति एवं सहजातादिभिधानेहि वुत्ता पच्च वारा **सहजातादिवारानि**। परतो च संसट्ठसम्पयुत्तवारो द्वीसु अरूपधम्मवसेनेव पच्चयपच्चयुप्पन्ना च, सेसेसु चतूसु वारेसु, सत्तमेव पञ्चावारे च रूपारूपवसेन, पच्चयवारे, निस्सयवारे च सहजातपच्छाजातपुरेजातवसेन, सेसेसु सहजातवसेन पच्चयपच्चयुप्पन्ना च कथिताति अयं विसेसो। सत्तमवारे पन यस्मा “कुसलो धम्मो कुसलस्स धम्मस्स हेतुपच्चयेन पच्चयो”तिआदिना नयेन ते ते पञ्चे उद्धरित्वा पुन “कुसला हेतु सम्पयुत्तकानं खन्धान”न्तिआदिना नयेन सब्बेपि ते पञ्चा निज्जटा, निग्गुम्बा च कत्वा विभत्ता, तस्मा सो वारो पञ्चानं साधुकं विभत्तत्ता **पञ्चावारो**त्वेव सङ्गं गतो। इति इमेहि सत्तहि महावारेहि चतुवीसतिया समन्तपट्टानेसु सब्बेपि तिकदुका चतुवीसतिया पच्चयानं अनुलोमादिवसेन वित्थारतो विभत्ता। कथं? अनुलोमपट्टाने हि यदिदं द्वावीसतितिके निस्साय तिकपट्टानं नाम सब्बपठमं निद्दिट्ठं। तत्थ कुसलत्तिकं ताव इमेहि पटिच्चवारादीहि महावारेहि पच्चयानुलोमादिनयचतुक्कतो विभत्तं। तत्थ यो तावेस सब्बपठमो पटिच्चवारो नाम, सो उद्देसनिद्देसतो दुविधो होति।

तत्थ उद्देसवारो कुसलादयो पटिच्च हेतुपच्चयादिवसेन कुसलादीनं युत्तानं, अकुसलादीनं अयुत्तकानञ्च धम्मानं उप्पत्तिपुच्छनवसेनेव पवत्तत्ता “पुच्छावारो”तिपि, पुच्छानञ्जेव पञ्जापनतो “पण्णितवारो”तिपि वुच्चति। न हि तत्थ विस्सज्जनं अत्थि। निद्देसवारो पन पुच्छावारे परिपुच्छितेसु पञ्हेसु “सिया अकुसलं धम्मं पटिच्च अकुसलो धम्मो उप्पज्जेय्या”तिआदिकं अयुत्तं पञ्हं अनुद्धरित्वा लभ्भमानानञ्जेव पञ्चानं वसेन पवत्तो। इतरेसु पन सहजातादीसु, सेसेसु च तिकेसु, सेसपट्टानेसु च सब्बत्थ पुच्छावारो नत्थि, लभ्भमानवसेन सब्बविस्सज्जनमेव दस्सितन्ति इदमेत्थ सङ्खेपतो पाळिववत्थानं।

इदानीं पनेत्थ आदितो पट्टाय एवं विभङ्गनयो वेदितब्बो। अनुलोमपट्टानस्मिञ्चि तिकपट्टाने कुसलत्तिकस्स सत्तसु महावारेसु पठमस्स पटिच्चवारस्स पुच्छावारे ताव — “सिया कुसलं धम्मं पटिच्च कुसलो धम्मो उप्पज्जेय्य हेतुपच्चया...पे०... अकुसलो धम्मो...पे०... अब्याकतो...पे०... कुसलो च अब्याकतो च...पे०... अकुसलो च अब्याकतो च...पे०... कुसलो च अकुसलो च...पे०... कुसलो च अकुसलो च अब्याकतो च धम्मा उप्पज्जेय्युं हेतुपच्चया”ति कुसलपदमूला सत्त पुच्छा उद्धटा।



एवं अकुसलपदमूला, अब्याकतपदमूला च । “सिया कुसलञ्च अब्याकतञ्च धम्मं पटिच्च अकुसलो...पे०... सिया अकुसलञ्च अब्याकतञ्च...पे०... सिया कुसलञ्च अकुसलञ्च...पे०... सिया कुसलञ्च अकुसलञ्च अब्याकतञ्च धम्मं पटिच्चा”ति द्विमूलका, तिमूलका च सत्त सत्त पुच्छाति एकूनपज्जास पुच्छा हेतुपच्चयमूलका उद्धटा ।

इमिनाव नयेन “सिया कुसलं धम्मं पटिच्च कुसलो धम्मो उप्पज्जेय्य आरम्मणपच्चया...पे०... अविगतपच्चया”ति एवं सेसपच्चयमूलकापि पुच्छावेदितब्बा । एकमूलकनयो ।

यथा च एकमूलके, एवं “सिया कुसलं धम्मं पटिच्च कुसलो धम्मो उप्पज्जेय्य हेतुपच्चया आरम्मणपच्चया...पे०... हेतुपच्चया अविगतपच्चया”ति आदिना द्विमूलकेपि । “हेतुपच्चया आरम्मणपच्चया अधिपतिपच्चया...पे०... हेतुपच्चया आरम्मणपच्चया अनन्तरपच्चया...पे०... हेतुपच्चया आरम्मणपच्चया अविगतपच्चया”ति आदिना तिमूलकादीसु सब्बमूलकपरियोसानेसु वारेसु नया वेदितब्बा । हेतुपच्चयमूलकनयो ।

यथा च हेतुमूलके, एवं “सिया कुसलं धम्मं पटिच्च कुसलो धम्मो उप्पज्जेय्य आरम्मणपच्चया”ति आदिना सेसपच्चयमूलकेसुपि नयो जातब्बो । पच्चयानुलोमवारो । एतेनेव उपायेन “सिया कुसलं धम्मं पटिच्च कुसलो धम्मो उप्पज्जेय्य नहेतुपच्चया”ति आदिना सब्बपकारयुतो पच्चयपच्चनीकवारोपि । “सिया कुसलं धम्मं...पे०... उप्पज्जति हेतुपच्चया नारम्मणपच्चया”ति आदिना अनुलोमपच्चनीकपच्चयवारोपि । “सिया कुसलं धम्मं...पे०... उप्पज्जेय्य नहेतुपच्चया आरम्मणपच्चया”ति आदिना पच्चनीयानुलोमवारोपि सब्बत्थ नेतब्बोति अयं तावेत्थ पुच्छावारे नयो ।

निद्देसवारो पन उद्देसवारे दस्सितासु पुच्छासु कुसलाकुसलादीनं सहुप्पत्तिया अभावतो या एता “कुसलं धम्मं पटिच्च कुसलो धम्मो उप्पज्जती”ति आदिका पुच्छा सब्बसो विस्सज्जनं लभन्ति, ता पहाय या विस्सज्जनं लभन्ति, तासमेव विस्सज्जनवसेन पवत्तो । तत्रायं नयो — “कुसलं धम्मं पटिच्च कुसलो धम्मो उप्पज्जति हेतुपच्चया । कुसलं एकं खन्धं पटिच्च तयो खन्धा । तयो खन्धे पटिच्च एको खन्धो । द्वे खन्धे पटिच्च द्वे खन्धा । कुसलं धम्मं पटिच्च अब्याकतो धम्मो उप्पज्जति हेतुपच्चया । कुसले खन्धे पटिच्च चित्तसमुद्धानं रूपं । कुसलं धम्मं पटिच्च कुसलो च अब्याकतो च धम्मा उप्पज्जन्ति हेतुपच्चया । कुसलं एकं खन्धं पटिच्च तयो खन्धा चित्तसमुद्धानञ्च रूपं । तयो खन्धे पटिच्च एको खन्धो चित्तसमुद्धानञ्च रूपं । द्वे खन्धे पटिच्च द्वे खन्धा चित्तसमुद्धानञ्च रूपं”ति एवं कुसलपदमूलासु सत्तसु पुच्छासु तिस्सोव लब्भमाना विस्सज्जिता । तथा अकुसलपदमूलासुपि तिस्सोव । अब्याकतपदमूलासु पन “अब्याकतं धम्मं पटिच्च अब्याकतो धम्मो उप्पज्जति हेतुपच्चया । विपाकाब्याकतं किरियाब्याकतं एकं खन्धं पटिच्च तयो खन्धा चित्तसमुद्धानञ्च रूपं...पे०... द्वे खन्धे पटिच्च द्वे खन्धा चित्तसमुद्धानञ्च रूपं । पटिसन्धिकखणे विपाकाब्याकतं एकं खन्धं पटिच्च तयो खन्धा कटत्ता च रूपं... पे०... द्वे खन्धा कटत्ता च रूपं । खन्धे पटिच्च वत्थु, वत्थुं पटिच्च खन्धा । एकं महाभूतं पटिच्च तयो महाभूता...पे०... द्वे महाभूते पटिच्च द्वे महाभूता । महाभूते पटिच्च चित्तसमुद्धानं रूपं कटत्तारूपं उपादारूपं”ति एकाव । द्विमूलकादीसु च “कुसलञ्च अब्याकतञ्च धम्मं पटिच्च अब्याकतो धम्मो उप्पज्जति हेतुपच्चया । कुसले खन्धे च महाभूते च पटिच्च चित्तसमुद्धानं रूपं”ति एका । तथा “अकुसलञ्च अब्याकतञ्च पटिच्चा”ति, एवं हेतुपच्चयमूलकासु एकूनपज्जासाय पुच्छासु नवेव लब्भमाना विस्सज्जिता । सेसा चत्तालीस मोघपुच्छाति न विस्सज्जिता । एवं उपरि आरम्मणपच्चयादीसु विस्सज्जितावसेसा मोघपुच्छाति गहेतब्बा । विजाननसुखत्थं पन भगवता पुच्छावारे लब्भमाना, अलब्भमाना च सब्बापि ता दस्सिताति वेदितब्बाति ।

तत्थ **कुसलं धम्मं पटिच्चा**ति सहजातेसु वेदनाखन्धादिभेदं एकं कुसलं धम्मं पटिच्च पटिगन्त्वा, सहुप्पत्तिसङ्घातेन सदिसभावेन पत्वाति अत्थो । सदिसत्थो हि एत्थ पटिसद्दो “पटिपुग्गलो”ति आदीसु विय । **कुसलो धम्मो**ति सज्जाकखन्धादिभेदो सहुप्पन्नो कुसलो धम्मो । **उप्पज्जती**ति पाकटभावतो उद्धं उप्पादादिं पापुणाति, अत्तानं वा पटिलभति । **हेतुपच्चया**ति न केवलं कुसलधम्ममत्तमेव पटिच्च उप्पज्जति, अथ खो कुसलहेतुना हेतुपच्चयतं साधेन्तेन च उप्पज्जतीति एवमत्थो गहेतब्बो ।

एवमिदं “उप्पज्जेय्या”ति पुच्छाय “उप्पज्जती”ति अविसेसेन विस्सज्जनं वत्वा इदानीं यं धम्मं पटिच्च ये धम्मा उप्पज्जन्ति, ते पच्चयपच्चयुप्पन्ने खन्धवसेन विसेसेत्वा दस्सेतुं “**कुसलं एकं खन्धं**”ति आदि वुत्तं । यस्मा पनेत्थ एको खन्धो एकस्सेव, द्विन्नयेव वा, द्वे वा पन एकस्सेव पच्चया नाम न होन्ति, तस्मा ते पकारेन अनामसित्वा “एकं खन्धं पटिच्च तयो खन्धा”ति आदिना पच्चयभावेन गहितावसेसं सब्बं पच्चयुप्पन्नं कत्वा दस्सितन्ति वेदितब्बं । एवं उपरिपि सब्बत्थ । **चित्तसमुद्धानं रूपं**ति इदं पटिच्चत्थस्स सहजातत्थत्ता यं कुसलेन सहजातञ्चेव हेतुपच्चयञ्च लभति, तं दस्सेतुं वुत्तं “**विपाकाब्याकतं किरियाब्याकतं**”ति । एत्थ हेतुपच्चयाधिकारे अहेतुका न गहेतब्बा । **खन्धे पटिच्च वत्थू**ति आदि कटत्तारूपगगणेन वत्थुस्मिं गहितेपि वत्थुं पटिच्च अरूपकखन्धानं उप्पत्तिदस्सनत्थं वुत्तं । **एकं महाभूतं**ति आदि पन रूपाब्याकतं पटिच्च रूपाब्याकतस्स उप्पत्तिदस्सनत्थं । हेतुपच्चये उपत्थम्भकानमेव चेत्थ चित्तजानं, पटिसन्धिकं कम्मजानञ्च अज्जमज्जं पच्चयपच्चयुप्पन्ता गहेतब्बा, न अहेतुकचित्तजउतुजादीनं तेसं हेतुपच्चया उप्पत्तिया अभावतो । **महाभूते पटिच्च चित्तसमुद्धानं**ति आदि महाभूते पटिच्च उपादादीनं उप्पत्तिदस्सनत्थं वुत्तं । इमिना उपायेन आरम्मणपच्चयादीसुपि विस्सज्जनानं अत्थो वेदितब्बो ।

आरम्मणपच्चये “कुसलं धम्मं पटिच्च कुसलो धम्मो उप्पज्जति आरम्मणपच्चया । एकं खन्धं...पे०... द्वे खन्धे पटिच्च द्वे खन्धा । अकुसलं धम्मं पटिच्च अकुसलो धम्मो...पे०... अब्याकतं धम्मं पटिच्च अब्याकतो धम्मो उप्पज्जति आरम्मणपच्चया । विपाकाब्याकतं किरियाब्याकतं एकं खन्धं...पे०... द्वे

खन्धा । पटिसन्धिकखणे विपाकाब्याकतं एकं खन्धं...पे०... द्वे खन्धा । वत्थुं पटिच्च खन्धा”ति एवं तिस्सो विस्सज्जिता । सेसा रूपमिस्सकत्ता, रूपस्स च आरम्भणपच्चयेन अनुपत्तितो न गहिता । तेनेव “वत्थुं पटिच्च खन्धा”ति वत्त्वा “खन्धे पटिच्च वत्थू”ति न वुत्तं । एत्थ च आरम्भणपच्चयाति सहजातं कुसलं धम्मं पटिच्च उप्पज्जमानो कुसलो धम्मो ततो अज्जेन असहजातेन छब्बिधेन आरम्भणभूतेन पच्चयेनाति एवं अत्थो गहेतब्बो । न हि अत्तना सहजातं आरम्भणं कत्वा चित्तचेतसिका उप्पज्जन्ति ।

अधिपतिपच्चये हेतुपच्चयसदिसं विस्सज्जनं । अनन्तरसमनन्तरेसु पन रूपाभावतो आरम्भणपच्चयसदिसं । सहजातपच्चयेपि हेतुपच्चयसदिसं । अब्याकतं पटिच्च अब्याकतुप्पत्तिया पन “बाहिरं एकं महाभूतं पटिच्च...पे०... द्वे महाभूता । महाभूते पटिच्च उपादारूपं...पे०... आहारसमुद्धानं एकं महाभूतं...पे०... द्वे महाभूता...पे०... उतुसमुद्धानं एकं...पे०... द्वे महाभूता...पे०... असज्जसत्तानं एकं महाभूतं पटिच्च...पे०... द्वे महाभूता...पे०... कटत्तारूपं उपादारूपं”न्ति इदं अधिकं । एवं अज्जमज्जपच्चयेपि । केवलं तत्थ कटत्तारूपं उपादारूपञ्च न गहितं तेसं अज्जमज्जपच्चयत्ताभावा । निस्सयपच्चयेपि सहजातपच्चयसदिसं विस्सज्जनं । पटिच्चत्थस्स पन सहजातत्थत्ता चक्खवादीसु पुरेजातनिस्सया इध न गहिताति । उपनिस्सयपच्चयेपि रूपस्स उपनिस्सयपच्चयुप्पन्नत्ताभावा आरम्भणपच्चयसदिसमेव विस्सज्जनं ।

पुरेजातपच्चये पन “कुसलं धम्मं पटिच्च कुसलो धम्मो उप्पज्जति पुरेजातपच्चया । कुसलं एकं...पे०... द्वे खन्धा । वत्थुं पुरेजातपच्चया । अकुसलं धम्मं पटिच्च अकुसलो...पे०... अब्याकतं धम्मं पटिच्च अब्याकतो...पे०... पुरेजातपच्चया । विपाकाब्याकतं किरियाब्याकतं एकं खन्धं...पे०... द्वे खन्धा । वत्थुं पुरेजातपच्चया”ति एवं तिस्सो पुच्छा विस्सज्जिता । तत्थ वत्थुं पुरेजातपच्चयाति इदं आरम्भणपुरेजातनिवत्तनत्थं वुत्तं । तं हि चक्खुविज्जाणादीनंयेव पुरेजातपच्चयत्तं साधयति, न मनोविज्जाणधातुयाति इध न गहितं ।

पच्छाजातपच्चयो इध अरूपधम्मेषु न लब्धति । रूपधम्मेषु च उपत्थम्भकोव, न जनको, तस्मा “अब्याकतं धम्मं पटिच्च अब्याकतो धम्मो उप्पज्जती”तिआदि न वत्तब्बोवाति अयं न गहितो । आसेवनपच्चयेपि आरम्भणपच्चये विय तिस्सोव पुच्छा विस्सज्जिता ।

कम्मपच्चये “कुसलं धम्मं पटिच्च कुसलो धम्मो उप्पज्जति कम्मपच्चया । कुसलं एकं खन्धं...पे०... अब्याकतो धम्मो उप्पज्जति...पे०... चित्तसमुद्धानञ्च रूपं...पे०... कुसलो च अब्याकतो च धम्मा...पे०... चित्तसमुद्धानं रूपं”न्ति कुसलपदे तिस्सो, तथा अकुसलपदे । अब्याकतपदे पन “अब्याकतं धम्मं पटिच्च अब्याकतो...पे०... विपाकाब्याकतं किरियाब्याकतं एकं खन्धं पटिच्च...पे०... महाभूते पटिच्च चित्तसमुद्धानं रूपं कटत्तारूपं उपादारूपं, असज्जसत्तानं...पे०... कटत्तारूपं उपादारूपं”न्ति एवं तिस्सो । “कुसलञ्च अब्याकतञ्च धम्मं पटिच्च अब्याकतो...पे०... कुसले खन्धे च महाभूते च पटिच्च चित्तसमुद्धानं रूपं”न्तिआदिना सहजातसदिसं विस्सज्जनं । नत्थिविगतपच्चयेसु आरम्भणसदिसं ।

एवं सब्बपच्चयेसु लब्धमानपज्हे विस्सज्जनं दस्सेत्वा ततो हेतुअधिपतिज्ञानमग्गपच्चया एकसदिसा । आरम्भणानन्तरसमनन्तरूपनिस्सयासेवननत्थिविगतपच्चया एकसदिसा । सहजातअज्जमज्जनिस्सयअत्थिविगता एकसदिसा । आसेवनपच्चये विपाको न लब्धति । अज्जमज्जपच्चये चित्तजरूपं, उपादारूपञ्च न लब्धतीतिआदिना पच्चयानं अज्जमज्जसदिसत्तं वत्त्वा पुन तेसं “हेतुया नव । आरम्भणे तीणि । अधिपतिया नव । अनन्तरसमनन्तरेसु तीणि । सहजाते नव । अज्जमज्जे तीणि । निस्सये नव । उपनिस्सये तीणि । पुरेजाते तीणि । आसेवने तीणि । कम्मे नव । विपाके एकं । आहारे नव । इन्द्रिये नव । ज्ञाने नव । मग्गे नव । सम्पयुत्ते तीणि । विप्पयुत्ते नव । अत्थिया नव । नत्थिया तीणि । विगते तीणि । अविगते नवा”ति एवं हेतुपच्चयादीनं एकेकस्मिं पुच्छाविस्सज्जनवारगणना वुत्ताति अयं एकमूलकनयो ।

यथा च एकमूलके, एवं “हेतुपच्चया आरम्भणपच्चया”तिआदिना द्विमूलकादीसुपि सब्बमूलकपरियोसानेसु यथानुरूपं नयो नेतब्बो । पाळियम्पि वित्थारनयं अदस्सेत्वा “हेतुपच्चया आरम्भणे तीणी”तिआदिना विस्सज्जनवारगणनभेदो दस्सितोति अयं पच्चयानुलोमे नयो ।

पच्चयपच्चनीये पन “अकुसलं धम्मं पटिच्च अकुसलो धम्मो उप्पज्जति नहेतुपच्चया । विचिकिच्छासहगते उद्धच्चसहगते खन्धे पटिच्च विचिकिच्छासहगते उद्धच्चसहगते मोहो । अब्याकतं धम्मं पटिच्च अब्याकतो धम्मो उप्पज्जति नहेतुपच्चया । अहेतुकं विपाकाब्याकतं किरियाब्याकतं एकं खन्धं...पे०... द्वे खन्धा चित्तसमुद्धानञ्च रूपं । अहेतुकपटिसन्धिकखणे विपाकाब्याकतं एकं खन्धं...पे०... द्वे खन्धा कटत्ता च रूपं...पे०... वत्थुं पटिच्च खन्धा । एकं महाभूतं पटिच्च...पे०... महाभूते पटिच्च चित्तसमुद्धानं रूपं, कटत्तारूपं उपादारूपं...पे०... एकं महाभूतं पटिच्च...पे०... उपादारूपं”न्ति इमा द्वे विस्सज्जिता ।

नारम्भणपच्चये “कुसलं धम्मं पटिच्च अब्याकतो...पे०... कुसले...पे०... अकुसलं धम्मं पटिच्च अब्याकतो...पे०... अकुसले...पे०... अब्याकतं धम्मं पटिच्च अब्याकतो...पे०... कुसलञ्च अब्याकतञ्च धम्मं पटिच्च अब्याकतो...पे०... चित्तसमुद्धानं रूपं, अकुसलञ्च अब्याकतञ्च धम्मं पटिच्च अब्याकतो...पे०... महाभूते पटिच्च चित्तसमुद्धानं रूपं”न्ति इमा पञ्च विस्सज्जिता ।

नाधिपतिपच्चये “कुसलं धम्मं पटिच्च कुसलो...पे०... कुसलं एकं खन्धं...पे०... द्वे खन्धा । कुसलं धम्मं पटिच्च अब्याकतो...पे०... कुसले खन्धे पटिच्च

चित्तसमुद्धानं रूपं। कुसलं धम्मं पटिच्च कुसलो च अब्याकतो च धम्मा उपपज्जन्ति...पे०... अकुसलं धम्मं पटिच्च अकुसलो...पे०... द्वे खन्धे पटिच्च द्वे खन्धा, अकुसलं धम्मं पटिच्च अब्याकतो...पे०... अकुसले खन्धे पटिच्च चित्तसमुद्धानं रूपं। अकुसलं धम्मं पटिच्च अकुसलो च अब्याकतो च धम्मा... पे०... अब्याकतं धम्मं पटिच्च अब्याकतो...पे०... महाभूते पटिच्च...पे०... कटत्तरूपं उपादारूपं। कुसलञ्च अब्याकतञ्च धम्मं पटिच्च अब्याकतो...पे०... कुसले खन्धे च महाभूते च पटिच्च चित्तसमुद्धानं रूपं। अकुसलञ्च अब्याकतञ्च धम्मं पटिच्च अब्याकतो...पे०... अकुसले खन्धे च महाभूते च पटिच्च चित्तसमुद्धानं रूपं”न्ति नव पुच्छा विस्सज्जिता। नानन्तरनसमनन्तरपच्चया नारम्मणपच्चयसदिसा।

नाञ्जमञ्जपच्चये “कुसलं धम्मं पटिच्च अब्याकतो...पे०... कुसले...पे०... चित्तसमुद्धानं रूपं। अकुसलं धम्मं पटिच्च अब्याकतो...पे०... अकुसले... पे०... चित्तसमुद्धानं रूपं। अब्याकतं धम्मं पटिच्च अब्याकतो...पे०... विपाकाब्याकते किरियाब्याकते खन्धे पटिच्च चित्तसमुद्धानं रूपं। पटिसन्धिकखणे विपाकाब्याकते...पे०... कटत्ता रूपं। महाभूते पटिच्च चित्तसमुद्धानं रूपं कटत्तरूपं उपादारूपं। बाहिरे महाभूते पटिच्च उपादारूपं। आहारसमुद्धाने महाभूते पटिच्च उपादारूपं। उत्तुसमुद्धाने...पे०... उपादारूपं। असञ्जसत्तानं महाभूते पटिच्च कटत्तरूपं उपादारूपं। कुसलञ्च अब्याकतञ्च धम्मं पटिच्च अब्याकतो...पे०... कुसले खन्धे च महाभूते च पटिच्च चित्तसमुद्धानं रूपं। अकुसलञ्च अब्याकतञ्च धम्मं पटिच्च अब्याकतो...पे०... अकुसले खन्धे च महाभूते च पटिच्च चित्तसमुद्धानं रूपं”न्ति पञ्च विस्सज्जिता। तत्थ **विपाकाब्याकते खन्धे पटिच्च कटत्तरूपं**न्ति हृदयवत्थुवज्जं वेदितव्वं। नउपनिस्सयपच्चयो नारम्मणपच्चयसदिसो।

नपुरेजातपच्चये “कुसलं धम्मं पटिच्च कुसलो...पे०... अरूपे कुसलं...पे०... द्वे खन्धा। कुसलं पटिच्च अब्याकतो...पे०... चित्तसमुद्धानं रूपं”न्ति कुसलपदे द्वे, तथा अकुसलपदेपि। “अब्याकतं पटिच्च अब्याकतो...पे०... अरूपे विपाकाब्याकतं किरियाब्याकतं...पे०... बाहिरं...पे०... उपादारूपं। कुसलञ्च अब्याकतञ्च धम्मं पटिच्च अब्याकतो। कुसले खन्धे च महाभूते च पटिच्च चित्तसमुद्धानं रूपं। अकुसलञ्च अब्याकतञ्च...पे०... अकुसले खन्धे च...पे०... रूपं”न्ति इमा तिस्सोति सत्त विस्सज्जिता। नपच्छाजातनासेवनपच्चया नाधिपतिपच्चयसदिसा। तत्थ कुसलाकुसलकिरियानं पठमजवनवसेन नासेवनपच्चयप्पवन्ति वेदितव्वा।

नकम्मपच्चये “कुसलं पटिच्च कुसलो, कुसला चेतना। अकुसलं पटिच्च अकुसलो, अकुसला चेतना। अब्याकतं पटिच्च अब्याकतो, विपाककिरिया चेतना। बाहिरं, आहारसमुद्धानं, उत्तुसमुद्धानं”न्ति तिस्सो विस्सज्जिता।

नविपाकपच्चये “कुसलं पटिच्च कुसलो, अब्याकतो। कुसलो च अब्याकतो चा”ति कुसलपदे तिस्सो, तथा अकुसलपदेपि। “अब्याकतं पटिच्च अब्याकतो...पे०... बाहिरं आहारसमुद्धानं उत्तुसमुद्धानं असञ्ज...पे०... उपादारूपं...पे०... अकुसलञ्च अब्याकतञ्च अब्याकतो”ति इमा तिस्सोति नव विस्सज्जिता।

नाहारपच्चये “अब्याकतं पटिच्च अब्याकतो। बाहिरं उत्तुसमुद्धानं, असञ्ज...पे०... उपादारूपं”न्ति एकाव।

नइन्द्रियपच्चये “अब्याकतं पटिच्च अब्याकतो। बाहिरं आहारसमुद्धानं...पे०... उत्तुसमुद्धानं...पे०... असञ्जसत्तानं महाभूते पटिच्च रूपजीवितिन्द्रिय”न्ति एकाव।

नज्ञानपच्चये “अब्याकतं पटिच्च अब्याकतो। पञ्चविज्जाणसहगतं...पे०... बाहिरं आहारउत्तुअसञ्जउपादारूपं”न्ति एकाव।

नमग्गपच्चये “अब्याकतं पटिच्च अब्याकतो। अहेतुकं विपाकाब्याकतं किरियाब्याकतं...पे०... चित्तसमुद्धानं...पे०... अहेतुकपटिसन्धिकखणे विपाका... पे०... कटत्ता च रूपं...पे०... बाहिरं आहारउत्तुअसञ्जउपादारूपं”न्ति एकाव।

नसम्पयुत्तपच्चयो नारम्मणपच्चयसदिसो।

नविप्पयुत्तपच्चये “कुसलं पटिच्च कुसलो। अरूपे कुसलोव। अकुसलं...पे०... अरूपे अकुसलो। अब्याकतं पटिच्च अब्याकतो, अरूपे विपाककिरियाब्याकतं। बाहिरं असञ्ज...पे०... उपादारूपं”न्ति इमा तिस्सोव पुच्छा विस्सज्जिता। नोनत्थिनोविगतपच्चया नारम्मणपच्चयसदिसा। नसहजातननिस्सयनोअत्थिनोअविगतपच्चया पनेत्थ चत्तारोपि न लब्भन्तीति।

एवं पच्चनीके लब्भमानपञ्चविस्सज्जनं दस्सेत्वा ततो “नहेतुया द्वे। नारम्मणे पञ्च। नाधिपतिया नव। नानन्तरे नसमनन्तरे नाञ्जमञ्जे नउपनिस्सये पञ्च। नपुरेजाते सत्त। नपच्छाजाते नासेवने नव। नकम्मे तीणि। नविपाके नव। नाहारे नइन्द्रिये नज्ञाने नमग्गे एकं। नसम्पयुत्ते पञ्च। नविप्पयुत्ते तीणि। नोनत्थिनोविगतेसु पञ्चा”ति विस्सज्जनवारगणना वुत्ताति अयं एकमूलकनयो।

इमिनाव नयेन द्विमूलकादीसुपि यथानुरूपं नयो नेतव्वो, पाळियं पन “नहेतुपच्चया नारम्मणे एक”न्तिआदिना विस्सज्जनवारगणनाव दस्सिताति अयं

पचयपचनीयनयो ।

इमिना वुत्तानुसारेनेव “कुसलं धम्मं पटिच्च अब्याकतो धम्मो उप्पज्जति हेतुपचयया नारम्मणपचयया”तिआदिना अनुलोमपचनीयनये, “अकुसलं धम्मं पटिच्च अकुसलो धम्मो उप्पज्जति नहेतुपचयया आरम्मणपचयया”तिआदिना पचनीयानुलोमनये पञ्चविस्सज्जननयो वेदितब्बो । पाळियं पनेत्थ विस्सज्जनवारगणनाव दस्सिताति अयं अनुलोमपचनीयकुसलत्तिके पटिच्चवारनयो ।

सहजातवारादीसुपि छवारेसु पटिच्चवारे वुत्तानुसारेन सब्बत्थ नयो नेतब्बो । ये पन तत्थ तत्थ पाळिविसेसा, अत्थविसेसा च उपलब्धन्ति, ते पट्टानपाळिअट्टकथासु एव सब्बाकारतो गहेतब्बा । इथ पन ते सब्बे सङ्खेपनयतो दस्सियमानापि गन्थभारियं करोन्तीति न दस्सिता ।

तेसु पन वारेसु “कुसलं धम्मं सहजातो कुसलो धम्मो उप्पज्जति हेतुपचयया । कुसलं धम्मं पचयया... कुसलं धम्मं निस्साय... कुसलं धम्मं संसट्ठो... कुसलं धम्मं सम्पयुत्तो कुसलो धम्मो उप्पज्जति हेतुपचयया”ति एवं आदितो पच्चसु वारेसु पाळिगति जातब्बा । तेसु च पटिच्चसहजाता एकत्था, पचयनिस्सया एकत्था, संसट्ठसम्पयुत्ता एकत्था । तत्थ “कुसलं धम्मं सहजातो”तिआदीसु कुसलं धम्मं पटिच्च तेन सहजातो हुत्वातिआदिना यथानुरूपं अत्थो वेदितब्बो । पच्छिमे पन पञ्चावारे “कुसलो धम्मो कुसलस्स धम्मस्स हेतुपचयेन पचयो । कुसला हेतू सम्पयुत्तकानं खन्धानं हेतुपचयेन पचयो । कुसलो अब्याकतस्स...पे०... कुसलस्स च अब्याकतस्स च...पे०... कुसला हेतू सम्पयुत्तकानं खन्धानं चित्तसमुद्धानानञ्चा”तिआदिना हेतुपचये,

“कुसलो धम्मो कुसलस्स धम्मस्स आरम्मणपचयेन पचयो । दानं दत्त्वा सीलं समादियित्वा उपोसथकम्मं कत्वा तं पचवेकखति । पुब्बे सुचिण्णानि...पे०... झाना वुड्ढित्वा झानं... सेखा गोत्रभुं वोदानं मगं पचवेकखन्ति । सेखा वा पुथुज्जना वा कुसलं अनिच्चतो दुक्खतो अनत्ततो विपस्सन्ति । चेतोपरियजाणेन कुसलचित्तसमङ्गिस्स चित्तं जानन्ति । आकासानञ्चायतनकुसलं विज्जाणञ्चायतनकुसलस्स आरम्मणपचयेन पचयो । आकिञ्चञ्चायतनकुसलं नेवसञ्जानासञ्चायतनकुसलस्स... कुसला खन्धा इद्धिविधजाणस्स चेतोपरियपुब्बेनिवासयथाकम्मूपग अनागतंसजाणस्स आरम्मणपचयेन पचयो ।

कुसलो अकुसलस्स...पे०... दानं दत्त्वा...पे०... कत्वा तं अस्सादेति अभिनन्दति । तं आरब्ध रागो उप्पज्जति । दिट्ठि विचिकिच्छा उद्धच्चं दोमनस्सं उप्पज्जति । पुब्बे सुचिण्णानि अस्सादेति ...पे०... दोमनस्सं उप्पज्जति । झाना वुड्ढित्वा झानं अस्सादेति...पे०... उद्धच्चं उप्पज्जति । झाने परिहीने विपटिसारिस्स दोमनस्सं उप्पज्जति ।

कुसलो अब्याकतस्स...पे०... पचयो । अरहा मगं पचवेकखति । पुब्बे सुचिण्णानि... कुसल...पे०... विपस्सति...पे०... विपाको तदारम्मणता उप्पज्जति । आकासानञ्चायतनकुसलं विज्जाणञ्चायतनविपाकस्स...पे०... किरियस्स । आकिञ्चञ्चायतन...पे०... विपाकस्स च किरियस्स च । कुसला खन्धा चेतोपरिय...पे०... अनागतंसजाणस्स आवज्जनाय ।

अकुसलो अकुसलस्स...पे०... पचयो । रागं अस्सादेति...पे०... उद्धच्चं उप्पज्जति । अकुसलो कुसलस्स...पे०... पचयो । सेखा पहीने किलेसे...पे०... अनागतंसजाणस्स । अकुसलो अब्याकतस्स... अरहा पहीने किलेसे...पे०... आवज्जनाय ।

अव्याकतो अब्याकतस्स... अरहा फलं पचवेकखति । निब्बानं, चक्खुं...पे०... फोड्ढं विपस्सति । दिब्बेन चक्खुना रूपं पस्सति...पे०... आकिञ्चञ्चायतनकिरियं...पे०... किरियस्स । रूपायतनं चक्खुविज्जाणस्स...पे०... आवज्जनाय । अब्याकतो कुसलस्स... सेखा फलं...पे०... अनागतंसजाणस्स । अब्याकतो अकुसलस्स... चक्खुं अस्सादेती”तिआदिना आरम्मणपचये च,

“कुसलो कुसलस्स अधिपतिपचयेन पचयो । आरम्मणाधिपति, सहजाताधिपति । आरम्मणाधिपति — दानं दत्त्वा”तिआदिना अधिपतिपचये च,

“कुसलो कुसलस्स अनन्तरपचयेन पचयो”तिआदिना वित्थारतो अनन्तरसमनन्तरसहजातअज्मज्जनिस्सयपचयेसु च,

“कुसलो कुसलस्स उपनिस्सयपचयेन पचयो । आरम्मणूपनिस्सयो अनन्तरूपनिस्सयो पकतूपनिस्सयो । आरम्मणूपनिस्सयो — दानं दत्त्वा”तिआदिना आरम्मणपचये वुत्तनयेन, “अनन्तरूपनिस्सयो — पुरिमा पुरिमा कुसला खन्धा पच्छिमानं पच्छिमानं”न्तिआदिना अनन्तरपचये वुत्तनयेनेव, “पकतूपनिस्सयो — सद्धं उपनिस्साय...पे०... उपोसथकम्मं करोति । झानं, विपस्सनं, मगं, अभिज्जं, समापत्तिं उप्पादेति । सीलं, सुतं, चागं, पज्जं उपनिस्साय...पे०... पठमस्स झानस्स परिकम्मं पठमस्स झानस्स उपनिस्सयपचयेन पचयो...पे०... आकिञ्चञ्चायतनं नेवसञ्जानासञ्चायतनस्स... पे०... यथाकम्मूपगजाणं अनागतंसजाणस्स...पे०... पठमस्स मगस्स परिकम्मं पठमस्स...पे०... ततियो मगो चतुत्थस्स । मगो सेखानं अत्थपटिसम्भिदाय... पे०... ठानाठानकोसल्लस्स उपनिस्सय । कुसलो अकुसलस्स...पे०... आरम्मणूपनिस्सयो । पकतूप...पे०... पकतूपनिस्सयो — सद्धं उपनिस्साय मानं जण्पेति । दिट्ठिं गण्हाति...पे०... सद्धा सीलं सुतं चागो पज्जा रागस्स, दोसस्स, मोहस्स, मानस्स, दिट्ठिया । पत्थनाय...पे०... कुसलो अब्याकतस्स...पे०... आरम्मणूपनिस्सयो । अनन्तरूपनिस्सयो । पकतूप...पे०... पकतूपनिस्सयो — सद्धं उपनिस्साय अत्तानं आतापेति...पे०... काथिकस्स सुखस्स, दुक्खस्स,

फलसमापत्तिया । कुसलं कम्मं विपाकस्स...पे०... मग्गो अरहतो अत्थपटिसम्भिदाय पच्चयो ।

अकुसलो अकुसलस्स...पे०... पकतूपनिस्सयो — रागं उपनिस्साय पाणं हनति...पे०... सम्मं पलपति...पे०... सङ्गं भिन्दति । दोसं, मोहं, मानं, दिट्ठिं, पत्थनं उपनिस्साय...पे०... सङ्गं भिन्दति...पे०... पाणातिपातो पाणातिपातस्स...पे०... सङ्गभेदकम्मस्स...पे०... पच्चयो ।

अकुसलो कुसलस्स...पे०... पकतूपनिस्सयो — रागं उपनिस्साय दानं देति...पे०... मग्गं उप्पादेति...पे०... समापत्तिं उप्पादेति । रागो...पे०... पत्थना । सद्भाय, सीलस्स...पे०... पञ्चाय उपनिस्सय । पाणं हन्त्वा तस्स पटिघातत्थाय दानं देती'तिआदिना च उपनिस्सयपच्चये च,

“अब्याकतो अब्याकतस्स पुरेजातपच्चयेन पच्चयो...पे०... आरम्मणपुरेजातं — अरहा चक्खुं...पे०... फोडुब्बे, वत्थुं विपस्सति...पे०... दिब्बेन चक्खुना रूपं पस्सति...पे०... रूपायतनं चक्खुविज्जाणस्स...पे०... वत्थुपुरेजातं — चक्खायतनं चक्खुविज्जाणस्स...पे०... वत्थु विपाकाब्याकतान'न्तिआदिना पुरेजातपच्चये च,

“कुसलो अब्याकतस्स...पे०... पच्छाजाता कुसला खन्धा पुरेजातस्स इमस्स कायस्सा'तिआदिना पच्छाजातपच्चये च,

“कुसलो कुसलस्स...पे०... पुरिमा पुरिमा कुसला खन्धा'तिआदिना आसेवनपच्चये च,

“सहजाता नानाक्खणिका, सहजाता कुसला चेतना...पे०... सम्पयुत्तकानं खन्धानं चित्तसमुद्धानानञ्च रूपानं । नानाक्खणिका विपाकानं खन्धानं कटत्ता च रूपान'न्तिआदिना कम्मपच्चये च,

“अब्याकतो अब्याकतस्स...पे०... एको खन्धो तिण्णन'न्तिआदिना विपाकपच्चये च,

“कुसलो कुसलस्सा'तिआदिना आहारपच्चयादीसु च, “कुसलो अब्याकतस्स, सहजातं, पच्छाजातं, सहजाता चित्तसमुद्धानानं रूपानं । पच्छाजाता इमस्स कायस्स...पे०... अब्याकतो कुसलस्स...पे०... पुरेजातं वत्थु कुसलानं खन्धानं विप्पयुत्तपच्चयेन पच्चयो'तिआदिना विप्पयुत्तपच्चयादीसु च पाळिगति वेदितव्वा ।

तत्थ कुसलधम्मो नामेस यस्मा उप्पज्जन्तो ठपेत्वा पच्छाजातपच्चयं, विपाकपच्चयञ्च सेसेहि द्वावीसतिया पच्चयेहि उप्पज्जति । कुसलस्स च पच्चयो होन्तो ठपेत्वा पुरेजातपच्छाजातविपाकविप्पयुत्तपच्चये सेसेहि वीसतिया पच्चयेहि पच्चयो होति । एवं कुसलो कुसलादीनं, अकुसलो च अकुसलादीनं यथानुरूपं पच्चया होन्ति, तस्मा कुसलादीनं तंतपच्चयुप्पन्नविभागं दस्सेतुं पञ्चावारो वुत्तो । तत्थ **सेखा गोत्रभुन्ति** सोतापन्नं सन्धाय वुत्तं, **वोदानन्ति** सकदागामिअनागामिनो । तेसं हि गोत्रभुचित्तं वोदानं नाम । **मग्गा बुद्धिहत्वाति** मग्गवीथितो बुद्धाय । न हि मग्गानन्तरा पच्चवेक्खणा नाम अत्थीति अयं अनुलोमपट्टाने कुसलत्तिकनयो ।

वेदनात्तिकादीसु “सुखाय वेदनाय सम्पयुत्तं धम्मं पटिच्च सुखाय वेदनाय सम्पयुत्तो धम्मो उप्पज्जति हेतुपच्चया । सुखाय वेदनाय सम्पयुत्तं एकं खन्धं पटिच्च द्वे खन्धा । द्वे खन्धे पटिच्च एको खन्धो'तिआदिना कुसलत्तिके वुत्तानुसारेण पटिच्चवारादीसु पञ्चावारपरियोसानेसु सत्तसु वारेसु एकेकस्मिं पच्चयानुलोमादीहि च एकमूलादीहि नयेहि च सब्बत्तिकेसु लब्भमानपदवसेन गणनानयो योजेत्वा जातव्वो । तत्थ वेदनात्तिके वेदनाक्खन्धस्स अलम्भनतो “एकं खन्धं निस्साय द्वे खन्धा'तिआदि वुत्तं । सब्बत्थ विसेसो पाळिअट्ठकथानुसारेणैव जातव्वोति अयं अनुलोमपटिलोमे **तिकपट्टाननयो** ।

दुकपट्टाने पन “हेतुं धम्मं पटिच्च हेतु धम्मो उप्पज्जति हेतुपच्चया । अलोभं पटिच्च अदोसो । अमोहो । अदोसं अमोहं पटिच्च अलोभो । अदोसो । लोभं पटिच्च मोहो । मोहं पटिच्च लोभो । दोसं पटिच्च मोहो । मोहं पटिच्च दोसो । पटिसन्धिकखणे हेतुं धम्मं पटिच्च नहेतु धम्मो उप्पज्जति...पे०... हेतू च नहेतू च । नहेतुं पटिच्च नहेतु धम्मो न...पे०... हेतू च नहेतू चा'तिआदिना हेतुदुके,

“सहेतुकं धम्मं पटिच्च सहेतुको धम्मो उप्पज्जति हेतुपच्चया । सहेतुकं एकं खन्धं...पे०... सहेतुकं धम्मं पटिच्च । अहेतुको...पे०... चित्तसमुद्धानं रूपं । पटिसन्धिकखणे...पे०... सहेतुको च, अहेतुको च...पे०... अहेतुकं खन्धं पटिच्च अहेतुको । विचिकिच्छासहगतं उद्धच्चसहगतं मोहं पटिच्च सम्पयुत्तका खन्धा...पे०... चित्तसमुद्धानं । आहारसमुद्धान'न्तिआदिना सहेतुकदुकादीसु च केनचिविज्जेय्यदुकवज्जितेसु सब्बदुकेसु पच्चेकं पटिच्चवारादीसु सत्तसु महावारेसु एकेकस्मिं पच्चयानुलोमादीसु चतूसु नयेसु एकमूलकादीहि सब्बवारेहि कुसलत्तिके वुत्तानुसारेण यथानुरूपं विभङ्गनयो योजेत्वा जातव्वो । सब्बस्मिप्पि हि पट्टाने केनचिविज्जेय्यदुकं न लब्भतीति अयं **दुकपट्टाननयो** ।

दुकतिकपट्टाने पन “हेतुं कुसलं धम्मं पटिच्च हेतु कुसलो धम्मो उप्पज्जति हेतुपच्चया'तिआदिना हेतुदुकेन सङ्घि कुसलत्तिके कुसलं पदं योजेत्वा पटिच्चवारादीसु सत्तसु वारेसु पच्चयानुलोमादीनं चतुन्नं नयानं वसेन लब्भमानकपच्चया एकमूलकादिनयेहि दस्सिता । यथा च कुसलं पदं, एवं अकुसलं

पदं, अब्याकतञ्च हेतुदुकेन योजेत्वा वृत्तनयेन दस्सेत्वा हेतुकुसलदुकतिकन्ति ठपितं। पाळि पन अतिसंखित्ता। यथा कुसलत्तिकं, एवं “हेतुं सुखाय वेदनाय सम्पयुत्तं धम्मं पटिच्च हेतु सुखाय वेदनाय सम्पयुत्तो धम्मो उप्पज्जति हेतुपच्चया”तिआदिना लब्भमानकपदवसेन वेदनात्तिकादयोपि हेतुदुकेन योजेत्वा हेतुवेदनदुकतिकादीनि एकवीसतितिकदुकतिकादिनि दस्सितानीति। यथा च हेतुदुकेन सद्धिं लब्भमानकपदवसेन द्वावीसतितिका योजिता, एवं सहेतुकदुकादीहि सब्बेहि सद्धिं पच्चेकं द्वावीसतितिका योजेतब्बा। पाळि पनेत्थ इतो परेसुपि सब्बत्थ अतिसंखित्ता। एवं द्वावीसतितिके गहेत्वा दुकसते पक्खिपित्वा दुकतिकपट्टानं देसितन्ति अयं **दुकतिकपट्टाननयो**।

तिकदुकपट्टानेपि “कुसलं हेतुं धम्मं पटिच्च कुसलो हेतु धम्मो उप्पज्जति हेतुपच्चया”तिआदिना कुसलत्तिकेन सद्धिं हेतुपदं योजेत्वा पटिच्चवारादीसु सत्तसु महावारेसु पच्चयानुलोमादिनयचतुक्कवसेन लब्भमानकपच्चया एकमूलादीहि सब्बवारेहि दस्सिता। यथा हेतुपदं, एवं नहेतुपदम्पि कुसलत्तिकेन सद्धिं योजेत्वा कुसलहेतु तिकदुकन्ति ठपितं। यथा च कुसलत्तिकेन सद्धिं हेतुदुकं, एवं “सुखाय वेदनाय सम्पयुत्तं हेतुं कुसलं धम्मं पटिच्चा”तिआदिना वेदनात्तिकादीहिपि तं योजेत्वा वेदनात्तिकदुकादीनि एकवीसतितिकदुकादीनि दस्सितानि। यथा च हेतुदुकं, एवं सहेतुकादयोपि सब्बे पच्चेकं द्वावीसतिया तिकेहि लब्भमानपदवसेनेन योजिता। एवं दुकसतं द्वावीसतिया तिकेसु पक्खिपित्वा तिकदुकपट्टानं देसितन्ति अयं **तिकदुकपट्टाननयो**।

तिकतिकपट्टानेपि “कुसलं सुखाय वेदनाय सम्पयुत्तं धम्मं पटिच्च कुसलो सुखाय वेदनाय सम्पयुत्तो धम्मो उप्पज्जति हेतुपच्चया”तिआदिना कुसलत्तिकं वेदनात्तिकादीहि सब्बतिकेहि, वेदनात्तिकादयो च कुसलत्तिकादीहि वृत्तनयेन योजेत्वा पच्चया दस्सिता। एवं तिकेसु एव तिके पक्खिपित्वा तिकतिकपट्टानं देसितन्ति अयं **तिकतिकपट्टाननयो**।

दुकदुकपट्टानेपि “हेतुं सहेतुकं धम्मं पटिच्च हेतु सहेतुको धम्मो उप्पज्जति हेतुपच्चया”तिआदिना हेतुदुकं सहेतुकादीहि, सहेतुकञ्च हेतुदुकादीहि योजेत्वा हेतु वृत्तनयेहि पच्चया दस्सिता। एवं दुकेसु एव दुके पक्खिपित्वा दुकदुकपट्टानं देसितन्ति अयं **दुकदुकपट्टाननयो**। एवं ताव अनुलोमपट्टाने —

“तिकञ्च पट्टानवरं दुकुत्तमं,  
दुकतिकञ्चेव तिकदुकञ्च।  
तिकतिकञ्चेव दुकदुकञ्च,  
छ **अनुलोमहि** नया सुगम्भीरा”ति॥ —

वृत्ता छ नया वेदितब्बा। पच्चयवसेन पनेतेसु छसु एकेकस्मिं पट्टाने पच्चयानुलोमादीनं चतुन्नं नयानं वसेन एतेन परियायेन चतुवीसतिनयपटिमण्डितमिदं धम्मनुलोमपट्टानन्ति वेदितब्बं। अयं **अनुलोमपट्टाननयो**।

पच्चनीयपट्टाने पन “नकुसलं धम्मं पटिच्च नकुसलो धम्मो उप्पज्जति हेतुपच्चया। अकुसलं अब्याकतं एकं खन्धं पटिच्च...पे०... द्वे खन्धा, चित्तसमुद्धानञ्च रूप”न्तिआदिना **तिकपट्टाने**, “नहेतुं धम्मं पटिच्च नहेतु धम्मो उप्पज्जति हेतुपच्चया। नहेतुं एकं खन्धं पटिच्च...पे०... चित्तसमुद्धानञ्च रूप”न्तिआदिना **दुकपट्टाने** च, “नहेतुं नकुसलं धम्मं पटिच्च नहेतु नकुसलो धम्मो उप्पज्जति हेतुपच्चया। नहेतुं नकुसलं अब्याकतं एकं खन्धं पटिच्च तयो खन्धा”तिआदिना **दुकतिकपट्टाने** च, “नकुसलं नहेतुं धम्मं पटिच्च नकुसलो नहेतु धम्मो उप्पज्जती”तिआदिना **तिकदुकपट्टाने** च, “नकुसलं नसुखाय वेदनाय सम्पयुत्तं धम्मं पटिच्च नकुसलो नसुखाय वेदनाय सम्पयुत्तो धम्मो उप्पज्जती”तिआदिना **तिकतिकपट्टाने** च, “नहेतुं नसहेतुकं धम्मं पटिच्च नहेतु नसहेतुको धम्मो उप्पज्जति हेतुपच्चया”तिआदिना **दुकदुकपट्टाने** चाति छसु पच्चनीयपट्टानेसु अनुलोमतिकपट्टानादीसु छसु पट्टानेसु वृत्तेन सब्बेन पकारेन पाळिनयो वेदितब्बो। इदञ्च कुसलादीनं, हेतुआदीनञ्च धम्मानं पच्चयुप्पन्नभावपटिक्खेपवसेन पवत्तता धम्मपच्चनीयपट्टानं नाम जातं। तत्थ हि **नकुसलं धम्मं पटिच्चा**ति कुसलस्स पच्चयपटिक्खेपो। **नकुसलो धम्मो उप्पज्जती**ति कुसलस्स पच्चयुप्पन्नभावपटिक्खेपो। तथा “अकुसलं अब्याकतं एकं खन्धं पटिच्च...पे०... अकुसला, अब्याकता खन्धा चित्तसमुद्धानञ्च रूपं उप्पज्जती”ति एवमादिना नयेनेत्थ अत्थो वेदितब्बो। एवमेत्थ पच्चनीयपट्टाने —

“तिकञ्च पट्टानवरं दुकुत्तमं,  
दुकतिकञ्चेव तिकदुकञ्च।  
तिकतिकञ्चेव दुकदुकञ्च,  
छ **पच्चनीयहि** नया सुगम्भीरा”ति॥ —

वृत्ता छ नया वेदितब्बा। पच्चयवसेन पनेत्थापि एकेकस्मिं पच्चयानुलोमादीनं चतुन्नं चतुन्नं नयानं वसेन चतुवीसतिनयपटिमण्डितमिदं धम्मपच्चनीयपट्टानन्ति वेदितब्बन्ति अयं **पच्चनीयपट्टाननयो**।

अनुलोमपच्चनीयपट्टाने पन “कुसलं धम्मं पटिच्च नकुसलो धम्मो उप्पज्जति हेतुपच्चया। कुसले खन्धे पटिच्च चित्तसमुद्धानं रूप”न्तिआदिना

**तिकपट्टाने**, “हेतुं धम्मं पटिच्च नहेतु धम्मो उप्पज्जति हेतुपच्चया”तिआदिना **दुकपट्टाने** च, “हेतुं कुसलं धम्मं पटिच्च नहेतु नकुसलो धम्मो उप्पज्जती”तिआदिना **दुकतिकपट्टाने** च, “कुसलं हेतुं धम्मं पटिच्च नकुसलो नहेतु धम्मो उप्पज्जती”तिआदिना **तिकदुकपट्टाने** च, “कुसलं सुखाय वेदनाय सम्पयुत्तं धम्मं पटिच्च नकुसलो नसुखाय वेदनाय सम्पयुत्तो धम्मो उप्पज्जती”तिआदिना **तिकतिकपट्टाने** च, “हेतुं सहेतुकं धम्मं पटिच्च नहेतु नसहेतुको धम्मो उप्पज्जती”तिआदिना **दुकदुकपट्टाने** च हेट्ठा वुत्तनयेन सब्बेन पकारेन पाळिनयो वेदितब्बो । इदं कुसलादीनं धम्मानं पच्चयत्तं अण्णटिक्खिपित्वा पच्चयुप्पन्नानं कुसलादिभावपटिक्खेपवसेन पवत्तत्ता धम्मानुलोमपच्चनीयपट्टानं नाम जातं । तत्थ हि **कुसलं धम्मं पटिच्चाति** कुसलस्स पच्चयभावविधानं । **नकुसलो धम्मो उप्पज्जतीति** कुसलस्स पच्चयुप्पन्नभावनिवारणं, तस्मा “कुसले खन्धे पटिच्च चित्तसमुद्धानं रूपं”न्तिआदिना विस्सज्जनं वुत्तन्ति वेदितब्बन्ति एवमेत्थ अनुलोमपच्चनीयपट्टाने —

“तिकञ्च पट्टानवरं दुकुत्तमं,  
दुकतिकञ्चेव तिकदुकञ्च ।  
तिकतिकञ्चेव दुकदुकञ्च,  
छ **अनुलोमपच्चनीयमिहि** नया सुगम्भीरा”ति ॥ —

वुत्ता छ नया वेदितब्बा । पच्चयवसेन पनेत्थापि एकेकस्मिं पच्चयानुलोमादीनं चतुन्नं चतुन्नं नयानं वसेन चतुवीसतिनयपटिमण्डितमिदं धम्मानुलोमपच्चनीयपट्टानन्ति वेदितब्बन्ति अयं **अनुलोमपच्चनीयपट्टाननयो** ।

पच्चनीयानुलोमपट्टाने “नकुसलं धम्मं पटिच्च अकुसलो धम्मो...पे०... नकुसलं धम्मं पटिच्च अब्बाकतो धम्मो उप्पज्जति हेतुपच्चया”तिआदिना **तिकपट्टाने**, “नहेतुं धम्मं पटिच्च हेतु धम्मो उप्पज्जती”तिआदिना **दुकपट्टाने** च, “नहेतुं नकुसलं धम्मं पटिच्च हेतु अकुसलो धम्मो...पे०... हेतु अब्बाकतो धम्मो उप्पज्जतीति”आदिना **दुकतिकपट्टाने** च, “नकुसलं नहेतुं धम्मं पटिच्च अकुसलो हेतु धम्मो...पे०... अब्बाकतो हेतु धम्मो उप्पज्जती”तिआदिना **तिकदुकपट्टाने** च, “नकुसलं नसुखाय वेदनाय सम्पयुत्तं धम्मं पटिच्च अकुसलो सुखाय वेदनाय सम्पयुत्तो धम्मो...पे०... अब्बाकतो सुखाय वेदनाय सम्पयुत्तो धम्मो उप्पज्जती”तिआदिना **तिकतिकपट्टाने** च, “नहेतुं नसहेतुकं धम्मं पटिच्च हेतु सहेतुको धम्मो उप्पज्जती”तिआदिना **दुकदुकपट्टाने** च, हेट्ठा वुत्तेन पकारेन पाळिनयो वेदितब्बो । इदञ्च कुसलादिधम्मानं पच्चयत्तं पटिक्खिपित्वा तेसं पच्चयुप्पन्नभावअण्णटिक्खेपवसेन पवत्तत्ता धम्मपच्चनीयानुलोमपट्टानं नाम जातं । तत्थ **नकुसलं धम्मन्ति** कुसलस्स पच्चयभावनिवारणं । **अकुसलो धम्मो उप्पज्जतीति** अकुसलस्स उप्पत्तिविधानं । कुसलं पन पटिच्च कुसलस्स उप्पत्तिअभावतो “कुसलो धम्मो उप्पज्जती”ति अवत्वा “अकुसलो धम्मो उप्पज्जती”ति लब्भमानपदवसेन वुत्तं । कुसलं, हि अकुसलं, अब्बाकतं वा सहजातपच्चयं कत्वा उप्पज्जमानो कुसलो नाम नत्थि, तस्मा अकुसलस्स च अब्बाकतस्स च वसेन देसना कता । एवमज्जत्थ । एवमेत्थ धम्मपच्चनीयानुलोमपट्टाने —

“तिकञ्च पट्टानवरं दुकुत्तमं,  
दुकतिकञ्चेव तिकदुकञ्च ।  
तिकतिकञ्चेव दुकदुकञ्च,  
छ **पच्चनीयानुलोममिहि** नया सुगम्भीरा”ति ॥ —

वुत्ता छ नया वेदितब्बा । पच्चयवसेन पनेत्थापि तिकपट्टानादीसु एकेकस्मिं पच्चयानुलोमादीनं चतुन्नं चतुन्नं नयानं वसेन एकेन परियायेन चतुवीसतिनयपटिमण्डितमिदं धम्मपच्चनीयानुलोमपट्टानन्ति वेदितब्बन्ति अयं **पच्चनीयानुलोमपट्टाननयो** ।

एवमिदं भगवता अनुलोमपट्टानादीसु चतुसु एकेकस्मिं पट्टाने तिकदुकादीनञ्जेव छन्नं छन्नं नयानं वसेन चतुवीसतिनयपटिमण्डितं समन्तपट्टानमहापकरणं देसितं । पच्चयवसेन पनेत्तेसु चतुवीसतिया पट्टानेसु एकेकस्मिं पच्चयानुलोमादीनं चतुन्नं चतुन्नं नयानं वसेनेतं छन्नवुत्तिनयपटिमण्डितं होति, धम्मवसेनेव चेतं पकरणं चतुवीसतिसमन्तपट्टानं वुत्तन्ति अयमेत्थ विभङ्गनयो ।

मोहविच्छेदनिया अभिधम्ममातिकत्थवण्णनाय

पट्टानमातिकत्थवण्णना निड्ढिता ।

**निगमनकथा**

एत्तावता च —

१. मातिकायाभिधम्मस्स, आरद्धा अत्थवण्णना ।

मोहविच्छेदनी नाम, या सा निडुमुपागता ॥

२. निडुं यथायं सम्पत्ता, लज्जीहि अभिपत्थिता ।  
सब्बे निडुं तथा सन्ता, समेन्तु सुमनोरथा ॥
३. यो गम्भीरो ससादीनं, समुदोव भयावहो ।  
कालेस्मिं धीमतञ्चापि, अपि गन्थावलोकने ॥
४. पठमन्तरधानस्स, अभिधम्मस्स तस्स यं ।  
सिलालेखा निधीनंव, धम्मत्थानं पकासिका ॥
५. नावा विय समुदस्स, सुखोतरणपद्धति ।  
पाळिअट्टकथा चेसा, परिसुद्धा अनाकुला ॥
६. नयतोपि अविक्किण्णा, असंकिण्णा निकायतो ।  
यतो सक्कच्च सोतब्बा, सद्धम्मट्ठितिया सता ॥
७. सद्धम्मट्ठितिकामेन, अनत्तुक्कंसनादितो ।  
मयापि वण्णयन्तेन, रचिता सुद्धचेतसा ।  
तेत्तिसभाणवाराय, परिमाणेन तन्तिया ॥
८. मातिकावण्णना या सा, याव निडुं यथाबलं ।  
सब्बत्थसङ्गहा एसा, अनाकुलपदक्कमा ॥
९. यं पत्तं कुसलं तेन, पत्त्वा सम्बोधिमुत्तमं ।  
निडुं पापेय्यमखिले, पाणिनो हितचेतसा ॥
१०. नानाजनाधिरमणीयतरस्स,  
**चोळरट्टस्स** भारमधिवाहकुलन्धरस्स ।  
कावेरिपूतसलिलेन हितालयस्स,  
राजाधिराजवरवंससुणीणितस्स ॥
११. मज्झमि चोळककलङ्कनिभेन मगं,  
पूरं विसालविभवेहि महाकुलेहि ।  
पाकारचक्कपरिखाहि च गोपुरेहि,  
युत्तं जनाकुलसुसज्जितराजमगं ॥
१२. सब्बूपभोगपरिभोगधनेहि नाना-  
वण्णेहि पुण्णविविधापणिकेहि सोभं ।  
चोळाधिनागपुरनन्दननाथभूतं,  
ये तत्थ सोगतविहारवराभिरामा ॥
१३. तेसं मुखे जनमनोहरसत्थुबिम्ब-  
सम्भाविते महति सज्जनमाननीये ।  
विज्जालयेहि उदयाचलसन्निभेहि,  
केलासकूटसिखरोपमचेतियेहि ॥
१४. पासादहम्मियवरेहि च मण्डपेहि,



जम्बुम्बतालपनसादितरावलीहि ।  
नन्दोपनन्दभुजगस्स वरस्स भोग-  
चक्कावलीसमसुधाकतगोपुरेहि ॥

१५. युत्ते विसालसिकतासितमाळकेहि,  
युत्ते सुसीलयतिसङ्गनिसैवितम्हि ।  
कल्याणकम्मनिरतेहि हटूपहारे,  
नागज्जुनव्हयविहारवरे वसन्तो ॥

१६. नामेन यो धुतधरगसमाननामो,  
चन्दोव पाकटनभोदितवीतपञ्जो ।  
सत्थन्तरेसु निपुणो पिटकत्तये च,  
वादीभयूथविपिने मिगराजलीलो ॥

१७. यो सागरोव न विलङ्घति सीलवेल-  
मप्पिच्छतादिगुणसारविभूसितत्तो ।  
जोतेति सासनमलं निखिलं जहन्तो,  
सक्कच्च धम्मविनयं परिदीपयन्तो ॥

१८. तेनाभिधम्मपिटकणवविष्पकिण्ण-  
सारत्थरत्ननिकरेव समुद्धरित्वा ।  
सम्मापजानगळलङ्करणाय मोह-  
विच्छेदनी विरचिता रतनावली या ॥

१९. सायं पभासतु सुकित्तिविराजमाना,  
धम्मेसु मोहतिमिरं विनिहच्च सम्मा ।  
आभातु ताव जिनसासनजोति याव,  
वत्तिस्सतिस्स जनताहितमावहन्ती ॥

इति चोळरट्टे महाकस्सपत्थेरेन विरचिता

मोहविच्छेदनी नाम

अभिधम्ममातिकथवण्णना निट्ठिता ।